

VENDIM
Nr. 651, datë 10.11.2017

PËR DISPOZITAT ZBATUESE TË LIGJIT NR. 102/2014, “KODI DOGANOR I REPUBLIKËS SË SHQIPËRISË”¹

(Ndryshuar me VKM nr. 557, datë 31.7.2019; nr. 626, datë 18.9.2019; nr. 142, datë 13.2.2020; nr. 872, datë 30.12.2024)

(i përditësuar)

Në mbështetje të nenit 100 të Kushtetutës dhe të neneve 9, 10, 18, 19, 24, 26, 29, 35, 39 deri 42, 47, 51, 58, 62, 64, 71, 83, 94, 98, 100, 108, 115, 118, 119, pika 7, 123, 129, 133, 141, 145, 148, 149 deri 152, 153, pikat 1, 2 e 3, 154, 160 deri 169, 174 deri 177, 181, 184, 188, 190, 193, 196, 200, 202, 206, 209, 212, 226, 238, 240, 245, 248, 286, 287 dhe 288, të ligjit nr.102/2014, “Kodi Doganor i Republikës së Shqipërisë”, të ndryshuar, me propozimin e ministrit të Financave dhe Ekonomisë, Këshilli i Ministrave

VENDOSI:

TITULLI I DISPOZITA TË PËRGJITHSHME

KREU 1

Fusha e legjislacionit doganor, misioni i doganave dhe përkufizimet

Neni 1

Përkufizime

(Shtuar pika 67 me vendimin nr. 557, datë 31.7.2019; ndryshuar pikat 21 dhe 27, shtuar pikat 68-72 me VKM nr. 872, datë 30.12.2024)

Për qëllime të këtij vendimi, termit e më poshtëm kanë këto kuptime:

1. **“Masa të politikës bujqësore”**, dispozitat që lidhen me aktivitete të importit e të eksportit për produktet e përmendura në pikat 1, 2 e 3, të aneksit 71-02, të shtojcës A, bashkëlidhur këtij vendimi dhe pjesë përbërëse e tij;
2. **“Carnet ATA”**, një dokument doganor ndërkombëtar për lejim të përkohshëm, i lëshuar në përputhje me Konventën ATA ose Konventën e Stambollit;
3. **“Konventa ATA”**, konventa doganore për Carnet ATA, për lejimin e përkohshëm të mallrave, e nënshkruar në Bruksel, më 6 dhjetor 1961;
4. **“Konventa e Stambollit”**, konventa për lejimin e përkohshëm, e nënshkruar në Stamboll, më 26 qershor 1990;
5. **“Konventa TIR”**, Konventa Doganore mbi Transportin Ndërkombëtar të Mallrave nën mbulimin e Carnet TIR, bërë në Gjenevë, më 14 nëntor 1975.
6. **“Operacion TIR”**, lëvizja e mallrave brenda territorit doganor të Republikës së Shqipërisë,

¹ Ky vendim përaftron pjesërisht:

- Rregulloren e Komisionit nr. 2015/2446, të 28 korrikut 2015, për sa u përket rregullave të detajuara në lidhje me dispozitë të caktuara të Kodit Doganor të Bashkimit Evropian nr. 952/2013, Celex nr. 32015R2446; Fletorja Zyrtare e Bashkimit Evropian, seria L, nr. 343, datë 29.12.2015. (OJ L 343, 29.12.2015, p. 1–557)

- Rregulloren Zbatuese nr. 2015/2447 të Komisionit, e datës 24 nëntor 2015, që përcakton rregulla të hollësishme për zbatimin e disa dispozitave të Rregullores (BE) Nr. 952/2013 të Parlamentit Evropian dhe Këshillit që ka miratuar Kodin Doganor të Bashkimit Evropian nr. 952/2013. Celex nr. 32015R2447. Fletorja Zyrtare e Bashkimit

Evropian, seria L, nr. 343, datë 29.12.2015. (OJ L 343, 29.12.2015, p. 558–893)

- Rregulloren e Deleguar të Komisionit nr. 341/2015, që plotëson rregulloren 952/2013 lidhur me rregullat transitorie për dispozitë të caktuara të Kodit Doganor të Bashkimit, ku sistemet elektronike përkatëse nuk janë ende operacionale dhe për amendimin e Rregullores 2446/2015. Fletorja Zyrtare e Bashkimit Evropian, (OJ L 69, 15.3.2016, p. 1–313)

në përputhje me Konventën TIR;

7. **“MRN” (Numri kryesor i lëvizjes)**, numri i regjistrimit, i caktuar nga autoritetet doganore kompetente në deklaratat dhe njoftimet e referuara në pikat 9 e 14, të nenit 6, të Kodit, në operacionet e TIR ose për të provuar statusin doganor të mallrave shqiptare;

8. **“Dokument i vetëm transporti”**, në kushtet e statusit doganor, një dokument transporti i lëshuar në Republikën e Shqipërisë, që mbulon transportimin e mallrave nga pika e nisjes, në territorin doganor të Republikës së Shqipërisë, deri në pikën e destinacionit në këtë territor, nën përgjegjësinë e transportuesit që lëshon dokumentin;

9. **“Konventa për transitin e përbashkët”**, konventa për një procedurë transiti të përbashkët;

10. **“Vend transiti i përbashkët”**, çdo vend që është palë kontraktuese e konventës për procedurën e transimit të përbashkët;

11. **“Vend tjetër”**, një vend ose territor jashtë territorit doganor të Republikës së Shqipërisë;

12. **“Carnet CPD”**, një dokument doganor ndërkombëtar, që përdoret për lejimin e përkohshëm të mjeteve të transportit, i lëshuar në përputhje me Konventën e Stambollit;

13. **“Kodi”**, ligji nr. 102/2014, “Kodi Doganor i Republikës së Shqipërisë”, i ndryshuar;

14. **“Aeroport i Republikës së Shqipërisë”**, çdo aeroport i vendosur në territorin doganor të Republikës së Shqipërisë;

15. **“Aeroport ndërkombëtar i Republikës së Shqipërisë”**, çdo aeroport i Republikës së Shqipërisë, i autorizuar nga autoriteti kompetent për trafik ajror me vendet jashtë territorit doganor të Republikës së Shqipërisë;

16. **“Fluturim brenda Republikës së Shqipërisë”**, fluturimi pa asnjë ndalesë i një avioni ndërmjet dy aeroporteve të Republikës së Shqipërisë, i cili nuk niset apo përfundon në një aeroport jashtë Republikës së Shqipërisë;

17. **“Avionë biznesi apo turistikë”**, avionë privatë, të destinuar për udhëtime, itinerari i të cilëve përcaktohet nga përdoruesi;

18. **“Port i Republikës së Shqipërisë”**, çdo port detar, që ndodhet në territorin doganor të Republikës së Shqipërisë;

19. **“Zyrë doganore e nisjes”**, zyra doganore ku pranohen deklaratat doganore që i vendosin mallrat nën regjimin e transimit;

20. **“Zyrë doganore e destinacionit”**, zyra doganore ku mallrat e vendosura nën regjimin e transimit paraqiten për të mbyllur regjimin;

21. **“Zyra doganore e hyrjes së parë”** është zyra doganore, e cila është kompetente për mbikëqyrjen doganore në vendin ku mbërrin ose, sipas rastit, pritet të mbërrijë mjeti i transportit që transporton mallrat, në territorin doganor të Republikës së Shqipërisë nga një territor jashtë këtij territori;

22. **“Zyrë doganore e eksportit”**, zyra doganore ku depozitohet deklarata e eksportit ose deklarata e rieksporit për mallrat që dalin jashtë territorit doganor të Republikës së Shqipërisë;

23. **“Zyrë doganore e vendosjes nën regjim”**, zyra doganore e treguar në autorizim për një regjim të posaçëm, siç referohet në pikën 1, të nenit 192, të Kodit, e autorizuar për lëshimin e mallrave për një regjim të posaçëm;

24. **“Zyrë doganore e paraqitjes”**, zyra doganore kompetente për vendin ku janë paraqitur mallrat;

25. **“Zyra doganore e transimit”** nënkupton:

a) zyrën doganore kompetente të daljes nga territori doganor i Republikës së Shqipërisë, kur mallrat dalin nga ky territor në vazhdim të një operacioni transiti nëpërmjet kufirit me një territor jashtë territorit doganor të Republikës së Shqipërisë, i ndryshëm nga një vendi i transimit të përbashkët;

b) zyrën doganore kompetente të hyrjes në territorin doganor të Republikës së Shqipërisë, kur mallrat kalojnë nga një territor jashtë territorit doganor të Republikës së Shqipërisë, në vazhdim të

një operacioni transiti.

26. **“Numri RIOE” (numri RIOE (NUIS/NIPT))**, një numër unik i regjistrimit dhe identifikimit të operatorëve ekonomikë në territorin doganor të Republikës së Shqipërisë, i caktuar nga autoriteti kompetent për një operator ekonomik ose për një person tjetër, në mënyrë që ta regjistrojë atë edhe për qëllime doganore;

27. **“Eksportues”** është:

a) një individ privat, i cili nxjerr mallra jashtë territorit doganor të Republikës së Shqipërisë, kur këto mallra mbahen në bagazhin personal të individit privat;

b) në raste të tjera nga ato të përmendura në shkronjën “a”:

i. një person i vendosur në territorin doganor të Republikës së Shqipërisë, i cili ka kompetencat për të caktuar dhe ka caktuar që mallrat të nxirren jashtë territorit doganor;

ii. në raste të tjera nga ato të përmendura në shkronjën “i”, “eksportues” është çdo person i vendosur në territorin doganor të Republikës së Shqipërisë, i cili është palë në kontratën, sipas së cilës nxirren mallrat nga ai territor doganor;

28. **“Parime të përgjithshme kontabiliteti”**, parimet, të cilat janë të njohura sipas legjislacionit në fuqi;

29. **“Person (individ)”**, personat fizikë natyrorë, të ndryshëm nga personat e tatueshëm që veprojnë si të tillë, siç përcaktohet nga legjislacioni përkatës në fuqi;

30. **“Udhëtar”**, çdo person (individ), i cili:

a) hyn përkohësisht në territorin doganor të Republikës së Shqipërisë ku, normalisht, nuk është rezident;

b) rikthehet në territorin doganor të Republikës së Shqipërisë, ku ai është normalisht rezident, pasi ka qenë përkohësisht jashtë këtij territori;

c) largohet përkohësisht nga territori doganor i Republikës së Shqipërisë, ku ai është normalisht rezident;

ç) largohet nga territori doganor i Republikës së Shqipërisë pas një qëndrimi të përkohshëm, pa qenë normalisht rezident atje.

31. **“Bagazh”**, të gjitha mallrat që transportohen nga çfarëdo lloj mjeti, të lidhura me udhëtimin e ndonjë personi (individ);

32. **“Bagazhi i dorës/kabinës”**, në rastin e udhëtimit në rrugë ajrore, bagazhi që personi (individ) merr me vete brenda dhe jashtë kabinës së avionit;

33. **“Bagazhi i regjistruar/hambarit”**, në rastin e udhëtimit në rrugë ajrore, bagazhi që është kontrolluar në aeroportin e nisjes dhe nuk është në dispozicion të personit (individit) gjatë fluturimit dhe as gjatë çdo ndalese;

34. **“Mallra të natyrës jotregtare”** nënkuptojnë:

a) mallrat që ndodhen në dërgesat e dërguara nga një person (individ) te një tjetër, ku dërgesa të tilla:

i. janë të një natyre rastësore;

ii. përmbajnë mallra ekskluzivisht për përdorim personal të marrësit ose të familjes së tij, të cilat, për nga natyra ose sasia nuk paraqesin interes tregtar;

iii. i janë dërguar marrësit nga dërguesi pa asnjë lloj pagese.

b) mallrat e përfshira në bagazhet personale të udhëtarëve, kur:

i. janë të një natyre rastësore;

ii. përbëhen, ekskluzivisht, nga mallra për përdorim personal të udhëtarëve apo familjeve të tyre ose nga mallra të destinuara si dhurata, natyra dhe sasia e të cilave nuk duhet të jetë e tillë që të mund të tregojë se ato janë duke u importuar apo eksportuar për qëllime tregtare.

35. **“Mallra në dërgesë postare”**, mallrat, përveç artikujve të korrespondencës, të përfshira në një pako ose paketë postare, të përcjellë nën përgjegjësinë ose nëpërmjet një operatori postar, në

përputhje me dispozitat e Konventës së Bashkimit Universal Postar, miratuar më 10 korrik 1984, nën kujdesin e Organizatës së Kombeve të Bashkuara;

36. **“Operator postar”**, një operator i vendosur në Republikën e Shqipërisë, që ofron shërbime ndërkombëtare të rregulluara nga Konventa Universale Postare;

37. **“Artikuj korrespondence”**, letrat, kartolinat, letrat me shkrim për të verbrit, si dhe materiale të shtypura/printuara, që nuk i nënshtrohen detyrimit të importit ose eksportit;

38. **“Afati për mbyllje”**, periudha në të cilën mallrat e vendosura nën një regjim të posaçëm, përveç transitit, ose produktet e përpunuara duhet të vendosen nën një regjim doganor pasues, të shkatërrohen, të nxirren jashtë territorit doganor të Republikës së Shqipërisë apo të caktohen për përdorim të veçantë përfundimtar (*end-use*). Në rastin e përpunimit pasiv, afati për mbyllje nënkupton periudhën brenda së cilës mallrat e eksportuara përkohësisht mund të riimportohen në territorin doganor të Republikës së Shqipërisë në formën e produkteve të përpunuara dhe të çlirohen për qarkullim të lirë, me qëllim që të përfitojnë nga përjashtimi i plotë ose i pjesshëm nga detyrimet e importit;

39. **“Përpunim pasiv IM/EX”**, importi paraprak i produkteve të përpunuara e të përfutuara nga mallrat ekuivalente nën përpunimin pasiv përpara eksportit të mallrave që ato zëvendësojnë, referuar shkronjës “ç”, të pikës 2, të nenit 201, të Kodit;

40. **“Përpunim pasiv EX/IM”**, eksporti i mallrave shqiptare nën përpunimin pasiv, para importit të produkteve të përpunuara;

41. **“Përpunim aktiv EX/IM”**, eksporti paraprak i produkteve të përpunuara e të përfutuara nga mallrat ekuivalente nën përpunimin aktiv para importit të mallrave që ato zëvendësojnë, referuar shkronjës “c”, të pikës 2, të nenit 201, të Kodit;

42. **“Përpunim aktiv IM/EX”**, importi i mallrave joshqiptare nën përpunimin aktiv para eksportit të produkteve të përpunuara;

43. **“Produkte kryesore të përpunuara”**, produkte të përpunuara, për të cilat është dhënë autorizim për përpunim aktiv;

44. **“Aktivitete marketingu”**, në kontekstin e vlerësimit doganor, të gjitha aktivitetet që kanë të bëjnë me reklamat, marketingun dhe promovimin e shitjes së mallrave në fjalë, dhe të gjitha aktivitetet që kanë të bëjnë me garancitë e dhëna në lidhje me to;

45. **“Produkte dytësore të përpunuara”**, produkte të përpunuara, të cilat përbëjnë një nënprodukt që duhet të rezultojë domosdoshmërisht nga operacioni i përpunimit, ndryshe nga produktet kryesore të përpunuara;

46. **“Magazinë doganore publike e tipit I”**, një magazinë doganore publike, ku përgjegjësitë e referuara në pikën 1, të nenit 215, të Kodit, i përkasin mbajtësit të autorizimit dhe mbajtësit të regjimit;

47. **“Magazinë doganore publike e tipit II”**, një magazinë doganore publike, ku përgjegjësitë e referuara në pikën 2, të nenit 215, të Kodit, i përkasin mbajtësit të regjimit

48. **“Magazinë doganore publike e tipit III”**, një magazinë doganore në të cilën veprojnë autoritetet doganore;

49. **“Zyrë doganore e mbikëqyrjes”** nënkupton:

a) në rastin e magazinimit të përkohshëm, siç referohet në titullin IV, të Kodit, ose në rastin e regjimeve të posaçme, të ndryshme nga ai i transitit, siç referohet në titullin VII, të Kodit, zyrën doganore që përcaktohet në autorizim për të mbikëqyrur magazinimin e përkohshëm të mallrave ose regjimin e posaçëm në fjalë;

b) në rastin e deklaratës doganore të thjeshtuar, siç referohet në nenin 152, të Kodit, të zhdoganimit të centralizuar, siç referohet në nenin 163, të Kodit, ose të hyrjes në regjistrimet e deklaruesit, siç referohet në nenin 165, të Kodit, zyrën doganore që përcaktohet në autorizim për të

mbikëqyrur vendosjen e mallrave nën regjimin doganor në fjalë.

50. **“Transbord”**, ngarkimi ose shkarkimi i produkteve dhe mallrave nga bordi i një mjeti transporti në një mjet tjetër transporti;

51. **“Instalime fikse transporti”**, mjete teknike që përdoren për transport të vazhdueshëm të mallrave të tilla si, energjia elektrike, gazi dhe nafta;

52. **“Mbeturina dhe mbetje”**, nënkupton:

a) mallrat ose produktet, të cilat janë klasifikuar si mbeturina dhe mbetje/skrap, në përputhje me Nomenklaturën e Kombinuar të Mallrave;

b) në rastet e përpunimit aktiv ose të përdorimit të veçantë përfundimtar (*end-use*), mallrat ose produktet që dalin nga një operacion përpunimi, të cilat nuk kanë ose kanë një vlerë të ulët ekonomike dhe nuk mund të përdoren pa përpunim të mëtejshëm.

53. **“Paletë”**, një pajisje në shtratin e së cilës mund të grumbullohet një sasi mallrash për të formuar një njësi ngarkese për qëllime transporti, trajtimi ose grumbullimi me ndihmën e pajisjeve mekanike. Kjo pajisje është e përbërë nga dy shtretër të ndarë, që lidhen me traversa, ose nga një shtrat i vetëm, që mbështetet mbi këmbët. Lartësia e saj e përgjithshme është reduktuar në minimum, në përputhje me trajtimin me vinça pirun ose kamiona për paleta. Ajo mund të ketë ose jo një superstrukturë;

54. **“Anije-fabrikë shqiptare”**, një anije e regjistruar në Republikën e Shqipërisë, që mban flamurin shqiptar dhe që nuk kap produkte peshkimi, por që përpunon produkte të tilla në bord;

55. **“Anije/barka peshkimi shqiptare”**, një anije/barkë e regjistruar në Republikën e Shqipërisë, që mban flamurin shqiptar, që kap produkte peshkimi detar dhe që, sipas rastit, i përpunon ato në bord;

56. **“Shërbim i rregullt transporti detar”**, një shërbim që transporton mallra në anije/barka që lundrojnë vetëm ndërmjet porteve të Republikës së Shqipërisë dhe që nuk shkojnë, vijnë apo ndalojnë në ndonjë pikë jashtë territorit doganor të Republikës së Shqipërisë apo në ndonjë pikë të një zone të lirë të një porti të Republikës së Shqipërisë;

57. **“Mallra identike”**, në kontekstin e vlerësimit doganor, janë mallrat e prodhuara në të njëjtin vend, të cilat janë të njëjta në të gjitha pikëpamjet, duke përfshirë karakteristikat fizike, cilësinë dhe reputacionin. Ndryshime të vogla në pamje nuk përbëjnë shkak për t'u konsideruar joidentike, mallra, të cilat në gjithçka tjetër përputhen me përkufizimin e të konsideruarit si identike;

58. **“Mallra të ngjashme”**, në kontekstin e vlerësimit doganor, janë mallrat e prodhuara në të njëjtin vend, të cilat, edhe pse nuk janë njësoj në çdo pikëpamje, kanë karakteristika dhe materiale përbërëse të ngjashme, që u mundësojnë atyre të kryejnë të njëjtat funksione dhe të jenë të shkëmbyeshme nga ana tregtare; cilësia e mallrave, reputacioni i tyre dhe ekzistenca e një marke tregtare janë ndër faktorët që merren parasysh në përcaktimin nëse mallrat janë të ngjashme;

59. **“Aplikues”**, një person, i cili aplikon pranë autoriteteve doganore për një vendim;

60. **“Mbajtës i vendimit”**, një person ndaj të cilit aplikohen efektet ligjore të një vendimi;

61. **“Aftësi paguese”**, një gjendje e mirë financiare, e cila është e mjaftueshme për të plotësuar detyrimet e aplikuesit për sa i përket karakteristikave të llojit të aktivitetit të operatorit të interesuar;

62. **“OEA”**, një operator ekonomik i autorizuar sipas përcaktimeve të nenit 40, të Kodit;

63. **“OEA”**, një operator ekonomik i autorizuar për thjeshtësime doganore, sipas përcaktimeve të shkronjës “a”, të pikës 2, të nenit 40, të Kodit;

64. **“OEAS”**, një operator ekonomik i autorizuar për sigurinë dhe mbrojtjen, sipas përcaktimeve të shkronjës “b”, të pikës 2, të nenit 40, të Kodit;

65. **“Autorizim OEA”**, certifikata që lëshohet në formatin e një Certifikate OEA për Thjeshtësime Doganore;

66. **“Autorizim OEAS”**, certifikata që lëshohet në formatin e një Certifikate OEA për sigurinë dhe mbrojtjen.

67. **“Zonë e lirë doganore”**, është një pjesë e territorit doganor të Republikës së Shqipërisë që i

nënshtrohet legjislacionit doganor, në të cilën lejohet të kryhet çdo aktivitet industrial, tregtar ose shërbimi.

68. **“Dërgesë e shpejtë”** është një zë i veçantë, i përcjellë nga ose nën përgjegjësinë e një operatori të transportit të shpejtë.

69. **“Operator i transportit të shpejtë”** është një operator, i cili ofron shërbim të integruar të mbledhjes, transportit, zhdoganimit dhe dërgimit të mallrave në mënyrë të shpejtë dhe brenda afateve të përcaktuara, duke garantuar në të njëjtën kohë gjurmimin e vendndodhjes dhe kontrollin e këtyre mallrave gjatë gjithë ofrimit të shërbimit.

70. **“Mallra që do të transportohen ose përdoren në kuadër të veprimtarive ushtarake”** janë mallrat që do të zhvendosen ose përdoren:

a) në veprimtari të organizuara ose nën kontrollin e autoritetit përkatës ushtarak të Republikës së Shqipërisë apo të një shteti të tretë, me të cilin Republika e Shqipërisë ka nënshkruar një marrëveshje për të kryer veprimtari ushtarake brenda territorit doganor të Republikës së Shqipërisë; ose

b) në kuadër të çdo veprimtarie ushtarake të ndërmarrë:

- nën Traktatin e Atlantikut Verior, të nënshkruar në Uashington D.C., më 4 prill 1949.

71. **“Formulari 302 i NATO-s”** është një dokument për qëllime doganore, siç parashikohet në regjimet përkatëse për zbatimin e marrëveshjes ndërmjet palëve të Traktatit të Atlantikut Verior, në lidhje me statusin e forcave të tyre, të nënshkruar në Londër, më 19 qershor 1951.

72. **“Operator postar i vendit të tretë”** nënkupton një operator, të krijuar dhe të caktuar nga një vend i tretë për të ofruar shërbimet ndërkombëtare, të rregulluara nga Konventa Universale Postare.

KREU 2

Të drejtat dhe detyrimet e personave në lidhje me legjislacionin doganor

Seksioni 1

Dispozitat mbi informacionin

Nënsesioni 1

Kërkesat e përbashkëta të të dhënave për shkëmbimin dhe ruajtjen e të dhënave

Neni 2

Kërkesat e përbashkëta të të dhënave

(Pika 2, e nenit 17, të Kodit)

1. Shkëmbimi dhe ruajtja e informacionit të nevojshëm për aplikimet dhe vendimet do t'i nënshtrohet kërkesave të përbashkëta të të dhënave të përcaktuara në aneksin A, të shtojcës A, bashkëlidhur këtij vendimi dhe pjesë përbërëse e tij.

2. Shkëmbimi dhe ruajtja e informacionit të kërkuar për deklaratat, njoftimet dhe prova e statusit doganor u nënshtrohen kërkesave të përbashkëta të të dhënave të përcaktuara në aneksin B, të shtojcës A, bashkëlidhur këtij vendimi dhe pjesë përbërëse e tij.

3. Duke anashkaluar pikën 1, të këtij neni, deri në implementimin e sistemit të informatizuar të informacionit tarifor të detyrueshëm (IDT) dhe të sistemit të mbikëqyrjes 2, sipas planit të punës të ministrit përgjegjës për financat, kolona 1, e aneksit A, të shtojcës A, bashkëlidhur këtij vendimi dhe pjesë përbërëse e tij nuk do të zbatohet, por do të zbatohen të dhënat e përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij.

4. Duke anashkaluar pikën 1, të këtij neni, deri në implementimin e sistemit të informatizuar OEA, sipas planit të punës të ministrit përgjegjës për financat, kolona 2, e aneksit A, të shtojcës A, bashkëlidhur këtij vendimi dhe pjesë përbërëse e tij nuk do të zbatohet, por do të zbatohen të dhënat e përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij.

5. Duke anashkaluar pikën 2, të këtij neni, deri në implementimin e sistemeve përkatëse IT të informatizuara, sipas planit të punës të ministrit përgjegjës për financat, të dhënat e përgjithshme, të përcaktuara në aneksin B, të shtojcës A, bashkëlidhur këtij vendimi dhe pjesë përbërëse e tij nuk do të zbatohen.

6. Për sistemet IT të referuara në pikën 2, deri në implementimin e sistemeve përkatëse IT të informatizuara, sipas planit të punës të ministrit përgjegjës për financat, shkëmbimi dhe ruajtja e informacionit të kërkuar për deklaratat, njoftimet dhe prova e statusit doganor do të jenë sipas të dhënave të përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij.

7. Kur të dhënat e kërkuara për shkëmbimin dhe ruajtjen e informacionit për deklaratat, njoftimet dhe provat e statusit doganor nuk janë të përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij, autoriteti doganor duhet të sigurojë që kërkesat për të dhënat përkatëse të jenë të tilla, që të lejojnë aplikimin e dispozitave që rregullojnë këto deklarata, njoftime dhe prova të statusit doganor.

8. Deri në implementimin e sistemeve të informatizuara, sipas planit të punës të ministrit përgjegjës për financat, autoritetet doganore mund të vendosin kërkesa alternative të të dhënave me ato të përcaktuara në aneksin A, të shtojcës A, bashkëlidhur këtij vendimi dhe pjesë përbërëse e tij, të cilat do të zbatohen në lidhje me aplikimet dhe autorizimet:

- a) që lidhen me thjeshtimin për përcaktimin e shumave që janë pjesë e vlerës doganore të mallrave;
- b) që lidhen me garancinë globale;
- c) për shtyrjen e pagesës;
- ç) për përdorimin e ambienteve të magazinimit të përkohshëm, siç referohen në nenin 138, të Kodit;
- d) për shërbime të rregullta të transportit detar;
- dh) për lëshuesin e autorizuar;
- e) për statusin e peshuesit të autorizuar të bananeve;
- ë) për vetëvlerësimin;
- f) për statusin e pritësit të autorizuar për operacionet TIR;
- g) për statusin e dërguesit të autorizuar për transitin;
- gj) për statusin e pritësit të autorizuar për transitin;
- h) për përdorimin e plumbçeve të një lloji të veçantë;
- i) për përdorimin e një deklarate transiti me të dhëna të reduktuara;
- j) për përdorimin e një dokumenti transporti elektronik si deklarate doganore;
- k) për zhdoganimet në ambientet e operatorit ekonomik.

9. Kur autoriteti doganor vendos, në përputhje me pikën 8, që do të zbatohen kërkesat alternative të të dhënave, siguron që këto kërkesa alternative të të dhënave të lejojnë autoritetin doganor të verifikojë që kushtet për dhënien e autorizimit në fjalë janë plotësuar dhe se ato përfshijnë, të paktën, një nga kërkesat e mëposhtme:

- Identifikimin e aplikuesit/mbajtësit të autorizimit (Kërkesa për të dhënat 3/2, “Aplikuesi/mbajtësi i autorizimit ose identifikimi i vendimit”, ose, kur mungon një numër i vlefshëm RIOE i aplikantit, kërkesa për të dhënat 3/1, “Aplikuesi/mbajtësi i autorizimit ose i vendimit”);
- Llojin e aplikimit ose autorizimit (Kërkesa për të dhënat 1/1, “Llojet e kodeve të aplikimit/vendimit”);
- Përdorimin e autorizimit në një ose më shumë zyra doganore (Kërkesa për të dhënat 1/4, “Vlefshmëria gjeografike/territoriale”), kur është e aplikueshme.

10. Deri në implementimin e sistemit të informatizuar të vendimeve sipas Kodit Doganor, autoritetet doganore do të zbatojnë kërkesat e të dhënave për aplikimet dhe autorizimet e anekseve

përkatëse, të shtojcës C, bashkëlidhur këtij vendimi dhe pjesë përbërëse e tij, në vend të kërkesave të të dhënave sipas aneksit A, të shtojcës A, bashkëlidhur këtij vendimi dhe pjesë përbërëse e tij, për procedurat për aplikimet dhe autorizimet për:

- a) përdorimin e deklaratës së thjeshtuar;
- b) zhdoganimin e centralizuar;
- c) hyrje në të dhënat në regjistrimet e deklaruesit;
- ç) përdorimin e përpunimit aktiv;
- d) përdorimin e përpunimit pasiv;
- dh) përdorimin e veçantë përfundimtar (*end-use*);
- e) përdorimin e lejimit të përkohshëm;
- ë) funksionimin e ambienteve për magazinim doganor.

11. Duke anashkaluar pikën 10, deri në implementimin e sistemit të informatizuar të eksportit ose të importit, kur një aplikim për autorizim bazohet në një deklaratë doganore, në përputhje me pikën 1, të nenit 531, deklarata doganore duhet të përmbajë, gjithashtu, të dhënat e mëposhtme:

- a) Kërkesat e përbashkëta të të dhënave për të gjitha regjimet:
 - Natyrën e përpunimit apo të përdorimit të mallrave;
 - Përshkrimet teknike të mallrave dhe/ose produkteve të përpunuara dhe mjetet e identifikimit të tyre;
 - Periudhën e vlerësuar për mbylljen;
 - Zyrën e propozuar për mbylljen (jo për përdorimin përfundimtar *end-use*);
 - Vendin e përpunimit apo përdorimit.
- b) Kërkesat specifike të të dhënave për përpunimin aktiv:
 - Kodet e kushteve ekonomike, të përmendura në anekset përkatëse të shtojcës C, bashkëlidhur këtij vendimi dhe pjesë përbërëse e tij;
 - Normën e vlerësuar të rendimentit ose metodën sipas së cilës kjo normë është përcaktuar; dhe nëse llogaritja e shumës së detyrimit të importit duhet të bëhet në përputhje me pikën 3, të nenit 81, të Kodit (trego “po” ose “jo”).

Nënsëksioni 2

Formatet dhe kodet e kërkesave të përbashkëta për të dhënat, shkëmbimi dhe ruajtja e të dhënave

Neni 3

1. Formatet dhe kodet për kërkesat e përbashkëta për të dhënat

(Pika 2, e nenit 17, të Kodit)

1. Formatet dhe kodet për kërkesat e përbashkëta për të dhënat, të përmendura në pikën 2, të nenit 17, të Kodit, dhe në nenin 2, për shkëmbimin dhe ruajtjen e informacionit të kërkuar për aplikimet dhe vendimet, janë të përcaktuara në aneksin A, të shtojcës B, bashkëlidhur këtij vendimi dhe pjesë përbërëse e tij.

2. Formatet dhe kodet për kërkesat e përbashkëta për të dhënat e përmendura në pikën 2, të nenit 17, të Kodit, dhe në nenin 2, për shkëmbimin dhe ruajtjen e informacionit të kërkuar për deklaratat, njoftimet dhe provat e statusit doganor, janë të përcaktuara në aneksin B, të shtojcës B, bashkëlidhur këtij vendimi dhe pjesë përbërëse e tij.

3. Duke anashkaluar pikën 1, të këtij neni, deri në implementimin e sistemit të informatizuar IDT dhe të sistemit 2, të mbikëqyrjes, nuk do të zbatohen kodet dhe formatet e aneksit A, të shtojcës B, bashkëlidhur këtij vendimi dhe pjesë përbërëse e tij, por kodet dhe formatet e përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij.

4. Duke anashkaluar pikën 1, të këtij neni, formulari i aplikimit për Informacionin Detyrues të Originës (IDO) është formulari i përcaktuar në aneksin 11, të shtojcës C, bashkëlidhur këtij vendimi dhe pjesë përbërëse e tij.

5. Duke anashkaluar pikën 1, të këtij neni, deri në implementimin e sistemit të informatizuar të OEA, nuk do të zbatohen kodet dhe formatet e aneksit A, të shtojcës B, bashkëlidhur këtij vendimi dhe pjesë përbërëse e tij, por kodet dhe formatet e përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij.

6. Duke anashkaluar pikën 2, të këtij neni, deri në implementimin e sistemit të informatizuar përkatës dhe për aq sa këto sisteme nuk janë ende funksionale, formatet dhe kodet e përcaktuara në aneksin B, të shtojcës B, bashkëlidhur këtij vendimi dhe pjesë përbërëse e tij, do të jenë opsionale.

7. Deri në implementimin e sistemit të informatizuar përkatës dhe për aq sa këto sisteme nuk janë ende funksionale, formatet dhe kodet e nevojshme për deklaratat, njoftimet dhe prova e statusit doganor do t'i nënshtrohen kërkesave për të dhënat e përcaktuara në anekset përkatëse të shtojcës C, bashkëlidhur këtij vendimi dhe pjesë përbërëse e tij.

8. Deri në implementimin e sistemit të informatizuar të eksportit/importit, sipas planit të punës të miratuar nga ministri përgjegjës për financat, Drejtoria e Përgjithshme e Doganave duhet të sigurojë që kodet dhe formatet për njoftimin e paraqitjes të lejojnë paraqitjen e mallrave, në përputhje me nenin 130, të Kodit.

9. Deri në implementimin e sistemit të informatizuar të vendimeve doganore, formatet dhe kodet për aplikimet e mëposhtme dhe autorizimet e aneksit A, të shtojcës B, bashkëlidhur këtij vendimi dhe pjesë përbërëse e tij, janë opsionale për aplikimet dhe autorizimet:

- a) që lidhen me thjeshtimin për përcaktimin e shumave që janë pjesë e vlerës doganore të mallrave;
- b) që lidhen me garancinë globale;
- c) për shtyrjen e pagesës;
- ç) për përdorimin e ambienteve të magazinimit të përkohshëm, siç referohen në nenin 138, të Kodit;
- d) për shërbime të rregullta të transportit detar;
- dh) për lëshuesin e autorizuar;
- e) për përdorimin e deklaratës së thjeshtuar;
- ë) për zhdoganimin e centralizuar;
- f) për hyrje në të dhënat në regjistrimet e deklaruesit;
- g) për vetëvlerësimin;
- gj) për statusin e peshuesit të autorizuar të bananeve;
- h) për përdorimin e përpunimit aktiv;
- i) për përdorimin e përpunimit pasiv;
- j) për përdorimin e veçantë përfundimtar (*end-use*);
- k) për përdorimin e lejimit të përkohshëm;
- l) për funksionimin e ambienteve për magazinim doganor; ll) për statusin e pritësit të autorizuar për operacionet TIR; m) për statusin e dërguesit të autorizuar për transitin;
- n) për statusin e pritësit të autorizuar për transitin;
- nj) për përdorimin e plumbçeve të një lloji të veçantë;
- o) për përdorimin e një deklarate transiti me të dhëna të reduktuara;
- p) për përdorimin e një dokumenti transporti elektronik si deklaratë doganore.

Kur administrata doganore heq dorë nga kode dhe formate të caktuara gjatë periudhës transitore, duhet të sigurojë zbatimin e procedurave efektive që i mundësojnë asaj verifikimin e plotësimit të kushteve për dhënien e autorizimit.

Siguria e sistemeve elektronike

(Neni 17, i Kodit)

1. Ndërkohë që zhvillon, mirëmban dhe vë në funksionim sistemet elektronike, të përmendura në nenin 286, të Kodit, administrata doganore duhet të vendosë dhe të mbajë rregulla sigurie të përshtatshme për funksionimin e rregullt, të besueshëm dhe të sigurt të sistemeve të ndryshme. Ajo, gjithashtu, duhet të sigurojë që janë marrë masat për të kontrolluar burimin e të dhënave dhe mbrojtjen e të dhënave kundër rrezikut të aksesit të paautorizuar, humbjes, ndryshimit ose shkatërrimit.

2. Çdo hyrje, modifikim dhe fshirje e të dhënave do të regjistrohet së bashku me informacionin për arsyen dhe kohën e saktë të këtij përpunimi si dhe identifikimin e personit që e ka kryer atë.

3. Administrata doganore informon organin kompetent dhe, kur është e përshtatshme, operatorin ekonomik të interesuar për të gjitha shkeljet aktuale ose të dyshuara të sigurisë së sistemeve elektronike.

4. Nënshkrimi dhe/ose vulosja në rrugë elektronike bëhet sipas legjislacionit në fuqi. Certifikimi sigurohet nga autoriteti kompetent.

Neni 5

Ruajtja e të dhënave

Të gjitha të dhënat e përpunuara në sistemin përkatës elektronik do të ruhen për të paktën 3 vjet, nga fundi i vitit në të cilin këto të dhëna janë përpunuar, përveç nëse përcaktohet ndryshe.

Neni 6

Disponueshmëria e sistemeve elektronike

1. Administrata doganore dhe organi kompetent do të lidhin marrëveshje operationale, që përcaktojnë kërkesat praktike për disponueshmërinë dhe performancën e sistemeve elektronike, si dhe për vazhdimësinë e aktivitetit.

2. Marrëveshjet operationale, të përmendura në pikën 1, duhet, në veçanti, të përcaktojnë kohën e duhur të përgjigjes për shkëmbimin dhe përpunimin e informacionit në sistemet përkatëse elektronike.

3. Sistemet elektronike duhet të garantojnë funksionimin në mënyrë të përhershme. Megjithatë, ky detyrim nuk zbatohet:

a) në raste të veçanta, që lidhen me përdorimin e sistemeve elektronike të përcaktuara në marrëveshjet e përmendura në pikën 1, ose në legjislacionin kombëtar, në mungesë të këtyre marrëveshjeve;

b) në rastet e forcës madhore.

Nënseksioni 3

Regjistrimi i personave pranë autoriteteve doganor

Neni 7

Organi kompetent doganor

(Neni 19, i Kodit)

Drejtoria e Përgjithshme e Doganave është përgjegjëse për regjistrimin e personave dhe publikimin e këtij informacioni në faqen zyrtare të saj.

Neni 8

Sistemi elektronik në lidhje me numrin RIOE (NUIS/NIPT)

(Neni 17, i Kodit)

1. Për shkëmbimin dhe ruajtjen e informacionit lidhur me RIOE (NUIS/NIPT), do të përdoret një sistem elektronik i ngritur për këtë qëllim, sipas nenit 17, të Kodit (sistemi RIOE (NUIS/NIPT). Informacioni bëhet i mundur nëpërmjet këtij sistemi nga autoritetet doganore kompetente, sa herë që jepen numra të rinj RIOE (NUIS/NIPT) ose ka ndryshime në të dhënat ekzistuese lidhur me regjistrimet.

2. Për çdo person jepet vetëm një numër RIOE (NUIS/NIPT).

3. Formati dhe kodet e të dhënave, të ruajtura në sistemin RIOE (NUIS/NIPT), janë të përcaktuara në aneksin 12-01, të shtojcës B, bashkëlidhur këtij vendimi dhe pjesë përbërëse e tij.

4. Duke anashkaluar pikën 1, të këtij neni, deri në implementimin e sistemit të ri të informatizuar qendror

RIOE (NUIS/NIPT), nuk zbatohen formatet dhe kodet e përcaktuara në aneksin 12-01, të shtojcës B, bashkëlidhur këtij vendimi dhe pjesë përbërëse e tij.

Deri në implementimin e sistemit të ri të informatizuar qendror RIOE (NUIS/NIPT), kodet e kërkesave të përbashkëta për të dhënat për regjistrimin e operatorëve ekonomikë dhe personave të tjerë përcaktohen në aneksin 1, të shtojcës C, bashkëlidhur këtij vendimi dhe pjesë përbërëse e tij.

5. DPD, kur mbledh të dhënat e pikës 4, të aneksit 12-01, të shtojcës B, bashkëlidhur këtij vendimi dhe pjesë përbërëse e tij, siguron përdorimin e formateve dhe kodeve të përcaktuara në aneksin 12-01, të shtojcës B, bashkëlidhur këtij vendimi dhe pjesë përbërëse e tij.

Neni 9

Përmbajtja e të dhënave

(Pika 2, e nenit 17, të Kodit)

1. Në kohën e regjistrimit të një personi, autoritetet doganore duhet të mbledhin e të ruajnë të dhënat e parashikuara në aneksin 12-01, të shtojcës A, bashkëlidhur këtij vendimi dhe pjesë përbërëse e tij, në lidhje me atë person. Këto të dhëna përbëjnë të dhënat për regjistrimin e numrit RIOE.

2. Duke anashkaluar pikën 1, deri në implementimin e sistemit të informatizuar RIOE, sipas planit të punës të ministrit përgjegjës për financat, nuk do të zbatohen kërkesat e zakonshme të të dhënave të përcaktuara në aneksin 12-01, të shtojcës A, bashkëlidhur këtij vendimi dhe pjesë përbërëse e tij.

3. Deri në implementimin e sistemit të informatizuar RIOE, autoriteti doganor mbledh dhe ruan të dhënat që do të përbëjnë të dhënat RIOE, siç është përcaktuar në anekset përkatëse të shtojcës C, bashkëlidhur këtij vendimi dhe pjesë përbërëse e tij, si më poshtë vijon:

a) të dhënat e listuara në pikat 1 deri 4, të aneksit përkatës të shtojcës C, bashkëlidhur këtij vendimi dhe pjesë përbërëse e tij;

b) bazuar në sistemin e autoritetit kompetent, të dhënat e listuara në pikat 5 deri 12, të aneksit përkatës të shtojcës C, bashkëlidhur këtij vendimi dhe pjesë përbërëse e tij.

Autoriteti doganor kompetent hedh të dhënat e mbledhura sipas pikës 3, të këtij neni, në një mënyrë të rregullt në sistemin RIOE.

4. Duke anashkaluar pikat 2 e 3, të këtij neni, mbledhja e dhënave të listuara në titullin I, kreu 3, pika 4, e aneksit 12-01, të shtojcës A, bashkëlidhur këtij vendimi dhe pjesë përbërëse e tij, nuk do të jetë detyruese. Në rastet kur autoriteti doganor kompetent mbledh këto të dhëna, ato duhet të hidhen në sistemin RIOE sa më shpejt që të jetë e mundur, pas implementimit të këtij sistemi.

Neni 10

Paraqitja e të dhënave për regjistrimin e numrit RIOE

(Pika 4, e nenit 19, të Kodit)

1. Autoritetet doganore mund t'i lejojnë personat të paraqesin të dhënat e nevojshme për regjistrimin e numrit RIOE me mjete të tjera, përveç teknikave elektronike për përpunimin e të dhënave.

2. Personat e regjistruar tashmë në sistemin doganor duhet të përditësojnë të dhënat e tyre sipas aneksit 12-01, të shtojcës A, bashkëlidhur këtij vendimi dhe pjesë përbërëse e tij, pas hyrjes në fuqi të këtij vendimi.

Përditësimi i të dhënave duhet të bëhet në momentin e parë që personi kryen procedura doganore.

Neni 11

Operatorët ekonomikë, që nuk janë të vendosur në territorin doganor të Republikës së Shqipërisë

(Pika 2, e nenit 19 dhe pika 2, e nenit 27 të Kodit)

(Shtuar shkronja “dh” e pikës 1 me VKM nr. 872, datë 30.12.2024)

1. Një operator ekonomik, që nuk është i vendosur në territorin doganor të Republikës së Shqipërisë, duhet të regjistrohet:

a) para depozitimit të deklarates doganore në territorin doganor të Republikës së Shqipërisë, me përjashtim të deklarates doganore:

i. të bërë në përputhje me nenet 529 deri në 533;

ii. për vendosjen e mallrave nën regjimin e lejimit të përkohshëm ose të një deklarate të rieksporit, për të mbyllur këtë regjim;

iii. të bërë në bazë të një marrëveshjeje ose konventës për procedurën e transitit të përbashkët, nga një operator ekonomik i vendosur në një vend transiti të përbashkët.

b) para depozitimit të një deklarate përmbledhëse të daljes apo hyrjes në territorin doganor të Republikës së Shqipërisë;

c) para depozitimit të një deklarate magazinimi të përkohshëm në territorin doganor të Republikës së Shqipërisë;

ç) kur vepron si një transportues për qëllime transporti përmes detit, rrugëve të brendshme ujore ose ajrore;

d) kur vepron si një transportues, i cili është i lidhur me sistemin doganor, dhe dëshiron të marrë ndonjë prej njoftimeve të parashikuara në legjislacionin doganor në lidhje me depozitimin ose ndryshimin e deklarave përmbledhëse të hyrjes.

dh) para se të kërkojë konfirmimin e provës së statusit doganor të mallrave shqiptare.

2. Pavarësisht nga përcaktimi i nënndarjes “ii”, të shkronjës “a”, të pikës 1, të këtij neni, operatorët ekonomikë, që nuk janë të vendosur në territorin doganor të Republikës së Shqipërisë, do të regjistrohen pranë autoriteteve doganore para paraqitjes së deklarates doganore për vendosjen e mallrave nën regjimin e lejimit të përkohshëm ose të një deklarate të rieksporit për mbylljen e atij regjimi, ku regjistrimi është i nevojshëm për përdorimin e sistemit të menaxhimit të përbashkët të garancisë.

3. Pavarësisht nga përcaktimi i nënndarjes “ii”, të shkronjës “a”, të pikës 1, të këtij neni, operatorët ekonomikë, të vendosur në një vend transiti të përbashkët, do të regjistrohen pranë autoriteteve doganore para paraqitjes së deklarates doganore, në bazë të një marrëveshjeje apo konventës për procedurën e transitit të përbashkët, kur kjo deklarate është depozituar në vend të deklarates përmbledhëse të hyrjes ose është përdorur si një deklarate parasisjeje.

4. Me përjashtim të shkronjës “ç”, të pikës 1, një operator ekonomik, që vepron si transportues

për qëllime transporti përmes detit, rrugëve të brendshme ujore apo ajrore, nuk do të regjistrohet pranë autoriteteve doganore kur i është caktuar një numër identifikimi unik, në kuadër të një programi partneriteti të tregtarëve nga vendet e tjera, i cili njihet nga Republika e Shqipërisë.

5. Në rastet kur regjistrimi është i nevojshëm, në përputhje me këtë nen, ai do të bëhet pranë autoriteteve doganore kompetente për vendin ku operatori ekonomik paraqet një deklaratë apo kërkon marrjen e një vendimi, ose në Drejtorinë e Përgjithshme të Doganave.

Neni 12

Persona të ndryshëm nga operatorët ekonomikë

(Pika 3, e nenit 19, të Kodit)

1. Personat, të ndryshëm nga operatorët ekonomikë, duhet të regjistrohen pranë autoriteteve doganore kur plotësohet njëri nga kushtet e mëposhtme:

- a) Një regjistrim i tillë kërkohej nga legjislacioni në fuqi;
- b) Personi angazhohet në operacione, për të cilat duhet të sigurohet një numër RIOE, në përputhje me anekset A dhe B, të shtojcës A, bashkëlidhur këtij vendimi dhe pjesë përbërëse e tij.

2. Duke anashkaluar pikën 1, kur një person, i ndryshëm nga një operator ekonomik, depoziton një deklaratë doganore të rastësishme dhe autoritetet doganore e konsiderojnë këtë si të justifikuar, atëherë regjistrimi mund të mos kërkohej.

Neni 13

Pavlefshmëria e numrit RIOE apo çregjistrimi

(Pika 4, e nenit 19, të Kodit)

1. Autoritetet doganore e bëjnë të pavlefshëm një numër RIOE në një nga rastet e mëposhtme:

- a) Me kërkesë të personit të regjistruar;
- b) Kur autoriteti doganor vihet në dijeni se personi i regjistruar ka pushuar aktivitetet që kërkojnë regjistrimin.

2. Autoritetet doganore regjistrojnë datën e pavlefshmërisë së numrit RIOE dhe ia komunikojnë këtë personit të regjistruar.

NËNSEKSIONI 4

(Shtuar me VKM nr. 872, datë 30.12.2024)

**MJETET PËR SHKËMBIMIN E INFORMACIONIT TË PËRDORURA PËR APLIKIME
DHE VENDIME PËR TË CILAT TË DHËNAT E KËRKUARA NUK JANË PËRCAKTUAR
NË SHTOJCËN A**

Neni 13/1

**Aplikime dhe vendime të kryera me mjete të ndryshme nga teknikat kompjuterike të
përpunimit të të dhënave**

(shkronja “a”, e pikës 3, të nenit 17, të Kodit)

Autoritetet doganore mund të lejojnë përdorimin e mjeteve të ndryshme nga teknikat informatike të përpunimit të të dhënave, në lidhje me aplikimet dhe vendimet, për të cilat kërkesat për të dhënat përkatëse nuk janë të përcaktuara në shtojcën A, të aneksit A, dhe në lidhje me çdo aplikim dhe akt pasues, në lidhje me menaxhimin e këtyre vendimeve.

Seksioni 2

Vendime që lidhen me zbatimin e legjislacionit doganor

Nënseksioni 1 E drejta për t'u dëgjuar

Neni 14

Procedurat e përgjithshme për të drejtën për t'u dëgjuar (Pika 6, e nenit 27, të Kodit)

1. Komunikimi, i përmendur në paragrafin e parë, të pikës 6, të nenit 27, të Kodit, duhet të:
 - a) përfshijë një referencë të dokumenteve dhe informacioneve, në të cilën autoritetet doganore kanë si qëllim të bazojnë vendimin e tyre;
 - b) tregojë periudhën brenda së cilës personi i interesuar duhet të shprehë pikëpamjet e tij, nga data në të cilën ai merr atë komunikim apo konsiderohet se e ka marrë atë;
 - c) përfshijë një referencë, për të drejtën e personit të interesuar, për të pasur akses në dokumentet dhe informacionet e përmendura në shkronjën “a”, në përputhje me dispozitat që zbatohen.
2. Kur personi i interesuar paraqet pikëpamjet e tij brenda afatit të përmendur në shkronjën “b”, të pikës 1, autoritetet doganore mund të vazhdojnë me marrjen e vendimit, përveç rastit kur personi i interesuar, në të njëjtën kohë, paraqet synimin për të shprehur më tej këndvështrimin e tij brenda kohëzgjatjes së përcaktuar.

Neni 15

Procedurat specifike për të drejtën për t'u dëgjuar (Pika 6, e nenit 27, të Kodit)

1. Autoritetet doganore mund ta bëjnë komunikimin e përmendur në paragrafin e parë të pikës 6, të nenit 27, të Kodit, si pjesë e procesit të verifikimit apo kontrollit, kur ato do të marrin një vendim bazuar në një nga rastet e mëposhtme:
 - a) Rezultatet e një verifikimi pas paraqitjes së mallrave;
 - b) Rezultatet e verifikimit të deklarimit doganor, siç përmendet në nenin 172, të Kodit;
 - c) Rezultatet e kontrollit pas çlirimit, siç përmendet në nenin 49, të Kodit, kur mallrat janë ende nën mbikëqyrje doganore;
 - ç) Rezultatet e verifikimit të provës së statusit doganor të mallrave shqiptare ose, sipas rastit, rezultatet e verifikimit të aplikimit për regjistrimin e një vërtetimi të tillë apo për miratimin e një vërtetimi të tillë;
 - d) Lëshimit të provës së origjinës nga autoritetet doganore;
 - dh) Rezultatet e kontrollit të mallrave, për të cilat nuk është depozituar deklaratë përmbledhëse, deklaratë magazinimi të përkohshëm, deklaratë rieksperti apo deklaratë doganore.
2. Kur komunikimi bëhet sipas pikës 1, personi në fjalë mund të:
 - a) shprehë, menjëherë, pikëpamjet e tij, me të njëjtat mjete që përdoren për komunikimin, sipas nenit 17;
 - b) bëjë kërkesë për komunikim, sipas nenit 16, me përjashtim të rasteve të përmendura në shkronjën “dh”, të pikës 1.
Personi në fjalë do të informohet nga autoritetet doganore për këto dy mundësi.
3. Kur autoritetet doganore marrin një vendim refuzimi ndaj personit të interesuar, ata do ta regjistrojnë, pavarësisht nëse ai ka shprehur ose jo pikëpamjet e tij, në përputhje me shkronjën “a”, të pikës 2.

Neni 16

Periudha e së drejtës për t'u dëgjuar

(Pika 6, e nenit 27, të Kodit)

1. Periudha që aplikuesi të shprehë pikëpamjen e tij, para se të merret një vendim, i cili do të ndikojë negativisht ndaj tij, është 30 (tridhjetë) ditë.

2. Pavarësisht nga përcaktimi i pikës 1, kur vendimi ka të bëjë me rezultatet e kontrollit të mallrave, për të cilat nuk janë depozituar deklarata përmbledhëse, deklarata e magazinimi të përkohshëm, deklarata e rieksporit apo deklarata doganore, atëherë autoritetet doganore mund të kërkojnë nga personi në fjalë që të shprehë pikëpamjen e tij brenda 24 (njëzet e katër) orëve.

Neni 17

Mjetet për komunikimin e arsyeve

(Shkronja "a", e pikës 3, të nenit 17, të Kodit)

Në rastet kur komunikimi i përmendur në paragrafin e parë të pikës 6, të nenit 27, të Kodit, është bërë si pjesë e procesit të verifikimit apo kontrollit, komunikimi mund të bëhet duke përdorur mjete të ndryshme nga teknikat informatike të përpunimit të të dhënave.

Në rastet kur aplikimi është paraqitur apo vendimi është njoftuar duke përdorur mjete të ndryshme nga teknikat informatike të përpunimit të të dhënave, komunikimi mund të bëhet duke përdorur të njëjtat mjete.

Neni 18

Përfashtime nga e drejta për t'u dëgjuar

(paragrafi i dytë, i pikës 6, të nenit 27, të Kodit)

(Ndryshuar shkronja "a" me VKM nr. 872, datë 30.12.2024)

Rastet e veçanta, kur aplikuesit nuk i është dhënë mundësia për të shprehur pikëpamjen e tij, do të jenë, si më poshtë vijon:

a) Kur aplikimi për një vendim nuk pranohet, në përputhje me nenin 19, ose me pikën 2, të nenit 29;

b) Kur autoritetet doganore njoftojnë personin që ka depozituar deklaratën përmbledhëse të hyrjes se mallrat nuk duhet të ngarkohen, në raste të trafikut detar dhe ajror të kontejnerëve;

c) Kur vendimi ka të bëjë me një njoftim të vendimit të Drejtorisë së Përgjithshme të Doganave ndaj aplikuesit, referuar pikës 3, të nenit 109, të Kodit;

ç) Kur një numër RIOE duhet bërë i pavlefshëm.

Nënseksioni 2

Rregulla të përgjithshme për vendimet në bazë të aplikimit

Neni 19

Kushtet për pranimin e një aplikimi

(Pika 2, e nenit 27, të Kodit)

1. Aplikimi për një vendim, në lidhje me zbatimin e legjislacionit doganor, do të pranohet nëse plotësohen këto kushte:

a) Kur kërkohet nga regjimi me të cilin lidhet aplikimi, aplikuesi është i regjistruar në përputhje me nenin 19, të Kodit;

b) Kur kërkohet nga regjimi me të cilin lidhet aplikimi, aplikuesi është i vendosur në territorin doganor të Republikës së Shqipërisë;

c) Aplikimi është paraqitur pranë autoritetit doganor të përcaktuar për të marrë aplikime, referuar në paragrafin e tretë, të pikës 1, të nenit 27, të Kodit;

ç) Aplikimi nuk ka të bëjë me një vendim që ka të njëjtin qëllim si vendimi i mëparshëm, drejtuar të njëjtit aplikues, i cili, gjatë periudhës njëvjeçare para aplikimit është anuluar apo revokuar me arsyetimin se aplikuesi nuk arriti të përmbushë detyrimet, sipas këtij vendimi.

2. Duke anashkaluar shkronjën “ç”, të pikës 1, periudha e përmendur atje do të jetë 3 vjet, kur vendimi i mëparshëm është anuluar në përputhje me pikën 1, të nenit 31, të Kodit, apo aplikimi është një aplikim për statusin e operatorit ekonomik të autorizuar, të bërë në përputhje me nenin 40, të Kodit.

Neni 20

Autoriteti doganor kompetent për marrjen e vendimit

(Pika 1, e nenit 27, të Kodit)

Në rastet kur nuk është e mundur të përcaktohet autoriteti doganor kompetent, në përputhje me paragrafin e tretë, të pikës 1, të nenit 27, të Kodit, autoriteti doganor kompetent do të jetë ai i vendit ku mbahen ose aksesohen të dhënat dhe dokumentacioni i aplikuesit (llogaritë kryesore për qëllime doganore), të cilat i mundësojnë autoritetit doganor të marrë një vendim.

Neni 21

Zgjatja e afatit për marrjen e vendimit

(Pika 3, e nenit 27, të Kodit)

(Ndryshuar pika 4 me VKM nr. 872, datë 30.12.2024)

1. Në rastet kur, pas pranimit të aplikimit, autoriteti doganor kompetent për marrjen e vendimit e konsideron të nevojshëm kërkimin e informacionit shtesë nga aplikuesi, me qëllim që të marrë një vendim, ai do t'i caktojë aplikuesit një afat kohor që nuk duhet t'i kalojë 30 (tridhjetë) ditë, për të siguruar këtë informacion. Afati për marrjen e vendimit, i përcaktuar në pikën 3, të nenit 27, të Kodit, zgjatet me atë periudhë kohe. Aplikuesi informohet për zgjatjen e afatit kohor për marrjen e vendimit.

2. Në rastet kur zbatohet pika 1, e nenit 16, afati për marrjen e vendimit, i përcaktuar në pikën 3, të nenit 27, të Kodit, zgjatet me një periudhë prej 30 (tridhjetë) ditësh. Aplikuesi informohet për zgjatjen e afatit.

3. Në rastet kur autoriteti doganor kompetent për marrjen e vendimit ka zgjatur periudhën për konsultime me një autoritet tjetër, afati për marrjen e vendimit zgjatet për të njëjtën periudhë kohore sa dhe zgjatja e periudhës së konsultimit. Aplikuesi informohet për zgjatjen e afatit kohor për marrjen e vendimit.

4. Kur ka dyshime të arsyeshme për shkelje të legjislacionit doganor, të akcizës ose atij tatimor dhe autoritetet doganore e fiskale kryejnë hetime të bazuara në këto arsye, afati kohor për të marrë këto vendime zgjatet në kohën e nevojshme për të kryer këto hetime. Kjo zgjatje nuk i tejkalon nëntë muaj. Nëse nuk rrezikohen hetimet, aplikuesi informohet për zgjatjen e afatit kohor.

Neni 22

Data e hyrjes në fuqi

(Pikat 4 dhe 6, të nenit 27, të Kodit)

Vendimi hyn në fuqi në një datë të ndryshme nga data në të cilën aplikuesi e merr apo konsiderohet se e ka marrë atë, në rastet e mëposhtme:

a) Kur vendimi ndikon pozitivisht mbi aplikuesin dhe aplikuesi ka kërkuar një datë tjetër të hyrjes

në fuqi, vendimi hyn në fuqi nga data e kërkuar nga aplikuesi, me kusht që ajo të jetë pas datës në të cilën aplikuesi merr ose konsiderohet ta ketë marrë vendimin;

b) Kur vendimi i mëparshëm është lëshuar për një afat kohe të kufizuar dhe qëllimi i vetëm i vendimit të ri është zgjatja e vlefshmërisë së tij, vendimi hyn në fuqi nga data pas skadimit të periudhës së vlefshmërisë së vendimit të mëparshëm;

c) Kur hyrja në fuqi e vendimit kushtëzohet me përmbushjen e formaliteteve të caktuara nga ana e aplikuesit, vendimi hyn në fuqi nga data në të cilën aplikuesi merr ose konsiderohet të ketë marrë njoftim nga autoritetet doganore kompetente, të cilat deklarojnë se formalitetet janë përmbushur në mënyrë të kënaqshme.

Neni 23

Rivlerësimi i vendimit

(Shkronja “a”, e pikës 4, të nenit 28, të Kodit)

1. Autoriteti doganor kompetent për marrjen e vendimit do ta rivlerësojë vendimin në rastet e mëposhtme:

- a) Kur ka ndryshime në legjislacionin përkatës, që ndikojnë në vendim;
- b) Kur është e nevojshme, si rezultat i monitorimit të kryer;
- c) Kur është e nevojshme, për shkak të informacionit të dhënë nga mbajtësi i vendimit, në përputhje me pikën 2, të nenit 28, të Kodit, ose nga autoritetet e tjera.

2. Autoriteti doganor kompetent për marrjen e vendimit ia komunikon rezultatin e rivlerësimit mbajtësit të vendimit.

Neni 24

Pezullimi i vendimit

(Shkronja “b”, e pikës 4, të nenit 28, të Kodit)

1. Autoriteti doganor kompetent për marrjen e vendimit e pezullon vendimin, por nuk e anulon, revokon ose ndryshon atë në përputhje me nenet 28, pika 3, 31 ose 32, të Kodit, kur:

a) autoriteti doganor gjykon se mund të ketë arsye të mjaftueshme për anulimin, revokimin ose ndryshimin e vendimit, por ende nuk disponon elementet e nevojshme për të vendosur për anulimin, revokimin ose ndryshimin;

b) autoriteti doganor gjykon se nuk janë përmbushur kushtet sipas vendimit ose që mbajtësi i vendimit nuk respekton detyrimet sipas këtij vendimi dhe mbajtësit të vendimit mund t'i jepet kohë për të marrë masa për përmbushjen e kushteve ose respektimin e detyrimeve;

c) mbajtësi i vendimit e kërkon pezullimin për shkak se, përkohësisht, nuk është në gjendje të përmbushë kushtet e përcaktuara sipas vendimit ose për të respektuar detyrimet e vendimit.

2. Në rastet e referuara në shkronjat “b” e “c”, të pikës 1, mbajtësi i vendimit duhet të njoftojë autoritetin doganor kompetent për marrjen e vendimit, për masat që do të marrë për të siguruar përmbushjen e kushteve ose respektimin e detyrimeve si dhe periudhën e kohës që i nevojitet për të marrë këto masa.

Neni 25

Periudha e pezullimit të vendimit

(Shkronja “b”, e pikës 4, të nenit 28, të Kodit)

(Ndryshuar paragrafi i dytë i pikës 1 me VKM nr. 872, datë 30.12.2024)

1. Në rastet e referuara në shkronjën “a”, të pikës 1, të nenit 24, periudha e pezullimit, e përcaktuar nga autoritetet doganore kompetente, duhet t'i korrespondojë periudhës së kohës që i nevojitet autoritetit doganor për të vendosur nëse plotësohen kushtet për anulim, revokim ose ndryshim.

Kjo periudhë nuk mund t'i kalojë 30 (tridhjetë) ditë.

Megjithatë, kur autoriteti doganor konsideron se mbajtësi i vendimit mund të mos plotësojë kriteret e përcaktuara në shkronjat “a” dhe “b”, të nenit 41, të Kodit, vendimi pezullohet derisa të vendoset nëse është kryer një shkelje e rëndë ose shkelje të përsëritura, duke përfshirë veprat penale nga një nga personat e mëposhtëm:

a) Mbajtësi i vendimit;

b) Personi përgjegjës i kompanisë, i cili është mbajtësi i vendimit në fjalë ose, i cili ushtron kontroll mbi menaxhimin e saj;

c) Punonjësi përgjegjës i kompanisë për çështjet doganore, i cili është mbajtësi i vendimit në fjalë.

2. Në rastet e referuara në shkronjat “b” e “c”, të pikës 1, të nenit 24, periudha e pezullimit, e përcaktuar nga autoriteti doganor kompetent për marrjen e vendimit, duhet t'i korrespondojë periudhës kohore të njoftuar nga mbajtësi i vendimit, në përputhje me pikën 2, të nenit 24. Periudha e pezullimit, në rastet kur është e nevojshme, mund të zgjatet më tej me kërkesë të mbajtësit të vendimit.

Periudha e pezullimit mund të zgjatet përtej periudhës së kohës që u nevojitet autoriteteve doganore kompetente për të verifikuar nëse këto masa sigurojnë përmbushjen e kushteve apo respektimin e detyrimeve. Kjo periudhë kohore nuk duhet t'i kalojë 30 (tridhjetë) ditë.

3. Në rastet kur, pas pezullimit të vendimit, autoriteti doganor kompetent për marrjen e vendimit synon ta anulojë, ta revokojë ose ta ndryshojë atë, në përputhje me nenet 28, pika 3, 31 ose 32, të Kodit, periudha e pezullimit, e përcaktuar në përputhje me pikat 1 e 2, të këtij neni, zgjatet, kur është e nevojshme, deri sa të hyjë në fuqi vendimi për anulimin, revokimin ose ndryshimin.

Neni 26

Përfundimi i pezullimit

(Shkronja “b”, e pikës 4, të nenit 28, të Kodit)

1. Pezullimi i vendimit duhet të përfundojë me mbarimin e periudhës së pezullimit, përveç rasteve kur, para mbarimit të kësaj periudhe, ndodh një nga situatat e mëposhtme:

a) Pezullimi është hequr bazuar në faktin se në rastet e referuara në shkronjën “a”, të pikës 1, të nenit 24, nuk ka asnjë arsye për anulimin, revokimin ose ndryshimin e vendimit, në përputhje me nenet 28, pika 3, 31 ose 32, të Kodit. Në këtë rast pezullimi do të përfundojë në datën e revokimit;

b) Pezullimi është hequr bazuar në faktin se në rastet e referuara në shkronjat “b” e “c”, të pikës 1, të nenit 24, mbajtësi i vendimit ka marrë masat e nevojshme për të siguruar përmbushjen e kushteve të përcaktuara për marrjen e vendimit apo për të respektuar detyrimet e vendosura në këtë vendim, të pranueshme nga autoriteti doganor kompetent për marrjen e vendimit. Në këtë rast pezullimi do të përfundojë në datën e revokimit;

c) Vendimi i pezulluar anulohet, revokohet ose ndryshohet. Në këtë rast pezullimi do të përfundojë në datën e anulimit, revokimit apo ndryshimit.

2. Autoriteti doganor kompetent për marrjen e vendimit informon mbajtësin e vendimit për përfundimin e pezullimit.

Neni 27

Sistemet elektronike në lidhje me vendimet

(Neni 17 i Kodit)

1. Për shkëmbimin dhe ruajtjen e informacionit që ka të bëjë me aplikimet dhe vendimet, të cilat merren nga autoritetet doganore dhe, në çdo rast të mëvonshëm, që mund të ndikojë në aplikimin ose vendimin e marrë, do të përdoret një sistem elektronik i ngritur për këto qëllime, në bazë të pikës 1,

të nenit 17, të Kodit. Informacioni bëhet i mundur nëpërmjet këtij sistemi nga ana e autoritetit doganor kompetent, pa vonesë dhe jo më vonë se 7 (shtatë) ditë nga data në të cilën ky autoritet ka marrë dijeni për informacionin.

2. Pika 1, e këtij neni, do të zbatohet nga data e implementimit të sistemit të informatizuar të vendimeve doganore, sipas planit të punës, të miratuar nga ministri përgjegjës për financat.

Deri në datën e implementimit të sistemit të informatizuar për vendimet doganore, sipas planit të punës të ministrit përgjegjës për financat, autoritetet doganore mund të lejojnë përdorimin e mjeteve të ndryshme nga teknika elektronike e përpunimit të të dhënave, në lidhje me aplikimet, vendimet dhe për çdo veprim/ngjarje pasuese, e cila mund të ndikojë në aplikimin ose vendimin fillestar.

Neni 28

Autoritetet doganore kompetente për të marrë aplikimet

(Paragrafi i tretë, i pikës 1, të nenit 27, të Kodit)

Kur nuk është e specifikuar, DPD-ja përcakton autoritetin doganor kompetent për të marrë aplikimet, në zbatim të paragrafit të tretë të pikës 1, të nenit 27, të Kodit.

Neni 29

Pranimi i aplikimit

(Pika 2, e nenit 27, të Kodit)

1. Kur autoriteti doganor kompetent pranon një aplikim, sipas pikës 1, të nenit 19, data e pranimi të aplikimit do të jetë data në të cilën i gjithë informacioni i kërkuar, në përputhje me pikën 2, të nenit 27, të Kodit, është marrë nga autoritetet doganore.

2. Kur autoriteti doganor kompetent përcakton se aplikimi nuk përmban gjithë informacionin e kërkuar, ai i kërkon aplikuesit të sigurojë informacionin e duhur brenda një afati kohor të arsyeshëm, i cili nuk duhet të kalojë 30 (tridhjetë) ditë.

3. Kur aplikuesi nuk i jep informacionin e kërkuar autoritetit doganor brenda periudhës të caktuar nga ata për këtë qëllim, aplikimi nuk do të pranohet dhe për këtë njoftohet aplikuesi.

4. Në mungesë të një komunikimi me aplikuesin, lidhur me pranimin ose jo të aplikimit të tij, aplikimi do të konsiderohet i pranuar. Data e pranimi do të jetë data e paraqitjes së aplikimit ose, në rastet kur jepet informacion shtesë nga aplikuesi, si pasojë e kërkesës së autoritetit doganor kompetent, siç përmendet në pikën 2, data e pranimi është data në të cilën është dhënë informacioni i fundit, i kërkuar.

Neni 30

Ruajtja e informacionit në lidhje me vendimet

(Pika 5, e nenit 28, të Kodit)

Autoriteti doganor kompetent për marrjen e një vendimi do të ruajë të gjitha të dhënat dhe informacionin mbështetës, në të cilin u bazua për vendimin e marrë, për të paktën 3 vjet, nga data e përfundimit të vlefshmërisë së tij.

Neni 31

Konsultimi mes autoriteteve doganore

(Neni 27 i Kodit)

1. Kur një autoritet doganor kompetent për marrjen e një vendimi ka nevojë të konsultohet me një autoritet tjetër doganor në lidhje me plotësimin e kushteve dhe kriterëve të nevojshme për marrjen e një vendimi të favorshëm, konsultimi duhet të kryhet brenda afatit të caktuar për vendimin

në fjalë. Autoriteti doganor kompetent për marrjen e një vendimi do të caktojë një afat kohor për konsultim, që fillon nga data kur ky autoritet i komunikon autoritetit tjetër konsultues kushtet dhe kriteret që duhet të shqyrtohen nga ky i fundit.

Kur, pas shqyrtimit të përmendur në paragrafin e mësipërm, autoriteti doganor konsultues konstaton se aplikuesi nuk përmbush një ose më shumë nga kushtet dhe kriteret për marrjen e një vendimi të favorshëm, rezultatet e dokumentuara dhe të justifikuara do t'i dërgohen autoritetit doganor kompetent për marrjen e vendimit.

2. Afati kohor, i caktuar për konsultim, në përputhje me pikën 1, mund të zgjatet nga autoriteti doganor kompetent për marrjen e vendimit në ndonjë nga rastet e mëposhtme:

a) Kur, për shkak të natyrës së shqyrtimit që do të kryhet, autoriteti doganor konsultues kërkon më shumë kohë;

b) Kur aplikuesi kryen rregullimet për të siguruar plotësimin e kushteve e të kriterëve të përmendura në pikën 1 dhe ia komunikon ato autoritetit doganor kompetent për marrjen e vendimit, i cili do të informojë, sipas rastit, autoritetin doganor konsultues.

3. Kur autoriteti doganor konsultues nuk përgjigjet brenda afatit të përcaktuar për konsultim, sipas pikave 1 e 2, kushtet dhe kriteret për të cilat u krye konsultimi mund të konsiderohen të përmbushura.

4. Procedurat e konsultimit, të përcaktuara në pikat 1 e 2, mund të aplikohen edhe për qëllim rivlerësimi dhe monitorimi të një vendimi.

5. Deri në datën e implementimit të sistemit të informatizuar për vendimet doganore, sipas planit të punës të ministrit përgjegjës për financat, autoritetet doganore duhet të sigurojnë disponueshmërinë e mjeteve të shkëmbimit e të ruajtjes së informacionit në mënyrë që të sigurojnë konsultimet në përputhje me nenin 31.

Neni 32

Revokimi i një vendimi të favorshëm

(Nenet 32 dhe 37 të Kodit)

1. Një vendim i pezulluar sipas pikës 1, të nenit 24, revokohet nga autoriteti doganor kompetent për marrjen vendimit në rastet e përmendura në shkronjat “b” e “c”, të pikës 1, të nenit 24, kur mbajtësi i vendimit nuk merr brenda afatit masat e nevojshme për të përmbushur kushtet dhe detyrimet e përcaktuara në këtë vendim.

2. Në zbatim të shkronjës “a”, të pikës 7, të nenit 37, të Kodit, një vendim informacioni detyrues tarifar (IDT) revokohet nga autoriteti doganor kompetent nëse nuk është më në përputhje me interpretimin e ndonjërës prej nomenklaturave të përcaktuara në shkronjat “a” dhe “b”, të pikës 2, të nenit 56, dhe që rrjedh nga secili nga rastet kur:

a) shënimet shpjeguese, të përmendura në Nomenklaturën e Kombinuar të Mallrave, me efekt nga data e hyrjes në fuqi;

b) vendimet e klasifikimit, mendimet e klasifikimit ose ndryshimet e shënimeve shpjeguese të Nomenklaturës së Sistemit të Harmonizuar të Përshkrimit dhe Kodifikimit të Mallrave, miratuar nga Organizata e krijuar nga Konventa që themeloi Këshillin e Bashkëpunimit Doganor, bërë në Bruksel, më 15 dhjetor 1950.

Nënseksioni 3

Vendimet për informacionin detyrues

Neni 33

Aplikimi për një vendim për informacionin detyrues

(Pika 1, e nenit 27 dhe shkronja “a”, e pikës 3, të nenit 17, të Kodit)

1. Aplikimi për një vendim, në lidhje me informacionin detyrues, dhe të gjitha dokumentet shoqëruese ose mbështetëse i paraqiten Drejtorisë së Përgjithshme të Doganave (DPD).

2. Duke paraqitur një aplikim për një vendim në lidhje me informacionin detyrues, aplikuesi konsiderohet se ka rënë dakord që të dhënat e vendimit, përfshirë çdo fotografi, imazh apo broshurë, mund të publikohen në faqen zyrtare të DPD-së, me përjashtim të informacionit konfidencial. Për çdo publikim të të dhënave duhet të respektohet e drejta e mbrojtjes të të dhënave personale.

3. Një aplikim për një vendim informacioni detyrues tarifor (IDT) duhet të lidhet vetëm me mallra, të cilat kanë karakteristika të ngjashme, dhe nëse dallimet ndërmjet tyre janë të parëndësishme për qëllimet e klasifikimit të tyre tarifor.

4. Një aplikim për një vendim informacioni detyrues të origjinës (IDO) duhet të lidhet vetëm me një lloj malli dhe një grup rrethanash, për përcaktimin e origjinës.

5. Për qëllime të sigurimit të pajtueshmërisë me kërkesat e përcaktuara në shkronjën “b”, të pikës 1, të nenit 36, të Kodit, në lidhje me një aplikim për një vendim IDT, DPD, siç përcaktohet në pikën 1, të këtij neni, do të konsultohet me sistemin elektronik të përmendur në nenin 38, dhe mund të mbajë një regjistrim të këtyre konsultimeve.

6. Në rastet kur nuk ka një sistem informatik funksional për paraqitjen e aplikimeve për një vendim, në lidhje me informacion detyrues të origjinës (IDO), DPD-ja mund të lejojë që këto aplikime të paraqiten duke përdorur mjete të ndryshme nga teknikat informatike të përpunimit të të dhënave.

Neni 34

Afatet kohore

(Pika 3, e nenit 27 dhe shkronja “b” e pikës 4 të nenit 28 të Kodit)

1. Kur DPD-ja njofton zyrat doganore se marrja e vendimeve IDT dhe IDO është pezulluar, në përputhje me shkronjën “b”, të pikës 4, të nenit 28 të Kodit, afati për marrjen e vendimit të përmendur në paragrafin e parë të pikës 3, të nenit 27, të Kodit, zgjatet më tej, derisa DPD-ja të njoftojë zyrat doganore se është përcaktuar saktë dhe në mënyrë uniforme klasifikimi tarifor dhe origjina.

Zgjatja e periudhës së përmendur në paragrafin e parë nuk duhet t'i kalojë 10 (dhjetë) muaj, por, në rrethana të jashtëzakonshme, mund të zbatohet një zgjatje shtesë jo më shumë se 5 muaj.

2. Periudha kohore e përmendur në paragrafin e dytë të pikës 3, të nenit 27, të Kodit, mund t'i kalojë 30 (tridhjetë) ditë në rastet kur nuk është e mundur që brenda kësaj periudhe të përfundojë analiza që autoriteti doganor kompetent për marrjen e vendimit e konsideron si të nevojshme për marrjen e vendimit.

Neni 35

Njoftimi i vendimeve IDO

(Pika 3, të nenit 17, të Kodit)

1. Kur paraqitet një aplikim për një vendim IDO, duke përdorur mjete të tjera, përveç teknikave informatike të përpunimit të të dhënave, autoritetet doganore mund të njoftojnë aplikuesin për vendimin IDO duke përdorur mjete të tjera, përveç teknikave informatike të përpunimit të të dhënave.

2. Kur DPD-ja njofton aplikuesin për vendimin IDO, duke përdorur mjete, të ndryshme nga teknikat elektronike të përpunimit të të dhënave, duhet ta bëjë këtë duke përdorur formularin e përcaktuar në aneksin 12-02, të shtojcës B, bashkëlidhur këtij vendimi dhe pjesë përbërëse e tij.

3. Kur DPD-ja njofton aplikuesin për vendimin IDO, duke përdorur teknika elektronike të

përpunimit të të dhënave, ky vendim do të jetë sipas formatit të përcaktuar në aneksin 12-02, të shtojcës B, bashkëlidhur këtij vendimi dhe pjesë përbërëse e tij.

Neni 36

Shkëmbimi i të dhënave për vendimet IDO

(Pika 5, e nenit 28, të Kodit)

DPD-ja duhet t'i transmetojë, periodikisht, degëve doganore, detajet përkatëse të vendimeve IDO.

Neni 37

Monitorimi i vendimeve në lidhje me informacionin detyrues

(pika 5, e nenit 28, të Kodit)

(Ndryshuar me VKM nr. 872, datë 30.12.2024)

Kur formalitetet doganore janë duke u përmbushur nga mbajtësi ose në emër të mbajtësit të një vendimi në lidhje me një informacion detyrues për mallrat e mbuluara nga ai vendim, kjo duhet të tregohet në deklaratën doganore, duke treguar numrin e referencës të vendimit.

Neni 38

Sistemi elektronik për IDT

(Pika 1, e nenit 17 dhe pika 5, e nenit 28, të Kodit.)

1. Për shkëmbimin dhe ruajtjen e informacionit që i përket aplikimeve dhe vendimeve lidhur me IDT ose ndonjë ngjarje të mëpasshme, e cila mund të ndikojë në aplikimin fillestar ose vendimin, duhet të ngrihet një sistem elektronik, në mbështetje të pikës 1, të nenit 17, të Kodit.

2. Kur përpunohet një aplikim për një vendim IDT, autoritetet doganore duhet të tregojnë statusin e aplikimit në sistemin e përmendur në pikën 1.

3. Deri në implementimin e sistemit të informatizuar, të referuar në planin e punës, të miratuar nga ministri përgjegjës për financat, do të përdoret baza e të dhënave të sistemit qendror të DPD-së.

4. Deri në datën e implementimit të sistemit të informatizuar për IDT, sipas planit të punës të ministrit përgjegjës për financat, autoritetet doganore mund të lejojnë përdorimin e mjeteve të tjera, të ndryshme nga teknika elektronike, të përpunimit të të dhënave në lidhje me aplikimet e vendimit dhe për çdo veprim/ngjarje pasues, që mund të ndikojë në aplikimin ose vendimin.

Aplikimet për një vendim IDT do të bëhen duke përdorur formatin e formularit sipas aneksit 2, të shtojcës C, bashkëlidhur këtij vendimi dhe pjesë përbërëse e tij, dhe vendimet IDT do të merren duke përdorur formatin e formularit e sipas aneksit 3, të shtojcës C, bashkëlidhur këtij vendimi dhe pjesë përbërëse e tij.

5. Deri në implementimin e sistemit të informatizuar, të përmendur në pikën 1, të këtij neni, autoritetet doganore do të kryejnë monitorimin e përdorimit të vendimit IDT kur bëjnë kryerjen e kontrolleve doganore ose kontrollet pas zhdoganimit, sipas neneve 47 dhe 49, të Kodit.

Neni 39

Përputhshmëria me vendimet ekzistuese IDT

(Pika 3, e nenit 27, të Kodit)

DPD-ja, për marrjen e një vendimi, duhet të konsultohet me sistemin elektronik, të përcaktuar në nenin 38, dhe mund të mbajë një regjistrim të konsultimeve të tilla, me qëllim që të sigurojë se vendimi IDT, të cilin ka për qëllim të lëshojë, është në përputhje me vendimet e IDT, që tashmë janë lëshuar.

Neni 40
Zgjatja e përdorimit të vendimeve për informacionin detyrues
(Pika 9, e nenit 37, të Kodit)

1. Kur DPD-ja vendos të zgjasë periudhën e përdorimit, sipas paragrafit të tretë të pikës 9, të nenit 37, të Kodit, duhet të përcaktojë datën në të cilën përfundon zgjatja e përdorimit të vendimit në fjalë.

2. Kur DPD-ja vendos të zgjasë periudhën e përdorimit të një vendimi IDT, sipas paragrafit të tretë të pikës 9, të nenit 37, të Kodit, duhet të specifikojë, përveç datave të përmendura në pikën 1, sasi të mallrave që mund të zhdoganohen gjatë periudhës së zgjatur të përdorimit.

Përdorimi i një vendimi, për të cilin është dhënë një zgjatje periudhe përdorimi, përfundon sapo këto sasi të jenë plotësuar.

Neni 41
Kufizimi i zbatimit të rregullave për rivlerësim dhe pezullim
(Pika 4, e nenit 28, të Kodit)

Nenet 23 deri në 26, në lidhje me rivlerësimin dhe pezullimin e vendimeve, nuk zbatohen për vendimet që lidhen me informacionin detyrues.

Seksioni 3
Operatori ekonomik i autorizuar

Nënseksioni 1
Përfitimet që rezultojnë nga statusi i operatorit ekonomik të autorizuar

Neni 42
Lehtësirat në lidhje me deklaratat e paranisjes
(Shkronja “b”, e pikës 2, të nenit 40, të Kodit)

1. Kur një Operator Ekonomik i Autorizuar për Sigurinë dhe Mbrojtjen (OEAS), siç referohet në shkronjën “b”, të pikës 2, të nenit 40, të Kodit, dorëzon në emër të tij një deklaratë paranisjeje, në formën e një deklarate doganore ose të rieksporit, nuk kërkohen detaje të tjera nga ato të deklaruara në këto deklarata.

2. Kur një OEAS dorëzon në emër të një personi tjetër, i cili është, gjithashtu, një OEAS, një deklaratë paranisjeje, në formën e një deklarate doganore ose të rieksporit, nuk kërkohen detaje të tjera nga ato të deklaruara në këto deklarata.

Neni 43
Trajtim më i favorshëm për sa i përket vlerësimit dhe kontrollit të riskut
(Pika 5, e nenit 40, të Kodit)

1. Operatori ekonomik i autorizuar (OEA) i nënshtrohet më pak kontrolleve fizike dhe dokumentare, krahasuar me operatorët e tjerë ekonomikë.

2. Kur një OEAS ka paraqitur një deklaratë përmbledhëse të hyrjes ose, në rastet e përmendura në nenin 122, të Kodit, një deklaratë doganore apo një deklaratë për magazinim të përkohshëm ose kur një OEAS ka depozituar një njoftim dhe ka ofruar akses ndaj detajeve që lidhen me deklaratën përmbledhëse të hyrjes në sistemin e tij informatik, siç referohet në pikën 8, të nenit 119, të Kodit, zyra doganore e hyrjes, e referuar në paragrafin e parë, të pikës 3, të nenit 119, të Kodit, duhet të njoftojë OEAS në rastet kur ngarkesa është përzgjedhur për kontroll fizik. Njoftimi duhet të bëhet para

mbërritjes së mallrave në territorin doganor të Republikës së Shqipërisë.

Ky njoftim duhet t'i vihet në dispozicion edhe transportuesit, nëse është i ndryshëm nga OEAS, e referuar në paragrafin e parë të pikës 3, të nenit 259, me kusht që transportuesi të jetë një OEAS dhe të jetë i lidhur me sistemet informatike në lidhje me deklaratat e referuara në këtë paragraf.

Njoftimi nuk jepet kur rrezikohen kontrollet që duhet të kryhen ose rezultatet që rrjedhin prej tyre.

3. Kur një OEA depoziton një deklaratë për magazinim të përkohshëm ose një deklaratë doganore në përputhje me nenin 156, të Kodit, zyra doganore kompetente për pranimin e deklaratës për magazinim të përkohshëm apo deklaratës doganore në përputhje me nenin 156, të Kodit, duhet të njoftojë OEA kur ngarkesa përzgjidhet për kontroll doganor. Njoftimi duhet të bëhet përpara paraqitjes së mallrave në doganë. Njoftimi nuk jepet kur rrezikohen kontrollet që duhet të kryhen ose rezultatet që rrjedhin prej tyre.

4. Kur dërgesat e deklaruara nga një OEA janë përzgjedhur për kontroll fizik apo dokumentar, këto kontrolle duhet të kryhen me prioritet.

Me kërkesë të një OEA-je, kontrollet mund të kryhen në një vend tjetër, të ndryshëm nga vendi ku mallrat duhet të paraqiten në doganë.

5. Njoftimet e referuara në pikat 2 dhe 3 nuk përfshijnë kontrollet doganore të vendosura në bazë të deklaratës për magazinim të përkohshëm ose të deklaratës doganore pas paraqitjes së mallit.

Neni 44

Përgjithësi nga trajtimi më i favorshëm

(Pika 5, e nenit 40, të Kodit)

Trajtimi më i favorshëm, i referuar në nenin 43, nuk zbatohet për kontrollet doganore që lidhen me nivele të larta të riskut apo me detyrimet e kontrollit të përcaktuara në një legjislacion tjetër në Republikën e Shqipërisë.

Megjithatë, autoritetet doganore kryejnë përpunimin, formalitetet dhe kontrollet e nevojshme për dërgesat e deklaruara nga një OEAS si çështje prioritare.

Nënseksioni 2

Aplikimi për statusin e operatorit ekonomik të autorizuar

Neni 45

Aplikimi dhe kushtet për pranimin e aplikimit për statusin OEA

(Pikat 1, dhe 2, të nenit 27, të Kodit)

1. Aplikimi për një autorizim OEA duhet të bëhet me shkrim ose në formë elektronike, në përputhje me specimenin e përcaktuar në aneksin 12, të shtojcës C, bashkëlidhur këtij vendimi dhe pjesë përbërëse e tij

2. Aplikimi për marrjen e një autorizimi OEA paraqitet në Drejtorinë e Përgjithshme të Doganave.

3. Përveç kushteve për pranimin e një aplikimi, të parashikuara në pikën 1, të nenit 19, me qëllim që aplikuesi të aplikojë për statusin OEA, së bashku me aplikimin duhet të paraqesë pyetësoarin e vetëvlerësimit, sipas aneksit 13, "Pyetësoari i vetëvlerësimit", të shtojcës C, bashkëlidhur këtij vendimi dhe pjesë përbërëse e tij, të plotësuar në mënyrën e duhur.

4. Operatori ekonomik duhet të paraqesë një aplikim të vetëm për statusin OEA, që mbulon të gjitha ambientet ekzistuese të biznesit në territorin doganor të Republikës së Shqipërisë.

5. Aplikuesi duhet të caktojë një pikë qendrore informacioni ose të emërojë një person kontakti brenda administratës së tij për t'i bërë lehtësisht të disponueshëm autoritetit doganor të gjithë informacionin e nevojshëm që provon përputhshmërinë me kërkesat për lëshimin e autorizimit OEA.

6. Aplikuesi, për aq sa është e mundur, i paraqet me mjete elektronike të dhënat e nevojshme

për autoritetet doganore.

7. Drejtoria e Përgjithshme e Doganave lëshon autorizimin OEA në përputhje me modelin e përcaktuar në aneksin 14, të shtojcës C, bashkëlidhur këtij vendimi dhe pjesë përbërëse e tij.

Neni 46

Afati kohor për marrjen e vendimeve

(Pika 3, e nenit 27, të Kodit)

1. Afati kohor për marrjen e vendimit të referuar në paragrafin e parë të pikës 3, të nenit 27, të Kodit, mund të zgjatet për një periudhë deri në 60 (gjashtëdhjetë) ditë.

2. Kur ka proces hetimi penal, që ngre dyshime nëse aplikuesi plotëson kushtet e përcaktuara në shkronjën “b”, të nenit 41, të Kodit, atëherë afati për të marrë vendimin zgjatet deri sa të përfundojnë ky proces.

Neni 47

Data e hyrjes në fuqi të autorizimit OEA

(Pika 4, e nenit 27, të Kodit)

Duke anashkaluar pikën 4, të nenit 27, të Kodit, autorizimi që siguron statusin OEA (autorizimi i OEA) hyn në fuqi në ditën e pestë pas marrjes së vendimit.

Neni 48

Efektet ligjore të pezullimit

(Shkronja “b”, e pikës 4, të nenit 28, të Kodit)

1. Kur autorizimi OEA është pezulluar për shkak të mosrespektimit të ndonjë prej kriterëve të përmendura në nenin 41, të Kodit, çdo vendim i marrë në lidhje me atë OEA, i cili është bazuar në autorizimin e OEA në përgjithësi ose në ndonjë nga kriteret specifike, të cilat çuan në pezullimin e këtij autorizimi, do ta pezullohet nga autoriteti doganor që e ka marrë këtë vendim.

2. Pezullimi i një vendimi, lidhur me zbatimin e legjislacionit doganor të marrë në lidhje me një OEA, nuk duhet të çojë në pezullimin automatik të autorizimit të OEA.

3. Kur një vendim në lidhje me një person, që është, njëkohësisht, OEAS dhe Operator Ekonomik i Autorizuar për Thjeshtësimet Doganore, siç përmendet në shkronjën “a”, të pikës 2, të nenit 40, të Kodit (OEAD), është pezulluar në përputhje me pikën 1, të nenit 24, për shkak të mospërmbushjes së kushteve të përcaktuara në shkronjën “d”, të nenit 41, të Kodit, autorizimi i tij si OEAD pezullohet, ndërsa autorizimi si OEAS mbetet i vlefshëm.

Kur një vendim në lidhje me një person, që është, njëkohësisht, OEAS dhe OEAD është pezulluar, në përputhje me pikën 1, të nenit 24, për shkak të mospërmbushjes së kushteve të përcaktuara në shkronjën “dh”, të nenit 41, të Kodit, autorizimi i tij si OEAS pezullohet, ndërsa autorizimi si OEAD mbetet i vlefshëm.

Nënseksioni 3

Kriteret për dhënien e statusit OEA

Neni 49

Konformiteti

(Shkronja “a”, e nenit 41, të Kodit)

(Ndryshuar pika 1 dhe 3 me VKM nr. 872, datë 30.12.2024)

1. Kriteri i përcaktuar në shkronjat “a” dhe “b”, të nenit 41, të Kodit, konsiderohet i plotësuar

nëse:

a) nuk ka asnjë vendim të marrë nga një autoritet administrativ ose gjyqësor, i cili përcakton se një nga personat e përmendur në shkronjën “b” ka kryer, gjatë 3 (tri) viteve të fundit një shkelje të rëndë ose shkelje të përsëritur të legjislacionit doganor, të akcizës ose atij tatimor, në lidhje me veprimtarinë ekonomike të tij/saj; dhe

b) asnjë nga personat e mëposhtëm nuk ka kryer vepër penale në lidhje me aktivitetin e tij/të saj, duke përfshirë aktivitetin ekonomik të aplikuesit, sipas rastit:

i. aplikuesi;

ii. punonjësi/t përgjegjës për çështjet doganore të aplikuesit,

iii. personi përgjegjës për aplikuesin ose që ushtron kontroll mbi menaxhimin e tij.

2. Megjithatë, kriteri referuar në shkronjën “a”, të nenit 41, të Kodit, mund të konsiderohet i përmbushur kur DPD-ja e konsideron shkelje me rëndësi të papërfillshme, në raport me numrin apo madhësinë e operacioneve doganore, dhe autoritetet doganore nuk krijojnë dyshime në lidhje me mirëbesimin e aplikuesit.

3. Kur personi i përmendur në shkronjën “b”/”iii”, të pikës 1, i ndryshëm nga aplikuesi, është i vendosur ose banon në një shtet tjetër, autoriteti doganor kompetent për marrjen e vendimit vlerëson plotësimin e kriterit, të përmendur në shkronjat “a” dhe “b”, të nenit 41, të Kodit, në bazë të të dhënave dhe informacionit të disponueshëm.

4. Kur aplikuesi është i themeluar për më pak se 3 vjet, DPD-ja do të vlerësojë përmbushjen e kriterit të përmendur në shkronjën “a”, të nenit 41, të Kodit, mbi bazën e të dhënave dhe informacioneve që disponon.

Neni 50

Sistem efikas i menaxhimit të të dhënave tregtare dhe të transportit

(Shkronja “c”, e nenit 41, të Kodit)

1. Kriteri i përcaktuar në shkronjën “c”, të nenit 41, të Kodit, do të konsiderohet i përmbushur nëse plotësohen kushtet e mëposhtme:

a) Aplikuesi mban një sistem kontabiliteti në përputhje me parimet e përgjithshme të pranura të kontabilitetit të Republikës së Shqipërisë, që lehtëson kontrollin doganor të bazuar në auditim, dhe mban një raport historik të të dhënave, që sigurojnë një gjurmë të auditimit nga momenti që të dhënat hyjnë në regjistra;

b) Të dhënat e mbajtura nga aplikuesi, për qëllime doganore, janë të integruara në sistemin e kontabilitetit të aplikuesit ose lejojnë që të bëhen kontrole të kryqëzuara të informacionit me sistemin e kontabilitetit;

c) Aplikuesi lejon aksesin fizik të autoritetit doganor në sistemet e tij kontabël dhe, kur është e zbatueshme, në regjistrimet e tij tregtare e të transportit;

ç) Aplikuesi lejon aksesin elektronik të autoritetit doganor në sistemet e tij kontabël dhe, kur është e zbatueshme, në regjistrimet e tij tregtare e të transportit, nëse të dhënat ose regjistrimet janë mbajtur në mënyrë elektronike;

d) Aplikuesi ka një sistem logjistik që identifikon mallrat si mallra shqiptare ose joshqiptare dhe tregon, kur është e mundur, vendndodhjen e tyre;

dh) Aplikuesi ka një organizim administrativ që korrespondon me llojin dhe madhësinë e biznesit, i cili është i përshtatshëm për menaxhimin e qarkullimit të mallrave dhe ka kontrole të brendshme, të afta për parandalimin, zbulimin e korrigjimin e gabimeve dhe parandalimin e zbulimin e transaksioneve të parregullta ose të paligjshme;

e) Kur është e zbatueshme, aplikuesi ka procedura efikase për trajtimin e licencave dhe të autorizimeve të dhëna, sipas masave të politikave tregtare ose në lidhje me tregtinë e produkteve bujqësore;

ë) Aplikuesi ka procedura efikase për arkivimin e të dhënave dhe informacionit dhe për mbrojtjen kundër humbjes së informacionit;

f) Aplikuesi siguron që punonjësit përkatës të jenë udhëzuar të informojnë autoritetet doganore nëse zbulohen vështirësi të përmbushjes së kriterëve dhe përcakton procedurat për informimin e autoriteteve doganore për vështirësi të tilla;

g) Aplikuesi ka miratuar masat e duhura të sigurisë për të mbrojtur sistemin kompjuterik të tij nga ndërhyrja e paautorizuar dhe për të siguruar dokumentacionin e aplikuesit;

gj) Kur është e zbatueshme, aplikuesi ka procedura efikase për trajtimin e licencave të importit dhe eksportit lidhur me ndalimet e kufizimet, duke përfshirë masa për të dalluar mallrat që u nënshtrohen ndalimeve ose kufizimeve nga mallra të tjera dhe masa për të siguruar pajtueshmërinë me këto ndalime e kufizime.

2. Kur aplikuesi aplikon vetëm për një autorizim si një operator ekonomik i autorizuar për sigurinë dhe mbrojtjen, siç referohet në shkronjën “b”, të pikës 2, të nenit 40, të Kodit (OEAS), kërkesa e përcaktuar në shkronjën “d”, të pikës 1, nuk do të zbatohet.

Neni 51

Aftësia paguese financiare

(Shkronja “ç”, e nenit 41, të Kodit)

1. Kriteri i përcaktuar në shkronjën “ç”, të nenit 41, të Kodit, do të konsiderohet i përmbushur, kur:

a) aplikuesi nuk është subjekt i procedurave të falimentimit;

b) gjatë tri viteve të fundit, para dorëzimit të aplikimit, aplikuesi i ka përmbushur detyrimet e tij financiare për pagesat e detyrimeve doganore dhe të gjitha detyrimet e tjera, taksat apo pagesat, të cilat janë mbledhur ose që kanë lidhje me importin apo eksportin e mallrave;

c) aplikuesi, në bazë të regjistrimeve dhe informacioneve në dispozicion për tre vitet e fundit, para dorëzimit të aplikimit, ka qëndrueshmëri të mjaftueshme financiare për të përmbushur detyrimet dhe angazhimet e tij, duke pasur parasysh llojin dhe vëllimin e aktivitetit të biznesit, duke përfshirë që nuk ka asete negative neto, përveç rasteve kur ato mund të mbulohen.

2. Në qoftë se aplikuesi është i themeluar për më pak se 3 vjet, aftësia paguese e tij financiare, siç përmendet në shkronjën “ç”, të nenit 41, të Kodit, do të verifikohet në bazë të të dhënave dhe informacioneve që janë në dispozicion.

Neni 52

Standardet praktike të kompetencave ose kualifikimet profesionale

(Shkronja “d”, e nenit 41, të Kodit)

1. Kriteri i përcaktuar në shkronjën “d”, të nenit 41, të Kodit, konsiderohet i përmbushur në qoftë se plotësohet ndonjë nga kushtet e mëposhtme:

a) Aplikuesi ose personi i ngarkuar me çështjet doganore të aplikuesit plotëson një nga standardet praktike të kompetencës në vijim:

i. Ka një eksperiencë praktike të provuar me një minimum prej 3 vitesh në çështjet doganore;

ii. Ka standardet e cilësisë në lidhje me çështjet doganore të miratuara nga një organ i standardizimit shqiptar apo evropian.

b) Aplikuesi ose personi i ngarkuar me çështjet doganore të aplikuesit ka përfunduar me sukses trajnimin që mbulon legjislacionin doganor në fuqi, në masën e përfshirjes së tij në aktivitetet që kanë të bëjnë me doganat, të mbajtura nga një nga organet në vijim:

i. DPD-ja;

ii. një institucion shkollor i njohur për qëllime të sigurimit të kualifikimit të tillë nga DPD-ja ose një

institucion publik përgjegjës për trajnim profesional;

iii. një shoqatë profesionale apo tregtare e njohur nga DPD-ja ose e akredituar në Republikën e Shqipërisë, me qëllim dhënien e një kualifikimi të tillë.

2. Kur personi i ngarkuar për çështjet doganore të aplikuesit është një person i kontraktuar, kriteri i përcaktuar në shkronjën “ç”, të nenit 41, të Kodit, do të konsiderohet i përmbushur nëse personi i kontraktuar është një operator ekonomik i autorizuar për thjeshtësime doganore, siç referohet në shkronjën “a”, të pikës 2, të neni 40, të Kodit (OEAD).

Neni 53

Standardet e sigurisë dhe të mbrojtjes

(Shkronja “dh”, e nenit 41, të Kodit)

1. Kriteri i përcaktuar në shkronjën “dh”, të nenit 41, të Kodit, konsiderohet i përmbushur nëse plotësohen kushtet e mëposhtme:

a) Ndërtesat që do të përdoren në lidhje me operacionet e mbuluara nga autorizimi OEAS sigurojnë mbrojtje nga ndërhyrjet e paligjshme dhe janë ndërtuar nga materiale, të cilat i rezistojnë hyrjes së paligjshme; b) Të jenë vendosur masat e duhura për të parandaluar hyrjen e paautorizuar në zyra, zonat e transportit,

bankinat e ngarkimit, zonat e ngarkesave dhe vende të tjera përkatëse;

c) Të jenë marrë masat për lëvizjen e mallrave, të cilat përfshijnë mbrojtje kundër hyrjes ose shkëmbimit të paautorizuar, keqpërdorimit të mallrave dhe kundër ndërhyrjes në njësitë e ngarkesave;

ç) Aplikuesi të ketë marrë masa që lejojnë identifikimin e qartë të partnerëve të tij të biznesit dhe të sigurojë, nëpërmjet implementimit të marrëveshjeve përkatëse kontraktuale apo masave të përshtatshme të tjera, në përputhje me modelin e biznesit të aplikuesit, se ata partnerë të biznesit garantojnë sigurinë e pjesës së tyre në zinxhirin ndërkombëtar të furnizimit;

d) Aplikuesi kryen, për aq sa e lejon legjislacioni kombëtar, kontrolle të sigurisë për të punësuarit e ardhshëm, që do të punojnë në pozicione sensitive të sigurisë dhe, sipas rrethanave, kontrolle periodike të punonjësve aktualë, në pozita të tilla;

dh) Aplikuesi ka miratuar procedura të përshtatshme të sigurisë për çdo ofrues të jashtëm të shërbimeve të kontraktuara;

e) Aplikuesi siguron që stafi i tij të ketë përgjegjësinë e duhur për çështjet e sigurisë dhe të marrë pjesë rregullisht në programet për të rritur ndërgjegjësimin për këto çështje të sigurisë;

ë) Aplikuesi ka caktuar një person kontakti kompetent për çështjet lidhur me sigurinë dhe mbrojtjen.

2. Kur aplikanti është mbajtës i një certifikate të sigurisë e të mbrojtjes, të lëshuar në bazë të një konvente ndërkombëtare ose të një standardi ndërkombëtar të Organizatës Ndërkombëtare për Standardizim, apo nga një standard evropian i një organi evropian standardizimi, këto certifikata merren parasysh kur kontrollohet pajtueshmëria me kriteret e përcaktuara në shkronjën “d”, të nenit 41, të Kodit.

Kriteret do të konsiderohen të përmbushura në masën që është vërtetuar se kriteret për lëshimin e certifikatës janë identike ose ekuivalente me ato të përcaktuara në shkronjën “d”, të nenit 41, të Kodit.

Kriteret do të konsiderohen të përmbushura kur aplikuesi është mbajtës i një certifikate të sigurisë e të mbrojtjes, të lëshuar nga një vend tjetër me të cilin Republika e Shqipërisë ka lidhur një marrëveshje që parashikon njohjen e asaj certifikate.

Neni 54

Shqyrtimi i kritereve

(Neni 27, i Kodit)

1. Për qëllime të shqyrtimit të kriterëve të përcaktuara në shkronjat “b” e “d”, të nenit 41, të Kodit, DPD-ja duhet të sigurojë që verifikimet janë kryer në vend, në të gjitha ambientet që janë të lidhura me aktivitetet doganore të aplikuesit.

2. DPD-ja, për të marrë një vendim, mund të marrë në konsideratë rezultatet e vlerësimeve apo të auditimeve të kryera, në masën që i përket shqyrtimit të kriterëve të përmendura në nenin 41, të Kodit.

3. Për qëllimet e shqyrtimit nëse kriteret e përcaktuara në shkronjat “b”, “c” e “d”, të nenit 41, të Kodit, janë plotësuar, autoritetet doganore mund të marrin në konsideratë konkluzionet e ekspertëve të ofruara nga aplikuesi, kur eksperti që i ka hartuar konkluzionet nuk është i lidhur me aplikuesin, në kuptim të nenit 96.

4. Autoritetet doganore, kur shqyrtojnë përmbushjen e kriterëve të përcaktuara në nenin 41, të Kodit, duhet të marrin në konsideratë karakteristikat specifike të operatorëve ekonomikë, në veçanti të ndërmarrjeve të vogla dhe të mesme.

5. Shqyrtimi i kriterëve të përcaktuara në nenin 41, të Kodit, si dhe rezultatet e tij, duhet të dokumentohen nga DPD-ja.

Neni 55

Sistemi elektronik lidhur me statusin OEA

(Pika 1, e nenit 17, të Kodit)

1. Në mbështetje të pikës 1, të nenit 17, të Kodit, për shkëmbimin dhe ruajtjen e informacionit që ka të bëjë me aplikimet për një autorizim si operator ekonomik i autorizuar (OEA) dhe autorizimet e dhëna OEA për çdo ngjarje të mëvonshme apo akt që mund të ndikojë më pas në vendimin e parë, duke përfshirë anulimin, pezullimin, revokimin ose ndryshimin apo rezultatet e çdo monitorimi ose rivlerësimi, do të përdoret një sistem elektronik i ndërtuar për ato qëllime.

2. Kur është e zbatueshme, në mënyrë të veçantë kur statusi OEA është bazë për miratimin e autorizimeve apo lehtësirave sipas legjislacionit në fuqi, autoritetet doganore kompetente mund t'i japin autoritetit përkatës kombëtar përgjegjës për sigurinë e aviacionit civil informacionin e mëposhtëm:

a) autorizimet OEAS, duke përfshirë emrin e mbajtësit të autorizimit dhe, kur është e zbatueshme, ndryshimin e tyre ose revokimin apo pezullimin e statusit të operatorit ekonomik të autorizuar dhe arsyet për to;

b) çdo rivlerësim të autorizimeve OEAS dhe rezultatet e tyre.

Autoritetet kombëtare përgjegjëse për sigurinë e aviacionit civil do ta përdorin informacionin në fjalë vetëm për qëllime sigurie dhe do të zbatojnë masat e duhura teknike dhe organizative për mbrojtjen e këtij informacioni.

3. Deri në implementimin e sistemit të informatizuar, të referuar në planin e punës të miratuar nga ministri përgjegjës për financat, do të përdoret baza e të dhënave të sistemit qendror të DPD-së.

4. Deri në datën e përmirësimit të sistemit të informatizuar për OEA, sipas planit të punës të ministrit përgjegjës për financat, autoritetet doganore mund të lejojnë përdorimin e mjeteve të tjera, të ndryshme nga teknika elektronike e përpunimit të të dhënave, në lidhje me aplikimet dhe vendimet dhe, për çdo veprim/ngjarje pasues, i cili mund të ndikojë në aplikimin ose vendimin.

5. Në rastet e përmendura në pikën 4, për aplikimet për statusin e OEA dhe autorizimet për dhënien e statusit të OEA do të përdoren formularët e përcaktuar në anekset përkatëse të shtojcës C, bashkëlidhur këtij vendimi dhe pjesë përbërëse e tij.

6. Një aplikues nuk është e nevojshme të jetë i vendosur në territorin doganor të Republikës së Shqipërisë kur një marrëveshje ndërkombëtare, ndërmjet Republikës së Shqipërisë dhe një vendi

tjetër, në të cilin është vendosur operatori ekonomik, parashikon njohjen reciproke të certifikatave OEA dhe përcakton masat administrative për kryerjen e kontrolleve të duhura në emër të autoritetit doganor të Republikës së Shqipërisë, në qoftë se kërkohet.

Neni 56

Procedura e konsultimit dhe shkëmbimi i informacionit ndërmjet institucioneve

(Neni 27 i Kodit)

1. Nëse vlerësohet e nevojshme, autoritetet doganore mund të konsultohen me institucione të tjera brenda dhe jashtë vendit, sa i takon verifikimit të plotësimit të kriterëve të përcaktuara në nenin 41, të Kodit. Konsultimet kryhen në qoftë se shqyrtimi i një ose më shumë kriterëve të përcaktuara në nenet 49 deri 54 nuk mund të bëhet nga Drejtoria e Përgjithshme e Doganave, për shkak të mungesës së informacionit apo për pamundësinë e kontrollit të tij. Në këto raste, konsultimet do të bëhen brenda 60 (gjashtëdhjetë) ditëve, duke filluar nga data e komunikimit të informacionit nga Drejtoria e Përgjithshme e Doganave, në mënyrë që të lejojnë lëshimin e “Certifikatës OEA” ose refuzimin e aplikimit, brenda afateve të përcaktuara.

2. Kur, pas shqyrtimit të përcaktuar në nenin 54, institucioni i konsultuar vendos që aplikuesi nuk përmbush një ose më shumë kriterë, rezultatet e konsultimeve, të dokumentuara në mënyrë të rregullt, do të dërgohen te Drejtoria e Përgjithshme e Doganave, e cila refuzon aplikimin.

Neni 57

Refuzimi i aplikimit

(Neni 27 i Kodit)

Refuzimi i aplikimit për OEA nuk cenon vendimet e favorshme të marra në lidhje me aplikuesin, në përputhje me legjislacionin doganor ekzistues, përveç rasteve kur dhënia e këtyre vendimeve të favorshme është e bazuar në përmbushjen e ndonjë prej kriterëve OEA, që provohen se nuk janë përmbushur gjatë shqyrtimit të aplikimit OEA.

Neni 58

Kombinimi i të dyja llojeve të autorizimeve

(Pika 3, e nenit 40, të Kodit)

Kur një aplikues ka të drejtë t'i jepet edhe autorizimi OEAD dhe OEAS, DPD-ja mund të lëshojë një autorizim të kombinuar.

Neni 59

Revokimi i një autorizimi

(Neni 32 i Kodit)

1. Revokimi i një autorizimi OEA nuk cenon asnjë vendim të favorshëm, i cili është marrë në lidhje me të njëjtin person, përveç nëse statusi OEA ishte një kusht për këtë vendim të favorshëm ose nëse vendimi ishte bazuar në një kriter të listuar në nenin 41, të Kodit, i cili nuk është më i përmbushur.

2. Revokimi ose ndryshimi i një vendimi të favorshëm, i cili është marrë në lidhje me mbajtësit e autorizimit, nuk cenon automatikisht autorizimin OEA të atij personi.

3. Kur i njëjti person është një OEAD dhe një OEAS dhe kur neni 32 ose 15, i Kodit, është i zbatueshëm për shkak të mospërmbushjes së kushteve të përcaktuara në shkronjën “ç”, të nenit 41, të Kodit, autorizimi OEAD revokohet dhe autorizimi OEAS mbetet i vlefshëm.

Kur i njëjti person është një OEAS dhe një OEAD dhe kur neni 32, i Kodit, ose neni 32, është i zbatueshëm për shkak të mospërmbushjes së kushteve të përcaktuara në shkronjën “d”, të nenit 41, të

Kodit, autorizimi OEAS revokohet dhe autorizimi OEAD mbetet i vlefshëm.

Neni 60
Monitorimi
(Pika 5, e nenit 28, të Kodit)

1. Autoritetet doganore duhet të informojnë DPD-në, pa vonesë, për çdo faktor që lind pas dhënies së statusit të OEA, i cili mund të ndikojë në vazhdimësinë apo përmbajtjen e tij.

2. Kur një autoritet doganor revokon një vendim të favorshëm, i cili është marrë në bazë të statusit të OEA, ai njofton DPD-në.

KREU 3
KONTROLLET DOGANORE

SEKSIONI 1
MENAXHIMI I RISKUT

Neni 61
Informacion i përgjithshëm mbi menaxhimin e riskut dhe vlerësimin e riskut
(Neni 47 i Kodit)

1. Për qëllime të nenit 47, të Kodit, autoritetet doganore kryejnë menaxhim risku për të bërë dallimin ndërmjet niveleve të riskut, që lidhen me mallrat objekt i kontrollit ose mbikëqyrjes doganore dhe për të përcaktuar nëse mallrat do të jenë objekt i kontrolleve të veçanta doganore.

2. Përcaktimi i niveleve të riskut bazohet në vlerësimin e gjasave që të ndodhë një ngjarje me risk dhe ndikimin që ajo do të ketë. Bazat e përzgjedhjes së ngarkesave ose deklarimeve, të cilat do jenë objekt i kontrolleve doganore, përfshijnë një element rastësor.

Neni 62
Institucionet publike që shkëmbejnë informacion dhe forma e bashkëpunimit
(Neni 48 i Kodit)

1. Për të mundësuar zbatimin korrekt të legjislacionit doganor si dhe për qëllim të menaxhimit të riskut, Administrata Doganore shkëmben informacion me institucionet publike të mëposhtme:

- a) Autoritetet veterinarë;
- b) Autoritetet fito-sanitare;
- c) Autoritetet sanitarë;
- ç) Autoritetet statistikore;
- d) Autoritetet e tatim-taksave;
- dh) Autoritetet përgjegjëse për luftën kundër mashtrimit;
- e) Autoritetet përgjegjëse për ekonominë, politikën tregtare, duke përfshirë autoritetet bujqësore, kur duhet;
- ë) Autoritetet përgjegjëse për kontrollin kufitar dhe transportin;
- f) Autoritetet e pushtetit vendor;
- g) Autoritetet policore dhe të krimit ekonomik;
- h) Autoriteti i parandalimit të pastrimit të parave.

2. Pavarësisht nga përcaktimet e pikës 1, në rast se konsiderohet e nevojshme për qëllim të menaxhimit të riskut, autoritetet doganore shkëmbejnë informacion edhe me institucione të tjera publike ose private, shqiptare apo të huaja, rast pas rasti, lidhur me të dhënat që ato zotërojnë.

Neni 63
Modalitetet e shkëmbimit të informacionit
(Neni 48, i Kodit)

1. Për qëllim të menaxhimit të riskut, institucionet e përmendura në nenin 62, si dhe organizma të tjerë publikë apo privatë, mund të shkëmbejnë periodikisht ose rast pas rasti të dhënat që ato zotërojnë në lidhje me hyrjen, daljen, transitin, lëvizjen, magazinimin, trafikun postar, qarkullimin e mallrave, rezultatet e kontrolleve të kryera etj.

2. Kategoritë e informacionit që do të shkëmbehet, frekuenca e këtij shkëmbimi dhe modalitetet përkatëse përcaktohen në marrëveshjet e bashkëpunimit, të lidhura për këtë qëllim.

Neni 64
Kushtet për shkëmbimin e të dhënave
(Neni 48, i Kodit)

Autoritetet doganore shkëmbejnë informacion me autoritetet e përcaktuara në nenin 62 vetëm nëse ky proces është i nevojshëm për plotësimin e detyrimeve të tyre ligjore, në lidhje me lëvizjen e mallrave që i nënshtrohen një procedure doganore.

Neni 65
Masat për zbatimin uniform të kontrolleve doganore
(Neni 47, i Kodit)

Për qëllime të pikës 3, të nenit 47, të Kodit, me udhëzim të drejtorit të Përgjithshëm të Doganave, përcaktohen masat që sigurojnë zbatimin uniform të kontrolleve doganore, përfshirë shkëmbimin e informacionit mbi riskun dhe rezultatet e analizave të riskut, kriteret dhe standardet e përbashkëta të riskut, masat e kontrollit dhe fushat prioritare të kontrollit.

Neni 66
Sistemi elektronik në lidhje me menaxhimin e riskut dhe kontrollet doganore
(Pika 1, e nenit 17, të Kodit)
(Shtuar pika 3 me VKM nr. 872, datë 30.12.2024)

1. Për shkëmbimin dhe ruajtjen e informacionit që ka të bëjë me komunikimin ndërmjet autoriteteve doganore të çdo informacioni të lidhur me riskun, do të përdoret një sistem elektronik i ndërtuar për këto qëllime (sistemi i menaxhimit të riskut doganor).

2. Sistemi i përmendur në pikën 1, do të përdoret, gjithashtu, për komunikimin ndërmjet autoriteteve doganore në zbatim të standardeve dhe kriterëve të përbashkëta të riskut, zonave të kontrollit me prioritet të përbashkëta, menaxhimin e krizave doganore, shkëmbimin e informacionit lidhur me riskun dhe rezultatet e analizave të riskut, siç përmendet në pikën 5, të nenit 47, të Kodit, si dhe rezultatet e kontrolleve doganore.

3. Përveç sa parashikohet, sistemi i përmendur në nenin 233 përdoret për:

a) paraqitjen, përpunimin dhe ruajtjen e të dhënave të deklaratave përmbledhëse të hyrjes dhe të informacioneve të tjera, që lidhen me këto deklarata, në lidhje me analizën e riskut për qëllime të sigurisë dhe mbrojtjes, duke përfshirë mbështetjen e sigurisë së aviacionit dhe në lidhje me masat që duhet të merren, bazuar në rezultatet e kësaj analize;

b) shkëmbimin e informacionit për të dhënat e deklaratës përmbledhëse të hyrjes dhe rezultatet e analizës së riskut të deklaratave përmbledhëse të hyrjes për informacione të tjera, të nevojshme për të kryer këtë analizë të riskut dhe për masat e marra në bazë të analizës së riskut, duke përfshirë

rekomandimet në vendet e kontrollit dhe rezultatet e këtyre kontrolleve;

c) shkëmbimin e informacionit për monitorimin dhe vlerësimin e zbatimit të kriterëve dhe standardeve të përbashkëta të sigurisë dhe mbrojtjes dhe të masave të kontrollit dhe fushave prioritare të kontrollit, të përmendura pikën 3 të nenit 47 të Kodit.

Seksioni 2

Bagazhi i transportuar nga ajri dhe deti

Nënseksioni 1

Bagazhi i dorës dhe bagazhi i regjistruar të cilat transportohen nga ajri

Neni 67

Fluturimet transit

(Neni 50, i Kodit)

1. Kontrollët doganorë dhe formalitetet e zbatueshme në bagazhet e dorës dhe në bagazhet e regjistruara të personave që fluturojnë nga një aeroport jo i Republikës së Shqipërisë në një avion, i cili, pas një ndalese në një aeroport të Republikës së Shqipërisë vazhdon në një tjetër aeroport të Republikës së Shqipërisë, do të kryhen në aeroportin e fundit ndërkombëtar të Republikës së Shqipërisë.

Bagazhet e dorës dhe bagazhi i regjistruar u nënshtrohen rregullave të zbatueshme për bagazhin e personave që vijnë nga një vend tjetër, përveç rastit kur personi që mban një bagazh të tillë provon statusin e mallrave të përfshira në të si mallra shqiptare.

2. Kontrollët doganorë dhe formalitetet e zbatueshme në bagazhet e dorës dhe bagazhet e regjistruara të personave që fluturojnë nga një aeroport i Republikës së Shqipërisë në një avion, i cili ndalon në një aeroport tjetër të Republikës së Shqipërisë para se të vazhdojë për në një aeroport jo të Republikës së Shqipërisë, do të kryhet në aeroportin e parë ndërkombëtar të Republikës së Shqipërisë.

Bagazhi i dorës, për të qartësuar statusin doganor të mallrave shqiptare, mund të jetë objekt kontrolli në aeroportin e fundit ndërkombëtar të Republikës së Shqipërisë ku avioni ndalon.

Neni 68

Fluturimet transit në avionin e biznesit dhe atë turistik

(Neni 50, i Kodit)

Kontrollët doganorë dhe formalitetet e zbatueshme për bagazhin e personave në bordin e avionit të biznesit ose atë turistik, kryhen në aeroportet e mëposhtme:

a) Për fluturimet që vijnë nga një aeroport jo i Republikës së Shqipërisë dhe ku avioni, pas një ndalese në një aeroport të Republikës së Shqipërisë vazhdon në një aeroport tjetër të Republikës së Shqipërisë, kryhen në aeroportin e parë ndërkombëtar të Republikës së Shqipërisë;

b) Për fluturimet që vijnë nga një aeroport i Republikës së Shqipërisë dhe ku avioni, pas një ndalese në një aeroport të Republikës së Shqipërisë, vazhdon për në një aeroport tjetër jo të Republikës së Shqipërisë, në aeroportin e fundit ndërkombëtar të Republikës së Shqipërisë.

Neni 69

Fluturime me transbord në hyrje

(Neni 50, i Kodit)

1. Kur bagazhi mbërrin në një aeroport të Republikës së Shqipërisë në bordin e një avionit që vjen nga një aeroport jo i Republikës së Shqipërisë dhe është transferuar/transborduar në atë aeroport të Republikës së Shqipërisë në një avion tjetër, i cili fluturon brenda Republikës së Shqipërisë, do të

zbatohen pikat 2 dhe 3.

2. Kontrollat doganore dhe formalitetet që zbatohen për bagazhet e regjistruara duhet të kryhen në aeroportin e fundit ndërkombëtar të Republikës së Shqipërisë, në mbërritjen e fluturimit brenda Republikës së Shqipërisë. Megjithatë, kontrollat doganore dhe formalitetet që zbatohen për bagazhet e regjistruara, që vijnë nga një aeroport jo i Republikës së Shqipërisë dhe transferohen/transbordohen në një aeroport ndërkombëtar të Republikës së Shqipërisë, në një avion që shkon për në një tjetër aeroport ndërkombëtar të Republikës së Shqipërisë, mund të kryhen në aeroportin ndërkombëtar të Republikës së Shqipërisë, ku bëhet transferimi i bagazhit të regjistruar.

Kontrollat doganore dhe formalitetet që zbatohen për bagazhet e regjistruara, në raste përjashtimore dhe si shtesë e kontrolleve e formaliteteve të përcaktuara në pikën 1, mund të kryhen në aeroportin e parë ndërkombëtar të Republikës së Shqipërisë, kur është e nevojshme, në vijim të kontrollit të bagazhit të dorës.

3. Kontrollat doganore dhe formalitetet e zbatueshme për bagazhin e dorës duhet të kryhen në aeroportin e parë ndërkombëtar të Republikës së Shqipërisë.

Kontrollat doganore shtesë dhe formalitetet e zbatueshme për bagazhin e dorës mund të kryhen në aeroportin e mbërritjes së një fluturimi brenda Republikës së Shqipërisë, vetëm në raste përjashtimore, kur konsiderohet e nevojshme në vijim të kontrolleve të bagazhit të regjistruar.

Neni 70

Fluturimet me transbord në dalje

(Neni 50, i Kodit)

1. Kur bagazhi ngarkohet në një aeroport të Republikës së Shqipërisë, në një avion të një fluturimi brenda Republikës së Shqipërisë, dhe më pas transferohet/transbordohet në një tjetër aeroport të Republikës së Shqipërisë, në një avion, destinacioni i të cilit është një aeroport jashtë Republikës së Shqipërisë, do të zbatohen pikat 2 dhe 3.

2. Kontrollat doganore dhe formalitetet që zbatohen për bagazhet e regjistruara duhet të kryhen në aeroportin e parë ndërkombëtar të nisjes nga Republika e Shqipërisë. Megjithatë, kontrollat doganore dhe formalitetet që zbatohen për bagazhet e regjistruara, pasi janë ngarkuar në një avion në një aeroport ndërkombëtar të Republikës së Shqipërisë dhe transbordohen në një aeroport tjetër ndërkombëtar të Republikës së Shqipërisë, në një avion me destinacion një aeroport jashtë Republikës së Shqipërisë, mund të kryhen në aeroportin ndërkombëtar të Republikës së Shqipërisë, ku kryhet transbordimi i bagazhit të dorës.

Kontrollat doganore dhe formalitetet që zbatohen për bagazhet e regjistruara, në raste përjashtimore dhe përveç kontrolleve e formaliteteve të përcaktuara në pikën 1, mund të kryhen në aeroportin e fundit ndërkombëtar të Republikës së Shqipërisë, kur konsiderohet e nevojshme, në vijim të kontrolleve të bagazhit të dorës.

3. Kontrollat doganore dhe formalitetet që zbatohen për bagazhin e dorës duhet të kryhen në aeroportin e fundit ndërkombëtar të Republikës së Shqipërisë.

Kontrollat doganore shtesë dhe formalitetet që zbatohen për bagazhin e dorës mund të kryhen në aeroportin e nisjes së një fluturimi, brenda Republikës së Shqipërisë, vetëm në raste përjashtimore, kur konsiderohet e nevojshme, në vijim të kontrolleve të bagazhit të regjistruar.

Neni 71

Transbordimi në një avion turistik apo biznesi

(Neni 50, i Kodit)

1. Kontrollat doganore dhe formalitetet që zbatohen për bagazhet që mbërrijnë në një aeroport të Republikës së Shqipërisë në bordin e një fluturimi të planifikuar ose charteri, nga një aeroport

jashtë Republikës së Shqipërisë, dhe transbordohen në atë aeroport të Republikës së Shqipërisë, në një avion turistik apo biznesi, në një fluturim brenda Republikës së Shqipërisë, do të kryhen në aeroportin e mbërritjes së fluturimit të planifikuar apo charterit.

2. Kontrollat doganore dhe formalitetet që zbatohen për bagazhin e ngarkuar në një aeroport të Republikës së Shqipërisë, në një avion turistik apo biznesi, në një fluturim brenda Republikës së Shqipërisë për transbordim në një aeroport tjetër të Republikës së Shqipërisë, në një fluturim të planifikuar apo charter, destinacioni i të cilit është një aeroport jashtë Republikës së Shqipërisë, duhet të kryhen në aeroportin e nisjes së fluturimit të planifikuar apo charterit.

Neni 72

Transferimet ndërmjet aeroporteve në territorin e Republikës së Shqipërisë

(Neni 50, i Kodit)

Autoritetet doganore mund të kryejnë kontrole në aeroportin ndërkombëtar të Republikës së Shqipërisë, ku bëhet transferimi i bagazhit të regjistruar, si në vijim:

a) Bagazhet që vijnë nga një aeroport jashtë Republikës së Shqipërisë dhe transferohen në një aeroport ndërkombëtar të Republikës së Shqipërisë, në një avion që fluturon për në një aeroport ndërkombëtar të Republikës së Shqipërisë;

b) Bagazhet, pasi janë ngarkuar në një avion në një aeroport ndërkombëtar të Republikës së Shqipërisë, për fluturim në një aeroport tjetër ndërkombëtar të Republikës së Shqipërisë, në territorin e Republikës së Shqipërisë, në një avion me destinacion një aeroport jashtë Republikës së Shqipërisë.

Neni 73

Masat për parandalimin e transferimit të paligjshëm

(Neni 50, i Kodit)

Autoritetet doganore duhet të sigurojnë që:

a) në mbërritje në një aeroport ndërkombëtar të Republikës së Shqipërisë, ku duhet të kryhen kontrollet doganore, të bëhet monitorimi i çdo transferimi të mallrave që gjenden në bagazhin e dorës, përpara se të jenë kryer kontrole në atë bagazh;

b) në nisje nga një aeroport ndërkombëtar i Republikës së Shqipërisë, ku duhet të kryhen kontrollet doganore, të bëhet monitorimi i çdo transferimi të mallrave që gjenden në bagazhin e dorës, pasi të jenë kryer kontrole në atë bagazh;

c) në mbërritjen në një aeroport ndërkombëtar të Republikës së Shqipërisë, ku duhet të kryhen kontrollet doganore, marrjen e masave të duhura për të parandaluar çdo transferim të mallrave që gjenden në bagazhin e regjistruar, përpara se të jenë kryer kontrole në atë bagazh;

ç) në nisje nga një aeroport ndërkombëtar i Republikës së Shqipërisë, ku duhet të kryhen kontrollet doganore, janë marrë masat e duhura për të parandaluar çdo transferim të mallrave të përfshira në bagazhin e regjistruar, pasi të jenë kryer kontrole në atë bagazh.

Neni 74

Etiketa e bagazhit

(Neni 50, i Kodit)

Bagazhet e regjistruara në një aeroport të Republikës së Shqipërisë do të identifikohen me një etiketë të ngjitur në bagazh. Modeli dhe karakteristikat teknike të etiketës përcaktohen në aneksin 12-03, të shtojcës B, bashkëlidhur këtij vendimi dhe pjesë përbërëse e tij.

Neni 75
Lista e aeroporteve ndërkombëtare të Republikës së Shqipërisë
(Neni 50, i Kodit)

DPD-ja publikon listën e aeroporteve ndërkombëtare të Republikës së Shqipërisë dhe përditëson çdo ndryshim në atë listë.

Nënseksioni 2
Bagazhi i transportuar nga deti

Neni 76
Anijet për shëtitje/argëtim
(Neni 50, i Kodit)

Kontrollet doganore dhe formalitetet e zbatueshme për bagazhin e personave në bordin e anijes për shëtitje/argëtim do të kryhen në të gjitha portet e Republikës së Shqipërisë, pavarësisht nga origjina apo destinacioni i anijes.

Neni 77
Kalimet e transferimit
(Neni 50, i Kodit)

Kontrollet doganore dhe formalitetet e zbatueshme për bagazhin e personave që përdorin një shërbim detar, që sigurohet nga e njëjta anije, e cila kryen udhëtime të njëpasnjëshme nga një vend jashtë Republikës

së Shqipërisë dhe që ndalon ose përfundon në një port jo të Republikës së Shqipërisë, do të kryhen në çdo port të Republikës së Shqipërisë, në të cilin bagazhi është ngarkuar ose shkarkuar.

KREU 4
Përfaqësimi në doganë

Seksioni 1
Përfaqësimi i drejtpërdrejtë dhe i tërthortë

Neni 78
E drejta e përfaqësimit
(Nenet 24 dhe 25, të Kodit)

1. Në zbatim të pikës 1, të nenit 24, të Kodit, të gjitha përfaqësimet e tërthorta duhet të bëhen vetëm nga agjentë doganorë të licencuar.

2. Agjentë doganorë konsiderohen personat (individët) të licencuar nga DPD-ja për të kryer formalitetet doganore.

Personi (individi), në këto raste, duhet të përmbushë kushtet e mëposhtme:

- a) Të ketë shtetësi shqiptare;
- b) Të ketë diplomë universitare;
- c) Të gjykohej i besueshëm nga administrata doganore;
- ç) Të kalojë provimin e parashikuar në nenin 82;
- d) Të ketë eksperiencë pune si punonjës pranë një agjencie doganore jo më pak se 1 vit;
- dh) Nuk duhet të jetë i punësuar në administratë publike apo shtetërore.

Dokumentacioni që duhet të depozitohet për licencim do të përcaktohet me udhëzim të drejtorit të

Përgjithshëm të Doganave.

3. Agjentët doganorë të licencuar organizohen në agjenci doganore si persona juridikë, aktiviteti kryesor i të cilëve ka të bëjë me kryerjen e të gjitha formaliteteve doganore, për çdo lloj regjimi doganor në emër të tij, por për llogari të një personi tjetër.

4. Agjencia doganore, në këto raste, duhet të përmbushë kushtet e mëposhtme:

- a) Të gjykohet e besueshme nga administrata doganore;
- b) Të paraqesë një kopje të vendimit për regjistrimin e tij si person juridik;
- c) Të depozitojë një garanci në shumën 50 000 000 (pesëdhjetë milionë) lekë, në përputhje me nenet 84 deri 93, të Kodit.

Dokumentacioni për përmbushjen e kushteve që duhet të depozitohet për licencim përcaktohet me udhëzim të drejtorit të Përgjithshëm të Doganave.

5. Personat që kanë kryer shkelje të qëllimshme ose të përsëritura të legjislacionit doganor, të akcizës ose atij tatimor, si edhe që janë përfshirë në ndonjë aktivitet të paligjshëm ose që janë dënuar për vepra penale, nuk kanë të drejtë të marrin licencë për të vepruar si agjentë doganorë. Po kështu, nuk kanë të drejtë të rimarrin licencë ata persona, të cilëve u është revokuar nga autoritetet doganore licenca e lëshuar për agjencitë doganore para datës 1 qershor 2017.

6. Të gjitha dokumentet e nënshkruara nga një agjent doganor duhet të vulosen me vulën e tij personale. Kjo vulë duhet të ketë emrin e agjentit, emrin e agjencisë dhe numrin identifikues të tij. Nënshkrimi dhe/ose

vulosja mund të bëhet edhe në rrugë elektronike, sipas legjislacionit në fuqi.

7. Përfaqësuesit e drejtpërdrejtë, për t'u licencuar nga DPD-ja duhet të plotësojnë këto kushte:

- a) Të kenë shtetësi shqiptare;
- b) Të kenë diplomë universitare;
- c) Të gjykohen të besueshëm nga administrata doganore;
- ç) Të zotërojnë një marrëveshje kontraktuale;
- d) Të zotërojnë një prokurë përfaqësimi;
- dh) Nuk duhet të jenë të punësuar në administratën publike apo shtetërore.

8. Drejtori i Përgjithshëm i Doganave përcakton me udhëzim procedurën dhe dokumentacionin e nevojshëm për licencimin e përfaqësimit të drejtpërdrejtë dhe të tërthortë.

Neni 79

Regjistri i përfaqësuesve doganorë

(Nenet 24 dhe 25, të Kodit)

DPD-ja regjistron agjentët doganorë të licencuar dhe personelin e tyre ndihmës, si dhe përfaqësuesit e drejtpërdrejtë, në një regjistër të veçantë. Forma dhe përmbajtja e këtij regjistri përcaktohen nga DPD-ja.

Neni 80

Prova e përfaqësimit

(Neni 25 i Kodit)

1. Autoritetet doganore, për çdo operacion doganor, mund t'i kërkojnë çdo personi, i cili deklaron që po vepron si një përfaqësues doganor, prova që atij i është lëshuar akti ligjor i përfaqësimit (autorizim/prokurë) nga i përfaqësuari, për kryerjen e formaliteteve doganore.

2. Ky autorizim duhet të përmbajë, të paktën, të dhënat e mëposhtme:

- a) Emrin e autorizuesit;
- b) Shtrirjen/tagrat e përfaqësimit;
- c) Numrin e NUIS/NIPT, në rast se autorizuesi është person juridik ose fizik;

c) Firmën e autorizuesit.

Neni 81

Njoftimi për ndryshimin e informacionit të dhënë autoriteteve doganore

(Nenet 24 dhe 25, të Kodit)

1. Të gjithë përfaqësuesit doganorë janë të detyruar të njoftojnë, brenda 15 (pesëmbëdhjetë) ditëve, DPD-në për të gjitha ndryshimet e adresave të tyre, të statusit ligjor dhe të atij informacioni që u është dhënë autoriteteve doganore kur kanë paraqitur kërkesën e tyre për t'u bërë përfaqësues doganorë.

2. Agjentët doganorë mund të transferohen nga një agjenci doganore në një tjetër vetëm me miratim të DPD-së.

Neni 82

Kërkesa për pajisjen me licencë në rastin e përfaqësimit të tërthortë

(Nenet 24 dhe 25, të Kodit)

1. Kërkesa për të marrë licencën e agentit doganor paraqitet pranë DPD-së. Kërkesa duhet bërë me shkrim dhe shoqërohet me dokumentet e kërkuara në përputhje me pikën 2, të nenit 78. Dokumentet duhet të paraqiten pranë DPD-së.

2. Provimet për marrjen e licencës së agentit doganor organizohen nga DPD-ja. Proviimi konsiston në një kontroll, me shkrim, mbi njohuritë e përgjithshme teorike si dhe zbatimin praktik të legjislacionit doganor.

3. Komisioni që drejton provimin kryesohet nga drejtori i Përgjithshëm i Doganave dhe ka në përbërje të tij drejtorin e procedurave, ose përgjegjësin e një prej sektorëve në këtë drejtori, dhe dy kryetarë degësh doganore.

4. Drejtori i Përgjithshëm i Doganave lëshon licencë pa afat për të vepruar si agent doganor vetëm për kandidatët që kalojnë provimin dhe përmbushin të gjitha kushtet e tjera të përcaktuara. Kjo licencë lëshohet kur plotësohen të gjitha kushtet. Çdo agjenti doganor i jepet një numër identifikimi individual.

Neni 83

Personeli ndihmës

(Nenet 24 dhe 25, të Kodit)

1. Agjencitë doganore mund të punësojnë personel ndihmës. Personeli ndihmës autorizohet nga DPD-ja

dhe duhet të përmbushë kushtet e mëposhtme:

- a) Të ketë shtetësi shqiptare;
- b) Të jetë mbi moshën 21 vjeç;
- c) Të gjykohej i besueshëm nga administrata doganore.

2. Personeli ndihmës nuk lejohet të nënshkruajë asnjë deklaratë doganore. Deklaratat nënshkruhen vetëm nga një agjent doganor i licencuar.

3. Agjentët doganorë, pa rënë ndesh me përgjegjësinë ligjore të vetë personelit, mbajnë përgjegjësi të plotë për veprimet e ndërmarra nga personeli i tyre ndihmës gjatë kryerjes së formaliteteve doganore.

Neni 84

Karta e identifikimit

(Nenet 24 dhe 25, të Kodit)

Agjentët doganorë dhe personeli i tyre ndihmës pajisen me kartë identifikimi, të cilën duhet t'a mbajnë në çdo rast ku dhe kur ata ushtrojnë aktivitetin e tyre si përfaqësues. Forma dhe përmbajtja e kartës së

identifikimit parashikohet me udhëzim të drejtorit të Përgjithshëm të Doganave.

Neni 85

Regjistrimi i operacioneve

(Nenet 24 dhe 25, të Kodit)

1. Agjentët doganorë duhet të mbajnë një regjistrë ku regjistrohen të gjitha operacionet e kryera prej tyre. Forma dhe përmbajtja e këtij regjistri përcaktohen nga DPD-ja.

2. Në përputhje me kufirin kohor të përcaktuar në nenin 52, të Kodit, agjentët doganorë duhet të ruajnë autorizimet e përfaqësimit, regjistrat dhe dokumentet që dëshmojnë se kanë paguar të gjitha detyrimet.

Neni 86

Pagesa e detyrimeve

(Nenet 24 dhe 25, të Kodit)

Agjentëve doganorë u kërkohet të paguajnë çdo borxh doganor që lind, në përputhje me nenet 72, pika 3, dhe 76, pika 3, të Kodit.

Neni 87

Pezullimi, shfuqizimi dhe ankimi

(Nenet 24, 25 dhe 28, të Kodit)

1. Agjentët doganorë, që punojnë për një person juridik, janë përgjegjës për çdo informacion të dhënë në një deklaratë doganore apo kur kryejnë ndonjë shkelje, siç parashikohet në titullin IX, të Kodit.

2. Pa rënë ndesh me të gjitha formalitetet e parashikuara nga Kodi, për vjeljen e borxhit doganor drejtori i Përgjithshëm i Doganave, me një vendim të arsyetuar, mund të pezullojë licencën e agjentit doganor, në rastet e mëposhtme:

- a) Për mospagim të detyrimeve doganore;
- b) Për mosplotësim të ndonjë detyrimi tjetër ndaj autoriteteve doganore;
- c) Kur dyshohet se ka kryer një shkelje të legjislacionit doganor në fuqi.

Pezullimi zgjat për aq kohë sa të përmbushen detyrimet e mësipërme.

3. Drejtori i Përgjithshëm i Doganave, me një vendim të arsyetuar, shfuqizon licencën dhe, më pas, çregjistrosh nga regjistri agjentët doganorë, të cilët:

a) nuk arrijnë të përmbushin ndonjë nga kushtet e parashikuara në shkronjat "a" dhe "c", të pikës 2, të nenit 78, ose shkronjat "a", "b" dhe "c", të pikës 4, të nenit 78;

b) kryejnë, në mënyrë të qëllimshme ose të përsëritur, një nga shkeljet e parashikuara në titullin IX, të Kodit;

c) janë dënuar për shkelje të tjera fiskale ose penale.

4. Vendimi për shfuqizimin ose pezullimin e licencës duhet t'i njoftohet personit të interesuar brenda 10 (dhjetë) ditëve, nga data e marrjes së vendimit. Agjenti doganor, brenda 30 (tridhjetë) ditëve nga marrja dijeni, mund të ankohet kundër vendimit të drejtorit të Përgjithshëm të Doganave te ministri përgjegjës për financat. Në këto raste, ankimi duhet të shoqërohet me të gjithë dokumentacionin e nevojshëm, mbi bazën e të cilit mbështeten argumentet e ankimit. Nëse ankimi nuk bëhet brenda afatit dhe/ose nuk shoqërohet me dokumentacionin e nevojshëm, ankimi konsiderohet se nuk është bërë.

5. Ministri përgjegjës për financat merr një vendim dhe ia njofton personit të interesuar brenda 60 (gjashtëdhjetë) ditëve nga data e depozitimit të ankimit, së bashku me dokumentacionin e nevojshëm mbi bazën e të cilit mbështeten argumentet e ankimit. Kundër vendimit të ministrit përgjegjës për financat, personi i interesuar mund të ankohet në Gjykatën Administrative.

6. Paraqitja e ankimit nuk ndërpret efektet ligjore të shfuqizimit ose të pezullimit.

Neni 88

Vlefshmëria e licencave

(Nenet 24 dhe 25, të Kodit)

1. Licencat e lëshuara agjencie doganore para datës 1 qershor 2017 janë të vlefshme për sa kohë nuk janë pezulluar apo shfuqizuar, në përputhje me dispozitat e këtij vendimi.

2. Licencat e lëshuara për agjentët doganorë persona fizikë, para datës 1 qershor 2017, do të vazhdojnë të mbeten në fuqi deri në 3 muaj pas hyrjes në fuqi të këtij vendimi, me qëllim përmbushjen e të gjitha detyrimeve.

TITULLI II

FAKTORËT, MBI BAZËN E TË CILËVE ZBATOHEN DETYRIMET E IMPORTIT OSE EKSPORTIT DHE MASA TË TJERA NË KUADËR TË TREGTISË SË MALLRAVE

KREU 1

Trajtimi tarifor favorizues për arsye të llojit të mallrave dhe për arsye të përdorimit të tyre të veçantë

Seksioni 1

Dispozita të përgjithshme

Neni 89

(Pika 2, e nenit 56 të Kodit)

Në përputhje me shkronjën “e”, të pikës 2, të nenit 56, të Kodit, ky kre përcakton dispozitat lidhur me trajtimin tarifor favorizues.

Seksioni 2

Trajtimi tarifor favorizues për arsye të natyrës së mallrave

Nënseksioni 1

Mallrat që u nënshtrohen disa kushteve

Neni 90

Kushti i denatyrimit dhe kushti për disa tipe farash

(Shkronja “e”, e pikës 2, e nenit 56, të Kodit)

1. Klasifikimi në nënkrerët tariforë, të përcaktuara në NKM, i nënshtrohet kushtit të denatyrimit, në mënyrë që mallrat të jenë të papërshtatshëm për konsum njerëzor, duke përdorur një nga denatyruesit dhe sasitë e përcaktuara në NKM.

Denatyrimi duhet të kryhet në mënyrë të tillë, që të sigurojë se produkti që do të denatyrohet dhe lënda denatyruese janë përzier në mënyrë të njëtrajtshme dhe nuk mund të ndahen përsëri në një mënyrë ekonomikisht të vlefshme.

2. Për disa tipe farash, klasifikimi në nënkrerët tariforë, i përcaktuar në NKM-ja, i nënshtrohet kushtit që personi i interesuar u provon autoriteteve doganore kompetente të Republikës së Shqipërisë

se farat do të përdoren realisht për mbjellje.

Nënseksioni 2

Lejimi i mallrave me trajtim tarifor favorizues, për arsye të përdorimit të tyre të veçantë

Neni 91

Kushtet

(Shkronja “e”, e pikës 2, e nenit 56, të Kodit)

1. Vendosja e mallrave në qarkullim të lirë, me trajtim tarifor favorizues për arsye të përdorimit të tyre të veçantë, është objekt i lëshimit të një autorizimi, me shkrim, për personin që importon mallrat ose që i ka

importuar ato për qarkullim të lirë. Autorizimi në fjalë lëshohet nga autoritetet doganore me aplikimin e personit të interesuar. Në këto raste zbatohen *mutatis mutandis* dispozitat e nenit 84 e në vijim të Kodit. Aplikimi duhet të përmbajë informacionin e mëposhtëm:

- a) Emrin dhe adresën e kërkuarit;
- b) Një përshkrim përmbledhës të impianteve që do të përdoren për kryerjen e trajtimeve të propozuara;
- c) Llojin e trajtimit të propozuar;
- d) Llojin dhe sasinë e mallrave që do të përdoren;
- d) Kur është rasti, llojin, sasinë dhe përshkrimin tarifor të mallrave të përfutuara. Personi i interesuar u mundëson autoriteteve doganore të identifikojnë mallrat në ambientin ose ambientet e tij gjatë gjithë procesit të trajtimit të tyre.

2. Të gjitha mallrat duhet të përdoren për qëllimin e veçantë, të përcaktuar brenda një viti nga data në të cilën nga autoritetet doganore është pranuar deklarata për qarkullim të lirë.

Afati kohor, i përcaktuar, mund të zgjatet nga autoritetet doganore në qoftë se mallrave nuk u është caktuar përdorimi i veçantë, i përcaktuar, si rrjedhojë e rrethanave të paparashikuara ose forcave madhore apo kërkesave të domosdoshme që lindin gjatë trajtimit të mallrave.

Mallrat konsiderohen se janë përdorur në mënyrën e veçantë kur të gjitha mallrat janë përdorur në këtë mënyrë, brenda kufirit kohor të vendosur.

Mbetjet dhe hedhurinat, që dalin nga trajtimi i mallrave, dhe frot, si pasojë e humbjeve natyrore, konsiderohen si mallra, të cilëve u është caktuar një përdorim i veçantë.

Autoritetet doganore mund të kufizojnë periudhën e vlefshmërisë së autorizimit, të përmendur në pikën 1. Kur autorizimi shfuqizohet, mbajtësi i autorizimit paguan, menjëherë, detyrimet e importit, të përcaktuara në përputhje me nenin 75, të Kodit, për ato mallra, të cilave nuk u është përcaktuar ende një përdorim i veçantë.

3. Mbajtësi i autorizimit është i detyruar:

- a) t'i përdorë mallrat për qëllimin e caktuar;
- b) të mbajë dhe të ruajë regjistrime, për t'u mundësuar autoriteteve doganore kryerjen e çdo kontrolli që ata e konsiderojnë të nevojshëm, për të siguruar se mallrat janë vendosur në përdorimin e veçantë të përcaktuar.

4. Autoritetet doganore nuk miratojnë përdorimin e mallrave në një mënyrë të ndryshme nga ajo që është parashikuar për trajtimin tarifor, të përmendur në pikën 2, për aq kohë sa mbajtësi i autorizimit t'u argumentojë në mënyrë bindëse autoriteteve doganore se ka qenë e pamundur, për arsye që lidhen me situatën e tij ose të vetë mallrave, që t'i vendosë ato në përdorimin e veçantë të përcaktuar.

5. Miratimi i përmendur në këtë kapitull e kushtëzon mbajtësin e autorizimit të paguajë shumën e detyrimeve të importit që përcaktohet në nenin 75, të Kodit.

6. Autoritetet doganore nuk do të lejojnë eksportimin e mallrave nga territori doganor i Republikës së Shqipërisë, ose shkatërrimin e mallrave nën mbikëqyrjen doganore, për aq kohë sa mbajtësi i autorizimit nuk u ka argumentuar, në mënyrë bindëse se ka qenë e pamundur, për arsye që lidhen me situatën e tij ose të vetë mallrave, që t'i vendosë ato në përdorimin e veçantë, të përcaktuar. Kur miratohet eksportimi i mallrave nga territori doganor i Republikës së Shqipërisë, mallrat konsiderohen si mallra joshqiptare, nga momenti i pranimit të deklaratës së eksportit.

KREU 2

Tarifa doganore dhe klasifikimi tarifar i mallrave

Seksioni 1

Menaxhimi i kuotave tarifore

Neni 92

Rregullat e përgjithshme për menaxhimin e kuotave tarifore

(Pika 4, e nenit 56, të Kodit)

(Shtuar pika 4 me VKM nr. 872, datë 30.12.2024)

1. Kuotat tarifore të hapura në përputhje me legjislacionin në fuqi, që i referohen metodës së administrimit në këtë nen dhe në nenet 93 deri 95, do të menaxhohen në përputhje me rendin kronologjik të datave të pranimit të deklaratave doganore për çlirim në qarkullim të lirë.

2. Për qëllime të këtij seksioni, deklarata për çlirim në qarkullim të lirë, e pranuar nga autoritetet doganore në 1, 2 ose 3 janar, do të konsiderohet se është pranuar më 3 janar, të të njëjtit vit. Megjithatë, kur një nga ato ditë është e shtunë apo e diel, një pranim i tillë do të konsiderohet sikur ka ndodhur më 4 janar të atij viti.

3. Për qëllime të këtij seksioni, ditët e punës nënkuptojnë ditët që nuk janë ditë pushimi për institucionet publike në Republikën e Shqipërisë.

4. Çdo kuotë tarifore në Republikën e Shqipërisë identifikohet nga një numër rendor, që lehtëson menaxhimin e tij.

Neni 93

Përgjegjësitë për menaxhimin e kuotave tarifore

(Pika 4, e nenit 56, të Kodit)

1. Autoritetet doganore do të shqyrtojnë nëse një kërkesë për të përfituar nga një kuotë tarifore, e bërë nga deklaruesi në një deklaratë doganore për çlirim në qarkullim të lirë, është e vlefshme, në përputhje me legjislacionin në fuqi lidhur me hapjen e kuotës tarifore.

2. Kur deklarata doganore për çlirim në qarkullim të lirë, që përmban një kërkesë të vlefshme nga deklaruesi për të përfituar nga kuota tarifore, pranohet dhe të gjitha dokumentet mbështetëse të kërkuara për dhënien e kuotës tarifore u janë dhënë autoriteteve doganore, autoritetet doganore kompetente do të tërheqin, nëpërmjet sistemit elektronik, nga kontingjenti tarifar sasinë përkatëse që i përkon nevojave të tij.

Neni 94

Anulimi i kërkesave dhe kthimi i sasive të pashfrytëzuara, të ndara sipas kuotave tarifore

(Pika 4, e nenit 56, të Kodit)

1. Autoritetet doganore do të kthejnë menjëherë, në sistemin elektronik, të përmendur në nenin 95,

çdo sasi që është tërhequr në mënyrë të gabuar. Megjithatë, detyrimi për t'u kthyer nuk zbatohet kur një shpërndarje e gabuar, që përfaqëson një borxh doganor prej më pak se vlera ekuivalente në lekë të 10 eurove, zbulohet pas muajit të parë, që vjen pas përfundimit të periudhës së vlefshmërisë së kuotës tarifore në fjalë.

2. Kur autoritetet doganore bëjnë të pavlefshme deklaratën doganore, në lidhje me mallrat që janë objekt i një kërkesë për të përfituar nga kuota tarifore, autoritetet doganore duhet të anulojnë të gjithë kërkesën për të përfituar nga kuota tarifore. Autoritetet doganore kompetente, menjëherë, do të kthejnë sasinë e caktuar në sistemin elektronik, të përmendur në nenin 95.

Neni 95

Sistemi elektronik në lidhje me menaxhimin e kuotave tarifore

(Pika 1, e nenit 17, dhe pika 4, e nenit 56, të Kodit)

Për menaxhimin e kuotave tarifore do të përdoret një sistem elektronik i ngritur për këtë qëllim, sipas pikës 1, të nenit 17, të Kodit.

Seksioni 2

Mbikëqyrja e çlirimit për qarkullim të lirë apo të eksportit të mallrave

Neni 96

Rregullat e përgjithshme për mbikëqyrjen e çlirimit për qarkullim të lirë apo të eksportit të mallrave

(Pika 5, e nenit 56, të Kodit)

1. Kur DPD-ja përcakton që mallra të caktuara do të jenë subjekt i mbikëqyrjes nga çlirimi për qarkullim të lirë ose eksport, ajo duhet të informojë autoritetet doganore për kodet e NK-së të këtyre mallrave dhe të dhënat e nevojshme për qëllime të mbikëqyrjes, në kohën e duhur, para se kërkesa e mbikëqyrjes të bëhet e zbatueshme.

Lista e të dhënave, të cilat mund të kërkohen nga DPD-ja për qëllime të mbikëqyrjes, është përcaktuar në aneksin 21-01, të shtojcës B, bashkëlidhur këtij vendimi dhe pjesë përbërëse e tij.

2. Kur mallrat janë bërë objekt i mbikëqyrjes nga çlirimi për qarkullim të lirë ose në eksport, autoritetet doganore do t'i sigurojnë DPD-së të dhënat mbi deklaratat doganore për procedurën përkatëse, të paktën një herë në javë.

3. Kur mallrat janë vendosur nën një regjim doganor në bazë të deklaratës së thjeshtuar, siç përmendet në nenin 152, të Kodit, ose nëpërmjet hyrjes në regjistrimet e deklaruesit, siç përmendet në nenin 165, të Kodit, dhe të dhënat e kërkuara nga DPD-ja nuk ishin në dispozicion në kohën kur mallrat janë çliruar, në përputhje me pikën 1, të nenit 175, të Kodit, autoritetet doganore do t'i sigurojnë DPD-së këtë informacion pa vonesë, pas marrjes së deklaratës plotësuese, të parashikuar në nenin 153, të Kodit.

4. Kur detyrimi për të paraqitur një deklaratë plotësuese nuk është përmbushur në përputhje me pikën 3, të nenit 153, të Kodit, apo deklarata plotësuese është depozituar ose është vënë në dispozicion në përputhje me nenin 326, mbajtësi i autorizimit u dërgon autoriteteve doganore, të paktën një herë në muaj, të dhënat e kërkuara nga DPD-ja ose autoritetet doganore duhet t'i mbledhin këto të dhëna nga sistemi i deklaruesit. Autoritetet doganore duhet të regjistrojnë të dhënat në sistemin elektronik të përmendur në nenin 97.

5. Duke anashkaluar pikën 1, të këtij neni, deri në implementimin e sistemit të informatizuar, të përmendur në pikën 1, të nenit 97, dhe të sistemeve të përmendura në planin e punës të miratuar nga ministri përgjegjës për financat, lista e të dhënave që mund të kërkohet nga DPD-ja për qëllime të

mbikëqyrjes është përcaktuar në aneksin 21-02, të shtojcës B, bashkëlidhur këtij vendimi dhe pjesë përbërëse e tij.

Neni 97

Sistemi elektronik në lidhje me mbikëqyrjen e çlirimit për qarkullim të lirë apo eksportin e mallrave

(Nenet 17, pika 1, dhe 56, pika 5, të Kodit)

Për mbikëqyrjen e çlirimit për qarkullim të lirë apo eksportin e mallrave do të përdoret një sistem elektronik i ngritur sipas pikës 1, të nenit 17, të Kodit, për transmetimin dhe ruajtjen e informacionit të mëposhtëm:

- a) Të dhënat e mbikëqyrjes së çlirimit për qarkullim apo eksportit të mallrave;
- b) Informacioni, i cili mund të rifreskojë të dhënat e mbikëqyrjes të paraqitura dhe të ruajtura në sistemin elektronik në çlirimin për qarkullim të lirë apo eksportin e mallrave.

KREU 3

Origjina e mallrave

Seksioni 1

Origjina jopreferenciale

NËNSEKSIONI 1

MALLRAT DHE ELEMENTE TË LIDHURA ME TO

Neni 98

Mallrat tërësisht të përfuara në një vend

(Pika 1, e nenit 60, të Kodit)

(Ndryshuar shkronja "b" me VKM nr. 872, datë 30.12.2024)

Mallrat në vijim konsiderohen si tërësisht të përfuara në një vend:

- a) Produkte minerale të nxjerra brenda atij vendi;
- b) produkte bimore të rritura dhe të korrura vetëm atje;
- c) Kafshët e gjalla të lindura dhe të rritura atje;
- ç) Produktet e prejardhura nga kafshët e gjalla të rritura atje;
- d) Produktet e gjahut ose të peshkimit të zëna atje;
- dh) Produktet e peshkimit si dhe produktet e tjera, të marra nga anijet/barkat e regjistruara në vendin ose territorin në fjalë dhe që mbajnë flamurin e atij vendi apo territori jashtë ujërave territoriale të secilit vend;
- e) Mallrat e përfuara ose të prodhuara në bordin e anijeve-fabrikë nga produktet e përmendura në shkronjën "dh", me origjinë nga ai vend apo territor, me kusht që këto anije-fabrikë të jenë të regjistruara në këtë vend ose territor dhe të mbajnë flamurin e tij;
- ë) Produktet e marra nga shtrati i detit apo nëntoka poshtë shtratit të detit jashtë ujërave territoriale, me kusht që vendi ose territori të ketë të drejtat ekskluzive për shfrytëzimin e shtratit të detit ose të nëntokës;
- f) Mbeturinat dhe mbetjet që dalin nga procesi i prodhimit dhe artikujt e përdorur, në qoftë se ato janë mbledhur atje dhe shërbejnë vetëm për rikuperimin e lëndëve të para;
- g) Mallrat e prodhuara atje ekskluzivisht nga produktet e specifikuara në shkronjat "a" deri në "f".

Neni 99

Mallrat, prodhimi i të cilave përfshin më shumë se një vend

(Pika 2, e nenit 60, të Kodit)

Mallrat e renditura në aneksin 22-01, të shtojcës A, bashkëlidhur këtij vendimi dhe pjesë përbërëse e tij, konsiderohen se i janë nënshtruar punimit apo përpunimit të fundit thelbësor, duke rezultuar në prodhimin e një produkti të ri ose që përfaqëson një fazë të rëndësishme të prodhimit në vendin në të cilin rregullat e përcaktuara në atë aneks janë plotësuar apo që identifikohen nga ato rregulla.

Neni 100

Operacionet e punimit ose përpunimit, të cilat nuk justifikohen ekonomikisht

(Pika 2, e nenit 60, të Kodit)

(Hequr togfjalësh dhe shtuar fjali në paragrafin e tretë me VKM nr. 872, datë 30.12.2024)

Çdo operacion punimi ose përpunimi, që kryhet në ndonjë vend, konsiderohet si i pajustificuar ekonomikisht nëse, në bazë të fakteve të disponueshme, rezulton se qëllimi i këtij operacioni ishte për të shmangur zbatimin e masave të referuara në nenin 59, të Kodit.

Për mallrat e aneksit 22-01, të shtojcës A, bashkëlidhur këtij vendimi dhe pjesë përbërëse e tij, zbatohen rregullat e tjera të kapitullit për ato mallra.

Për mallrat që nuk mbulohen nga aneksi 22-01, i shtojcës A, bashkëlidhur këtij vendimi dhe pjesë përbërëse e tij, kur punimi ose përpunimi i fundit nuk konsiderohet si i justifikuar ekonomikisht, këto mallra konsiderohen se i janë nënshtruar punimit ose përpunimit të tyre të fundit thelbësor e të justifikuar ekonomikisht, duke rezultuar në prodhimin e një produkti të ri ose duke përfaqësuar një fazë të rëndësishme të prodhimit në vendin apo territorin ku e ka origjinën pjesa më e madhe e materialeve. Kur produkti përfundimtar klasifikohet në kapitujt 1 deri në 29 ose 31 deri në 40, të Sistemit të Harmonizuar, pjesa kryesore e materialeve përcaktohet në bazë të peshës së materialeve. Kur produkti përfundimtar klasifikohet në kapitujt 30 ose 41 deri në 97, të Sistemit të Harmonizuar, pjesa kryesore e materialeve përcaktohet në bazë të vlerës së materialeve .

Neni 101

Operacionet minimale

(Pika 2, e nenit 60, të Kodit)

(Shtuar paragraf me VKM nr. 872, datë 30.12.2024)

Operacionet në vijim nuk konsiderohen si punime ose përpunime thelbësore, të justifikuara ekonomikisht për qëllime të dhënies së origjinës:

a) Operacionet për të siguruar ruajtjen e produkteve në gjendje të mirë gjatë transportit dhe magazinimit (ajrosja/ventilimi, përhapja, tharja, largimi i pjesëve të dëmtuara dhe operacione të ngjashme) ose operacionet që lehtësojnë dërgesat ose transportin;

b) Operacionet e thjeshta, që kanë të bëjnë me heqjen e pluhurit, kontrollin apo ekzaminimin, klasifikimin, përputhjen, larjen, prerjen;

c) Ndryshimet e paketimit, ndarja dhe grumbullimi i dërgesave, vendosja e thjeshtë në shishe, kanoçe, epruveta, çanta, valixhe, kuti, vendosja në kartonë apo dërrasa dhe të gjitha operacionet e tjera të thjeshta të paketimit;

ç) Vendosja e mallrave në komplete/sete apo grupe ose vënia në shitje;

d) Vendosja e shenjave/markave, etiketave apo shenjave të tjera të ngjashme e të dallueshme mbi produktet ose mbi paketimin e tyre;

dh) Bashkimi i thjeshtë i pjesëve të produkteve që përbëjnë një produkt të plotë;

e) Ndarja ose ndryshimi i përdorimit;

ë) Një kombinim i dy ose më shumë operacioneve të përcaktuara në shkronjat “a” deri në “e”.

Për mallrat e mbuluara nga aneksi 22-01, i shtojcës A, zbatohen rregullat e tjera të kapitullit për

ato mallra. Për mallrat që nuk mbulohen nga aneksi 22-01, i shtojcës A, kur punimi ose përpunimi i fundit konsiderohet të jetë një operacion minimal, origjina e produktit përfundimtar është vendi ose territori, ku ka origjinën pjesa më e madhe e materialeve. Kur produkti përfundimtar klasifikohet në kapitujt 1 deri në 29 ose 31 deri në 40, të Sistemit të Harmonizuar, pjesa kryesore e materialeve përcaktohet në bazë të peshës së materialeve. Kur produkti përfundimtar klasifikohet në kapitujt 30 ose 41 deri në 97, të Sistemit të Harmonizuar, pjesa kryesore e materialeve përcaktohet në bazë të vlerës së materialeve.

Neni 102

Aksesorët, pjesët e këmbimit ose veglat

(Neni 60, i Kodit)

(Ndryshuar shkronja "a" e pikës 3 me VKM nr. 872, datë 30.12.2024)

1. Aksesorët, pjesët e këmbimit ose veglat, të cilat janë dorëzuar me ndonjë nga mallrat e listuara në seksionet XVI, XVII dhe XVIII, të Nomenklaturës së Kombinuar, dhe që përbëjnë një pjesë të pajisjeve standarde, konsiderohen se kanë të njëjtën origjinë si ato mallra.

2. Pjesët kryesore të këmbimit për përdorim me një nga mallrat e listuara në seksionet XVI, XVII dhe XVIII, të Nomenklaturës së Kombinuar, të çliuara më parë në qarkullim të lirë në Republikën e Shqipërisë, konsiderohen se kanë të njëjtën origjinë si këto mallra, nëse përfshirja e pjesëve thelbësore të këmbimit në fazën e prodhimit nuk do të kishte ndryshuar origjinën e tyre.

3. Për qëllime të këtij neni, pjesët kryesore të këmbimit nënkuptojnë pjesët, të cilat përmbushin të gjitha kushtet e mëposhtme:

- a) Janë komponentë, pa të cilët nuk mund të sigurohet funksionimi i duhur i një pjese të pajisjes, makinerisë, aparatit ose mjetit që është vënë në qarkullim të lirë;
- b) Janë karakteristikë e këtyre mallrave;
- c) Janë të destinuara për mirëmbajtjen e tyre normale dhe për të zëvendësuar pjesët e të njëjtit lloj, të cilat janë dëmtuar apo janë nxjerrë jashtë përdorimit.

Neni 103

Elementet neutrale dhe paketimi

(Neni 60, i Kodit)

1. Me qëllim që të përcaktohet nëse mallrat e kanë origjinën nga një vend apo territor, nuk do të merret parasysh origjina e elementeve të mëposhtme:

- a) Energjia elektrike dhe karburanti;
- b) Toka dhe pajisjet;
- c) Makineritë dhe veglat;
- ç) Materialet, të cilat as nuk hynë dhe as nuk janë të destinuara për t'u futur në përbërjen finale të produkteve.

2. Kur, në bazë të rregullit të përgjithshëm 5 për interpretimin e Nomenklaturës së Kombinuar të Mallrave, materialet e paketimit dhe kontejnerët e paketimit konsiderohen si pjesë e produktit për qëllime klasifikimi, ato nuk do të merren parasysh për qëllime të përcaktimit të origjinës, përveç rasteve kur rregulli në aneksin 22-01, të shtojcës A, bashkëlidhur këtij vendimi dhe pjesë përbërëse e tij, për mallrat në fjalë, bazohet në përqindjen e vlerës së shtuar.

Nënseksioni 2

Prova e origjinës jopreferenciale

Neni 104

Certifikata e origjinës për produktet që u nënshtrohen marrëveshjeve/rregullimeve të veçanta jopreferenciale në import

(Pikat 1 dhe 2, të nenit 61, të Kodit)

1. Për produktet që e kanë origjinën e tyre në një vend të tretë, për të cilët janë përcaktuar marrëveshje/rregullime të veçanta jopreferenciale në import, kur këto marrëveshje i referohen këtij neni, duhet të lëshohet certifikatë origjine, duke përdorur formularin e paraqitur në aneksin 22-14, të shtojcës B, bashkëlidhur këtij vendimi dhe pjesë përbërëse e tij, në përputhje me specifikimet teknike të përcaktuara në të.

2. Certifikatat e origjinës do të lëshohen nga autoritetet kompetente të vendit të tretë, ku produktet me të cilat marrëveshjet e veçanta jopreferenciale të importit zbatojnë origjinën, ose nga një agjenci e besueshme, e autorizuar nga këto autoritete për këtë qëllim (autoritetet lëshuese), me kusht që origjina e produkteve të jetë përcaktuar në përputhje me nenin 60, të Kodit. Autoritetet lëshuese duhet të mbajnë një kopje të secilës certifikatë të origjinës së lëshuar.

3. Certifikatat e origjinës do të lëshohen para se produktet, me të cilat ato kanë lidhje, të jenë deklaruar për eksport në vendin e tretë.

4. Duke anashkaluar pikën 3, certifikatat e origjinës mund, përjashtimisht, të lëshohen pas eksportit të produkteve me të cilat ato lidhen, kur moslëshimi i tyre në kohën e eksportit ishte rezultat i një gabimi, një lëshim i pavullnetshëm ose rrethana të veçanta.

Autoritetet lëshuese nuk mund të lëshojnë në mënyrë retrospektive (*a-posteriori*) një certifikatë të origjinës, të parashikuar në pikën 1, përveç rastit kur ato janë të bindura se të dhënat në aplikimin e eksportuesit korrespondojnë me ato në dosjen përkatëse të eksportit.

Neni 105

Bashkëpunimi administrativ në lidhje me marrëveshjet/rregullimet e veçanta jopreferenciale në import

(Neni 61, i Kodit)

1. Kur marrëveshjet/rregullimet e veçanta jopreferenciale në import, për produkte të caktuara, kërkojnë përdorimin e certifikatës së origjinës, të përcaktuar në nenin 104, përdorimi i marrëveshjeve / rregullimeve të tilla do t'i nënshtrohet kushtit që të jetë vendosur një procedurë bashkëpunimi administrativ, përveç rastit nëse specifikohet ndryshe në marrëveshjet në fjalë. Me qëllim krijimin e kësaj procedure bashkëpunimi administrativ, vendi i tretë do t'i dërgojë Republikës së Shqipërisë:

a) emrat dhe adresat e autoriteteve lëshuese, bashkë me specimenet e vulave të përdorura nga këto autoritete;

b) emrat dhe adresat e autoriteteve qeveritare kompetente, të ngarkuara për të marrë kërkesat për verifikimin e mëvonshëm të certifikatave të origjinës.

2. Kur vendi i tretë nuk arrin të dërgojë informacionin e specifikuar më sipër, autoritetet kompetente të Republikës së Shqipërisë do të refuzojnë përdorimin e veçantë të marrëveshjeve/rregullimeve jopreferenciale të importit.

Neni 106

Verifikimi i certifikatave të origjinës për produktet që u nënshtrohen marrëveshjeve/rregullimeve të veçanta jopreferenciale në import

(Neni 61, i Kodit)

1. Verifikimi i certifikatave të origjinës, të përmendura në nenin 104, kryhet pas pranimit të deklaratës doganore (verifikim *a-posteriori*).

2. Kur autoritetet doganore kanë dyshime të arsyeshme për origjinalitetin e certifikatës së origjinës

ose saktësinë e informacionit që ajo përmban dhe kur ato kryejnë verifikime të mëvonshme, të rastit, ato do të kërkojnë nga autoritetet e përmendura në shkronjën “b”, të pikës 1, të nenit 105, të verifikojnë nëse certifikata e origjinës është autentike apo origjina e deklaruar është përcaktuar në mënyrë korrekte dhe në përputhje me nenin 60, të Kodit, ose të dyja.

Për këto qëllime, autoritetet doganore do t'i kthejnë certifikatën e origjinës ose një kopje autoritetit të përmendur në shkronjën “b”, të pikës 1, të nenit 105. Nëse një faturë ka shoqëruar deklaratën, fatura origjinale ose një kopje e saj do t'i bashkëngjitet certifikatës së origjinës së kthyer.

Autoritetet doganore do të japin, sipas rastit, arsyet për verifikimin dhe do të japin çdo informacion në zotërim të tyre për të argumentuar se detajet e të dhënave në certifikatën e origjinës janë të pasakta ose se certifikata e origjinës nuk është autentike.

2. Autoriteti i përmendur në shkronjën “b”, të pikës 1, nenit 105, do t'u komunikojë rezultatet e verifikimeve autoriteteve doganore sa më shpejt të jetë e mundur.

Kur nuk ka përgjigje brenda 6 muajve, pas dërgimit të kërkesës në përputhje me pikën 2, autoritetet doganore refuzojnë përdorimin e veçantë të marrëveshjes jopreferenciale të importit për produktet në fjalë.

Neni 107

Certifikata e origjinës për produktet shqiptare në eksport dhe bashkëpunimi administrativ

(Neni 61, i Kodit)

1. Certifikatat e origjinës jopreferenciale, për produktet që e kanë origjinën e tyre në Republikën së Shqipërisë, lëshohen nga dhomat e tregtisë dhe të industrisë në Shqipëri, mbi bazën e një kërkesë me shkrim nga personi i interesuar, me kusht që origjina e produkteve të jetë përcaktuar në përputhje me nenin 60, të Kodit. Certifikata e origjinës jopreferenciale lëshohet duke përdorur formularin e paraqitur në përputhje me specifikimet teknike të përcaktuara në aneksin 22-09, të shtojcës B, bashkëlidhur këtij vendimi dhe pjesë përbërëse e tij.

Kur e justifikojnë rrethanat, veçanërisht kur i interesuari ka aktivitet të rregullt eksporti, dhoma e tregtisë mund të vendosë të mos kërkojë paraqitjen e një kërkesë për çdo operacion eksporti, me kusht që të respektohen dispozitat në fuqi për sa i përket origjinës.

Kur e justifikojnë nevojat tregtare, mund të lëshohet një ose disa kopje shtesë të certifikatës së origjinës.

2. Në kuadrin e bashkëpunimit administrativ me vende të tjera, dhoma e tregtisë do t'u përgjigjet kërkesave të autoriteteve kompetente doganore të vendit ku janë importuar mallrat për kontrolle *a-posteriori*, qoftë edhe nëpërmjet autoriteteve doganore shqiptare.

Rezultatet e kontrollit *a-posteriori* duhet t'u komunikohen autoriteteve kërkuese sa më shpejt që të jetë e mundur. Koha maksimale për përgjigje nuk duhet të kalojë 6 (gjashtë) muaj.

Seksioni 2

Origjina preferenciale

Neni 108

Përkufizime

Për qëllime të këtij seksioni do të zbatohen përkufizimet e mëposhtme, të cilat nënkuptojnë:

1. “Prodhim”, çdo lloj punimi apo përpunimi, përfshirë edhe montimin;
2. “Material”, çdo lloj përbërësi, lëndë e parë, përbërësi apo pjesë etj, të përdorur në prodhimin e produktit;
3. “Produkt”, produkti që është prodhuar, edhe nëse ai është për t'u përdorur më vonë, në një proces tjetër prodhimi;

4. “Mallra”, si materialet ashtu edhe produktet;
5. “Materiale të zëvendësueshme”, materiale të të njëjtit lloj dhe cilësie tregtare, me karakteristika të njëjta teknike e fizike, dhe të cilat nuk mund të dallohen nga njëri-tjetri pasi ata janë të përfshirë në produktin e përfunduar;
6. “Vlerë doganore”, vlera e përcaktuar në përputhje me marrëveshjen e vitit 1994, për zbatimin e nenit VII, të marrëveshjes së përgjithshme mbi tarifën dhe tregtinë (Marrëveshja e OBT mbi vlerësimin doganor);
7. “Vlerë e materialeve”, vlera doganore në kohën e importimit të materialeve joorigjinuese të përdorura ose, nëse kjo nuk njihet dhe nuk mund të përcaktohet, çmimi i parë i përcaktuar dhe i paguar për materialet në vendin e prodhimit. Ky përkufizim zbatohet *mutatis mutandis*, kur duhet të përcaktohet vlera e materialeve origjinuese të përdorura;
8. “Çmimi i fabrikës/*ex-works*”, çmimi i paguar për produktin e prodhuar (*ex-works*) të prodhuesi, në të cilin kryhet punimi apo përpunimi i fundit, me kusht që çmimi të përfshijë vlerën e të gjitha materialeve të përdorura dhe të të gjitha shpenzimeve të tjera në lidhje me prodhimin e tij, minus taksat e brendshme, të cilat janë ose mund të jenë të rimbursueshme kur produkti i përfutur eksportohet;
Kur çmimi aktual i paguar nuk pasqyron të gjitha shpenzimet që lidhen me prodhimin e produktit, të cilat aktualisht kryhen në vendin e prodhimit, çmimi i fabrikës/*ex-works* nënkupton shumën e të gjitha këtyre shpenzimeve minus taksat e brendshme, të cilat janë ose mund të jenë të rimbursueshme kur produkti i përfutur eksportohet;
- Kur punimi apo përpunimi i fundit është nënkontraktuar për një prodhues, termi 'prodhues', referuar në pikën 1, mund t'i referohet ndërmarrjes që ka punësuar nënkontraktorin;
9. “Përmbajtja maksimale e materialeve joorigjinuese”, përmbajtja maksimale e materialeve joorigjinuese, të cilat lejohen në mënyrë që prodhimi të konsiderohet si një punim apo përpunim i mjaftueshëm për t'i dhënë produktit statusin origjinues. Kjo mund të shprehet si përqindje e çmimit të fabrikës/*ex-works* për produktin ose si përqindje e peshës neto të këtyre materialeve të përdorura, që bëjnë pjesë në një grup të caktuar kapitujsh, kapitulli, kreu ose nënkreu;
10. “Pesha neto”, pesha e vetë mallrave pa materialet e paketimit dhe kontejnerët/mbajtësit e paketimit të çdo lloji.
11. “Kapituj”, “krerë” dhe “nënkerrerë”, kapitujt, krerët dhe nënkerrerët (kodet katër- apo gjashtëshifrore) të Sistemit të Harmonizuar;
12. “I klasifikuar”, i referohet klasifikimit të një produkti ose materiali nën një kre ose nënkre të veçantë të Sistemit të Harmonizuar;
13. “Dërgesë”, produktet të cilat ose:
 - a) dërgohen njëkohësisht nga një eksportues të një marrëse;
 - b) mbulohen nga një dokument i vetëm transporti, që mbulon transportimin e tyre nga një eksportues të një marrëse ose, në mungesë të një dokumenti të tillë, nga një faturë e vetme.
14. “Eksportues”, një person që bën eksportimin e mallrave drejt Republikës së Shqipërisë ose drejt një vendi përfitues, i cili është në gjendje të provojë origjinën e mallrave, nëse ai është apo jo prodhuesi dhe nëse ai vetë kryen apo jo formalitetet e eksportit.

Nënseksioni 1

Lëshimi ose bërja e provës së origjinës

Neni 109

Deklaratat e furnitorit dhe përdorimi i tyre

(Pika 1, e nenit 63, të Kodit)

(Shtuar pikat 1/1 dhe 1/2 me VKM nr. 872, datë 30.12.2024)

1. Kur furnitori pajis eksportuesin apo tregtarin me informacionin e nevojshëm për të përcaktuar statusin e origjinës së mallrave, për qëllime të dispozitave që rregullojnë tregtinë preferenciale, ndërmjet Republikës së Shqipërisë dhe disa vendeve (për statusin preferencial të origjinës), furnitori do ta bëjë këtë me anë të një deklarate të furnitorit.

Për çdo ngarkesë të mallrave lëshohet një deklaratë e veçantë furnitori, me përjashtim të rasteve të parashikuara në nenin 110.

1/1. Në tregtinë ndërmjet palëve kontraktuese të Konventës Rajonale për Rregullat e Origjinës Preferenciale Pan-Euro-Mesdhetare (në vijim Konventa PEM), kur zbatohen dy ose më shumë grupe rregullash origjine, origjina preferenciale e mallrave mund të përcaktohet sipas një ose më shumë grupeve të rregullave të origjinës.

Furnizuesit duhet të specifikojnë kuadrin ligjor të përdorur për të përcaktuar origjinën e mallrave. Kur një kuadër i tillë ligjor nuk është i specifikuar, si parazgjedhje, deklarata e furnizuesit do të konsiderohet se deklaron se Konventa PEM përdoret për të përcaktuar origjinën e mallrave.

1/2. Për qëllime të tregtisë ndërmjet palëve kontraktuese të Konventës PEM, eksportuesi mund të përdorë deklaratat e furnizuesit, si dokumente mbështetëse për të aplikuar për lëshimin e një certifikate qarkullimi ose për të bërë një deklaratë të origjinës, në përputhje me rregullat kalimtare të origjinës të zbatueshme paralelisht me rregullat e origjinës së Konventës PEM, kur:

a) deklaratat e furnizuesit tregojnë statusin e origjinës, në përputhje me rregullat e origjinës së Konventës PEM, për produktet e klasifikuara sipas kapitujve 1, 3 dhe 16 (për produktet e peshkut të përpunuar) dhe 25 deri në 97, të Sistemit të Harmonizuar;

b) nuk ka zbatim të kumulimit me palët kontraktuese të Konventës PEM, të cilat po zbatojnë vetëm Konventën PEM.

Eksportuesi do të marrë të gjitha hapat e nevojshëm për të siguruar që kushtet për lëshimin ose bërjen e një prove të origjinës, sipas një grupi specifik rregullash origjine, janë përmbushur.

2. Furnitori do ta përfshijë deklaratën në faturën tregtare, në lidhje me këtë ngarkesë, ose në një fletëngarkesë apo në ndonjë dokument tjetër tregtar, i cili përshkruan mallrat përkatëse në detaje të mjaftueshme për të mundësuar identifikimin e tyre.

3. Furnitori mund të ofrojë deklaratën në çdo kohë, edhe pasi mallrat janë dorëzuar.

Neni 110

Deklarata afatgjatë e furnitorit

(Pika 1, e nenit 63, të Kodit)

(Ndryshuar me VKM nr. 872, datë 30.12.2024)

1. Kur një furnitor furnizon rregullisht një eksportues ose operator me dërgesa të mallrave dhe të gjitha këto mallra pritet të kenë të njëjtin status të origjinës, furnitori mund të japë një deklaratë të vetme, e cila mbulon dërgesa të shumëfishta të këtyre mallrave (një deklaratë afatgjatë e furnitorit).

1/1. Në tregtinë ndërmjet palëve kontraktuese të Konventës PEM, ku dy ose më shumë grupe rregullash origjine zbatohen, origjina preferenciale e mallrave mund të përcaktohet sipas një ose më shumë grupeve të rregullave të origjinës.

Furnizuesit duhet të specifikojnë kuadrin ligjor të përdorur për të përcaktuar origjinën e mallrave. Kur kuadri ligjor nuk është përcaktuar konsiderohet se deklarata e furnizuesit përcakton që është përdorur Konventa PEM për përcaktimin e origjinës së mallrave.

1/2. Për qëllime të tregtisë ndërmjet palëve kontraktuese të Konventës PEM, eksportuesi mund të përdorë deklaratat e furnizuesit si dokumente mbështetëse për të aplikuar për lëshimin e një certifikate qarkullimi ose për të bërë një deklaratë të origjinës në përputhje me rregullat kalimtare të origjinës të zbatueshme paralelisht me Konventën PEM, kur:

a) deklaratat e furnizuesit tregojnë statusin e origjinës, në përputhje me rregullat e origjinës të Konventës PEM për produktet e klasifikuara sipas kapitujve 1, 3 dhe 16 (për produktet e peshkut të përpunuar) dhe 25 deri në 97, të Sistemit të Harmonizuar;

b) nuk ka zbatim të kumulimit me palët kontraktuese të Konventës PEM, të cilat po zbatojnë vetëm Konventën PEM.

Eksportuesi do të marrë të gjitha hapat e nevojshëm për të siguruar, që kushtet për lëshimin ose bërjen e një prove të origjinës, sipas një grupi specifik rregullash origjine, janë përmbushur.

2. Një deklaratë afatgjatë e furnitorit hartohet për dërgesa të dërguara gjatë një periudhe kohore dhe duhet të përmbajë 3 (tri) data:

a) kur është hartuar deklarata (data e lëshimit);

b) e fillimit të periudhës (data e fillimit), e cila nuk mund të jetë më herët se 12 (dymbëdhjetë) muaj ose më vonë se 6 (gjashtë) muaj pas datës së lëshimit;

c) e përfundimit të periudhës (data e përfundimit), e cila nuk mund të jetë më vonë se 24 (njëzet e katër) muaj pas datës së fillimit.

3. Furnitori informon menjëherë eksportuesin ose operatorin në fjalë, kur deklarata afatgjatë e furnitorit nuk është e vlefshme, në lidhje me disa ose të gjitha dërgesat e mallrave të furnizuara dhe të mallrave që do të furnizohen.

Neni 111

Bërja e deklaratës së furnitorit

(Pika 1, e nenit 63, të Kodit)

1. Për produktet që kanë fituar statusin e origjinës preferenciale, deklaratat e furnitorit bëhen siç përcaktohet në aneksin 22-15, të shtojcës B, bashkëlidhur këtij vendimi dhe pjesë përbërëse e tij. Megjithatë, deklaratat afatgjata të furnitorit për këto produkte do të bëhen siç përcaktohet në aneksin 22-16, të shtojcës

B, bashkëlidhur këtij vendimi dhe pjesë përbërëse e tij.

2. Për produktet, të cilat i janë nënshtruar punimit ose përpunimit në Republikën e Shqipërisë pa e fituar statusin preferencial të origjinës, deklaratat e furnitorit bëhen siç përcaktohet në aneksin 22-17, të shtojcës B, bashkëlidhur këtij vendimi dhe pjesë përbërëse e tij. Megjithatë, për deklaratat afatgjata të furnitorit, deklarata e furnitorit bëhet siç është përcaktuar në aneksin 22-18, të shtojcës B, bashkëlidhur këtij vendimi dhe pjesë përbërëse e tij.

3. Deklarata e furnitorit shoqërohet me një nënshkrim të shkruar me dorë të furnitorit. Megjithatë, kur të dyja, deklarata e furnitorit dhe fatura janë hartuar me mjete elektronike, këto mund të bëhen autentike në mënyrë elektronike ose furnitori mund t'i japë eksportuesit apo tregtarit një deklaratë me shkrim për pranimin e përgjegjësisë së plotë për çdo deklaratë furnitori, që e identifikon atë sikur të jetë e nënshkruar nga ana e tij me dorë.

Neni 112

Bashkëpunimi administrativ

(Pika 1, e nenit 64, të Kodit)

Autoritetet doganore duhet të ndihmojnë njëra-tjetrën në kontrollin e saktësisë së informacionit të dhënë në deklaratat e furnitorit.

Neni 113

Verifikimi i deklaratave të furnitorit

(Pika 1, e nenit 63, të Kodit)

Verifikimi i deklaratave të furnitorit kryhet në përputhje me rregullat e origjinës preferenciale dhe

bashkëpunimin administrative, sipas marrëveshjeve ndërkombëtare në fuqi.

Neni 114

Autorizimi i eksportuesit të miratuar

(Pika 1, e nenit 63, të Kodit)

(Ndryshuar togfjalësh në pikën 1 me VKM nr. 872, datë 30.12.2024)

1. Kur Republika e Shqipërisë ka një marrëveshje preferenciale me një vend tjetër, e cila parashikon se prova e origjinës bëhet në formën e një deklarate-faturë ose deklarate-origjine, të bërë nga një eksportues i miratuar, eksportuesit dhe ridërguesit e vendosur në territorin doganor të Republikën e Shqipërisë mund të aplikojnë për autorizim të eksportuesit të miratuar për qëllime të bërjes ose të zëvendësimit të deklarates së origjinës.

2. Shkronja “ç”, e pikës 1, të nenit 19, nenet 24, 25 dhe 26, në lidhje me kushtet për aplikimet për pranimin dhe pezullimin e vendimeve, dhe nenet 27 dhe 32, në lidhje me përdorimin e mjeteve elektronike për shkëmbimin e ruajtjen e informacionit dhe revokimin e vendimeve të favorshme që kanë të bëjnë me aplikimet dhe vendimet, nuk zbatohen për vendimet që lidhen me autorizimet e eksportuesit të miratuar.

3. Autorizimet e eksportuesit të miratuar i jepen vetëm personave që plotësojnë kushtet e përcaktuara në dispozitat e origjinës ose të marrëveshjeve ndërkombëtare që ka nënshkruar Republika e Shqipërisë.

4. Autoritetet doganore i japin eksportuesit të miratuar një numër autorizimi doganor, i cili paraqitet në provat e origjinës preferenciale.

5. DPD-ja u përcjell vendeve në fjalë adresat e autoriteteve kompetente doganore përgjegjëse për kontrollin e vërtetimit të origjinës preferenciale të bërë nga eksportuesit e miratuar.

6. Kur marrëveshja preferenciale e zbatueshme nuk specifikon formën që do të ketë deklarata-faturë apo deklarata e origjinës, deklaratat hartohen në përputhje me rregullat e origjinës të vendit dhënës të preferencës.

Neni 115

Mjetet për të aplikuar dhe lëshuar autorizime të eksportuesit të miratuar

(Shkronja “a”, e pikës 3, të nenit 17, të Kodit)

Aplikimi për statusin e eksportuesit të miratuar, me qëllim lëshimin e provës së origjinës preferenciale, mund të paraqitet me mjete të tjera nga teknikat informatike të përpunimit të të dhënave. Gjithashtu, autorizimi i eksportuesit të miratuar mund të lëshohet me mjete të tjera të ndryshme nga teknikat informatike të përpunimit të të dhënave.

Neni 115/1

Origjina preferenciale e produkteve të përpunuara, të përfutuara nga mallrat që kanë status preferencial të origjinës

(neni 63, i Kodit)

(Shtuar me VKM nr. 872, datë 30.12.2024)

1. Kur mallrat joshqiptare, të cilat kanë status preferencial të origjinës, në kuadër të një marrëveshjeje preferenciale, ndërmjet Republikës së Shqipërisë dhe shteteve të tjera, i nënshtrohen regjimit të përpunimit aktiv, produktet e përpunuara të përfutuara prej tyre, kur vendosen në qarkullim të lirë, konsiderohen të kenë të njëjtin status preferencial të origjinës me ato mallra.

2. Pika 1 nuk zbatohet në asnjë nga rastet e mëposhtme, kur:

a) veprimtaria e përpunimit gjithashtu përfshin mallrat joshqiptare, të ndryshme nga ato të

përmendura në pikën 1, përfshirë mallrat që kanë status preferencial të origjinës, nën një marrëveshje të ndryshme preferenciale;

b) produktet e përpunuara përfitohen nga mallrat ekuivalente, të përmendura në nenin 201, të Kodit;

c) autoritetet doganore kanë autorizuar rieksporin e përkohshëm të mallrave për përpunim të mëtejshëm, në përputhje me nenin 231, të Kodit.

3. Kur gjen zbatim pika 1, një dokument mbi origjinën, i lëshuar ose i hartuar për mallrat, të cilat i nënshtrohen regjimit të përpunimit aktiv, konsiderohet të jetë një dokument mbi origjinën, i lëshuar ose i hartuar për produktet e përpunuara.

Nënseksioni 2

Sistemi i Përgjithshëm i Preferencave (SPP)

Neni 116

Kërkesa të përgjithshme

Rregullat e origjinës janë elemente thelbësore të të gjitha skemave SPP. Në mënyrë që të kualifikohen për trajtim tarifor preferencial në bazë të skemës SPP, produktet e eksportuara nga Republika Shqipërisë duhet të përmbushin rregullat e origjinës preferenciale përkatëse të vendeve dhënëse të preferencave.

Neni 117

Sigurimi i bashkëpunimit administrativ

(Pika 1, e nenit 63, të Kodit)

1. Drejtoria e Përgjithshme e Doganave, në varësi të rregullave të origjinës, duhet të informojë direkt apo nëpërmjet sekretariatit të UNCTAD (Konferenca e Kombeve të Bashkuara për Tregti dhe Zhvillim/United Nation Conference on Trade and Development) autoritetet kompetente të vendeve ose grupeve të vendeve që i japin Republikës së Shqipërisë preferenca të njëanshme, listën e emrave dhe adresat e zyrave doganore, të cilat janë të autorizuar të lëshojnë certifikatat e origjinës preferenciale “Form A”, specimenet e vulave që përdoren nga këto zyra si dhe emrin dhe adresën e zyrës përgjegjëse për kontrollin e këtyre certifikatave, në kuadër të sistemit të përgjithshëm të preferencave (SPP).

2. Për qëllim të kontrollit ‘*a-posteriori*’ të certifikatës së origjinës preferenciale, zyra doganore që lëshon dokumentin përkatës duhet të ruajë për të paktën 3 vjet, nga data e lëshimit të certifikatës, kopje të certifikatave dhe kopje të dokumenteve të eksportimit.

3. Në rast se kërkohet të bëhet kontroll ‘*a-posteriori*’ për vërtetësinë dhe rregullsinë e provave të origjinës preferenciale, si certifikata e origjinës “Form A” apo deklarata-faturë, të lëshuara nga zyrat doganore shqiptare në kuadër të SPP-së, autoritetet doganore kryejnë të gjitha kontrollet e nevojshme, në mënyrë që t’i përgjigjen në kohë kërkesës për kontroll të ardhur nga autoritetet e huaja.

Neni 118

Procedurat në lidhje me eksportet në kuadër të SPP

Autoritetet doganore duhet të sigurojnë përputhshmërinë me:

- a) rregullat për origjinën e produkteve që eksportohen;
- b) rregullat për plotësimin dhe lëshimin e certifikatave të origjinës “Form A”;
- c) dispozitat për përdorimin e deklaratave-faturë, në përputhje me kërkesat e përcaktuara në SPP.

Neni 119

Procedura për lëshimin e një certifikate të origjinës, “Forma A”

(Pika 1, e nenit 63, të Kodit)

1. Certifikata e origjinës “Form A” lëshohet me kërkesë me shkrim nga eksportuesi ose përfaqësuesi i tij, së bashku me çdo dokument tjetër mbështetës për të provuar që produktet, të cilat do të eksportohen, kualifikohen për lëshimin e certifikatës së origjinës “Form A”. Certifikata e origjinës “Form A” lëshohet duke përdorur formularin e paraqitur në aneksin 22-08, të shtojcës B, bashkëlidhur këtij vendimi dhe pjesë përbërëse e tij.

2. Degët doganore do të venë në dispozicion të eksportuesit certifikatën e origjinës “Form A” në momentin e eksportit apo kur të jetë siguruar kryerja e tij. Megjithatë, degët doganore, sipas SPP-së të vendeve dhënëse të preferencave, mund të lëshojnë një certifikatë të origjinës “Form A” pas eksportimit të produkteve, të cilave u referohet, nëse:

a) nuk ishte lëshuar në kohën e eksportimit, për shkak të gabimeve ose mungesave të pavullnetshme apo rrethanave të veçanta;

b) është demonstruar për të bindur autoritetet doganore që një certifikatë e origjinës “Form A” është lëshuar, por nuk është pranuar gjatë importimit për arsye teknike;

c) destinacioni final i produkteve në fjalë është përcaktuar gjatë transportit ose magazinimit të tyre dhe pas ndarjes së mundshme të dërgesës.

3. Degët doganore mund të lëshojnë një certifikatë *a-posteriori* vetëm pasi të jetë verifikuar se informacioni i dhënë nga eksportuesi në aplikimin për një certifikatë të origjinës “Form A”, të lëshuar në mënyrë retrospektive, është në përputhje me atë të dosjeve korresponduese të eksportit dhe një certifikatë e origjinës

“Form A” nuk është lëshuar kur produktet në fjalë janë eksportuar, përveçse kur certifikata e origjinës “Form

A” nuk është pranuar për arsye teknike. Shënimi “*Issued retrospectively*” apo “*Délivré a-posteriori*” do të vendoset në kutinë 4, të certifikatës së origjinës “Form A”, lëshuar në retrospektivë (*a-posteriori*).

4. Në rast të vjedhjes, humbjes apo shkatërrimit të një certifikate të origjinës “Form A”, eksportuesi mund të aplikojë për një dublikatë te dega doganore kompetente që e ka lëshuar atë, në bazë të dokumenteve të eksportit që ai zotëron. Shënimi “*Duplicate*” ose “*Duplicata*”, data e lëshimit dhe numri serial i certifikatës origjinale do të vendoset në kutinë 4, të dublikatës së certifikatës së origjinës “Form A”. Dublikata hyn në fuqi nga data e origjinalit.

5. Për qëllime të verifikimit, nëse produkti për të cilin kërkohet një certifikatë e origjinës “Form A” përputhet me rregullat përkatëse të origjinës, autoritetet kompetente doganore kanë të drejtë të kërkojnë dokumente shtesë ose të kryejnë çdo kontroll, të cilin ata e konsiderojnë të përshtatshëm.

Neni 120

Kushtet për lëshimin e një deklarate-faturë

(Pika 1, e nenit 63, të Kodit)

1. Deklarata-faturë mund të bëhet nga çdo eksportues në Republikën e Shqipërisë, për produktet origjinuese, në përputhje me kërkesat e përcaktuara në SPP të vendeve dhënëse të preferencave.

2. Eksportuesi që bën një deklaratë-faturë duhet të përgatitet të paraqesë në çdo kohë, me kërkesën e autoriteteve doganore, të gjitha dokumentet e nevojshme që provojnë statusin origjinues të produkteve në fjalë.

3. Një deklaratë-faturë duhet të lëshohet nga eksportuesi në anglisht, frëngjisht ose në gjuhën e vendit dhënëse të preferencës, duke shtypur, vulosur ose printuar mbi faturë, fletëngarkesë ose ndonjë dokument tjetër tregtar deklaratën e origjinës, teksti i së cilës tregohet në rregullat e origjinës të

vendit dhënës së preferencave. Nëse deklarata është e shkruar me dorë, duhet të shkruhet me bojë, me shkronja kapitale. Një deklaratë-faturë duhet të ketë firmën origjinale të shkruar me dorë nga eksportuesi.

Nënsesioni 3

Masa preferenciale tarifore të miratuara në mënyrë të njëanshme nga Republika e Shqipërisë për vende dhe territore të caktuara

Neni 121

Kërkesat e përgjithshme

(Pika 3, e nenit 63, të Kodit)

(Ndryshuar me VKM nr. 872, datë 30.12.2024)

1. Për qëllimet e dispozitave në lidhje me masat tarifore preferenciale, të miratuara në mënyrë të njëanshme nga Republika e Shqipërisë për vende të caktuara, grupe vendesh ose territore (në vijim vendi apo territori përfitues), produktet e mëposhtme konsiderohen si produkte origjinuese nga vendi apo territori përfitues:

- a) Produktet tërësisht të përftuara në vendin apo territorin përfitues, në kuptim të nenit 122;
- b) Produkte të përftuara në vendin apo territorin përfitues, në prodhimin e të cilave përdoren produkte të tjera nga ato të referuara në shkronjën “a”, me kusht që ato produkte t’i jenë nënshtruar punimeve apo përpunimeve të mjaftueshme, në kuptim të nenit 123.

2. Për qëllimet e këtij nënsesioni, produktet me origjinë në Republikën e Shqipërisë, në kuptim të pikës 3, të cilat janë subjekt në një vend apo territor përfitues, ku punimet apo përpunimet shkojnë përtej atyre që përshkruhen në nenin 124, konsiderohen si origjinuese në vendin apo territorin përfitues.

3. Pika 1 zbatohet *mutatis mutandis* në përcaktimin e origjinës së produkteve, të përftuara në Republikën e Shqipërisë.

Neni 122

Produktet tërësisht të përftuara

(pika 3, e nenit 63, të Kodit)

(Ndryshuar togfjalësh në fjalinë hyrëse dhe shkronjën “g” të pikës 1, në shkronjat “a”, “b”, “c”, “ç” dhe “d” të pikës 2, në pikat 3 dhe 4, shtuar togfjalësh në shkronjën “b” të pikës 1 me VKM nr. 872, datë 30.12.2024)

1. Konsiderohen si tërësisht të përftuara në një vend apo territor përfitues ose në Republikën e Shqipërisë:

- a) produktet minerale të nxjerra nga toka ose nga shtrati i detit;
- b) produktet bimore të rritura dhe të korrura atje;
- c) kafshët e gjalla, të lindura dhe të rritura atje;
- ç) produktet nga kafshët e gjalla të rritura atje;
- d) produktet nga kafshët e therura, që janë lindur e rritur atje;
- dh) produktet e përftuara nga gjuetia apo peshkimi i kryer atje;
- e) produktet e peshkimit dhe produkte të tjera të marra nga deti jashtë ujërave territoriale nga anijet/barkat e tij;
- ë) produktet e prodhuara në bordin e anijeve-fabrikë ekskluzivisht nga produktet e referuara në shkronjën “e”;
- f) artikujt e përdorur, me kusht që të jenë mbledhur atje dhe që shërbejnë vetëm për rikuperimin e lëndëve të para;
- g) mbeturinat dhe mbetjet që rezultojnë nga operacionet e prodhimit të kryera atje;

gj) produkte të nxjerra nga shtrati i detit ose nën shtratin e detit, i cili ndodhet jashtë ujërave territoriale, por vetëm kur vendi apo territori përfitues ose Republika e Shqipërisë ka të drejtën ekskluzive të shfrytëzimit;

h) mallra të prodhuara atje ekskluzivisht nga produktet e specifikuar në shkronjat “a” deri në “gj”.

2. Termat “anijet/barkat e tyre” dhe “anijet e tyre fabrikë” në shkronjat “e” dhe “ë”, të pikës 1, aplikohen vetëm për anijet/barkat dhe anijet-fabrikë që plotësojnë kushtet e mëposhtme:

a) Janë të regjistruara ose të matriculuara në një vend apo territor përfitues ose në Republikën e Shqipërisë;

b) Mbajnë flamurin e vendit apo territorit përfitues ose të Republikës së Shqipërisë;

c) Zotërohen, me të paktën 50%, nga shtetasit e vendit apo territorit përfitues ose të Republikës së Shqipërisë, apo nga një kompani me seli kryesore në një vend apo territor përfitues ose në Republikën e Shqipërisë, nga të cilat administratori apo administratorët, kryetari i bordit të drejtorëve ose të bordit mbikëqyrës dhe shumica e anëtarëve të bordeve të tilla janë nënshetas të vendit apo territorit përfitues ose të Republikës së Shqipërisë dhe, për më tepër, në rastin e kompanive, të paktën gjysma e kapitalit i përket vendit apo territorit përfitues ose të Republikës së Shqipërisë, apo institucioneve publike ose shtetasve të vendit apo territorit përfitues ose të Republikës së Shqipërisë.

ç) Kapiteni dhe oficerët e barkave dhe anijeve-fabrikë janë shtetas të vendit apo territorit përfitues ose të Republikës së Shqipërisë.

d) Të paktën 75% e ekuipazhit janë të vendit apo territorit përfitues ose të Republikës së Shqipërisë.

3. Termat “vendi apo territori përfitues” dhe “Republika e Shqipërisë” mbulojnë, gjithashtu, edhe ujërat territoriale të vendit apo territorit përfitues ose të Republikës së Shqipërisë.

4. Anijet/barkat, që operojnë në det të hapur, përfshirë edhe anijet-fabrikë, në të cilat produktet/peshqit që kapen punohen apo përpunohen, konsiderohen si pjesë të vendit apo territorit përfitues ose Republikës së Shqipërisë, të cilit i përkasin, me kusht që ato të plotësojnë kushtet e përcaktuara në pikën 2.

Neni 123

Produkte të punuara ose të përpunuara mjaftueshëm

(pika 3, e nenit 63, të Kodit)

(Ndryshuar togfjalësh në paragrafin e parë me VKM nr. 872, datë 30.12.2024)

Për qëllime të nenit 121, produktet, të cilat nuk janë tërësisht të përfuara në vendin apo territorin përfitues ose në Republikën e Shqipërisë, konsiderohen të punuara ose të përpunuara mjaftueshëm me kusht që të plotësohen kushtet e përcaktuara në aneksin 22-11, të shtojcës A, bashkëlidhur këtij vendimi dhe pjesë përbërëse e tij.

Këto kushte tregojnë punimin ose përpunimin që duhet të kryhet mbi materialet joorigjinuese të përdorura në prodhimin e të gjitha produkteve të trajtuara nga ky nënseksion dhe zbatohen vetëm në lidhje me materiale të tilla.

Nëse një produkt, i cili ka fituar statusin origjinues duke plotësuar kushtet e vendosura në listë, është përdorur në prodhimin e një produkti tjetër, kushtet e zbatuara ndaj një produkti në të cilin ai bën pjesë nuk zbatohen tek ai dhe nuk do të merren parasysh materialet joorigjinuese, të cilat mund të jenë përdorur në prodhimin e tij.

Neni 124

Punimi ose përpunimi i pamjaftueshëm

(pika 3, e nenit 63, të Kodit)

(Shtuar togfjalësh nën titull dhe ndryshuar togfjalësh në pikën 2 me VKM nr. 872, datë 30.12.2024)

1. Pa rënë ndesh me pikën 2, konsiderohen si punime ose përpunime të pamjaftueshme për t'i dhënë statusin origjinues produktit, nëse plotësohen ose jo kërkesat e nenit 123, operacionet e mëposhtme:

- a) Kryerja e operacioneve për të siguruar që produkti mbahet në kushte të mira gjatë transportit dhe magazinimit;
- b) Ndarjet dhe bashkimet e paketimeve;
- c) Larja, pastrimi, heqja e pluhurit, oksidit, vajit, njollave apo mbetjeve të tjera;
- ç) Hekurosja ose presimi i tekstileve dhe artikujve të tekstilit;
- d) Operacionet e thjeshta të lyejeve apo lustrimit;
- dh) Tharja, bluarja e pjesshme apo totale, shkëlqimi dhe lëmimi i drithërave dhe orizit;
- e) Operacionet për të ngjyrosur ose për t'i dhënë shije sheqerit ose për të formuar kubikët e sheqerit; bluarja e pjesshme ose totale e sheqerit;
- ë) Heqja e lëkurës, bërthamës dhe farave të frutave, arrave e perimeve;
- f) Mprehja, bluarjet ose prerjet e thjeshta;
- g) Shoshitja, sitja, seleksionimi, klasifikimi, kategorizimi, kombinimi (duke përfshirë vendosjen e pjesëve të artikujve);
- gj) Vendosjet e thjeshta në shishe, kanoçe, epruveta, çanta, valixhe, kuti, fiksimi i tyre në kartonë ose dërrasa si dhe të gjitha operacionet e tjera të paketimit të thjeshtë;
- h) Fiksimi ose printimi i markave, etiketave, logove dhe shenjave të tjera të dallueshme mbi produkte ose mbi paketimin e tyre;
- i) Përzierjet e thjeshta të produkteve, qoftë të llojeve të ndryshme ose jo; përzierjet e sheqerit me çdo lloj materiali;
- j) Shtimi i thjeshtë i ujit ose hollimi, tharja/ dehidratimi ose denaturimi i produkteve;
- k) Bashkimi i thjeshtë i pjesëve të artikujve për të bërë një artikull të plotë ose ndarja e produktit në pjesë;

l) Tharja e kafshëve;

ll) Kombinimi i dy ose më shumë prej veprimeve të përcaktuara në shkronjat “a” deri në “p”.

2. Për të përcaktuar nëse punimi ose përpunimi i një produkti të caktuar duhet të konsiderohet i pamjaftueshëm sipas pikës 1, mbahen parasysh në tërësi të gjitha operacionet që kryhen në vendin apo territorin përfitues ose në Republikën e Shqipërisë në atë produkt.

Neni 125

Njësia e kualifikimit

(pika 3, e nenit 63, të Kodit)

(Shtuar togfjalësh nën titull me VKM nr. 872, datë 30.12.2024)

1. Njësia e kualifikimit për zbatimin e dispozitave të këtij nënseksioni duhet të jetë produkti specifik, i cili konsiderohet si njësi bazë gjatë përcaktimit të klasifikimit sipas Sistemit të Harmonizuar.

Në këtë kuptim, vijon se:

a) kur një produkt i përbërë nga një grup ose bashkim artikujsh është i klasifikuar sipas Sistemit të Harmonizuar nën një kre të vetëm, atëherë e tëra përbën njësinë e kualifikimit;

b) kur një dërgesë përfaqëson një numër produktesh identike të klasifikuara nën të njëjtin kre të Sistemit të Harmonizuar, çdo produkt duhet të merret individualisht, në rastin e zbatimit të dispozitave të këtij nënseksioni.

2. Kur, në bazë të rregullit të përgjithshëm interpretues 5 të Sistemit të Harmonizuar, paketimi përfshihet bashkë me produktin për qëllime klasifikimi, ai do të përfshihet për qëllime të përcaktimit

të origjinës.

Neni 126

Toleranca e përgjithshme

(pika 3, e nenit 63, të Kodit)

(Shtuar togfjalësh nën titull me VKM nr. 872, datë 30.12.2024)

1. Duke anashkaluar nenin 123, materialet joorigjinuese mund të përdoren në prodhimin e një produkti të caktuar, me kusht që vlera e tyre e përgjithshme të mos e kalojë 10% e çmimit të fabrikës/*ex-works* të produktit.

Nëse në listë, për vlerën maksimale të materialeve joorigjinuese janë dhënë një ose disa përqindje, zbatimi i paragrafit të parë nuk duhet të sjellë tejkalimin e kësaj përqindjeje.

2. Pika 1 nuk zbatohet për produktet e parashikuara nga kapitulli 50 deri në 63 të Sistemit të Harmonizuar.

Neni 127

Aksesorët, pjesët e këmbimit dhe veglat

(pika 3, e nenit 63, të Kodit)

(Shtuar togfjalësh nën titull me VKM nr. 872, datë 30.12.2024)

Aksesorët, pjesët e këmbimit dhe veglat e lidhura me një pjesë të pajisjes, makinës, aparatit ose mjetit, të cilat janë pjesë e pajisjes normale dhe përfshihen në çmimin e saj ose nuk janë faturuar veçmas, konsiderohen si një me pjesën e pajisjes, makinës, aparatit apo mjetit në fjalë.

Neni 128

Setet

(pika 3, e nenit 63, të Kodit)

(Shtuar togfjalësh nën titull me VKM nr. 872, datë 30.12.2024)

Setet, sipas përcaktimit në rregullin e përgjithshëm interpretues 3 të Sistemit të Harmonizuar, konsiderohen si origjinuese kur të gjitha produktet përbërëse të jenë origjinuese. Megjithatë, kur një set përbëhet nga produkte origjinuese dhe produkte joorigjinuese, atëherë seti, si i tërë, konsiderohet si origjinues, me kusht që vlera e produkteve joorigjinuese të mos e kalojë 15% të çmimit të fabrikës/*ex-works*.

Neni 129

Elementet neutrale

(pika 3, e nenit 63, të Kodit)

(Shtuar togfjalësh nën titull me VKM nr. 872, datë 30.12.2024)

Me qëllim që të përcaktohet nëse një produkt është një produkt origjinues, nuk do të jetë e nevojshme të përcaktohet origjina e artikujve që mund të jenë përdorur gjatë prodhimit të tij, të tillë si:

- a) energjia elektrike dhe karburanti;
- b) toka dhe pajisjet;
- c) makineritë dhe veglat;
- ç) mallrat, të cilat nuk hyjnë dhe të cilat nuk synohen të hyjnë në përbërjen përfundimtare të produktit.

Neni 130

Kërkesa të përgjithshme

(Pika 1, e nenit 63, të Kodit)

(Ndryshuar titulli dhe togfjalësia në paragrafin e parë dhe të dytë, shtuar fjalë në fund të shkronjës "a" të paragrafit të parë me VKM nr. 872, datë 30.12.2024)

Produktet me origjinë në vendin apo territorin përfitues do të përfitojnë nga preferencat e njëanshme tarifore të dhëna nga Republika e Shqipërisë me paraqitjen e:

a) një certifikate qarkullimi mallrash EUR.1, lëshuar duke përdorur formularin e paraqitur në aneksin 22-10, të shtojcës B, bashkëlidhur këtij vendimi dhe pjesë përbërëse e tij; ose,

b) në rastet e specifikuara në pikën 1, të nenit 136, një deklaratë, teksti i së cilës jepet në aneksin 22-13, të shtojcës B, bashkëlidhur këtij vendimi dhe pjesë përbërëse e tij, dhënë nga eksportuesi në një faturë, fletëngarkesë apo një dokument tjetër tregtar, i cili përshkruan produktet në detaje të mjaftueshme për të mundësuar identifikimin e tyre (në vijim referuar si 'deklaratë faturë').

Kutia 7 e certifikatave të qarkullimit të mallrave EUR.1 ose të deklaratave faturë duhet të përmbajë shënimin "*Autonomous trade measures*" apo "Masat autonome tregtare".

Neni 131

Procedura për lëshimin e një certifikate qarkullimi mallrash EUR.1

(Pika 1, e nenit 63, të Kodit)

(Ndryshuar me VKM nr. 872, datë 30.12.2024)

1. Produktet origjinuese, në kuptimin e nënseksionit 3, të seksionit 2, të kreut 3, të titullit II, do të jenë të pranueshme gjatë importimit në Republikën e Shqipërisë për të përfituar nga preferencat tarifore, të referuara në nenin 121, me kusht që ato të jenë transportuar direkt në Republikën e Shqipërisë, brenda kuptimit të nenit 145, me paraqitjen e një certifikate qarkullimi mallrash EUR.1, të lëshuar nga autoritetet doganore apo autoritete të tjera kompetente shtetërore të vendit apo territorit përfitues, me kusht që vendi apo territori përfitues:

a) t'i ketë komunikuar Drejtorisë së Përgjithshme të Doganave në Republikën e Shqipërisë informacionin e kërkuar nga neni 141;

b) të ndihmojë Republikën e Shqipërisë duke lejuar autoritetet doganore të Republikës së Shqipërisë për të verifikuar vërtetësinë e dokumentit ose saktësinë e informacionit, në lidhje me origjinën e produkteve në fjalë.

2. Një certifikatë qarkullimi mallrash EUR.1 mund të lëshohet vetëm kur ajo mund të shërbejë si një provë dokumentare, e kërkuar për qëllimet e preferencave tarifore, të referuara në nenin 121.

3. Një certifikatë qarkullimi mallrash EUR.1 do të lëshohet vetëm me aplikimin me shkrim nga eksportuesi ose përfaqësuesi i tij. Aplikimi duhet të paraqitet duke përdorur formularin e paraqitur në anekset 22-10, të shtojcës B, dhe do të plotësohet në përputhje me dispozitat e këtij neni dhe të neneve 130, 132 deri 135, 138 dhe 140.

Aplikimet për certifikatat e qarkullimit të mallrave EUR.1 do të mbahen nga autoritetet kompetente lëshuese të vendit apo territorit përfitues ose të Republikës së Shqipërisë, për të paktën 3 (tre) vjet, nga fundi i vitit në të cilin është lëshuar certifikata e qarkullimit.

4. Eksportuesi ose përfaqësuesi i tij duhet të paraqesë me aplikimin e tij të gjitha dokumentet e duhura mbështetëse, që provojnë se produktet për t'u eksportuar kualifikohen për lëshimin e një certifikate qarkullimi mallrash EUR.1.

Me kërkesën e autoriteteve kompetente, eksportuesi duhet të paraqesë të gjitha dokumentet shtesë, që mund t'i kërkojnë, me qëllim të vërtetimit të saktësisë së statusit të origjinës së produkteve të kualifikueshme për trajtim preferencial dhe do të pranojë kontrollin e llogarive/kontabilitetit të tyre dhe çdo kontroll tjetër të kushteve të prodhimit dhe rrethanave, në të cilat produktet janë përftuar.

5. Certifikata e qarkullimit të mallrave EUR.1 lëshohet nga autoritetet kompetente/autoritetet doganore, nëse produktet që do të eksportohen mund të konsiderohen si produkte origjinuese në vendin apo territorin përfitues ose në Republikën e Shqipërisë, në kuptimin e nënseksionit 3, të seksionit 2, të kreut 3, të titullit II.

6. Që në momentin që certifikata e qarkullimit të mallrave EUR.1 përbën provë dokumentare për zbatimin e marrëveshjeve preferenciale, të përcaktuara në nenin 121, do të jetë përgjegjësi e autoriteteve kompetente të vendit apo territorit përfitues ose autoriteteve doganore të Republikës së Shqipërisë të marrin të gjithë hapat e nevojshëm për të verifikuar origjinën e produkteve dhe për të kontrolluar treguesit e tjerë në certifikatë.

7. Me qëllim që të verifikohet nëse janë plotësuar kushtet e përcaktuara në pikën 5, autoritetet kompetente/autoritetet doganore të vendit apo territorit përfitues ose të Shqipërisë kanë të drejtë të kërkojnë dokumente shtesë ose të kryejnë çdo kontroll, të cilin ata e konsiderojnë të nevojshëm.

8. Autoritetet kompetente të vendit apo territorit përfitues ose autoritetet doganore të Republikës së Shqipërisë kanë përgjegjësi të sigurojnë, që formularët e referuar në pikën 1, të jenë plotësuar siç duhet.

9. Data e lëshimit të një certifikate qarkullimi mallrash EUR.1 duhet të tregohet në atë pjesë të certifikatës të rezervuar për autoritetet kompetente lëshuese.

10. Certifikata e qarkullimit të mallrave EUR.1 lëshohet nga autoritetet kompetente të vendit apo territorit përfitues ose nga autoritetet doganore të Republikës së Shqipërisë, kur produktet me të cilat ai ka lidhje, eksportohen. Kjo bëhet e vlefshme për eksportuesin sapo të kryhet eksporti ose kur është e sigurt që eksporti do të kryhet.

Neni 132

Importimi me këste

(Pika 1, e nenit 63, të Kodit)

(Ndryshuar fjalë me VKM nr. 872, datë 30.12.2024)

Kur, me kërkesën e importuesit dhe me kushtet e parashtruara nga autoritetet doganore të vendit importues, produktet e çmontuara ose të pamontuara, në kuptimin e rregullit të përgjithshëm interpretues 2, shkronja “a”, të Sistemit të Harmonizuar dhe që janë në seksionin XVI ose XVII, ose krerët 7308 ose 9406 të Sistemit të Harmonizuar, importohen me këste (pjesë-pjesë), për të tilla raste, për këto produkte, një provë e vetme e origjinës duhet të paraqitet pranë autoriteteve doganore gjatë importimit të kështit (pjesës) të parë.

Neni 133

Paraqitja e provës së origjinës

(Pika 1, e nenit 63, të Kodit)

(Hequr fjalë me VKM nr. 872, datë 30.12.2024)

Prova e origjinës duhet të paraqitet pranë autoriteteve doganore të importit, në përputhje me procedurat e parashikuara në nenin 150, të Kodit. Autoritetet e mësipërme mund të kërkojnë një përkthim të provës së origjinës dhe, gjithashtu, mund të kërkojnë që deklaratës së importit t'i bashkëlidhet një deklaram nga importuesi, që vërteton se produktet plotësojnë kushtet e kërkuara për zbatimin e këtij nënseksioni.

Neni 134

Certifikata e qarkullimit të mallrave EUR.1, lëshuar a-posteriori

(Pika 1, e nenit 63, të Kodit)

(Shtuar fjalë në shkronjën “a” të pikës 1 dhe ndryshuar togfjalësh në pikën 3 me VKM nr. 872, datë

30.12.2024)

1. Duke anashkaluar pikën 10, të nenit 131, një certifikatë qarkullimi mallrash EUR. 1 mund të lëshohet pas eksportimit të produkteve të cilave iu referohet, nëse plotësohet njëri nga dy kushtet e mëposhtme:

a) Ajo nuk është lëshuar në kohën e eksportimit, për shkak të gabimeve ose mungesave të pavullnetshme ose rrethanave të veçanta; ose,

b) Një certifikatë qarkullimi mallrash EUR.1, e cila është lëshuar në vendin eksportues, u është paraqitur autoriteteve doganore kompetente importuese, por nuk është pranuar gjatë importimit për arsye teknike.

2. Autoritetet doganore kompetente mund të lëshojnë një certifikatë qarkullimi mallrash EUR. 1 *a-posteriori* vetëm pasi të jetë verifikuar se informacioni i dhënë nga eksportuesi në aplikim është i njëjtë me atë të dosjeve korresponduese të eksportit dhe që një certifikatë qarkullimi mallrash EUR.1, për përmbushjen e dispozitave të këtij nënseksioni, nuk është lëshuar kur produktet në fjalë janë eksportuar.

3. Certifikatat e qarkullimit të mallrave EUR. 1, lëshuar *a-posteriori*, duhet të mbyllen me frazën në anglisht, “ISSUED RETROSPECTIVELY” ose në gjuhën shqipe “LESHUAR A-POSTERIORI”.

Shënimi, i referuar në pikën 3, do të vendoset në kutinë “Shënime”, të certifikatës së qarkullimit të mallrave EUR.1.

Neni 135

Lëshimi i një certifikate të qarkullimit të mallrave EUR. 1 dublikatë

(Pika 1, e nenit 63, të Kodit)

(Ndryshuar fjalë në pikën 1 dhe togfjalësh në pikën 2 me VKM nr. 872, datë 30.12.2024)

1. Në rast të vjedhjes, humbjes ose shkatërrimit të një certifikate qarkullimi mallrash EUR.1, eksportuesi mund të aplikojë për një dublikatë tek autoritetet kompetente, të cilat e kanë lëshuar atë, në bazë të dokumenteve të eksportit në zotërim të tij.

2. Dublikata e lëshuar në këtë mënyrë duhet të mbyllet me fjalën në anglisht “DUPLICATE”, ose në gjuhën shqipe “DUBLIKAT”.

3. Shënimi, i referuar në pikën 2, do të vendoset në kutinë “Shënime” të certifikatës së qarkullimit të mallrave EUR.1.

4. Dublikata duhet të tregojë datën e lëshimit të certifikatës origjinale të qarkullimit të mallrave EUR.1 dhe do të jetë në fuqi që nga ajo datë.

Neni 136

Kushtet për lëshimin e një deklarate-faturë

(Pika 1, e nenit 63, të Kodit)

(Ndryshuar togfjalësh në shkronjën “a” të pikës 1, në pikën 2, 3 dhe fjalë në pikën 4 me VKM nr. 872, datë 30.12.2024)

1. Deklarata-faturë mund të bëhet nga:

a) një eksportues i miratuar në Republikën e Shqipërisë, në kuptim të nenit 131;

b) çdo eksportues i ndonjë dërgese të përbërë nga një ose më shumë paketime që përmbajnë produkte origjinuese, vlera totale e të cilave nuk e kalon shumën ekuivalente në lekë të 6 000 eurove, dhe me kusht që asistencë e dhënë në pikën 1, të nenit 131, të zbatohet në këtë procedurë.

2. Një deklaratë-faturë mund të bëhet nëse produktet në fjalë mund të konsiderohen me origjinë në

Republikën e Shqipërisë ose në vendin apo territorin përfitues dhe që plotësojnë kërkesat e tjera të nënseksionit 3, të seksionit 2, të kreut 3, të titullit II.

3. Eksportuesi, që bën një deklaratë-faturë, duhet të përgatitet të paraqesë në çdo kohë, me kërkesën e autoriteteve kompetente/autoriteteve doganore, të gjitha dokumentet e nevojshme që provojnë statusin origjinues të produkteve në fjalë si dhe përmbushjen e kërkesave të tjera të nënseksionit 3 të seksionit 2, të kreut 3, të titullit II.

4. Një deklaratë-faturë duhet të lëshohet nga eksportuesi duke shtypur, stampuar ose printuar mbi faturën, fletëngarkesën ose ndonjë dokument tjetër tregtar deklaratën, teksti i së cilës tregohet në aneksin 22- 13, të shtojcës B, bashkëlidhur këtij vendimi dhe pjesë përbërëse e tij, duke përdorur një nga versionet gjuhësore të përcaktuara në atë aneks dhe në përputhje me dispozitat në fuqi. Nëse deklarata është e shkruar me dorë, duhet të shkruhet me bojë, me shkronja kapitale.

5. Një deklaratë-faturë duhet të ketë firmën origjinale të eksportuesit të shkruar me dorë. Megjithatë, një eksportuesi të miratuar, në kuptimin e nenit 137, nuk do t'i kërkohet të nënshkruajë deklarata të tilla, me kusht që ai t'u japë autoriteteve doganore një deklaratë me shkrim se ai pranon përgjegjësinë e plotë për çdo deklaratë, e cila e identifikon atë si të ishte e nënshkruar me nënshkrimin e tij me dorë.

6. Në rastet e përmendura në shkronjën "b", të pikës 1, përdorimi i një deklarate- faturë është objekt i kushteve të mëposhtme:

a) Një deklaratë-faturë duhet të bëhet për secilën dërgesë;

b) Nëse mallrat e përfshira në dërgesë tashmë janë verifikuar në vendin eksportues, sipas përkufizimit të "produkteve origjinuese", eksportuesi mund ta referojë këtë verifikim në deklaratën faturë.

Dispozitat e kësaj pike nuk përjashtojnë eksportuesit nga përmbushja e ndonjë formaliteti tjetër të kërkuar sipas rregullave doganore ose postare.

Neni 137

Eksportuesi i miratuar

(Pika 1, e nenit 63, të Kodit)

(Ndryshuar me VKM nr. 872, datë 30.12.2024)

1. Autoritetet doganore të Republikës së Shqipërisë mund të autorizojnë çdo eksportues të vendosur në territorin doganor të Republikës së Shqipërisë (në vijim eksportues i miratuar), që bën dërgesa të shpeshta të produkteve origjinuese në Republikën e Shqipërisë, brenda kuptimit të pikës 2, të nenit 121, dhe që ofron për të bindur autoritetet doganore, të gjitha garancitë e nevojshme për të verifikuar statusin e origjinës së produkteve, si dhe plotësimin e kërkesave të tjera të nënseksionit 3, të seksionit 2, të kreut 3, të titullit II, të këtij vendimi, të lëshojë deklaratë-faturë, pavarësisht nga vlera e produkteve në fjalë. Autoritetet doganore të Republikës së Shqipërisë do t'i caktojnë eksportuesit të miratuar një numër autorizimi doganor, i cili do të shfaqet në deklaratën faturë.

2. Autoritetet doganore mund të japin statusin e eksportuesit të miratuar, kur ata e gjykojnë të përshtatshme.

3. Autoritetet doganore do t'i caktojnë eksportuesit të miratuar një numër autorizimi doganor, i cili do të shfaqet në deklaratë-faturë.

4. Autoritetet doganore do të kontrollojnë përdorimin e autorizimeve nga eksportuesi i miratuar.

5. Autoritetet doganore mund ta tërheqin autorizimin në çdo kohë. Ata do ta bëjnë këtë kur eksportuesi i miratuar nuk ofron garancitë e referuara në paragrafin 1 nuk plotëson kushtet e përmendura në paragrafin 2 ose ndryshe bën përdorim të papërshtatshëm të autorizimit.

Neni 138

Vlefshmëria e provës së origjinës

(Pika 1, e nenit 63, të Kodit)

(Ndryshuar togfjalësh në fjalinë hyrëse dhe në shkronjat "b" dhe "c" të pikës 4 me VKM nr. 872, datë 30.12.2024)

1. Prova e origjinës do të jetë e vlefshme për 4 muaj, nga data e lëshimit në vendin eksportues, dhe duhet të dorëzohet brenda kësaj periudhe tek autoritetet doganore të vendit importues.

2. Prova e origjinës, e cila është paraqitur pranë autoriteteve doganore të vendit importues pas datës së fundit për paraqitje, specifikuar në paragrafin 1, mund të pranohen me qëllim aplikimin e preferencave tarifore të referuara në nenin 121, kur nuk është arritur depozitimi i këtyre dokumenteve deri në datën përfundimtare, shkaktuar nga rrethana të jashtëzakonshme.

3. Në rastet e tjera të depozitimeve të vonuara, autoritetet doganore të vendit importues mund ta pranojnë provën e origjinës nëse produktet janë paraqitur përpara përfundimit të afatit të përcaktuar.

4. Me kërkesë të importuesit dhe duke pasur parasysh kushtet e parashtruara nga autoritetet doganore të Republikës së Shqipërisë, një provë e origjinës mund të paraqitet pranë autoriteteve doganore me importimin e dërgesës së parë, kur mallrat përmbushin kushtet që vijnë:

a) Janë importuar në kuadrin e flukseve të shpeshta e të vazhdueshme tregtare të një vlere të rëndësishme tregtare;

b) Janë objekt i së njëjtës kontratë të shitjes, palë të kësaj kontrate të vendosura në vendin eksportues ose në Republikën e Shqipërisë;

c) Klasifikohen në të njëjtin Kod (tetë shifror) të Nomenklaturës së Kombinuar;

ç) Vijnë ekskluzivisht nga i njëjti eksportues, janë të destinuara për të njëjtin importues dhe janë bërë objekt i formaliteteve të hyrjes në të njëjtën zyrë doganore në Republikën e Shqipërisë.

Kjo procedurë do të jetë e zbatueshme për sasitë dhe për një periudhë të përcaktuar nga autoritetet doganore kompetente. Kjo periudhë, në asnjë rrethanë, nuk mund të kalojë 3 (tre) muaj.

5. Procedura e përcaktuar në pikën e mësipërme zbatohet edhe kur vetëm një provë e origjinës paraqitet pranë autoriteteve doganore për importet me këste (pjesë-pjesë), në përputhje me nenin 132. Megjithatë, në këtë rast, autoritetet kompetente doganore mund të japin një periudhë të aplikimit që zgjat më tepër se 3 (tre) muaj.

Neni 139

Përfshirjet nga prova e origjinës

(Pika 1, e nenit 63, të Kodit)

1. Produktet e dërguara si paketa të vogla, nga personi privat te personat privatë, ose që janë pjesë e bagazheve personale të udhëtarëve, do të pranohen si produkte me origjinë që përfitojnë nga preferencat tarifore të referuara në nenin 121, pa kërkuar paraqitjen e një certificate qarkullimi mallrash EUR.1 ose një deklarate-faturë, me kusht që këto produkte të mos jenë importuar për qëllime tregtie dhe të jenë deklaruar se plotësojnë kushtet e kërkuara për zbatimin e nënseksionit 3 të seksionit 2, të kreut 3, të titullit II, dhe atje ku nuk ka dyshim te vërtetësia e një deklarimi të tillë.

2. Importet, të cilat janë të rastit dhe përbëhen vetëm nga produkte për përdorim personal të pranuesit ose udhëtarëve apo familjeve të tyre nuk do të konsiderohen si importe për qëllime tregtie nëse është e qartë nga natyra dhe sasia e produkteve që nuk ka asnjë qëllim tregtar.

Gjithashtu, vlera totale e produkteve nuk duhet të kalojë vlerën ekuivalente në lekë të 500 eurove, në rastin e pakove të vogla, ose vlerën ekuivalente në lekë të 1 200 eurove, në rastin e produkteve që janë pjesë e bagazheve personale të udhëtarëve.

Neni 140

Mospërputhjet dhe gabimet formale

(Pika 1, e nenit 63, të Kodit)

Konstatimi i mospërputhjeve të vogla midis të dhënave të bëra në provën e origjinës dhe atyre të bëra në dokumentet e paraqitura në zyrën doganore për qëllime të kryerjes së formaliteteve për importimin e produkteve, nuk përbën fakt për ta bërë provën e origjinës të pavlefshme nëse përcaktohet që dokumenti i korrespondon produkteve të paraqitura.

Gabimet formale të dukshme në provën e origjinës, të tilla si gabime gjatë shtypjes, nuk bëhen shkas që ky dokument të refuzohet, nëse këto gabime nuk krijojnë dyshime lidhur me korrektësinë e të dhënave të bëra në atë dokument.

Neni 141

Bashkëpunimi administrativ

(Pika 1, e nenit 63, të Kodit)

(Ndryshuar me VKM nr. 872, datë 30.12.2024)

1. Vendet apo territoret përfituese do të informojnë autoritetin doganor të Republikës së Shqipërisë për emrat dhe adresat e autoriteteve kompetente shtetërore, të cilat janë të autorizuar të lëshojnë certifikatat e qarkullimit të mallrave EUR.1, së bashku me një kopje të specimeneve të vulave të përdorura nga këto autoritete, emrat dhe adresat e autoriteteve doganore kompetente, përgjegjëse për verifikimin e certifikatave të qarkullimit të mallrave EUR.1, si dhe deklaratave-faturë. Vulat do të jenë të vlefshme nga data e marrjes së specimeneve nga autoriteti doganor i Republikës së Shqipërisë. Autoriteti doganor ia përcjell këtë informacion degëve doganore të Republikës së Shqipërisë.

2. Autoriteti doganor i Republikës së Shqipërisë do t'u dërgojë vendeve apo territoreve përfituese specimenet e vulave, të cilat përdoren nga autoritetet doganore të Republikës së Shqipërisë për lëshimin e certifikatave të qarkullimit të mallrave EUR.1.

Neni 142

Verifikimi i provave të origjinës

(Pika 1, e nenit 63, të Kodit)

(Ndryshuar me VKM nr. 872, datë 30.12.2024)

1. Verifikimet e certifikatave të qarkullimit të mallrave EUR.1 dhe të deklaratave faturë do të kryhen në mënyrë të rastësishme ose sa herë që autoritetet doganore në Republikën e Shqipërisë ose autoritetet doganore të vendit apo territorit përfitues kanë dyshime të arsyeshme për origjinalitetin e të tilla dokumenteve për statusin e origjinës së produkteve, brenda kuptimit të nënseksionit 3, të seksionit 2, të kreut 3, të titullit II.

2. Për qëllime të zbatimit të dispozitave të pikës 1, autoritetet doganore kompetente importuese në Republikën e Shqipërisë ose të vendit apo territorit përfitues do të kthejnë certifikatën e qarkullimit të mallrave EUR.1 dhe faturën, në qoftë se ajo është dorëzuar, deklaratën-faturë ose një kopje të këtyre dokumenteve autoriteteve doganore kompetente eksportuese të vendit apo territorit përfitues apo Republikës së Shqipërisë, duke i dhënë, sipas rastit, arsyet për hetimin. Çdo dokument dhe informacion i marrë, i cili tregon se informacioni i dhënë në provën e origjinës është jokorrekt, duhet të bashkëngjitet në mbështetje të kërkesës për verifikim.

Nëse autoritetet doganore në Republikën e Shqipërisë vendosin të pezullojnë përkohësisht dhënien e preferencave tarifore, të referuara në nenin 121, ndërkohë që presin rezultatet e verifikimit, importuesit duhet t'i ofrohet mundësia për të çliruar produktet, përveç rasteve të marrjes së ndonjë mase parandaluese që gjykohet e nevojshme.

3. Kur një kërkesë për verifikimin e mëvonshëm është bërë në përputhje me pikën 1, një

verifikim i tillë duhet të kryhet dhe rezultatet e tij do t'u komunikohen autoriteteve doganore të Republikës së Shqipërisë ose autoriteteve kompetente të vendit apo territorit importues përfitues, maksimumi brenda 6 (gjashtë) muajve. Rezultatet e verifikimit duhet të tregojnë qartë, nëse prova e origjinës në fjalë i përket produkteve të eksportuara, pra është origjinale dhe nëse këto produkte mund të konsiderohen si origjinuese në vendin apo territorin përfitues apo në Republikën e Shqipërisë.

4. Në rast të dyshimeve të arsyeshme, nëse nuk ka përgjigje brenda 6 (gjashtë) muajve, të specifikuar në pikën 3, ose në qoftë se përgjigja nuk përmban informacion të mjaftueshëm për të përcaktuar origjinalitetin e dokumentit në fjalë ose origjinën e vërtetë të produkteve, një komunikim i dytë do të dërgohet tek organet kompetente. Në qoftë se pas komunikimit të dytë rezultatet e verifikimit nuk i komunikohen autoriteteve kërkuese brenda 4 (katër) muajve ose në qoftë se këto rezultate nuk tregojnë origjinalitetin e dokumentit në fjalë ose origjinën e vërtetë të produkteve, autoritetet doganore, me përjashtim të rrethanave të jashtëzakonshme, duhet të refuzojnë dhënien e preferencave tarifore.

5. Në rastet kur procedura e verifikimit ose çdo informacion tjetër i disponueshëm duket se tregon se dispozitat e nënseksionit 3, të seksionit 2, të kreut 3, të titullit II, po shkelen, autoritetet doganore të vendit apo territorit përfitues eksportues, me iniciativën e vet ose me kërkesë të Drejtorisë së Përgjithshme të Doganave të Republikës së Shqipërisë, do të kryejnë hetimet e duhura ose do të marrin masa që hetime të tilla të kryhen me urgjencën e duhur për të identifikuar dhe për të parandaluar shkelje të tilla. Për këtë qëllim, Drejtoria e Përgjithshme e Doganave e Republikës së Shqipërisë mund të marrë pjesë në hetime.

Neni 143

Ruajtja e provave të origjinës (pika 1, e nenit 63, të Kodit)

(Ndryshuar me VKM nr. 872, datë 30.12.2024)

Për qëllime të verifikimit të mëvonshëm të certifikatave të qarkullimit të mallrave EUR.1, kopjet e certifikatave, si dhe çdo dokument eksporti, që ka të bëjë me to, do të mbahen nga autoritetet kompetente doganore të vendit apo territorit përfitues eksportues ose autoriteteve doganore kompetente eksportuese të Republikës së Shqipërisë, për të paktën 3 (tre) vjet, nga fundi i vitit në të cilin janë lëshuar certifikatat e qarkullimit.

Nënseksioni 4

Masa preferenciale tarifore të miratuara në mënyrë të njëanshme nga RSH për vende apo territore të caktuara

Neni 144

Parimi i territorialitetit (Pika 3, e nenit 63, të Kodit)

Kushtet e përcaktuara në këtë nënseksion për përfitimin e statusit origjinues duhet të vazhdojnë të plotësohen në çdo kohë (pa ndërprerje) në vendin apo territorin përfitues ose në Republikën e Shqipërisë. Nëse produktet origjinuese, të cilat janë eksportuar nga vendi ose territori përfitues apo nga Republika e Shqipërisë në një vend tjetër kthehen, konsiderohen si joorigjinuese me përjashtim të rasteve kur i paraqiten autoriteteve doganore kompetente prova se janë plotësuar kushtet e mëposhtme:

- a) Produktet e kthyer janë të njëjta me ato që janë eksportuar;
- b) Ato nuk i janë nënshtruar ndonjë procesi tjetër, përveç atyre që nevojiten për t'i ruajtur në

kushte të mira, gjatë kohës së qëndrimit në këtë vend ose gjatë eksportimit.

Neni 145
Transporti i drejtpërdrejtë
(Pika 3, e nenit 63, të Kodit)

1. Konsiderohen si të transportuara direkt nga vendi apo territori përfitues drejt Republikës së Shqipërisë apo nga Republika e Shqipërisë drejt vendit apo territorit përfitues:

- a) produktet e transportuara pa kaluar përmes territorit të ndonjë vendi tjetër;
- b) produktet që përbëhen nga një dërgesë e vetme e transportuar nëpër territorin e vendeve të tjera nga vendi apo territori përfitues ose nga Republika e Shqipërisë dhe, nëse është e nevojshme, përmes transbordit apo magazinimit të përkohshëm në këto vende, me kusht që produkti të mbahet nën mbikëqyrjen e autoriteteve doganore në vendin e transitit ose të magazinimit dhe ato nuk i nënshtrohen operacioneve të tjera, përveç shkarkimit, ringarkimit ose ndonjë operacioni tjetër me synimin për t'i ruajtur ato në kushte të mira;
- c) produktet që transportohen me tubacione, pa ndërprerje, nëpër një territor të ndryshëm nga ai i vendit ose territorit përfitues eksportues ose i Republikës së Shqipërisë.

2. Prova që vërteton se janë plotësuar tërësisht kushtet e përcaktuara në shkronjën "b", të pikës 1, duhet t'i jepet autoriteteve doganore kompetente përmes paraqitjes së ndonjë prej dokumenteve të mëposhtme:

- a) Një dokumenti të vetëm transporti, që tregon kalimin nga vendi eksportues përmes vendit transit;
- b) Një certifikatë të lëshuar nga autoritetet doganore të vendit transit duke:
 - i. dhënë një përshkrim të saktë të produkteve;
 - ii. paraqitur datat e shkarkimit e të ngarkimit të produkteve dhe nëse është e zbatueshme, emrat e anijeve ose llojet e tjera të transportit të përdorura;
 - iii. paraqitur një vërtetim të kushteve nën të cilat ka qëndruar produkti në vendin e transitit;
- c) Ose, në rast se nuk mundësohen këto, ndonjë dokument tjetër thelbësor.

Neni 146
Ekspozitat
(Pika 3, e nenit 63, të Kodit)

1. Produktet origjinuese të dërguara nga një vend ose territor përfitues për ekspozim në një vend tjetër dhe të shitura pas ekspozitës, për t'u importuar në Republikën e Shqipërisë përfitojnë në import nga tarifat preferenciale të referuara në nenin 121, me kusht që ato të plotësojnë kërkesat e këtij nënseksioni, që i jep atyre të drejtën për t'u konsideruar me origjinë nga ai vend ose territor përfitues dhe me kusht që të provojë pranë autoriteteve kompetente doganore të Republikës së Shqipërisë se:

- a) një eksportues i ka dërguar produktet nga vendi ose territori përfitues direkt në vendin ku bëhet ekspozita dhe i ka ekspozuar ato atje;
- b) produktet janë shitur ose dhënë nga ky eksportues një personi në Republikën e Shqipërisë;
- c) produktet janë dorëzuar gjatë ekspozitës ose menjëherë pas saj në Republikën e Shqipërisë, në gjendjen në të cilën ishin dërguar për ekspozim;
- ç) produktet e dërguara për ekspozim nuk janë përdorur për ndonjë qëllim tjetër, përveç atij të ekspozimit.

2. Një certifikatë lëvizëse qarkullimi mallrash EUR. 1 dorëzohet sipas procedurave normale tek autoritetet doganore të Republikës së Shqipërisë. Emri dhe adresa e ekspozitës duhet të jenë të treguara qartë në të. Kur është e nevojshme, mund të kërkohet një provë dokumentuese shtesë për

natyrën e produkteve dhe kushtet në të cilat ato janë të ekspozuara.

3. Pika 1 zbatohet për çdo ekspozitë tregtare, industriale, bujqësore apo artizanale, panair apo shfaqje publike të ngjashme që nuk është organizuar për qëllime private në dyqane apo në ambientet e bizneseve me synimin e shitjes së produkteve të huaja dhe gjatë ekspozimit produktet mbeten nën kontrollin doganor.

Neni 147

Kërkesa të përgjithshme

(Pika 3, e nenit 63, të Kodit)

Produktet me origjinë nga vende, grupe vendesh apo territore do të përfitojnë nga masat tarifore preferenciale të miratuara në mënyrë të njëanshme nga Republika e Shqipërisë, duke zbatuar *mutatis mutandis* rregullat e përcaktuara në nenet 130 - 142.

KREU 4

Vlera e mallrave për qëllime doganore

Neni 148

Dispozita të përgjithshme

(Shkronja “ç”, e pikës 3, e nenit 66, të Kodit)

1. Për qëllime të këtij kreu, dy persona do të konsiderohen të jenë të lidhur në qoftë se përmbushet një nga kushtet e mëposhtme:

- a) Njëri prej tyre është anëtar ose drejtues i biznesit të tjetrit dhe anasjelltas;
- b) Janë ligjërisht të njohur si ortakë në biznes;
- c) Janë punëdhënës dhe punëmarrës;
- ç) Një person i tretë zotëron, kontrollon apo mban, drejtpërdrejt ose tërthorazi, 5% ose më shumë të aksioneve me të drejtë vote ose të aksioneve të dy prej tyre;
- d) Njëri prej tyre, drejtpërdrejt ose tërthorazi, kontrollon tjetrin;
- dh) Të dy, drejtpërdrejt ose tërthorazi, kontrollohen nga një person i tretë;
- e) Së bashku, ata kontrollojnë një person të tretë, në mënyrë të drejtpërdrejtë ose të tërthortë;
- ë) Ata janë anëtarë të së njëjtës familje. Personat quhen se janë anëtarë të së njëjtës familje vetëm nëse ata kanë ndonjërin prej marrëdhënieve të mëposhtme me njëri-tjetrin:
 - i. burrë dhe grua;
 - ii. të paralindur dhe të paslindur, në vijë të drejtë, në shkallë të parë (prindër dhe fëmijë);
 - iii. vëlla e motër (pavarësisht nëse janë me gjak të plotë ose jo);
 - iv. të paralindur dhe të paslindur, në vijë të drejtë, në shkallë të dytë (gjysh/gjyshe dhe nip/mbesë);
 - v. dajë/xhaxha ose teze/hallë dhe nip/mbesë;
 - vi. vjehri/vjehra dhe dhëndër/nuse;
 - vii. kunetë dhe kunata.

2. Persona që janë të lidhur në biznes me njëri-tjetrin, për shkak se njëri prej tyre është i vetmi agjent, shpërndarës, ose koncesionar i tjetrit, sido që të jetë emërtimi, quhen të lidhur vetëm në qoftë se hyjnë në njërin prej marrëdhënieve të pikës 1.

3. Për qëllime të shkronjave “d”, “dh”, “e”, të pikës 1, një person konsiderohet se kontrollon një tjetër kur i pari është ligjërisht ose faktikisht në një pozicion për të ushtruar drejtimin mbi të dytin.

Neni 149

Vlera e transaksionit

(Pika 1, e nenit 66, të Kodit)

1. Vlera e transaksionit të mallrave të shitura për eksport drejt territorit doganor të Republikës së Shqipërisë përcaktohet në momentin e pranimin të deklaratës doganore, në bazë të shitjes që ndodh menjëherë para se mallrat të jenë sjellë në atë territor doganor.

2. Kur mallrat janë shitur për eksport drejt territorit doganor të Republikës së Shqipërisë, jo para se ato të sillleshin në atë territor doganor, por ndërkohë që ishin në magazinim të përkohshëm ose ndërkohë që ishin vendosur nën një regjim të posaçëm të ndryshëm nga transiti i brendshëm, përdorimi i veçantë përfundimtar (*end-use*) ose përpunimit pasiv, vlera e transaksionit do të përcaktohet në bazë të kësaj shitjeje.

Neni 150

Çmimi realisht i paguar ose që duhet paguar

(Pikat 1 dhe 2, të nenit 66, të Kodit)

1. Çmimi realisht i paguar ose që duhet paguar, në kuptim të pikave 1 dhe 2, të nenit 66, të Kodit, do të përfshijë të gjitha pagesat e bëra ose që do të bëhen si kusht i shitjes së mallrave të importuara nga blerësi, për ndonjë nga këta persona:

- a) shitësin;
- b) një palë të tretë në dobi të shitësit;
- c) një palë të tretë të lidhur me shitësin;
- ç) një palë të tretë, ku pagesa për atë palë është bërë në mënyrë që të plotësojë detyrimin e shitësit.

Pagesat mund të bëhen direkt ose indirekt, edhe me anë të letrave të kredisë ose të titujve të negociueshëm.

2. Veprimtaritë, duke përfshirë veprimtaritë e marketingut, të ndërmarra nga blerësi ose një ndërmarrje e lidhur me blerësin për llogarinë e tij, të ndryshme nga ato për të cilat një rregullim është parashikuar në nenin

67, të Kodit, nuk do të konsiderohen si një pagesë indirekte për shitësin.

Neni 151

Zbritjet

(Pikat 1 dhe 2, të nenit 66, të Kodit)

1. Për qëllimet e përcaktimit të vlerës doganore, në kuptim të pikës 1, të nenit 66, të Kodit, zbritjet do të merren në konsideratë në qoftë se, në momentin e pranimin të deklaratës doganore, kontrata e shitjes përcakton zbatimin dhe vlerën e tyre.

2. Zbritjet për pagesën e hershme do të merren në konsideratë në lidhje me mallrat për të cilat çmimi nuk ka qenë, në fakt, i paguar në momentin e pranimin të deklaratës doganore.

3. Zbritjet, që rrjedhin nga ndryshimet në kontratë, në një kohë më të vonshme nga pranimi i deklaratës doganore, nuk do të merren parasysh.

Neni 152

Dërgesa të pjesshme

(Pika 1, e nenit 66, të Kodit)

1. Kur mallrat e deklaruar për një procedurë doganore janë pjesë e një sasi më të madhe të mallrave të njëjta, të blera në një transaksion, çmimi realisht i paguar ose që duhet paguar, për qëllimet e pikës 1, të nenit

66, të Kodit, duhet të llogaritet proporcionalisht, në bazë të çmimit për sasinë totale të blerë. 2. Pjesëtimi i çmimit realisht të paguar ose që duhet paguar do të zbatohet edhe në rastin e humbjes së një pjese të dërgesës apo kur mallrat janë dëmtuar përpara se mallrat të jenë çliruar për qarkullim të lirë.

Neni 153

Rregullimet e çmimeve për mallrat me defekte

(Pika 1, e nenit 66, të Kodit)

(Shfuqizuar shkronja "c" me VKM nr. 872, datë 30.12.2024)

Një rregullim i çmimit të paguar ose të pagueshëm për mallrat, i bërë nga shitësi, në dobi të blerësit, mund të merret në konsideratë për përcaktimin e vlerës doganore, në përputhje me pikën 1, të nenit 66, të Kodit, nëse janë plotësuar kushtet e mëposhtme:

- a) Mallrat janë me defekt në momentin e pranimit të deklarës doganore për çlirim për qarkullim të lirë;
- b) Shitësi ka bërë rregullimin për të kompensuar për defektin në mënyrë që të përmbushet një nga kushtet e mëposhtme:
 - i) një detyrim kontraktual, i lidhur para pranimit të deklarës doganore;
 - ii) një detyrim ligjor i zbatueshëm mbi mallrat.
- c) Shfuqizuar.

Neni 154

Vlerësimi i kushteve dhe kërkesave

(Shkronja "b", e pikës 3, e nenit 66, të Kodit)

Kur shitja ose çmimi i mallrave të importuara i nënshtrohet një kushti ose kërkesë, vlera e të cilave duhet të përcaktohet në lidhje me mallrat që po vlerësohen, vlera të tilla do të konsiderohen si pjesë e çmimit realisht të paguar ose të pagueshëm, përveçse kur këto kushte apo kërkesa kanë të bëjnë me:

- a) një aktivitet, për të cilin zbatohet pika 2, e nenit 150;
- b) një element të vlerës doganore, në bazë të nenit 67, të Kodit.

Neni 155

Transaksionet ndërmjet personave të lidhur

(Shkronja "ç", e pikës 3, e nenit 66, të Kodit)

1. Kur blerësi dhe shitësi janë të lidhur, me qëllim që të përcaktohet nëse një marrëdhënie e tillë nuk ka ndikuar në çmim, rrethanat e shitjes do të shqyrtohen sipas nevojës dhe deklaruesit do t'i jepet një mundësi për sigurimin e mëtejshëm të detajuar të informacionit që mund të jetë i nevojshëm për ato rrethana.

2. Megjithatë, mallrat do të vlerësohen në përputhje me pikën 1, të nenit 66, të Kodit, ku deklaruesi provon se vlera e deklaruar e transaksionit i përfaqëson shumë njëërës prej vlerave të mëposhtme, të marra si kritere, të përcaktuara afërsisht të njëjtën kohë:

- a) Vlerës së transaksionit në shitje, mes blerësve dhe shitësve, të cilët nuk janë të lidhur në ndonjë rast të veçantë, të mallrave identike ose të ngjashme për eksport drejt territorit doganor të Republikës së Shqipërisë;
- b) Vlerës doganore të mallrave identike ose të ngjashme, të përcaktuar në përputhje me shkronjën "c", të pikës 2, të nenit 70, të Kodit;
- c) Vlerës doganore të mallrave identike ose të ngjashme, të përcaktuar në përputhje me shkronjën "ç", të pikës 2, të nenit 70, të Kodit.

3. Gjatë përcaktimit të vlerës së mallrave identike ose të ngjashme, të përmendura në pikën 2, do të merren parasysh elementet e mëposhtme:

- a) Ndryshimet e shfaqura në nivele tregtare;
- b) Sasitë;

- c) Elementët e listuar në pikën 1, të nenit 67, të Kodit;
 - ç) Shpenzimet e bëra nga shitësi në shitjet në të cilat ai dhe blerësi nuk janë të lidhur, nëse këto shpenzime nuk janë të shkaktuara nga shitësi, në rastet e shitjeve mes personave të lidhur.
4. Vlerat e marra si kritere të renditura në pikën 2, duhet të përdoren me kërkesë të deklaruesit. Ato nuk do të zëvendësojnë vlerën e deklaruar të transaksionit.

Neni 156

Mallrat dhe shërbimet që përdoren për prodhimin e mallrave të importuara

(Shkronja “b”, e pikës 1, e nenit 67, të Kodit)

1. Kur një blerës furnizon shitësin me ndonjë nga mallrat ose shërbimet e renditura në shkronjën “b”, të pikës 1, të nenit 67, të Kodit, vlera e këtyre mallrave dhe shërbimeve do të konsiderohet të jetë e barabartë me çmimin e tyre të blerjes. Çmimi i blerjes duhet të përfshijë të gjitha pagesat, të cilat blerësi i mallrave ose i shërbimeve të renditura në shkronjën “b”, të pikës 1, të nenit 67, është i detyruar t’i bëjë, për të marrë mallrat ose shërbimet.

Kur këto mallra ose shërbime janë prodhuar nga blerësi ose një person i lidhur me të, vlera e tyre do të jetë kostoja e prodhimit të tyre.

2. Kur vlera e mallrave dhe shërbimeve të renditura në shkronjën “b”, të pikës 1, të nenit 67, të Kodit, nuk mund të përcaktohet në përputhje me pikën 1, do të përcaktohet në bazë të të dhënave të tjera objektive e të përlogaritshme.

3. Kur mallrat e renditura në shkronjën “b”, të pikës 1, të nenit 67, të Kodit, janë përdorur nga blerësi para se ato të ishin furnizuar, vlera e tyre do të korrigjohet për të marrë parasysh çdo ulje çmimi.

4. Vlera e shërbimeve të përmendura në shkronjën “b”, të pikës 1, të nenit 67, të Kodit, përfshin shpenzimet e aktiviteteve të zhvillimit që nuk ishin të suksesshme, për aq sa ato lidhen me projektet apo porositë e mallrave të importuara.

5. Për qëllimet e nënndarjes (iv), të shkronjës “b”, të pikës 1, të nenit 67, të Kodit, shpenzimet e kërtimeve dhe projekteve nuk do të përfshihen në vlerën doganore.

6. Vlera e mallrave dhe shërbimeve të furnizuara, siç është përcaktuar në përputhje me pikat 1 deri 5, do të ndahet në mënyrë proporcionale mbi mallrat e importuara.

Neni 157

Pagesa mbi përdorimin e të drejtës së pronësisë intelektuale (royalties) dhe licencat

(Shkronja “c”, e pikës 1, të nenit 71, të Kodit)

1. *Royalties* dhe licencat që janë të lidhura me mallin e importuar, në mënyrë të veçantë të drejtat e transferuara sipas marrëveshjes së licencës apo të *royalties*, janë të trupëzuara në mallra. Metoda e llogaritjes së shumës së *royalties* ose të licencës nuk është vendimtare.

2. Kur metoda e llogaritjes së shumës së pagesës të *royalties* ose licencave bazohet në çmimin e mallrave të importuara, në mungesë të provave të kundërta, supozohet se pagesat e këtyre *royalties* ose të licencave lidhen me mallrat objekt vlerësimi.

3. Nëse pagesa për *royalties* ose për licenca lidhet pjesërisht me mallrat që do të vlerësohen dhe pjesërisht me përbërës të tjerë ose pjesë të shtuara mallrave pas importimit të tyre, ose të aktiviteteve apo shërbimeve të pas importimit, duhet të bëhet një rregullim i përshtatshëm.

4. *Royalties* dhe licenca konsiderohen për t’u paguar si kusht i shitjes për mallrat e importuara, kur përmbushet ndonjë nga kushtet e mëposhtme:

- a) Shitësi ose një person i lidhur me shitësin i kërkon blerësit për të bërë këtë pagesë;
- b) Pagesa nga blerësi është bërë për të përmbushur detyrimin e shitësit, në përputhje me detyrimet kontraktuale;
- c) Mallrat nuk mund të shiten ose të blihen nga blerësi pa pagesën e *royalties* ose të licencave për

një licencëdhënës.

5. Vendi në të cilin është vendosur pranuesi i pagesës së *royalties* ose licencës është i parëndësishëm.

6. Çmimit realisht të paguar ose që duhet paguar, për filmat kinematografikë të importuar në Republikën e Shqipërisë me të drejtën e riprodhimit dhe të shpërndarjes, nuk do t'i shtohet pagesa mbi përdorimin e të drejtës së pronësisë intelektuale (*royalties*) dhe pagesa mbi përdorimin e licencës (*license fee*).

Neni 158

Vendi i hyrjes së mallrave në territorin doganor të Republikës së Shqipërisë

(Shkronja “ç”, e pikës 1, të nenit 67, të Kodit)

(Ndryshuar fjalë në shkronjën “b” të pikës 4 me VKM nr. 872, datë 30.12.2024)

1. Për qëllime të shkronjës “ç”, të pikës 1, të nenit 67, të Kodit, vendi ku mallrat kanë hyrë në territorin doganor të Republikës së Shqipërisë do të jetë, si vijon:

a) Për mallrat e transportuara në rrugë detare, porti ku mallrat mbërrijnë për herë të parë në territorin doganor të Republikës së Shqipërisë;

b) Për mallrat e transportuara në rrugë detare dhe më pas, pa transbordim, nëpërmjet ujërave të brendshëm, porti i parë ku mund të kryhet shkarkimi;

c) Për mallrat e transportuara në rrugë hekurudhore, rrugë të brendshme ujore, ose rrugë automobilistike, vendi ku ndodhet zyra doganore e hyrjes;

ç) Për mallrat e transportuara me mënyrat e tjera të transportit, vendi ku kalohet kufiri i territorit doganor të Republikës së Shqipërisë.

2. Për qëllimet e shkronjës “ç”, të pikës 1, të nenit 67, të Kodit, kur mallrat janë sjellë në territorin doganor të Republikës së Shqipërisë dhe pastaj transportuar për në një destinacion, në një pjesë tjetër të këtij territori, nëpërmjet territoreve jashtë territorit doganor të Republikës së Shqipërisë, vendi ku mallrat janë sjellë në territorin doganor të Republikës së Shqipërisë do të jetë vendi ku mallrat janë sjellë për herë të parë në atë territor doganor, me kusht që mallrat të transportohen direkt përmes këtyre territoreve nga një rrugë e zakonshme në vendin e destinacionit.

3. Pika 2 zbatohet edhe kur mallrat janë shkarkuar, transportuar ose përkohësisht të palëvizshme në territoret jashtë territorit doganor të Republikës së Shqipërisë, për arsye që kanë të bëjnë vetëm me transportin e tyre.

4. Kur kushtet e përcaktuara në shkronjën “b”, të pikës 1, pikave 2 dhe 3, nuk plotësohen, vendi ku mallrat janë sjellë në territorin doganor të Republikës së Shqipërisë do të jetë, si më poshtë:

a) Për mallrat e transportuara në rrugë detare, porti i shkarkimit;

b) Për mallrat e transportuara me mënyra të tjera të transportit, vendi i specifikuar në shkronjat “c”, “ç” ose “d”, të pikës 1, është ai i vendosur në këtë pjesë të territorit doganor të Republikës së Shqipërisë, drejt së cilit janë dërguar mallrat.

Neni 159

Shpenzimet e transportit

(Shkronja “b”, e pikës 1, të nenit 67, të Kodit)

(Ndryshuar fjalë në pikën 1 me VKM nr. 872, datë 30.12.2024)

1. Kur mallrat transportohen me të njëjtat mënyra të transportit në një pikë përtej vendit ku ato janë sjellë në territorin doganor të Republikës së Shqipërisë, shpenzimet e transportit do të vlerësohen në raport me distancën nga vendi ku mallrat janë sjellë në territorin doganor të Republikës së Shqipërisë, në përputhje me nenin 158, vetëm nëse paraqiten prova para autoriteteve doganore për shpenzimet që

do të ishin bërë në bazë të një tarife standarde, për transportin e mallrave deri në vendin ku mallrat janë sjellë në territorin doganor të Republikës së Shqipërisë.

2. Shpenzimet e transportit ajror, duke përfshirë kostot e shpërndarjes ajrore ekspres, do të përfshihen në vlerën doganore të mallrave.

Kur transporti është falas ose i siguruar nga blerësi, shpenzimet e transportit që do të përfshihen në vlerën doganore të mallrave, do të llogariten në përputhje me një tarifë standarde që zbatohet zakonisht për të njëjtat mënyra transporti.

Neni 160

Detyrimet mbi dërgesat postare

(Pika 1, e nenit 66, të Kodit)

Detyrimet postare, në lidhje me mallrat e dërguara me postë në vendin e destinacionit, do të përfshihen në vlerën doganore të këtyre mallrave, me përjashtim të çdo takse postare shtesë që vendoset në territorin doganor të Republikës së Shqipërisë.

Neni 161

Mospranimi i vlerave të deklaruarat të transaksionit

(Pika 1, e nenit 66, të Kodit)

(Hequr fjali në pikën 4 me VKM nr. 872, datë 30.12.2024)

1. Kur autoritetet doganore, mbështetur në analizën e riskut, kanë dyshime të arsyeshme se vlera e deklaruar e transaksionit nuk përfaqëson shumën totale të paguar ose të pagueshme, siç referohet në pikën 1, të nenit 66, të Kodit, mund të kërkojnë nga deklaruesi të japë informacione shtesë dhe deklaruesi është i detyruar që të japë informacion dhe dokumente shtesë lidhur me:

a) vërtetësinë e dokumenteve të paraqitura;

b) informacion ose dokumente shtesë, të nevojshme, për përcaktimin e vlerës doganore të mallrave.

2. Në qoftë se përsëri mbeten dyshime, autoritetet doganore mund të vendosin që vlera e mallit nuk mund të përcaktohet në përputhje me pikën 1, të nenit 66, të Kodit. Autoritetet doganore, mbështetur në nenin 7.3, të Marrëveshjes për Zbatimin e nenit 7, të Marrëveshjes së Përgjithshme mbi Tarifat dhe Tregtinë

(GATT-1994), informojnë deklaruesin për aktin e vlerësimit.

Akti i vlerësimit duhet të sqarojë dyshimet e arsyeshme, rivekurimin dhe metodën e vlerësimit të përdorur për llogaritjen e vlerës doganore të mallit të importuar.

Brenda 10 ditëve nga informimi, deklaruesi mundet të ankohet me shkrim ndaj aktit të vlerësimit pranë degës doganore vendim marrëse.

Vendimi i arsyetuar i komunikohet me shkrim deklaruesit brenda 5 ditëve, depozitimi i ankimit.

3. Kundër vendimit, personit të interesuarit i lind e drejta e ankimit në Drejtorinë e Përgjithshme të Doganave. Në këtë rast, nenet 281 dhe 282, të Kodit, aplikohen *mutatis mutandis*.

4. Në zbatim të pikës 3, të nenit 70, të Kodit Doganor, përgatitja e të dhënave të disponueshme në Republikën e Shqipërisë dhe përditësimi i tyre, për përcaktimin e vlerës doganore, në rastet kur nuk ka qenë e mundur të përcaktohet në përputhje me pikën 3, të nenit 70, bëhen nga Drejtoria e Përgjithshme e Doganave. Të dhënat e disponueshme për vlerën doganore pasqyrohen në faqen e internetit të Drejtorisë së Përgjithshme të Doganave.

5. Ministri përgjegjës për financat mund të nxjerrë edhe akte të tjera nënligjore për vlerësimin doganor të mallrave.

Neni 162

Vlera doganore e mallrave identike ose të ngjashme
(Shkronjat “a” dhe “b”, të pikës 2, të nenit 70, të Kodit)

1. Gjatë përcaktimit të vlerës doganore të mallrave të importuara në përputhje me shkronjat “a” dhe “b”, të pikës 2, të nenit 70, të Kodit, do të përdoret vlera e transaksionit e mallrave identike ose të ngjashme të shitura në të njëjtin nivel tregtar dhe në sasi në thelb të njëjta me mallrat që po vlerësohen.

Kur nuk gjenden shitje të tilla, vlera doganore përcaktohet duke pasur parasysh vlerën e transaksionit të mallrave identike ose të ngjashme të shitura në një nivel të ndryshëm tregtar ose në sasi të ndryshme. Kjo vlerë e transaksionit duhet të përshtatet për të marrë parasysh ndryshimet që i përkasin nivelit tregtar dhe/ose sasisë.

2. Duhet të bëhet një rregullim, duke marrë parasysh ndryshimet thelbësore të këtyre shpenzimeve, ndërmjet mallrave të importuara dhe mallrave identike ose të ngjashme në fjalë, për shkak të dallimeve në largësi dhe mënyrat e transportit.

3. Kur është gjetur më shumë se një vlerë e transaksionit të mallrave identike ose të ngjashme, më e ulëta e këtyre vlerave do të përdoret për të përcaktuar vlerën doganore të mallrave të importuara.

4. “Mallrat identike” dhe “mallrat e ngjashme”, sipas rastit, nuk përfshijnë mallrat që kanë ose pasqyrojnë punën inxhinierike, zhvillimin, veprat e artit, punën e dizajnit, planet apo skicat për të cilat asnjë rregullim nuk është bërë në bazë të nënndarjes (iv), të shkronjës “b”, të pikës 1, të nenit 67, të Kodit, sepse një punë e tillë është kryer në Republikën e Shqipërisë.

5. Vlera e transaksionit të mallrave të prodhuara nga një person tjetër duhet të merret parasysh vetëm kur vlera e transaksionit nuk mund të gjendet për mallra identike ose të ngjashme, të prodhuara nga i njëjti person që ka prodhuar mallrat objekt vlerësimi.

Neni 163

Metoda deduktive

(Shkronja “c”, e pikës 2, të nenit 70, të Kodit)

1. Çmimi për njësi, i përdorur për përcaktimin e vlerës doganore në bazë të shkronjës “c”, të pikës 2, të nenit 70, të Kodit, do të jetë çmimi me të cilin mallrat e importuara ose mallrat identike apo të ngjashme të importuara janë shitur në Republikën e Shqipërisë, në gjendjen siç janë importuar, përafërsisht me kohën e importimit të mallrave që vlerësohen.

2. Në mungesë të një çmimi për njësi, siç përmendet në pikën 1, çmimi i njësisë së përdorur do të jetë çmimi me të cilin mallrat e importuara ose mallrat identike të importuara apo të ngjashme janë shitur në gjendjen siç janë importuar në territorin doganor të Republikës së Shqipërisë, në kohë më të hershme pas importimit të mallrave që do të vlerësohen dhe në çdo rast brenda 90 ditëve të atij importimi.

3. Në mungesë të një çmimi për njësi, siç referohet në të dy pikat 1 dhe 2, me kërkesë të deklaruesit, çmimi për njësi me të cilin mallrat e importuara janë shitur në territorin doganor të Republikës së Shqipërisë, pas punimit të mëtejshëm ose përpunimit, do të përdoret kompensimi për shkak të vlerës së shtuar nga punime apo përpunime të tilla.

4. Për qëllime të përcaktimit të vlerës doganore në bazë të shkronjës “c”, të pikës 2, të nenit 70, të Kodit, nuk do të merren parasysh:

- a) shitja e mallrave në një nivel tregtar të ndryshëm nga ai i pari, pas importimit;
- b) shitjet ndaj personave të lidhur;
- c) shitjet ndaj personave, të cilët, direkt ose indirekt, furnizojnë pa pagesë apo me kosto të reduktuar mallrat ose shërbimet e renditura në shkronjën “b”, të pikës 1, të nenit 67, të Kodit, për përdorim në lidhje me prodhimin dhe shitjen për eksport të mallrave të importuara;

ç) shitjet në sasi të cilat nuk janë të mjaftueshme për të lejuar përcaktimin e çmimit për njësi.

5. Gjatë përcaktimit të vlerës doganore, do të zbriten nga njësia e çmimit të përcaktuar në përputhje me pikat 1 deri 4, elementët e mëposhtëm:

a) Secili nga komisionet, që zakonisht paguhet ose bihet dakord për t'u paguar apo shtesat që bëhen zakonisht për qëllime fitimi dhe shpenzime të përgjithshme (duke përfshirë kostot direkte dhe indirekte të marketingut të mallrave në fjalë) në lidhje me shitjen në territorin doganor të Republikës së Shqipërisë të mallrave të importuara të së njëjtës kategori ose lloj, të cilat janë mallrat që bien brenda një grupi ose një sërë mallrash të prodhuara nga një sektor i caktuar industrial;

b) Shpenzimet e zakonshme të transportit dhe siguracionit dhe shpenzimet shoqëruese të shkaktuara në territorin doganor të Republikës së Shqipërisë;

c) Detyrimet e importit dhe detyrimet e tjera të pagueshme në territorin doganor të Republikës së Shqipërisë, për shkak të importit ose shitjes së mallrave.

Vlera doganore e mallrave që prishen shpejt, të importuara në ngarkesë, mund të përcaktohet direkt në përputhje me nenet 66 dhe 70, të Kodit.

Neni 164

Metoda e vlerës së përlllogaritur

(Shkronja “ç”, e pikës 2, të nenit 70, të Kodit)

(Ndryshuar fjalë në pikën 2 me VKM nr. 872, datë 30.12.2024)

1. Në zbatim të shkronjës “ç”, të pikës 2, të nenit 70, të Kodit, autoritetet doganore nuk mund të kërkojnë ose të detyrojnë një person jo të vendosur në territorin doganor të Republikës së Shqipërisë të paraqesë dokumente kontabile apo dokumente të tjera justifikuese, ose të lejojë akses në dokumente të tilla, për shqyrtim për qëllime të përcaktimit të vlerës doganore.

2. Kostoja ose vlera e materialeve dhe e përpunimit e përmendur në nenin nënndarjen (i), të shkronjës “ç”, të pikës 2, të nenit 70, të Kodit, do të përfshijë vlerën e elementëve të përcaktuar në nënndarjet (ii) dhe (iii) të shkronjës “a”, të pikës 1, të nenit 67, të Kodit. Ajo do të përfshijë koston në proporcionalitet të çdo produkti apo shërbimi të specifikuar në shkronjën “b”, të pikës 1, të nenit 67, të Kodit, të cilat janë furnizuar direkt ose indirekt, nga blerësi, për përdorim në lidhje me prodhimin e mallrave që vlerësohen. Vlera e elementëve të përcaktuar në nënndarjen (iv), të shkronjës “b”, të pikës 1, të nenit 67, të Kodit të cilat janë ndërmarrë në Republikën e Shqipërisë, përfshihet vetëm në masën që këto elemente i janë ngarkuar prodhuesit.

3. Kostoja e prodhimit përfshin të gjitha shpenzimet e kryera për krijimin, zhvillimin ose përmirësimin e konsiderueshëm ekonomik të mallrave. Ajo, gjithashtu, përfshin kostot e specifikuara në nenin nënndarjet (ii) dhe (iii), të shkronjës “b”, të pikës 1, të nenit 67, të Kodit.

4. Shpenzimet e përgjithshme, të përmendura në nënndarjen (ii), të shkronjës “ç”, të pikës 2, të nenit 70, të Kodit, mbulojnë kostot e drejtpërdrejta dhe të tërthorta të prodhimit dhe shitjes së mallrave për eksport, të cilat nuk janë të përfshira nënndarjen (i), të shkronjës “ç”, të pikës 2, të nenit 70, të Kodit.

Neni 165

Metoda e të dhënave të disponueshme

(Pika 3, e nenit 70, të Kodit)

1. Gjatë përcaktimit të vlerës doganore në bazë të pikës 3, të nenit 70, të Kodit, mund të përdoret një arsyetim fleksibël në aplikimin e metodave të parashikuara në nenet 66 dhe 70, pika 2, të Kodit. Vlera e përcaktuar në këtë mënyrë, për aq sa është e mundur, do të bazohet në vlerat doganore të përcaktuara më parë.

2. Kur vlerat doganore nuk mund të përcaktohen sipas pikës 1, do të përdoren metoda të tjera, të përshtatshme. Në këtë rast, vlera doganore nuk do të përcaktohet në bazën e ndonjërit prej

elementeve të mëposhtme:

- a) Çmimi i shitjes brenda territorit doganor të Republikës së Shqipërisë, të mallrave të prodhuara në territorin doganor të Republikës së Shqipërisë;
- b) Një sistem ku më e larta midis dy vlerave alternative është përdorur për vlerësimin doganor;
- c) Çmimi i mallrave në tregun e brendshëm të vendit eksportues;
- ç) Kostoja e prodhimit, e ndryshme nga vlerat e përlogaritura që janë përcaktuar për mallra identike ose të ngjashme, në bazë të shkronjës “ç”, të pikës 2, të nenit 70, të Kodit;
- d) Çmimet për eksport në një vend tjetër;
- dh) Vlerat minimale doganore;
- e) Vlerat arbitrare ose fiktive.

Neni 166
Thjeshtësime
(Neni 69 i Kodit)

1. Autorizimi, i referuar në nenin 69, të Kodit, mund të jepet kur plotësohen kushtet e mëposhtme:
 - a) Zbatimi i procedurës së referuar në nenin 152, të Kodit, në ato rrethana përfaqëson shpenzime administrative joproporcionale;
 - b) Vlera doganore e përcaktuar nuk do të ndryshojë shumë nga ajo e përcaktuar në mungesë të një autorizimi.
2. Dhënia e autorizimit kushtëzohet nga përmbushja e kushteve të mëposhtme:
 - a) Aplikuesi përmbush kriterin e parashikuar në shkronjën “a”, të nenit 41, të Kodit;
 - b) Aplikuesi mban një sistem të kontabilitetit, i cili është në përputhje me parimet e përgjithshme të pranura të kontabilitetit, të aplikuara në Republikën e Shqipërisë dhe që mundësojnë kontrollin doganor të bazuar në auditim. Sistemi i kontabilitetit mban një protokoll regjistrimi të të dhënave, që ofron gjurmë të auditimit që nga momenti kur të dhënat hyjnë në dosje;
 - c) Aplikuesi ka një organizim administrativ që i korrespondon llojit dhe madhësisë së biznesit dhe i cili është i përshtatshëm për menaxhimin e qarkullimit të mallrave, si dhe ka kontrole të brendshme të afta për zbulimin e transaksioneve të paligjshme ose të parregullta.

Neni 167
Dokumentet shoqëruese në lidhje me vlerën doganore
(Pika 1, e nenit 150, të Kodit)

Fatura, e cila ka të bëjë me vlerën e deklaruar të transaksionit, është e nevojshme si një dokument shoqërues.

Neni 168
Konvertimi i monedhës për qëllime të vlerësimit doganor
(Shkronja “a”, e pikës 1, të nenit 54, të Kodit)

Në përputhje me shkronjën “a”, të pikës 1, të nenit 54, të Kodit, për qëllime të vlerësimit doganor do të përdoret kursi i këmbimit i publikuar nga Banka e Shqipërisë.

Neni 169
Sistemi elektronik në lidhje me vlerën e mallrave

Deklarata e të dhënave në lidhje me vlerën doganore:

1. Deri në datat e përmirësimit të sistemit të informatizuar për importin, sipas planit të punës së ministrit përgjegjës për financat, deklarata doganore për çlirim për qarkullim të lirë do të përfshijë të dhëna në lidhje me vlerën doganore.

2. Autoritetet doganore mund të lejojnë përdorimin e mjeteve të tjera, të ndryshme nga teknikat elektronike të përpunimit të të dhënave për t'u përdorur në lidhje me dispozitat mbi të dhënat e përmendura në pikën 1.

3. Kur të dhënat e përmendura në paragrafin 1 janë siguruar duke përdorur mjete të tjera, të ndryshme nga teknikat elektronike të përpunimit, do të përdoret formulari i aneksit 4, të shtojcës C, bashkëlidhur këtij vendimi dhe pjesë përbërëse e tij.

4. Autoritetet doganore mund të heqin detyrimin për të paraqitur të dhënat e veçanta të referuara në pikën 1, të këtij neni, kur vlera doganore e mallrave në fjalë nuk mund të përcaktohet bazuar në nenin 66 të Kodit.

5. Përveç rasteve kur është e domosdoshme për përcaktimin e saktë të vlerës doganore, autoritetet doganore mund të heqin detyrimin për të siguruar të dhënat e përmendura në pikën 1, për ndonjë nga rastet e mëposhtme:

a) kur vlera doganore e mallrave të importuara në një ngarkesë nuk i kalon 10 000 euro, me kusht që kjo dërgesë të mos jetë e ndarë apo pjesë e dërgesave të shumëfishta nga i njëjti dërgues për të njëjtin marrës;

b) kur transaksioni bazë për çlirim për qarkullim të lirë të mallrave ka natyrë jo tregtare;

c) kur paraqitja e të dhënave në fjalë nuk është e nevojshme për zbatimin e Tarifës Doganore;

ç) kur detyrimet doganore të parashikuara në Tarifën Doganore nuk janë të tarifueshme.

6. Në rastin e qarkullimit të vazhdueshëm të mallrave nga i njëjti shitës për të njëjtin blerës, sipas kushteve të njëjta tregtare, autoritetet doganore mund të heqin dorë nga kërkesa e vazhdueshme për të siguruar të dhënat e përmendura në pikën 1.

TITULLI III

BORXHI DOGANOR DHE GARANCITË

KREU 1

Lindja e borxhit doganor

Seksioni 1

Dispozita të përbashkëta për lindjen e borxhit doganor në import dhe eksport

Nënseksioni 1

Rregullat për llogaritjen e shumës së detyrimit të importit ose eksportit

Neni 170

Llogaritja e shumës së detyrimit të importit për produktet e përpunuara që rezultojnë nga përpunimi aktiv

(Pika 3, e nenit 81, të Kodit)

1. Për të përcaktuar shumën e detyrimit të importit që duhet paguar për produktet e përpunuara në përputhje me pikën 3, të nenit 81, të Kodit, sasia e mallrave të vendosura nën regjimin e përpunimit aktiv konsiderohet të jetë e pranishme në produktet e përpunuara për të cilat lind një borxh doganor, në përputhje me pikat 2 deri në 6.

2. Metoda e matjes sasiore, e përcaktuar në pikat 3 dhe 4, zbatohet në rastet e mëposhtme:

a) Kur vetëm një lloj i produkteve të përpunuara rrjedh nga operacionet e përpunimit;

b) Kur lloje të ndryshme të produkteve të përpunuara rrjedhin nga operacionet e përpunimit dhe të

gjithë përbërësit ose komponentët e mallrave të vendosura nën regjim gjenden në secilin prej këtyre produkteve të përpunuara.

3. Në rastin e përmendur në shkronjën “a”, të pikës 2, sasia e mallrave të vendosura nën regjimin e përpunimit aktiv, që konsiderohet të jetë e pranishme në produktet e përpunuara për të cilat lind një borxh doganor, përcaktohet duke zbatuar ndaj sasisë totale të mallrave të vendosura nën regjimin e përpunimit aktiv një përqindje që i korrespondon raportit mes sasisë së produkteve të përpunuara për të cilat lind një borxh doganor dhe sasisë totale të produkteve të përpunuara nga operacionet e përpunimit aktiv.

4. Në rastin e përmendur në shkronjën “b”, të pikës 2, sasia e mallrave të vendosura nën regjimin e përpunimit aktiv, që konsiderohet të jetë e pranishme në produktet e përpunuara për të cilat lind një borxh doganor, përcaktohet duke zbatuar ndaj sasisë totale të mallrave të vendosura nën regjimin e përpunimit aktiv një përqindje të llogaritur duke shumëzuar faktorët e mëposhtëm:

a) përqindjen që zënë produktet e përpunuara për të cilat lind një borxh doganor në sasinë totale të produkteve të përpunuara të të njëjtit lloj që del nga operacionet e përpunimit;

b) përqindjen që zë sasia totale e produkteve të përpunuara të të njëjtit lloj, pavarësisht nga fakti nëse lind një borxh doganor në sasinë totale të të gjitha produkteve të përpunuara që dalin nga operacionet e përpunimit.

5. Sasi të e mallrave të vendosura nën regjim, të cilat janë shkatërruar dhe kanë humbur gjatë operacionit të përpunimit, në veçanti nga avullimi, tharja, kalimi në gjendje të gaztë apo rrjedhja, nuk do të merren parasysh në zbatimin e metodës së matjes sasiore.

6. Në raste të tjera, përveç atyre të përmendura në pikën 2, metoda e matjes së vlerës zbatohet në përputhje me paragrafët e dytë, të tretë dhe të katërt.

Sasia e mallrave të vendosura nën regjimin e përpunimit aktiv, që konsiderohet të jetë e pranishme në produktet e përpunuara për të cilat lind një borxh doganor, përcaktohet duke zbatuar për të gjithë sasinë e mallrave të vendosura nën regjimin e përpunimit aktiv një përqindje të llogaritur duke shumëzuar faktorët e mëposhtëm:

a) Përqindjen që zënë produktet e përpunuara, për të cilat lind një borxh doganor, në vlerën totale të produkteve të përpunuara të të njëjtit lloj që del nga operacioni i përpunimit;

b) Përqindjen që zë vlera totale e produkteve të përpunuara të të njëjtit lloj, pavarësisht nëse lind ndonjë borxh doganor, në vlerën totale të të gjitha produkteve të përpunuara që dalin nga operacioni i përpunimit.

Për qëllime të zbatimit të metodës së matjes së vlerës, vlera e produkteve të përpunuara përcaktohet në bazë të çmimeve aktuale të fabrikës (*ex-works*) në territorin doganor të Republikës së Shqipërisë ose, nëse nuk mund të përcaktohen çmime të tilla të fabrikës (*ex-works*), përcaktohet bazuar në çmimet aktuale të shitjes në territorin doganor të Republikës së Shqipërisë për produkte të njëjta ose të ngjashme. Çmimet e përcaktuara mes palëve që rezultojnë të jenë të lidhura ose të kenë një marrëveshje kompensuese me njëri-tjetrin nuk mund të përdoren për përcaktimin e vlerës së produkteve të përpunuara, përveç rasteve kur provohet se çmimet nuk ndikohen nga marrëdhëniet.

Kur vlera e produkteve të përpunuara nuk mund të përcaktohet në përputhje me paragrafin e tretë, atëherë ajo përcaktohet me ndonjë metodë tjetër të arsyeshme.

Neni 171

Zbatimi i dispozitave të regjimit të përdorimit të veçantë përfundimtar (end-use) ndaj produkteve

të përpunuara që rezultojnë nga përpunimi aktiv

(Pika 3, e nenit 81, të Kodit)

1. Për qëllimet e zbatimit të pikës 3, të nenit 81, të Kodit, kur duhet të përcaktohet shuma e detyrimit

të importit që i korrespondon borxhit doganor për produktet e përpunuara që dalin nga regjimi i përpunimit aktiv, përfitohet përjashtim nga detyrimi ose një reduktim i nivelit të detyrimit, nëse produktet e përpunuara vendosen nën regjimin e përdorimit të veçantë përfundimtar (*end-use*), në përputhje me nenin 227 të Kodit.

2. Pika 1 zbatohet kur plotësohen kushtet e mëposhtme:

a) Mund të jetë lëshuar një autorizim për t'i vendosur mallrat nën regjimin e përdorimit të veçantë përfundimtar (*end-use*), dhe

b) Përmbushen kushtet për përjashtim nga detyrimi ose reduktim të nivelit të detyrimit për shkak të përdorimit të veçantë përfundimtar (*end-use*) të këtyre mallrave në momentin e pranimin të deklarates doganore për vendosjen e mallrave nën regjimin e përpunimit aktiv.

Neni 172

Zbatimi i trajtimit tarifor preferencial për mallrat e vendosura nën regjimin e përpunimit aktiv
(Pika 3, e nenit 81, të Kodit)

Në zbatim të pikës 3, të nenit 81, të Kodit, kur në kohën e pranimin të deklarates doganore për vendosjen e mallrave nën regjimin e përpunimit aktiv, mallrat e importuara i plotësojnë kushtet për t'u klasifikuar për trajtim tarifor preferencial brenda kuotave apo tavanëve tarifore, këto mallra do të përfitojnë çdo trajtim tarifor preferencial të parashikuar në lidhje me mallrat identike në momentin e pranimin të deklarates për çlirim në qarkullim të lirë.

Neni 173

Detyrimi i veçantë i importit për produktet e përpunuara që rezultojnë nga përpunimi pasiv apo produktet zëvendësuese
(Pika 5, e nenit 81, të Kodit)

Kur duhet të zbatohet një detyrim i veçantë importi, në lidhje me produktet e përpunuara që rezultojnë nga regjimi i përpunimit pasiv apo produktet zëvendësuese, atëherë shuma e detyrimit të importit llogaritet në bazë të vlerës doganore të produkteve të përpunuara në kohën e pranimin të deklarates doganore për çlirim në qarkullim të lirë, minus vlerën statistikore të mallrave përkatëse të eksportuara përkohësisht, në kohën kur ato janë vendosur nën regjimin e përpunimit pasiv, shumëzuar me shumën e detyrimit të importit që zbatohet për produktet e përpunuara ose produktet zëvendësuese, pjesëtuar me vlerën doganore të produkteve të përpunuara ose produktet zëvendësuese.

Neni 174

Përjashtim nga llogaritja e shumës së detyrimit të importit për produktet e përpunuara të përftuara nga përpunimi aktiv
(pikat 2 dhe 4, të nenit 81, të Kodit)
(Ndryshuar me VKM nr. 872, datë 30.12.2024)

1. Pika 3, e nenit 81, të Kodit, zbatohet pa kërkesën e deklaruesit, kur plotësohen të gjitha kushtet e mëposhtme:

a) Produktet e përpunuara të përftuara nga regjimi i përpunimit aktiv importohen në mënyrë të drejtpërdrejtë ose të tërthortë nga mbajtësi përkatës i autorizimit, brenda një periudhe njëvjeçare, pas rieksporimit të tyre;

b) Në momentin e pranimin të deklarates doganore për vendosjen e mallrave nën regjimin e përpunimit aktiv, mallrat do t'i nënshtrohen masave të politikës tregtare dhe bujqësore, një detyrim të përkohshëm ose të përhershëm *antidumping*, një detyrim kundërbalancues, një mase mbrojtëse apo një detyrim shtesë që rezultojnë nga pezullimi i koncesioneve nëse ato do të deklaroheshin për

vendosje në qarkullim të lirë;

c) Nuk është kërkuar asnjë ekzaminim i kushteve ekonomike në përputhje me nenin 145.

2. Pika 3, e nenit 81, të Kodit, gjithashtu zbatohet pa kërkesën e deklaruesit, kur produktet e përpunuara janë përftuar nga mallrat e vendosura nën përpunim aktiv, të cilat, në momentin e pranimit të deklarates së parë për vendosjen e mallrave nën regjimin e përpunimit aktiv, do t'i nënshtroheshin detyrimit të përkohshëm ose të përhershëm *antidumping*, një detyrimi kundërbalancues, një mase mbrojtëse apo një detyrimi shtesë, që rezulton nga pezullimi i koncesioneve, nëse ato do të deklaroheshin për vendosje në qarkullim të lirë dhe rasti nuk mbulohet nga shkronjat “ë”, “f”, “i” ose “l”, të pikës 1, të nenit 537.

3. Pikat 1 dhe 2 nuk zbatohen kur mallrat e vendosura nën regjimin e përpunimit aktiv nuk do t'i nënshtroheshin detyrimit të përkohshëm ose të përhershëm *antidumping*, një detyrimi kundërbalancues, një mase mbrojtëse ose një detyrimi shtesë, që rezulton nga pezullimi i koncesioneve, në momentin kur lind një borxh doganor për produktet e përpunuara.

Nënseksioni 2

Afati kohor për përcaktimin e vendit ku lind borxhi doganor

Neni 175

Afati për përcaktimin e vendit ku lind borxhi doganor sipas transitit

(Pika 2, e nenit 82, të Kodit)

(Ndryshuar togfjalësh në shkronjat “a” dhe “b” me VKM nr. 872, datë 30.12.2024)

Për mallrat e vendosura nën regjimin e transitit, afati i referuar në pikën 2, të nenit 82, të të Kodit, do të jetë:

a) 7 (shtatë) muaj nga data e fundit në të cilën mallrat duhet të ishin paraqitur në zyrën doganore të destinacionit, përveç rastit kur, para skadimit të këtij afati kohor, është dërguar një kërkesë për të transferuar vjeljen e borxhit doganor tek autoriteti përgjegjës i vendit ku, sipas provave të marra nga autoritetet doganore të nisjes, ngjarjet nga të cilat ka lindur borxhi doganor kanë ndodhur. Në këtë rast afati zgjatet me një maksimum prej një muaji;

b) 7 (shtatë) muaj nga skadimi i afatit për përgjigje nga ana e mbajtësit të regjimit për një kërkesë për të dhënë informacionin e nevojshëm për mbylljen e regjimit, kur autoriteti doganor i nisjes nuk është njoftuar për mbërritjen e mallrave dhe mbajtësi i regjimit ka dhënë ose jo informacione të mjaftueshme.

Neni 176

Afati kohor për përcaktimin e vendit ku lind borxhi doganor sipas transitit në përputhje me Konventën TIR

(Pika 2, e nenit 82, të Kodit)

Për mallrat e vendosura nën regjimin e transitit në përputhje me Konventën Doganore mbi transportin ndërkombëtar të mallrave, që janë objekt i Carnet TIR, përfshirë çdo ndryshim të mëvonshëm (Konventa TIR), afati i përmendur në pikën 2, të nenit 82, të Kodit, do të jetë shtatë muaj nga data e fundit në të cilën mallrat duhet të ishin paraqitur në zyrën doganore të destinacionit ose të daljes.

Neni 177

Afati për përcaktimin e vendit ku lind borxhi doganor sipas transitit, në përputhje me Konventën ATA ose Konventën e Stambollit

(Pika 2, e nenit 82, të Kodit)

Për mallrat e vendosura nën regjimin e transitit në përputhje me Konventën ATA për Lejimin e Përkohshëm të Mallrave, të nënshkruar në Bruksel, më 6 dhjetor 1961, duke përfshirë çdo ndryshim të mëvonshëm të saj (Konventa ATA), ose me Konventën për Lejimin e Përkohshëm (Konventa e

Stambollit), duke përfshirë çdo ndryshim të mëvonshëm, afati kohor i përmendur në pikën 2, të nenit 82, të Kodit, do të jetë shtatë muaj nga data në të cilën mallrat duhet të ishin paraqitur në zyrën doganore të destinacionit.

Neni 178

Afati kohor për përcaktimin e vendit ku lind borxhi doganor në raste të tjera përveç transitit

(Pika 2, e nenit 82, të Kodit)

Për mallrat e vendosura nën një regjim të posaçëm përveç transitit ose për mallrat, të cilat janë në magazinim të përkohshëm, afati i përmendur në pikën 2, të nenit 82, të Kodit, do të jetë një muaj nga përfundimi i ndonjëres prej periudhave të mëposhtme:

- a) Periudha e përcaktuar për mbylljen e regjimit të posaçëm;
- b) Periudha e përcaktuar për përfundimin e mbikëqyrjes doganore të mallrave për përdorim të veçantë përfundimtar (*end-use*);
- c) Periudha e përcaktuar për përfundimin e magazinimit të përkohshëm;
- ç) Periudha e përcaktuar për përfundimin e lëvizjes së mallrave të vendosura nën regjimin e magazinimit, mes vendeve të ndryshme në territorin doganor të Republikës së Shqipërisë, kur nuk është mbyllur regjimi.

KREU 2

Garancia për një borxh doganor të mundshëm ose ekzistues

Seksioni 1

Dispozita të përgjithshme

Neni 179

Sistemet elektronike në lidhje me garancitë

(Neni 17 i Kodit)

1. Për shkëmbimin dhe ruajtjen e informacionit që ka të bëjë me garancitë do të ngrihet një sistem elektronik. Ky sistem zbatohet sipas planit të punës të miratuar nga ministri përgjegjës për financat.

2. Deri në datën e implementimit të sistemit të përmendur në pikën 1, autoritetet doganore mund të lejojnë përdorimin e mjeteve të tjera, të ndryshme nga teknika elektronike e përpunimit të të dhënave, në lidhje me aplikimet dhe vendimet që do të përdoren për shkëmbimin dhe ruajtjen e informacionit për garancitë.

3. Shkëmbimi dhe ruajtja e informacionit për garancitë, siç përmendet në pikën 2, dhe kur garancitë janë paraqitur për ndonjë qëllim tjetër përveç transitit, do të zbatohet si vijon:

- a) ruajtja e informacionit duhet të bëhet nga autoritetet doganore të Republikës së Shqipërisë, në përputhje me sistemin ekzistues kombëtar;
- b) për shkëmbimin e informacionit midis autoriteteve doganore do të përdoret posta elektronike.

4. Për shkëmbimin e informacionit të përmendur në pikën 3 do të caktohen pika kontakti si përgjegjës.

Neni 180

Garancia individuale për një borxh doganor të mundshëm

(Paragrafi 2, i pikës 1, të nenit 85, të Kodit)

1. Kur është e detyrueshme që të sigurohet një garanci që mbulon një operacion të vetëm (garancia individuale), për një borxh doganor të mundshëm, ajo duhet të mbulojë shumën e detyrimit të importit ose të eksportit që i korrespondon borxhit doganor që mund të lindë, të llogaritur në bazë të normave më të larta të taksimit të zbatueshëm për mallra të të njëjtit lloj.

2. Kur pagesat e tjera në lidhje me importin dhe eksportin e mallrave mbulohen nga garancia individuale, llogaritja e tyre do të bazohet në normat më të larta të aplikueshme për mallra të të njëjtit lloj në Republikën e Shqipërisë, kur mallrat në fjalë janë vendosur nën një regjim doganor ose magazinim të përkohshëm.

Neni 181

Garancia fakultative

(Neni 86 i Kodit)

Kur autoritetet doganore vendosin të kërkojnë një garanci, e cila është fakultative, zbatohen nenet 182 deri 193.

Neni 182

Garancia në formën e një depozite në të holla (cash)

(Shkronja “a”, e pikës 1, të nenit 87, të Kodit)

Kur një garanci është e nevojshme për një regjim të posaçëm ose magazinim të përkohshëm dhe është siguruar si një garanci individuale në formën e një depozite në të holla, kjo garanci i jepet autoritetit doganor të Republikës së Shqipërisë, ku mallrat janë vendosur nën regjim ose magazinim të përkohshëm.

Kur një regjim i posaçëm, i ndryshëm nga regjimi i përdorimit të veçantë përfundimtar (*end-use*) është mbyllur, ose mbikëqyrja e mallrave nën regjimin e përdorimit të veçantë përfundimtar (*end-use*) ose magazinimit të përkohshëm është mbyllur në mënyrë korrekte, garancia do të rimbursohet nga autoriteti doganor në Republikën e Shqipërisë.

Neni 183

Garancia në formën e një dorëzanie nga dorëzanësi

(Nenet 87, pika 1, shkronja “b”; dhe 89, të Kodit)

1. Garancia e dhënë në formën e një dorëzanie duhet të miratohet nga zyra doganore ku është dhënë garancia (zyra doganore e garancisë), e cila do t'i njoftojë miratimin e saj, personit që i kërkohet të sigurojë garancinë.

2. Zyra doganore e garancisë mund të revokojë miratimin e dorëzanisë nga dorëzanësi në çdo kohë. Zyra doganore e garancisë duhet t'i njoftojë revokimin dorëzanësit dhe personit të cilit i kërkohet të sigurojë garancinë.

3. Dorëzanësi mund të anulojë/tërheqë dorëzaninë e tij në çdo kohë. Ai duhet të njoftojë zyrën doganore të garancisë për anulimin/ tërheqjen.

4. Anulimi i dorëzanisë nuk do të ndikojë mbi mallrat të cilat në momentin kur anulimi hyn në fuqi kanë qenë dhe vazhdojnë të jenë të vendosura nën një regjim doganor ose magazinim të përkohshëm, në bazë të dorëzanisë së anuluar.

5. Një garanci individuale e siguruar në formën e një dorëzanie duhet të jepet duke përdorur formularin e paraqitur në aneksin 32-01, të shtojcës B, bashkëlidhur këtij vendimi dhe pjesë përbërëse e tij.

6. Një garanci globale e siguruar në formën e një dorëzanie duhet të jepet duke përdorur

formularin e paraqitur në aneksin 32-03, të shtojcës B, bashkëlidhur këtij vendimi dhe pjesë përbërëse e tij.

7. Pa rënë ndesh me pikat 5 dhe 6, të këtij neni dhe nenit 196, autoritetet doganore mund që në përputhje me legjislacionin në fuqi të lejojnë që dorëzania e siguruar nga një dorëzanës të ketë një formë të ndryshme nga ato të përcaktuara në anekset 32-01, 32-02 dhe 32-03, të shtojcës B, bashkëlidhur këtij vendimi dhe pjesë përbërëse e tij, me kusht që të ketë të njëjtin efekt ligjor.

Neni 184

Garancia në formën e një dorëzanie nga dorëzanësi në rastet e një marrëveshje ndërkombëtare

(Nenet 6, pika 3, shkronja “a”; 27, pika 4; dhe 89, të Kodit Doganor)

(Shtuar pika 5 me VKM nr. 872, datë 30.12.2024)

1. Në rastet kur është nënshkruar një marrëveshje ndërkombëtare për transitin dhe garancia e dhënë në formën e një dorëzanie nga dorëzanësi mund të përdoret në më shumë se një shtet, garantuesi duhet të tregojë një adresë për shërbime ose të caktojë një përfaqësues në shtetin, pjesë e marrëveshjes ku mund të përdoret kjo garanci.

2. Revokimi i miratimit të dorëzanësit ose i dorëzansës së dorëzanësit hyn në fuqi në ditën e 16-të pas datës në të cilën është marrë ose konsiderohet të jetë marrë nga dorëzanësi vendimi për revokimin.

3. Anulimi i dorëzanësit do të hyjë në fuqi në ditën e 16, pas datës në të cilën dorëzanësi i ka komunikuar anulimin zyrës doganore ku është depozituar garancia.

4. Kur një garanci që mbulon një operacion të vetëm (garanci individuale) është dhënë në formën e kuponit (*voucher*), ajo mund të paraqitet duke përdorur mjete të ndryshme nga teknikat elektronike të përpunimit të të dhënave.

5. Kërkesat e përbashkëta për të dhënat për dorëzanimin e garantuesit për të ofruar një garanci individuale, një garanci individuale në formën e letrave me vlerë ose një garanci globale janë përcaktuar përkatësisht në anekset 32-01, 32-02 dhe 32-03, të shtojcës A.

Neni 185

Format e garancisë të ndryshme nga depozita në të holla (cash) ose të një dorëzanie të dhënë nga një dorëzanës

(Shkronja “c”, e pikës 1, të nenit 87, të Kodit)

1. Format e garancisë, të ndryshme nga depozita në të holla ose dorëzania e dhënë nga një dorëzanës, do të jenë:

a) Krijimi i një garancie hipotekore, një pagese për token, një kontratë shlyerjeje apo të drejte tjetër që konsiderohet e barabartë me të drejtën mbi pronën e paluajtshme;

b) Dhënia e kredive, vendosja e një pengu, me ose pa dorëzimin e posedimit të mallrave, titujve ose kredive mbi një llogari kursimi bankare apo një hyrje në regjistrin e borxhit kombëtar;

c) Marrja e përgjegjësisë së përbashkët kontraktore për shumën e plotë të borxhit nga një palë e tretë, e miratuar për këtë qëllim nga autoritetet doganore ose depozitimi i një kambiali, pagesa e të cilit garantohej nga kjo palë e tretë;

ç) Një depozitë në të holla ose mjetet e pagesës të barasvlershme me to, të ndryshme nga leku;

d) Pjesëmarrja, me pagesën e një kontributi, në një skemë garancie të përgjithshme, të administruar nga autoritetet doganore.

2. Format e garancisë, të referuara në pikën 1, nuk pranohen për vendosjen e mallrave nën regjimin e transimit.

3. Autoritetet doganore kompetente pranojnë format e garancisë të përmendura në pikën 1, për aq sa këto forma garancie zbatohen sipas legjislacionit shqiptar.

Neni 186

Garancia individuale e siguruar në formën e një dorëzanie

(Nenet 84 dhe 87, shkronja “b”, pika 1, të Kodit)

1. Kur një garanci individuale është dhënë në formën e një dorëzanie nga një dorëzanës, dokumenti i dorëzatisë do të mbahet nga zyra doganore e garancisë për periudhën e vlefshmërisë së saj.
2. Kur një garanci individuale është dhënë në formën e një dorëzanie nga një dorëzanës, mbajtësi i regjimit nuk duhet të ndryshojë kodin e aksesit që lidhet me numrin e referencës së garancisë.

Neni 187

Asistenca e ndërsjellë ndërmjet autoriteteve doganore

(Shkronja “c”, e pikës 1, të nenit 87, të Kodit)

Kur lind një borxh doganor në një zyrë doganore të ndryshme nga zyra doganore që ka pranuar një garanci në një nga format e përmendura në pikën 1, të nenit 185, dhe që mund të përdoret në më shumë se një zyrë doganore, zyra doganore që ka pranuar garancinë, pas skadimit të afatit për pagesë, me një kërkesë të bërë nga zyra doganore ku ka lindur borxhi, do t'i transferojë kësaj të fundit shumën e detyrimit të importit ose të eksportit të papaguara, brenda kufijve të garancisë së pranuar.

Transferimi do të bëhet brenda 1 muaji, nga data e pranimit të kërkesës.

Neni 188

Numri i referencës së garancisë dhe kodi i aksesit

(Pika 2, e nenit 84, të Kodit)

1. Kur përdoret një garanci individuale në më shumë se një zyrë doganore, zyra doganore e garancisë do t'i komunikojë personit që ka siguruar garancinë, ose në rastin e një garancie në formën e kuponit (*voucher*) garantuesit, të dhënat e mëposhtme:

- a) Një numër reference garancie;
- b) Një kod aksesi, që lidhet me numrin e referencës së garancisë.

2. Kur përdoret një garanci globale në më shumë se një zyrë doganore, zyra doganore e garancisë do t'i komunikojë personit që ka siguruar garancinë, të dhënat e mëposhtme:

- a) Një numër reference të garancisë për secilën pjesë të shumës referencë që do të monitorohet në përputhje me nenin 192;
- b) Një kod aksesi që lidhet me numrin e referencës së garancisë.

Me kërkesë të personit që ka siguruar garancinë, zyra doganore e garancisë do të caktojë një ose më shumë kode aksesi shtesë mbi këtë garanci për t'u përdorur nga ai person ose përfaqësuesit e tij.

3. Autoriteti doganor do të verifikojë ekzistencën dhe vlefshmërinë e garancisë, çdo herë që një person i komunikon një numër reference garancie.

Neni 189

Rastet kur nuk kërkohet garanci

(Shkronja “b”, e pikës 8, të nenit 84 dhe pikat 3, 4, të nenit 192 të Kodit)

1. Vendosja e mallrave nën regjimin e lejimit të përkohshëm nuk i nënshtrohet depozitimi / dhënies së një garancie në këto raste:

- a) Kur deklarata doganore mund të bëhet me gojë ose me ndonjë akt tjetër të përmendur në nenin 311;
- b) Në rastet e materialeve të përdorura në trafikun ndërkombëtar, nëpërmjet kompanive ajrore, detare ose hekurudhore apo ofruesve të shërbimeve postare, me kusht që këto materiale të jenë shënuar në mënyrë që të identifikohen;

c) Në rastin e ambalazheve/paketimeve të importuara bosh, me kusht që këto të jenë shënjuar në mënyrë që nuk mund të fshihet ose hiqet;

ç) Kur mbajtësi i mëparshëm i autorizimit për lejimin e përkohshëm ka deklaruar mallrat për regjimin e lejit të përkohshëm, në përputhje me nenin 305 ose nenin 309, dhe këto mallra janë vendosur, më pas, në regjimin e lejit të përkohshëm për të njëjtin qëllim.

2. Kur sigurohet mbikëqyrja dhe funksionimi i duhur i regjimeve të përdorimit të veçantë dhe të përpunimit, autoritetet doganore mund të mos kërkojnë depozitimin e një garancie.

Seksioni 2

Garancia globale dhe përjashtimi nga depozitimi i garancisë

Neni 190

Shuma referencë

(Neni 85 i Kodit)

(Ndryshuar vlera në paragrafin e tretë të pikës 3 me VKM nr. 872, datë 30.12.2024)

1. Pa rënë ndesh me nenin 193, shuma e garancisë globale do të jetë e njëjtë me shumën referencë, të përcaktuar nga zyra doganore e garancisë, në përputhje me nenin 85, të Kodit.

2. Kur një garanci globale duhet të sigurojë shumën e detyrimit të importit ose të eksportit dhe pagesave të tjera, shuma e të cilave mund të përcaktohet me saktësi në kohën kur kërkohet garancia, pjesa e shumës referencë që mbulon këtë detyrim dhe pagesat e tjera, duhet t'i korrespondojë shumës së detyrimit të importit, eksportit dhe pagesave të tjera për t'u paguar.

3. Kur një garanci globale duhet të sigurojë shumën e detyrimit të importit ose eksportit dhe pagesave të tjera, shuma e të cilave nuk mund të përcaktohet me saktësi në kohën kur kërkohet garancia, ose që ndryshon me kalimin e kohës, pjesa e shumës referencë që mbulon këtë detyrim dhe pagesat e tjera përcaktohen, si vijon:

a) Për pjesën që mbulon shumën e detyrimit të importit ose të eksportit dhe pagesat e tjera që kanë lindur, shuma referencë duhet t'i korrespondojë shumës së detyrimit të importit ose eksportit dhe pagesave të tjera të pagueshme;

b) Për pjesën që mbulon shumën e detyrimit të importit ose eksportit dhe pagesat e tjera që mund të lindin, shuma referencë duhet t'i korrespondojë shumës së detyrimit të importit ose eksportit dhe pagesave të tjera, të cilat mund të bëhen të pagueshme në lidhje me çdo deklaratë doganore ose deklaratë të magazinimit të përkohshëm, për të cilat është siguruar garancia, në periudhën midis vendosjes së mallrave nën regjimin doganor përkatës ose magazinimit të përkohshëm dhe momentit kur ky regjim mbyllet ose mbikëqyrja e mallrave nën regjimin e përdorimit të veçantë përfundimtar (*end-use*) ose nën magazinim të përkohshëm ka përfunduar.

Për qëllimet e shkronjës “b”, duhet të merren në konsideratë nivelet më të larta të taksimit të detyrimit të importit ose të eksportit, të zbatueshme për mallra të të njëjtit lloj dhe nga nivelet më të larta të pagesave të tjera në lidhje me importin apo eksportin e mallrave të të njëjtit lloj në Republikën e Shqipërisë.

Kur informacioni i nevojshëm për të përcaktuar pjesën që i takon shumës reference, nuk është në dispozicion të zyrës doganore të garancisë, kjo shumë do të fiksohet në vlerën ekuivalente në lekë të 10 000 eurove për çdo deklaratë.

4. Zyra doganore e garancisë përcakton shumën referencë në bashkëpunim me personin të cilit i është kërkuar të sigurojë garancinë. Kur përcaktohet pjesa e shumës referencë, në përputhje me pikën 3, zyra doganore e garancisë do ta vendosë atë shumë në bazë të informacionit për mallrat e vendosura nën regjimet doganore përkatëse ose magazinim të përkohshëm në 12 muajt e mëparshëm dhe sipas një vlerësimi të volumit të operacioneve të synuara siç tregohet, ndër të tjera,

përmes dokumentacionit tregtar dhe llogarive të personit, të cilit i është kërkuar të depozitojë garancinë.

5. Zyra doganore e garancisë rishikon shumën referencë me iniciativën e saj ose me kërkesë të personit, të cilit i është kërkuar të sigurojë garancinë dhe e përshtat atë në përputhje me dispozitat e këtij neni dhe të nenit 85, të Kodit.

Neni 191

Monitorimi i shumës referencë nga personi që i kërkohet të depozitojë garanci

(Neni 84 i Kodit)

Personi, të cilit i kërkohet të depozitojë një garanci, duhet të sigurojë që shuma e detyrimit të importit ose eksportit dhe e pagesave të tjera në lidhje me importin ose eksportin e mallrave, kur ato duhet të mbulohen nga garancia, shumë e cila është e pagueshme ose mund të bëhet e pagueshme, nuk duhet të tejkalojë shumën referencë.

Ky person informon zyrën doganore të garancisë kur shuma referencë nuk është në një nivel të mjaftueshëm për të mbuluar operacionet e tij.

Neni 192

Monitorimi i shumës referencë nga autoritetet doganore

(Pika 6, e nenit 84, të Kodit)

1. Monitorimi i pjesës së shumës referencë që mbulon shumën e detyrimit të importit ose eksportit dhe pagesave të tjera në lidhje me importin ose eksportin e mallrave, shumë e cila do të bëhet e pagueshme në lidhje me mallrat e çliruara për qarkullim të lirë duhet të sigurohet për çdo deklaratë doganore në kohën e vendosjes së mallrave nën regjim. Kur deklaratat doganore për çlirim për qarkullim të lirë janë depozituar në përputhje me një autorizim të referuar në nenin 152, pika 2, ose nenin 165, të Kodit, monitorimi i pjesës përkatëse të shumës referencë duhet të sigurohet në bazë të deklaratave shtesë ose kur është e zbatueshme në bazë të të dhënave në regjistrimet e deklaruesit.

2. Monitorimi i pjesës së shumës referencë që mbulon shumën e detyrimit të importit ose eksportit dhe pagesave të tjera në lidhje me importin ose eksportin e mallrave, shumë e cila mund të bëhet e pagueshme për mallrat e vendosura nën regjimin e transitit, duhet të sigurohet me anë të sistemit elektronik të referuar në pikën 1, të nenit 569, për çdo deklaratë doganore në kohën e vendosjes së mallrave nën regjim. Monitorimi nuk zbatohet për mallrat e vendosura nën regjimin e transitit duke përdorur thjeshtimin e referuar në shkronjën “d”, të pikës 4, të nenit 207, të Kodit, kur deklarata doganore nuk është përpunuar nga sistemi elektronik siç referohet në pikën 1, të nenit 569.

3. Monitorimi i pjesës së shumës referencë që mbulon shumën e detyrimit të importit ose eksportit dhe pagesave të tjera në lidhje me importin ose eksportin e mallrave, kur ato duhen mbuluar me garanci, shumë e cila do të lind ose mund të lind në raste të tjera nga ato të përmendura në pikat 1, dhe 2, duhet të sigurohet përmes një auditimi të përshtatshëm dhe të vazhdueshëm.

Neni 193

Niveli i garancisë globale

(pikat 2 dhe 3, të nenit 90, të Kodit)

(Ndryshuar me VKM nr. 872, datë 30.12.2024)

1. Sipas kushteve, të përcaktuara në nenin 194, shuma e garancisë globale, e përmendur në pikën 2, të nenit 90, të Kodit, reduktohet në 50%, 30% ose 0% të pjesës së shumës referencë, të përcaktuar

në përputhje me shkronjën “b”, të pikës 3, të nenit 190.

2. Shuma e garancisë globale, e përmendur në pikën 3, të nenit 90, të Kodit, reduktohet në 30% të pjesës së shumës referencë, të përcaktuar në përputhje me pikën 2 dhe me shkronjën “a”, të pikës 3, të nenit 190.

Neni 194

Reduktimi i shumës të garancisë globale dhe përjashtimi nga depozitimi i garancisë

(Pika 2, e nenit 90, të Kodit)

(Shfuqizuar shkronjat “dh” e pikës 1, “e” e pikës 2 dhe “b” e pikës 3, shtuar pikat 3/1 dhe 3/2, ndryshuar pika 4 me VKM nr. 872, datë 30.12.2024)

1. Autorizimi për të përdorur një garanci globale me një shumë të reduktuar në 50% të shumës referencë jepet kur aplikuesi dëshmon se plotëson kriteret e mëposhtme:

a) Ka një sistem kontabiliteti në përputhje me parimet e përgjithshme të pranura të kontabilitetit të zbatuara në Republikën e Shqipërisë ku mban llogaritë e tij, që lejon kontrollin doganor bazuar në audit dhe mban një protokoll të të dhënave që ofrojnë gjurmë të auditimit nga momenti që të dhënat hyjnë në dosje;

b) Ka një organizim administrativ që i korrespondon llojit dhe madhësisë së biznesit dhe që është i përshtatshëm për menaxhimin e fluksit të mallrave dhe ka një sistem kontrolli të brendshëm të aftë për parandalimin, zbulimin dhe korrigjimin e gabimeve dhe parandalimin e zbulimin e transaksioneve të paligjshme ose të parregullta;

c) Nuk është në procedurë falimentimi;

ç) Gjatë tri viteve të fundit, përpara paraqitjes së aplikimit, aplikuesi ka përmbushur detyrimet e tij financiare për pagesën e detyrimit doganor dhe të gjitha detyrimet e tjera, taksat apo detyrimet, lidhur me importin ose eksportin e mallrave;

d) Bazuar në të dhënat dhe informacionet në dispozicion për tri vitet e fundit para dorëzimit të aplikimit, vërteton që ka një gjendje financiare të mirë, të mjaftueshme për të përmbushur detyrimet dhe angazhimet e tij duke pasur parasysh llojin dhe volumnin e aktivitetit ekonomik të biznesit, veçanërisht që nuk ka asete negative neto, përveç rasteve kur këto mund të mbulohen;

dh) Shfuqizuar.

2. Autorizimi për të përdorur një garanci globale me një shumë të reduktuar në 30% të shumës referencë jepet kur aplikuesi dëshmon se plotëson kriteret e mëposhtme:

a) Ka një sistem kontabiliteti në përputhje me parimet e përgjithshme të pranura të kontabilitetit të zbatuara në Republikën e Shqipërisë ku mban llogaritë e tij që lejon kontrollin doganor bazuar në audit dhe mban një protokoll të të dhënave që ofrojnë gjurmë të auditimit nga momenti që të dhënat hyjnë në dosje;

b) Ka një organizim administrativ që i korrespondon llojit dhe madhësisë së biznesit dhe që është i përshtatshëm për menaxhimin e fluksit të mallrave, dhe ka një sistem kontrolli të brendshëm, të aftë për parandalimin, zbulimin dhe korrigjimin e gabimeve dhe parandalimin e zbulimin e transaksioneve të paligjshme ose të parregullta;

c) Siguron që punonjësit përkatës të jenë udhëzuar të informojnë autoritetet doganore sa herë që hasin vështirësi pajtueshmërie dhe ka procedura të caktuara për informimin e autoriteteve doganore për vështirësi të tilla;

ç) Nuk është në procedurë falimentimi;

d) Gjatë tri viteve të fundit përpara paraqitjes së aplikimit, aplikuesi ka përmbushur detyrimet e tij financiare për pagesën e detyrimit doganor dhe të gjitha detyrimet e tjera, taksat apo detyrimet, lidhur me importin ose eksportin e mallrave;

dh) Bazuar në të dhënat dhe informacionet në dispozicion për tri vitet e fundit para dorëzimit të

aplikimit, vërtetohet që ka një gjendje financiare të mirë, të mjaftueshme për të përmbushur detyrimet dhe angazhimet e tij duke pasur parasysh llojin dhe volumin e aktivitetit ekonomik të biznesit, veçanërisht që nuk ka asete negative neto, përveç rasteve kur këto mund të mbulohen;

e) Shfuqizuar.

3. Përjashtimi nga depozitimi i garancisë jepet kur aplikuesi plotëson kushtet e mëposhtme:

a) Ka një sistem kontabiliteti në përputhje me parimet e përgjithshme të pranuar të kontabilitetit të zbatuara në Republikën e Shqipërisë ku mban llogaritë e tij, që lejon kontrollin doganor bazuar në audit dhe mban një protokoll të të dhënave që ofrojnë gjurmë të auditimit nga momenti që të dhënat hyjnë në dosje;

b) I lejon autoritetit doganor të ketë akses fizik në sistemet e tij kontabël dhe, kur mund të jetë e zbatueshme, në regjistrimet e tij tregtare e të transportit;

c) Ka një sistem logjistik që identifikon mallrat si mallra shqiptare ose joshqiptare dhe tregon, kur është e përshtatshme, vendndodhjen e tyre;

ç) Ka një organizim administrativ që i korrespondon llojit dhe madhësisë së biznesit dhe që është i përshtatshëm për menaxhimin e fluksit të mallrave, dhe ka një sistem kontrolli të brendshëm, të aftë për parandalimin, zbulimin dhe korrigjimin e gabimeve dhe parandalimin e zbulimin e të transaksioneve të paligjshme ose të parregullta;

d) Kur është e zbatueshme, ka procedura të pranueshme për trajtimin e licencave dhe autorizimeve të lëshuara në përputhje me masat e politikës tregtare ose në lidhje me tregtinë e produkteve bujqësore;

dh) Ka procedura të pranueshme për arkivimin e të dhënave dhe informacioneve të tij dhe për mbrojtjen kundër humbjes së tyre;

e) Siguron që punonjësit përkatës të jenë udhëzuar të informojnë autoritetet doganore sa herë që hasin vështirësi pajtueshmërie dhe ka procedura të caktuara për informimin e autoriteteve doganore për vështirësi të tilla;

ë) Ka masa sigurie të përshtatshme për të mbrojtur sistemin e tij kompjuterik nga ndërhyrjet e paautorizuara dhe për të siguruar dokumentacionin e aplikuesit;

f) Nuk është në procedurë falimentimi;

g) Gjatë tri viteve të fundit përpara paraqitjes së aplikimit, aplikuesi ka përmbushur detyrimet e tij financiare për pagesën e detyrimit doganor dhe të gjitha detyrimet e tjera, taksat apo detyrimet, lidhur me importin ose eksportin e mallrave;

gj) Bazuar në të dhënat dhe informacionet në dispozicion për tri vitet e fundit para dorëzimit të aplikimit, vërtetohet që ka një gjendje financiare të mirë, të mjaftueshme për të përmbushur detyrimet dhe angazhimet e tij duke pasur parasysh llojin dhe volumin e aktivitetit ekonomik të biznesit, veçanërisht që nuk ka asete negative neto, përveç rasteve kur këto mund të mbulohen;

h) Shfuqizuar.

3/1. Kur verifikohet nëse aplikuesi ka gjendje të mjaftueshme financiare me qëllim dhënien e një autorizimi për të përdorur një garanci globale me një shumë të reduktuar ose një përjashtim nga depozitimi i garancisë siç kërkohet në shkronjën “d”, të pikës 1, në shkronjën “dh”, të pikës 2, dhe në shkronjën “gj”, të pikës 3, autoritetet doganore marrin parasysh aftësinë e aplikuesit për të përmbushur detyrimin e tij për të paguar borxhet doganore dhe tarifatat që mund të lindin, të cilat nuk janë të mbuluara nga garancia.

Nëse justifikohet, autoritetet doganore mund të marrin parasysh rrezikun e lindjes së këtyre borxheve doganore dhe të tarifave të tjera duke pasur parasysh llojin dhe volumin e veprimtarive të biznesit të aplikuesit të lidhura me doganat dhe llojin e mallrave për të cilat kërkohet garancia.

3/2. Kur kushti mbi gjendjen e mjaftueshme financiare është vlerësuar si një modalitet për aplikimin e kriterit, të përmendur në shkronjën “ç”, të nenit 41, të Kodit, autoritetet doganore verifikojnë vetëm në rast se gjendja financiare e aplikuesit justifikon dhënien e një autorizimi për të

përdorur një garanci globale me një shumë të reduktuar ose një përjashtim nga depozitimi i garancisë.

4. Kur aplikuesi është vendosur për më pak se 3 (tri) vite, plotësimi i kushteve të përcaktuara në shkronjat “ç” dhe “d”, të pikës 1, në shkronjat “d” dhe “dh”, të pikës 2, dhe në shkronjat “j” dhe “g”, të pikës 3, kontrollohet në bazë të të dhënave dhe informacionit të disponueshëm.

Seksioni 3

Dispozitat për regjimin e transitit sipas Konventës së Stambollit/Konventës ATA dhe Konventës TIR

Neni 195

Llogaritja për qëllimet e transitit të përbashkët (Pika 2, e nenit 84, të Kodit)

Për qëllime të llogaritjes së përmendur në nenin 180, dhe në paragrafin e dytë të shkronjës “b”, të pikës 3, të nenit 190, mallrat shqiptare të transportuara në përputhje me Konventën e Transitit të Përbashkët do të trajtohen si mallra joshqiptare.

Neni 196

Garancia individuale në formën e kuponit (voucher) (Shkronja “b”, e pikës 1, e nenit 87, të Kodit)

1. Në kuadër të regjimit të transitit, një garanci individuale në formën e një dorëzanie nga një dorëzanës mund të sigurohet, gjithashtu, nga një garantues përmes lëshimit të një garancie në formën e kuponit personave që duan të jenë mbajtës të regjimit.

Provë e kësaj dorëzanie do të jetë përdorimi i formularit të paraqitur në aneksin 32-02, të shtojcës B, bashkëlidhur këtij vendimi dhe pjesë përbërëse e tij, dhe kuponët do të jenë sipas formularit të përcaktuar në aneksin 32-06, të shtojcës B, bashkëlidhur këtij vendimi dhe pjesë përbërëse e tij.

Çdo kupon mbulon shumën prej 10 000 (dhjetë mijë) eurosh, ose ekuivalentin në lekë të kësaj shume, për të cilën garantuesi është përgjegjës.

Perioda e vlefshmërisë së një kuponit është 1 vit, nga data e lëshimit.

2. Garantuesi duhet t’i sigurojë zyrës doganore të garancisë çdo detaj të kërkuar në lidhje me kuponët e garancisë individuale që ai ka lëshuar.

3. Për çdo kupon, garantuesi i komunikon personit që do të jetë mbajtës i regjimit të dhënat e mëposhtme:

a) Një numër reference garancie;

b) Një kod aksesit të lidhur me numrin e referencës së garancisë.

Personi që do të jetë mbajtës i regjimit nuk duhet ta ndryshojë kodin e aksesit.

4. Personi që do të jetë mbajtës i regjimit duhet të paraqesë në zyrën doganore të nisjes një numër kuponash që i korrespondojnë shumëfishit të 10 000 (dhjetë mijë) eurove, ose shumës ekuivalente në lekë, të kërkuar për mbulimin e shumës totale referuar nenit 180.

Neni 197

Revokimi dhe anulimi e një dorëzanie të siguruar në rastin e garancisë individuale në formën e kuponit

(Nenet 87, shkronja “b”, pika 1 dhe 89, të Kodit)
(Shtuar paragrafi i dytë me VKM nr. 872, datë 30.12.2024)

Autoriteti doganor përgjegjës për zyrën doganore të garancisë do të shënojë në sistemin elektronik të referuar në pikën 1, të nenit 569, informacionet e çdo revokimi ose anulimi të dorëzarisë, në rastin e një garancie individuale në formën e kuponit dhe datën kur revokimi ose anulimi hyn në fuqi.

Nga dita e hyrjes në fuqi e revokimit ose anulimit, asnjë garanci individuale në formën e letrave me vlerë e lëshuar më parë nuk mund të përdoret për vendosjen e mallrave nën regjimin e transitit.

Neni 198

Garancia globale

(Nenet 84, pika 5 dhe 90, të Kodit)

1. Në kuadër të regjimit të transitit, garancia globale mund të jepet vetëm në formën e një dorëzanie nga një dorëzanesë.

2. Prova e kësaj dorëzanie do të mbahet nga zyra doganore e garancisë për periudhën e vlefshmërisë së saj. Si zyrë garancie në këtë formë të garancisë do të jetë Drejtoria e Përgjithshme e Doganave.

3. Mbajtësi i regjimit nuk duhet ta ndryshojë kodin e aksesit, të lidhur me numrin e referencës së garancisë.

Neni 199

Përgjegjësia e shoqatave garantuese për operacionet TIR (shkronja “b”, e pikës 3, të nenit 203, të Kodit)

(Ndryshuar me VKM nr. 872, datë 30.12.2024)

Për qëllime të pikave 3 dhe 4, të nenit 8, të Konventës TIR, për transportin ndërkombëtar të mallrave, sipas karneteve TIR, duke përfshirë çdo ndryshim të mëtejshëm të saj (Konventa TIR), kur një operacion TIR kryhet në territorin doganor të Republikës së Shqipërisë, çdo shoqatë garantuese e vendosur në territorin doganor mund të bëhet përgjegjëse për pagesën e vlerës për t'u siguruar lidhur me mallrat në fjalë në operacionet TIR deri në një kufi prej 100 000 (njëqind mijë) eurosh ose shumë e barasvlershme në lekë për çdo karnet TIR.

Neni 200

Çlirimi i garantuesit nga detyrimet nën regjimin e transitit

(Nenet 17, pikat 2 e 3, shkronja “a” dhe 93, të Kodit)

1. Kur regjimi i transitit nuk është mbyllur, zyra doganore e nisjes duhet që, brenda nëntë muajve, nga afati kohor i caktuar për paraqitjen e mallrave në zyrën doganore të destinacionit, të njoftojë garantuesin se regjimi nuk është mbyllur.

2. Kur regjimi i transitit nuk është mbyllur, autoritetet doganore, të përcaktuara në përputhje me nenin 82 të Kodit, brenda 3 vjetëve, nga data e pranimi të deklaratës së transitit, duhet të njoftojnë garantuesin të paguajë borxhin për të cilin është përgjegjës në lidhje me operacionin përkatës të transitit.

3. Garantuesi çlirohet nga detyrimet e tij në qoftë se cilido prej njoftimeve të parashikuara në pikat 1 dhe 2 nuk është kryer para përfundimit të afatit kohor.

4. Kur cilido prej njoftimeve është kryer, garantuesi informohet për mbylljen e regjimit ose mbledhjen e borxhit.

5. Kërkesat e përbashkëta të të dhënave për njoftimin sipas pikës 1, të këtij neni, përcaktohen në aneksin 32-04, të shtojcës A, bashkëlidhur këtij vendimi dhe pjesë përbërëse e tij.

Kërkesat e përbashkëta të të dhënave për njoftimin sipas pikës 2 përcaktohen në aneksin 32-05, të shtojcës A, bashkëlidhur këtij vendimi dhe pjesë përbërëse e tij.

6. Në përputhje me shkronjën “a”, të pikës 3, të nenit 17, të Kodit, njoftimi sipas pikave 1 dhe 2 mund të dërgohet me mjete të tjera, përveç teknikave informatike të përpunimit të të dhënave.

Neni 201

Kërkesa për pagesë drejtuar një shoqate garantuese për mallrat e mbuluara nga Carnet ATA dhe njoftimi i mosmbylljes së Carnet CPD për një shoqatë garantuese sipas regjimit të

Konventës ATA ose Konventës së Stambollit

(Nenet 17, pika 2, 17, pika 3, shkronja “a”, dhe 93, të Kodit)

1. Në rast të mospërmbushjes së një prej detyrimeve sipas Carnet ATA ose Carnet CPD, autoritetet doganore rregullojnë dokumentet lidhur me lejimin e përkohshëm (kërkesën për pagesë drejtuar shoqatës garantuese ose njoftimin e mosmbylljes) në përputhje me nenet 9, 10 dhe 11 të aneksit A, të Konventës së Stambollit apo, kur është e zbatueshme, në përputhje me nenet 7, 8 dhe 9 të Konventës ATA.

2. Shuma e detyrimit të importit dhe taksat që rrjedhin nga kërkesa për pagesë drejtuar një shoqate garantuese duhet të llogaritet sipas formularit model të detyrimeve.

3. Kërkesat e përbashkëta për të dhënat për kërkesën për pagesë drejtuar një shoqate garantuese, të përmendur në pikën 1, përcaktohen në aneksin 33-01, të shtojcës B, bashkëlidhur këtij vendimi dhe pjesë përbërëse e tij.

4. Kërkesat e përbashkëta për të dhënat për njoftimin e mosmbylljes të Carnet CPD, të përmendura në pikën 1, përcaktohen në aneksin 33-02, të shtojcës B, bashkëlidhur këtij vendimi dhe pjesë përbërëse e tij.

5. Në përputhje me shkronjën “a”, të pikës 3, të nenit 17, të Kodit, kërkesa për pagesën drejtuar një shoqate garantuese dhe njoftimi i mosmbylljes së Carnet CPD mund mund t’u dërgohen shoqatave përkatëse garantuese me mjete të tjera, përveç teknikave informatike të përpunimit të të dhënave.

KREU 3

Vjelja, pagesa, rimbursimi dhe falja e shumës së detyrimit të importit ose eksportit

Seksioni 1

Përcaktimi i shumës së detyrimit të importit ose eksportit, njoftimi i borxhit doganor dhe kontabilizimi

Nënseksioni 1

Njoftimi i borxhit doganor, pezullimi i afatit për pagesë dhe kërkesa për pagesë drejtuar shoqatës garantuese

Neni 202

Mjetet e njoftimit të borxhit doganor

(Shkronja “a”, e pikës 3, të nenit 17, të Kodit)

Njoftimi i borxhit doganor në përputhje me nenin 96, të Kodit, mund të bëhet në mënyra të tjera përveç teknikave informatike të përpunimit të të dhënave.

Neni 203

Ndihma e ndërsjellë mes autoriteteve doganore

(Nenet 95, pika 1 dhe 96, pika 1, të Kodit)

1. Kur lind një borxh doganor, zyra doganore kompetente për vjeljen e shumës së detyrimit të importit ose të eksportit, që i korrespondon borxhit doganor, duhet të informojë zyrat e tjera doganore dhe DPD-në për:

- a) faktin që një borxh doganor ka lindur;

- b) veprimin e ndërmarrë ndaj debitorit për të vjelë shumat në fjalë.
2. Autoritetet doganore, në bashkëpunim, do të ndihmojnë njëra-tjetrën në vjeljen e shumës së detyrimit të importit ose të eksportit që i korrespondon borxhit doganor.

Neni 204

Përfshirja nga njoftimi i borxhit doganor

(Shkronja “ç”, e pikës 1, të nenit 96, të Kodit)

1. Autoritetet doganore mund të mos njoftojnë një borxh doganor që lind përmes mospërbushjes sipas neneve 74 ose 77 të Kodit, kur shuma e detyrimit të importit ose eksportit në fjalë është më pak se 1 500 (një mijë e pesëqind) lekë.
2. Kur borxhi doganor është njoftuar fillimisht për një shumë detyrimi importi ose eksporti, që ishte më e vogël se shuma e detyrimit të importit ose eksportit për t’u paguar, autoritetet doganore mund të mos bëjnë njoftimin e borxhit doganor për diferencën mes këtyre shumave, me kusht që ajo të jetë më pak se 1 500 (një mijë e pesëqind) lekë.
3. Kufizimi 1 500 (një mijë e pesëqind) lekë, i referuar në pikat 1 dhe 2, vihet në zbatim për çdo veprim vjeljeje/rikuperimi.

Neni 205

Pezullimi i afatit kohor për pagesë në rast kërkesë për falje

(Shkronja “a”, e pikës 3, të nenit 101, të Kodit)

1. Autoritetet doganore pezullojnë afatin për pagesën e shumës së detyrimit të importit ose eksportit që i korrespondon borxhit doganor deri sa të marrin një vendim për aplikimin për falje, me kusht që të plotësohen kushtet e mëposhtme:
 - a) Kur është paraqitur një aplikim për falje në përputhje me nenet 111, 112 ose 113, të Kodit, nëse kushtet e parashikuara në nenin përkatës plotësohen;
 - b) Kur është paraqitur një aplikim për falje në përputhje me nenin 110 të Kodit, nëse kushtet e parashikuara në nenin 110 dhe nenin 46, pika 2, të Kodit, plotësohen.
2. Kur mallrat që i nënshtrohen aplikimit për falje nuk janë më nën mbikëqyrjen doganore në kohën e aplikimit, duhet të depozitohet një garanci.
3. Duke anashkaluar pikën 2, autoritetet doganore nuk kërkojnë garanci, nëse vërtetohet se sigurimi i garancisë mund t’i shkaktojë debitorit vështirësi serioze ekonomike ose sociale.

Neni 206

Pezullimi i afatit për pagesë në rastin e mallrave që konfiskohen, shkatërrohen ose braktisen në favor të shtetit

(Shkronja “b”, e pikës 3, të nenit 101, të Kodit)

Autoritetet doganore pezullojnë afatin e pagesës së shumës së detyrimit të importit ose eksportit që i korrespondon borxhit doganor kur mallrat janë ende nën mbikëqyrjen doganore dhe duhet të konfiskohen, të shkatërrohen ose të braktisen në favor të shtetit dhe autoritetet doganore gjykojnë nëse kushtet për konfiskim, shkatërrim ose braktisje janë plotësuar, deri sa të merret vendimi përfundimtar për konfiskimin, shkatërrimin ose braktisjen e tyre.

Neni 207

Pezullimi i afatit për pagesë në rastin e borxhit doganor të lindur përmes mospërbushjes

(Shkronja “c”, e pikës 3, të nenit 101, të Kodit)

1. Autoritetet doganore pezullojnë afatin e pagesës së shumës së detyrimit të importit ose eksportit që i korrespondon borxhit doganor të personit të përmendur në shkronjën “a”, të pikës 3, të nenit 74, të Kodit, kur borxhi doganor ka lindur përmes mospërbushjes, siç referohet në nenin 74 të Kodit, me kusht që të plotësohen kushtet e mëposhtme:

a) Është identifikuar të paktën një debitor tjetër, në përputhje me shkronjat “b” dhe “c”, të pikës 3, të nenit 74, të Kodit;

b) Shuma e detyrimit të importit ose eksportit në fjalë i është komunikuar debitorit të përmendur në shkronjën “a”, në përputhje me nenin 96 të Kodit;

c) Personi i përmendur në shkronjën “a”, të pikës 3, të nenit 74, të Kodit, nuk konsiderohet si një debitor në përputhje me shkronjat “b” dhe “c”, të pikës 3, të nenit 74, të Kodit, dhe këtij personi nuk i adresohet asnjë mashtrim ose neglizhencë.

2. Pezullimi kushtëzohet me depozitim të një garancie nga personi përfitues i pezullimit për shumën e detyrimit të importit ose të eksportit në fjalë, përveç në ndonjë prej rasteve të mëposhtme:

a) Kur ekziston, tashmë, një garanci që mbulon të gjithë shumën e detyrimit të importit ose eksportit dhe garantuesi nuk është çliruar nga detyrimet e tij;

b) Është vendosur, në bazë të një vlerësimi të dokumentuar, se kërkesa e një garancie mund t'i shkaktojë debitorit vështirësi serioze ekonomike ose sociale.

3. Kohëzgjatja e pezullimit është e kufizuar në një vit. Megjithatë, kjo periudhë mund të zgjatet nga autoritetet doganore për arsye të justifikuara.

Neni 208

Zyra doganore e koordinimit në lidhje me Carnet ATA ose Carnet CPD

(Shkronja “c”, e pikës 3, të nenit 203, të Kodit)

DPD është përgjegjëse për koordinimin e veprimeve në lidhje me borxhin doganor që ka lindur nga mospërbushja e detyrimeve ose kushteve që lidhen me Carnet ATA ose Carnet CPD, në bazë të nenit 74, të Kodit.

Neni 209

Mbulimi i detyrimeve të tjera nën regjimin e transitit dhe transitit në përputhje me Konventën TIR

(Shkronjat “a”, dhe “b”, të pikës 3, të nenit 203, të Kodit)

1. Kur zyra doganore, që konstaton borxhin doganor dhe detyrimin për të paguar detyrimet e tjera në lidhje me importin apo eksportin e mallrave të vendosura nën regjimin e transitit ose nën regjimin e transitit në përputhje me Konventën TIR, merr prova në lidhje me vendin se ku kanë ndodhur ngjarjet që kanë sjellë për pasojë lindjen e borxhit doganor dhe detyrimin për të paguar detyrimet e tjera, pezullon procedurën e vjeljes dhe dërgon, menjëherë, të gjitha dokumentet e nevojshme, duke përfshirë një kopje autentike të provave, zyrës doganore përgjegjëse në atë vend. Zyra dërguese, në të njëjtën kohë kërkon konfirmimin e zyrës marrëse për vjeljen e detyrimeve.

2. Zyra doganore marrëse, pas konfirmimit të marrjes së komunikimit, informon nëse ajo është kompetente për vjeljen e detyrimeve të tjera. Nëse nuk është marrë asnjë përgjigje brenda 10 ditësh, zyra doganore dërguese, menjëherë, do të rifillojë procedurën e vjeljes që iniciuan.

Neni 210

Njoftimi i vjeljes së detyrimeve dhe pagesave të tjera nën regjimin e transitit dhe transitit në përputhje me Konventën TIR

(Shkronjat “a”, dhe “b”, të pikës 3, të nenit 226, të Kodit)

Kur lind një borxh doganor në lidhje me mallrat e vendosura nën regjimin e transitit ose nën regjimin e transitit, në përputhje me Konventën TIR, autoriteti doganor kompetent për vjeljen e borxhit informon zyrën doganore të nisjes për vjeljen e detyrimeve dhe pagesave të tjera.

Neni 211

Kërkesa për pagesë nga shoqata garantuese sipas procedurës të Konventës ATA dhe Konventës së Stambollit (Neni 93 i Kodit)

1. Kur autoritetet doganore konstatojnë se borxhi doganor ka lindur për mallrat e mbuluara nga një Carnet ATA, ato, pa vonesë, duhet të bëjnë një kërkesë ndaj shoqatës garantuese. DPD-ja bën kërkesën e përmendur në nenin 201, duke njoftuar zyrën doganore të vendosjes nën regjimin e lejimit të përkohshëm, mbi kërkesën për pagesën dërguar shoqërisë garantuese.

2. Formulari i detyrimeve, siç përmendet në nenin 201, mund të dërgohet pas kërkesës për pagesë që i dërgohet shoqatës garantuese, por jo më vonë se 3 muaj nga kërkesa dhe, në çdo rast, jo më vonë se 6 muaj nga data në të cilën autoritetet doganore fillojnë procedurën e vjeljes. Formulari i detyrimeve është përcaktuar në aneksin 33-04, të shtojcës B, bashkëlidhur këtij vendimi dhe pjesë përbërëse e tij.

Seksioni 2

Rimbursimi dhe falja

Nënseksioni 1

Dispozita të përgjithshme dhe procedura

Neni 212

Aplikimi për rimbursim ose falje

(Shkronja “a”, e pikës 3, të nenit 17, pika 1, e nenit 27, dhe neni 97, të Kodit)

1. Aplikimi për rimbursim ose falje dorëzohet nga personi që ka paguar ose është i detyruar të paguajë shumën e detyrimit të importit ose të eksportit, ose nga çdo person të cilit i kanë kaluar të drejtat dhe detyrimet e tij.

2. Duke anashkaluar paragrafin e tretë, të pikës 1, të nenit 27, të Kodit, aplikimi për rimbursim ose falje të detyrimeve të importit ose eksportit të përmendura në nenin 109 të Kodit, dorëzohet në zyrën doganore kompetente që ka njoftuar borxhin doganor.

3. Aplikimi i përmendur në pikën 2, mund të bëhet me mjete të tjera, përveç teknikave informatike të përpunimit të të dhënave.

Neni 213

Paraqitja e mallrave si kusht për rimbursim ose falje

(Pika 1, e nenit 109, të Kodit)

Rimbursimi ose falja do t'i nënshtrohen paraqitjes së mallrave. Kur mallrat nuk mund të paraqiten pranë autoriteteve doganore, atëherë, zyra doganore kompetente për marrjen e vendimit jep rimbursimin ose faljen vetëm kur ka prova që tregojnë se mallrat në fjalë janë ato për të cilat është kërkuar rimbursimi ose falja.

Neni 214

Kufizimi në transferimin e mallrave

(Pika 1, e nenit 109, të Kodit)

Pa rënë ndesh me pikën 4, të nenit 226, dhe derisa të jetë marrë vendimi lidhur me një aplikim për rimbursim ose falje, mallrat për të cilat është kërkuar rimbursimi ose falja nuk do të transferohen në një vend të ndryshëm nga ai i specifikuar në aplikim, përveçse kur aplikanti njofton paraprakisht zyrën doganore kompetente për marrjen e vendimit për rimbursim ose falje.

Neni 215

Informacioni shtesë që kërkohej kur mallrat janë vendosur në një zyrë tjetër doganore

(Pika 2, dhe shkronja “a”, e pikës 3, të nenit 17, të Kodit)

Kërkesat e përbashkëta për të dhënat për informacion shtesë, kur mallrat janë vendosur në një zyrë tjetër doganore, përcaktohen në aneksin 33-06, të shtojcës A, bashkëlidhur këtij vendimi dhe pjesë përbërëse e tij. Kërkesa për informacion shtesë, e përmendur në paragrafin e parë, mund të bëhet me mjete të tjera, përveç teknikave informatike të përpunimit të të dhënave.

Neni 216

Mjetet e njoftimit të vendimit për rimbursim ose falje

(Shkronja “a”, e pikës 3, të nenit 17, të Kodit)

Vendimi për rimbursim ose falje të detyrimit të importit ose eksportit mund t'i njoftohet personit të interesuar me mjete të tjera, përveç teknikave informatike të përpunimit të të dhënave.

Neni 217

Kërkesat e përbashkëta për të dhënat lidhur me formalitetet kur mallrat janë vendosur në një zyrë tjetër doganore

(Pika 2, e nenit 17, të Kodit)

Kërkesat e përbashkëta për të dhënat për përgjigje ndaj kërkesës për informacion në lidhje me përfundimin e formaliteteve, kur kërkesa për shlyerje ose rimbursim lidhet me mallra të cilat janë të vendosura në një zyrë tjetër doganore përveç asaj ku është njoftuar borxhi doganor, përcaktohen në aneksin 33-07, të shtojcës A, bashkëlidhur këtij vendimi dhe pjesë përbërëse e tij.

Neni 218

Mënyra për dërgimin e informacionit në përfundim të formaliteteve kur mallrat janë të vendosura në një zyrë tjetër doganore

(Shkronja “a”, e pikës 3, të nenit 17, të Kodit)

Përgjigja e përmendur në nenin 217 mund të dërgohet me mënyra të tjera, përveç teknikave informatike të përpunimit të të dhënave.

Neni 219

Ndihma reciproke mes autoriteteve doganore

(Nenet 27 dhe 109, pika 1, të Kodit)

1. Kur, për qëllime të rimbursimit ose faljes duhet të merret informacion shtesë nga një zyrë doganore e ndryshme nga ajo në të cilin borxhi doganor është konstatuar, ose kur mallrat duhet të shqyrtohen nga ai autoritet për të siguruar se kushtet për rimbursim ose falje janë përmbushur, zyra doganore kompetente për marrjen e vendimit do të kërkojë ndihmën e zyrave doganore ku mallrat janë të vendosura, duke specifikuar natyrën e informacionit që do të marrë apo kontrollet që do të kryhen.

2. Zyra doganore ku mallrat janë vendosur duhet të përmbushë kërkesën e përmendur në pikën 1, brenda 30 ditëve, nga data e marrjes së kërkesës. Kur zyra doganore në të cilën janë vendosur mallrat nuk është në gjendje të marrë informacionin, ose të kryejë kontrollet e kërkuara brenda afatit të përcaktuar, ajo duhet ta kthejë kërkesën pa veprim, brenda të njëjtit afat.

Nënseksioni 2

Vendimet që merren nga DPD

Neni 220

Transferimi i dosjes në DPD për vendimin

(Pika 3, e nenit 109, të Kodit)

1. Zyra doganore duhet të njoftojë personin e interesuar për transferimin e dosjes në DPD para se kjo të ndodhë dhe për t'i dhënë personit të interesuar një afat 30-ditor për të nënshkruar një deklaratë që vërteton se ai e ka lexuar dosjen dhe nuk ka asgjë për të shtuar ose të listojë/të bashkëlidhë të gjitha informacionet shtesë që ai konsideron se duhet të përfshihen. Kur personi i interesuar nuk e jep këtë deklaratë brenda afatit 30-ditor, konsiderohet se ai e ka lexuar dosjen dhe se nuk ka asgjë për të shtuar.

2. Kur një zyrë doganore transferon në DPD një dosje për vendim, në rastet e referuara në pikën 3, të nenit 109, të Kodit, në dosje duhet të përfshihen:

- a) një përmbledhje e rastit;
- b) informacion i detajuar, që përcakton se janë plotësuar kushtet e referuara në nenin 112 ose nenin 113, të Kodit;
- c) deklarata e përmendur në pikën 1 ose një deklaratë nga zyra doganore, që vërteton se personi i interesuar konsiderohet se ka lexuar dosjen dhe nuk ka asgjë për të shtuar.

3. DPD i konfirmon zyrës doganore kompetente marrjen e dosjes sapo ta marrë atë në dorëzim.

4. Me kërkesë të zyrave doganore, DPD-ja vë në dispozicion të tyre një kopje të përmbledhjes së rastit, të përmendur në shkronjën “a”, të pikës 2, brenda 15 (pesëmbëdhjetë) ditëve nga data kur DPD ka marrë dosjen.

5. Në rastet kur informacioni i transmetuar nga zyra doganore nuk mjafton që DPD-ja të marrë një vendim, atëherë DPD-ja mund të kërkojë informacione shtesë nga zyra doganore.

6. DPD-ja i kthen dosjen zyrës doganore dhe çështja konsiderohet sikur nuk i është dorëzuar asnjëherë DPD-së në rastet e mëposhtme:

- a) Dosja nuk është e plotë, pasi nuk përmban asgjë që justifikon shqyrtimin e saj nga DPD-ja;
- b) Dosja nuk duhej dorëzuar në DPD;
- c) Zyra doganore i ka dorëzuar DPD-së informacion të ri, që ndryshon ndjeshëm faktet ose vlerësimin ligjor të rastit, ndërkohë që DPD-ja është ende duke shqyrtuar dosjen.

Neni 221

E drejta e personit të interesuar për t'u dëgjuar

(Pika 3, e nenit 109, të Kodit)

1. Kur DPD-ja duhet të marrë një vendim të pafavorshëm, në rastet e referuara në pikën 3, të nenit 109, të Kodit, ajo duhet t'i komunikojë me shkrim personit të interesuar arsyet, duke iu referuar të gjitha dokumenteve dhe informacioneve në të cilat është bazuar. DPD duhet të informojë personin e interesuar lidhur me të drejtën e tij për të pasur akses në dosje.

2. DPD-ja informon zyrën doganore kompetente për arsyet e marrjes së vendimit të pafavorshëm dhe komunikimin me personin e interesuar, siç përmendet në pikën 1.

3. Personit të interesuar i jepet mundësia t'ia shprehë pretendimet e tij me shkrim DPD-së në një

afat prej 30 (tridhjetë) ditësh, nga data në të cilën ai ka marrë komunikimin e përmendur në pikën 1.

Neni 222

Afatet kohore

(Pika 3, e nenit 109, të Kodit)

1. DPD-ja vendos nëse justifikohet apo jo rimbursimi a falja brenda 9 (nëntë) muajve, nga data në të cilën ajo ka marrë dosjen e përmendur në pikën 1, të nenit 220.

2. Kur DPD-ja e shikon të nevojshme të kërkojë informacion shtesë nga zyra doganore, siç përcaktohet në pikën 5, të nenit 220, afati i përmendur në pikën 1 zgjatet me të njëjtën periudhë kohore sa është periudha mes datës në të cilën DPD-ja ka dërguar kërkesën për informacion shtesë dhe datës në të cilën ajo e ka marrë këtë informacion. DPD-ja duhet të njoftojë personin e interesuar për zgjatjen e afatit.

3. Kur DPD-ja zhvillon hetime në mënyrë që të marrë një vendim, periudha e përmendur në pikën 1, zgjatet deri në kohën e nevojshme për të përfunduar hetimet, e cila nuk duhet t'i kalojë nëntë muaj. DPD-ja duhet të njoftojë zyrën doganore dhe personin e interesuar për datën në të cilën kanë filluar dhe përfunduar hetimet.

4. Nëse DPD-së i duhet të marrë një vendim të pafavorshëm, siç përmendet në pikën 1, të nenit 221, periudha e përmendur në pikën 1 zgjatet edhe për 30 (tridhjetë) ditë.

Neni 223

Zgjatja e afatit kohor për marrjen e vendimit për rimbursim ose falje

(pika 3, e nenit 27, të Kodit)

(Ndryshuar me VKM nr. 872, datë 30.12.2024)

1. Kur zbatohet shkronja “a”, e pikës 3, të nenit 109, të Kodit, ose shkronja “b”, e pikës 3, të nenit 109, të Kodit, afati kohor për të marrë vendimin për rimbursim ose falje pezullohet deri në momentin që zyra kompetente doganore në fjalë të marrë njoftimin e vendimit të Drejtorisë së Përgjithshme të Doganave ose njoftimin nga Drejtoria e Përgjithshme e Doganave për kthimin e dosjes për arsyet e parashikuara në pikën 6, të nenit 220.

2. Kur zbatohet shkronja “b”, e pikës 3, të nenit 109, të Kodit, afati kohor për marrjen e vendimit për rimbursim ose falje pezullohet deri në momentin që zyra kompetente doganore të ketë marrë njoftimin e vendimit të Drejtorisë së Përgjithshme të Doganave për rastin që përfshin çështje të karakterizuara nga elemente të krahasueshme faktike dhe juridike.

3. Kur vendimi për rimbursim ose falje mund të ndikohet nga rezultati i një prej procedurave administrative ose procedurave gjyqësore në vijim, me miratimin e aplikuesit, afati kohor për marrjen e vendimit për rimbursim ose falje mund të zgjatet, si më poshtë vijon:

a) Nëse një rast, i cili përfshin çështje identike ose të krahasueshme të fakteve dhe të ligjit është duke u shqyrtuar në Kolegjet e Bashkuara të Gjykatës së Lartë të Republikës së Shqipërisë, afati kohor për të marrë vendimin për rimbursim ose falje mund të zgjatet për një periudhë që përfundon jo më vonë se 30 (tridhjetë) ditë pas datës së dhënies së vendimit të Gjykatës në fjalë;

b) Nëse vendimi për rimbursim ose falje varet nga rezultati i kërkesës për verifikim pasues të provës së origjinës preferenciale të bërë në përputhje me marrëveshjen preferenciale në fjalë, afati kohor për të marrë vendimin për rimbursim ose falje mund të zgjatet për periudhën e verifikimit, siç përmendet në marrëveshjen preferenciale në fjalë dhe në çdo rast, jo më shumë se 15 (pesëmbëdhjetë) muaj nga data në të cilën është dërguar kërkesa.

Neni 224
Njoftimi i vendimit
(Pika 3, e nenit 109, të Kodit)

1. DPD duhet të njoftojë zyrën doganore kompetente për vendimin e saj, sa më shpejt që të jetë e mundur dhe, në çdo rast, brenda 30 (tridhjetë) ditëve nga data e përfundimit të periudhës së përcaktuar në pikën 1, të nenit 222.

2. Zyra doganore kompetente merr vendim në bazë të vendimit të DPD-së, të njoftuar në përputhje me pikën 1.

Zyra doganore kompetente informon DPD duke i dërguar edhe një kopje të vendimit në fjalë.

3. Kur vendimi, në rastet e parashikuara me pikën 3, të nenit 109, të Kodit, është i favorshëm për personin e interesuar, atëherë DPD-ja mund të përcaktojë kushtet në të cilat zyra doganore do të kryejë rimbursimin apo faljen prej detyrimeve në raste të ngjashme faktike dhe ligjore.

Neni 225
Pasojat e mosmarrjes së vendimit ose njoftimit
(Pika 3, të nenit 109, të Kodit)

Nëse DPD nuk merr një vendim brenda afatit të parashikuar në nenin 222 ose nuk i komunikon vendimin zyrës doganore kompetente brenda afatit të parashikuar në pikën 1, të nenit 224, zyra doganore kompetente merr një vendim të favorshëm për personin e interesuar.

Neni 226
Plotësimi i formaliteteve doganore
(Pika 1, e nenit 109, të Kodit)

1. Kur rimbursimi ose falja është objekt i plotësimit të formaliteteve doganore, mbajtësi i vendimit për rimbursimin ose faljen informon zyrën doganore të mbikëqyrjes që i ka plotësuar këto formalitete. Kur vendimi specifikon se mallrat mund të eksportohen ose të vendosen nën një regjim të posaçëm dhe debitori ka në dispozicion këtë mundësi, zyra e mbikëqyrjes doganore do të jetë zyra doganore ku mallrat janë vendosur nën këtë regjim.

2. Zyra doganore e mbikëqyrjes njofton autoritetin doganor kompetent vendimmarrës për plotësimin e formaliteteve doganore për të cilat rimbursimi ose falja është objekt, sipas përgjigjes të përmendur në nenin 217, duke përdorur formularin e përcaktuar në aneksin 33-07, të shtojcës B, bashkëlidhur këtij vendimi dhe pjesë përbërëse e tij.

3. Kur zyra doganore kompetente për marrjen e vendimit ka vendosur që rimbursimi ose falja është e justifikuar, shumat e detyrimeve do të rimbursohen ose falet vetëm pasi autoriteti doganor ka marrë informacionin e përmendur në pikën 2.

4. Zyra doganore kompetente, për marrjen e vendimit mund të autorizojë kryerjen e formaliteteve doganore për të cilat rimbursimi ose falja mund të jenë objekt, para se ai të marrë një vendim. Një autorizim i tillë nuk duhet të paragjykojë atë vendim. Në këto raste, pikat 1 deri në 3 do të zbatohen *mutatis mutandis*.

5. Për qëllime të këtij neni, zyra doganore e mbikëqyrjes është zyra doganore e cila siguron, kur është e përshtatshme, që formalitetet ose kërkesat që kanë objekt rimbursimin ose faljen e shumës së detyrimit të importit dhe eksportit, të jenë plotësuar.

Neni 227
Formalitetet në lidhje me vendimin për rimbursim ose falet
(Pika 2, e nenit 109, të Kodit)

1. Kur merret një vendim për rimbursim ose falje të detyrimeve të importit ose eksportit, objekt i plotësimit paraprak të formaliteteve të caktuara doganore, zyrat doganore do të caktojnë një afat kohor për përfundimin e këtyre formaliteteve doganore, i cili nuk do të kalojë 60 (gjashtëdhjetë) ditë nga data e njoftimit të atij vendimi.

2. Mosrespektimi i afatit të përmendur në pikën 1 sjell humbjen e së drejtës për rimbursim ose falje, përveç rastit kur personi i interesuar provon se ai ishte penguar nga përmbushja e këtij afati për shkak të rrethanave të paparashikuara ose forcës madhore.

Neni 228

Pjesët ose komponentët e një artikulli të vetëm

(Pika 1, e nenit 109, të Kodit)

Kur rimbursimi apo falja është e lidhur me shkatërrimin, braktisjen në favor të shtetit ose vendosjen nën një regjim të posaçëm apo regjim eksporti të mallrave, por formalitetet përkatëse janë plotësuar vetëm për një ose më shumë pjesë apo komponentë të këtyre mallrave, shuma që duhet rimbursuar apo falur, do të jetë sa diferenca mes shumës së detyrimit të importit ose të eksportit të mallrave dhe shumës së detyrimit të importit ose të eksportit që do të kishte qenë e zbatueshme për pjesën e mbetur të mallrave në qoftë se ato do të ishin të vendosur në një gjendje të pandryshuar nën një regjim doganor që sjell lindjen e një borxhi doganor, në datën në të cilën mallrat janë vendosur në atë mënyrë.

Neni 229

Mbetjet dhe hedhurinat

(Pika 1, e nenit 109, të Kodit)

Kur shkatërrimi i mallrave, të autorizuar nga zyra doganore kompetente për marrjen e vendimit, krijon mbeturina apo hedhurina/skrap, këto do të konsiderohen si mallra joshqiptare, sapo të jetë marrë një vendim për dhënien e rimbursimit ose faljen.

Neni 230

Eksporti ose shkatërrimi pa mbikëqyrje doganore

(Pika 1, e nenit 109, të Kodit)

1. Në rastet e mbuluara nga paragrafi i dytë, i pikës 1, të nenit 109, nenet 111 ose 113, të Kodit, kur eksporti ose shkatërrimi ndodh pa mbikëqyrje doganore, rimbursimi apo falja në bazë të nenit 113, të Kodit, do të jetë i kushtëzuar nga sa më poshtë:

a) Aplikanti dorëzon në zyrën doganore kompetente për marrjen e vendimit provat e nevojshme për të përcaktuar nëse mallrat për të cilat kërkohet rimbursimi apo falja përmbushin një nga kushtet e mëposhtme:

i. Mallrat janë eksportuar nga territori doganor i Republikës së Shqipërisë;

ii. Mallrat janë shkatërruar nën mbikëqyrjen e autoriteteve ose personave të autorizuar nga autoritetet për të vërtetuar një shkatërrim të tillë;

b) Aplikanti kthen në zyrën doganore kompetente për marrjen e vendimit çdo dokument që vërteton ose që përmban informacion që konfirmon statusin doganor të mallrave shqiptare për mallrat në fjalë, mbi bazën e të cilave mallrat në fjalë mund të jenë larguar nga territori doganor i Republikës së Shqipërisë, ose paraqet çfarëdo prove që autoriteti në fjalë e konsideron të nevojshme për të verifikuar se dokumenti nuk mund të përdoret më pas në lidhje me mallrat e sjella në territorin doganor të Republikës së Shqipërisë.

2. Provat që mallrat për të cilat kërkohet rimbursimi ose falja janë eksportuar nga territori doganor i Republikës së Shqipërisë, përbëhen nga dokumentet e mëposhtme:

- a) Vërtetimi i daljes, i përmendur në nenin 705;
 - b) Originali ose kopja e vërtetuar e deklaratës doganore për regjimin që përfshin lindjen e borxhit doganor;
 - c) Kur është e nevojshme, dokumentet tregtare ose administrative që përmbajnë një përshkrim të plotë të mallrave të cilat janë paraqitur me deklaratën doganore për regjimin në fjalë, ose me deklaratën doganore për eksport nga territori doganor i Republikës së Shqipërisë, ose me deklaratën doganore të bërë për mallrat në vendin tjetër të destinacionit.
3. Provat që vërtetojnë se mallrat për të cilat kërkohet rimbursimi ose falja janë shkatërruar nën mbikëqyrjen e autoriteteve ose të personave të autorizuar për të vërtetuar zyrtarisht një shkatërrim të tillë, përbëhen nga dokumentet të mëposhtme:
- a) Një raport apo deklaratë të shkatërrimit, të hartuar nga autoritetet nën mbikëqyrjen e të cilave u shkatërruan mallrat ose një kopje të vërtetuar të saj;
 - b) Një certifikatë të hartuar nga personi i autorizuar për të vërtetuar shkatërrimin, shoqëruar nga dokumenti që provon autoritetin e tij.
- Këto dokumente duhet të përmbajnë një përshkrim të plotë të mallrave të shkatërruara për të vendosur, me anë të krahasimit me të dhënat e deklaratës doganore për regjimin doganor që sjell lindjen e borxhit doganor dhe dokumentet mbështetëse, që mallrat e shkatërruara janë ato të cilat ishin vendosur nën regjimin në fjalë.
4. Kur prova e referuar në pikat 2 dhe 3 është e pamjaftueshme për autoritetin doganor për marrjen e vendimit, ose kur prova e caktuar nuk është në dispozicion, një provë e tillë mund të plotësohet ose zëvendësohet nga çdo dokument tjetër zyrtar që konsiderohet i nevojshëm nga autoriteti në fjalë.

Neni 231

Informacioni që duhet t'i dërgohet DPD

(Nenet 114 dhe 115, të Kodit)

- 1. Zyra doganore kompetente, përveç rasteve të përmendura në pikën 3, të nenit 109, të Kodit, do t'i dërgojë DPD-së një listë të rasteve të rimbursimit apo faljes.
- 2. Informimi duhet të bëhet gjatë tremujorëve të parë dhe të tretë të çdo viti, për të gjitha rastet në të cilat është vendosur për rimbursimin ose faljen e detyrimeve, gjatë gjysmës së parë të vitit.
- 3. Kur një zyrë doganore nuk ka marrë asnjë vendim për rastet e përmendura në pikën 1, gjatë gjysmës së vitit në fjalë, ajo do t'i dërgojë DPD-së një njoftim për këtë.
- 4. Për secilin prej rasteve të përmendura në këtë nen do të ofrohet informacioni i mëposhtëm:
 - a) Numri i deklaratës doganore apo dokumentit që njofton borxhin;
 - b) Data e deklaratës doganore ose e dokumentit që njofton borxhin;
 - c) Lloji i vendimit;
 - ç) Baza ligjore për vendimin;
 - d) Shuma e parave;
 - dh) Të dhëna të tjera të rastit (që përfshijnë një shpjegim të shkurtër se pse zyra doganore i konsideron kushtet për rimbursim ose falje sipas bazës përkatëse ligjore, të plotësuara).

KREU 4

Shuarja e borxhit doganor

Neni 232

Parregullsi të cilat nuk ndikojnë në funksionimin e duhur të një regjimi doganor

(Nënndarja "I", e shkronjës "c", të pikës 1, të nenit 116, të Kodit)

Situatat e mëposhtme konsiderohen si parregullsi pa ndikim të rëndësishëm në funksionimin e duhur të regjimit doganor kur:

a) tejkalimi i afatit kohor me një periudhë jo më shumë se afati që do të ishte dhënë, nëse do të ishte vënë në zbatim zgjatja;

b) borxhi doganor ka lindur për mallrat e vendosura nën një regjim të posaçëm ose në magazinim të përkohshëm në përputhje me nenin 215, pika 1, shkronja “a” ose “c”, të Kodit, dhe këto mallra janë hedhur më pas në qarkullim të lirë;

c) mbikëqyrja doganore është rivendosur për mallrat të cilat nuk janë formalisht pjesë e një regjimi transiti, por të cilat më parë ishin në një magazinim të përkohshëm ose janë vendosur në një regjim të posaçëm së bashku me mallrat e vendosura formalisht në atë regjim transiti;

ç) në rastin e mallrave të vendosura në një regjim të posaçëm, përveç atij të transitit dhe zonave të lira, ose në rastin e mallrave në magazinim të përkohshëm, kur është kryer një gabim në lidhje me informacionin në deklaratën doganore për mbylljen e regjimit ose në përfundim të magazinimit të përkohshëm me kusht që gabimi të mos ketë ndikim në mbylljen e procedurës ose në përfundimin e magazinimit të përkohshëm;

d) borxhi doganor ka lindur në bazë të nenit 215, pika 1, shkronja “a” ose “b”, të Kodit, me kusht që personi i interesuar të informojë autoritetet doganore kompetente në lidhje me mospërmbushjen para se borxhi doganor të jetë njoftuar apo autoritetet doganore të kenë informuar personin se duan të kryejnë një kontroll.

TITULLI IV

MALLRAT QË HYJNË NË TERRITORIN DOGANOR TË REPUBLIKËS SË SHQIPËRISË

KREU 1

Deklarata përmbledhëse e hyrjes

Seksioni 1

Depozitimi, afatet e depozitimit dhe regjistrimi i deklaratës përmbledhëse të hyrjes

Nënseksioni 1

Depozitimi i deklaratës përmbledhëse të hyrjes

Neni 233

Sistemi elektronik në lidhje me deklaratat përmbledhëse të hyrjes

(Neni 17 i Kodit)

Një sistem elektronik i informacionit dhe komunikimit, ngritur në bazë të pikës 1, të nenit 17, të Kodit, do të përdoret për paraqitjen, përpunimin, ruajtjen dhe shkëmbimin e informacionit, në lidhje me deklaratat përmbledhëse të hyrjes, si dhe për shkëmbimet e mëvonshme të informacionit, të parashikuara në këtë kre. Duke anashkaluar paragrafin e parë të këtij neni, deri në implementimin e sistemit të informatizuar të referuar në planin e punës, të miratuar nga ministri përgjegjës për financat, deklarata përmbledhëse e hyrjes bëhet me anë të depozitimit të manifestit të ngarkesës së mjetit lundrues, mjetit ajror, mjetit hekurudhor, deklaratës së transitit, dokumentit të transportit rrugor (CMR) ose në çdo formë tjetër që pranohet nga zyra doganore përkatëse.

Neni 234

Depozitimi i një deklarate përmbledhëse të hyrjes

(Pikat 5 dhe 6, të nenit 119, të Kodit)

1. Të dhënat e deklaratës përmbledhëse të hyrjes mund të sigurohen me depozitimin e një grupimi të dhënash.

2. Për qëllime të paraqitjes së deklaratës përmbledhëse të hyrjes përmes depozitimit të një grupimi të dhënash, zyra doganore e hyrjes do të jetë zyra doganore e njohur nga personi i interesuar në momentin e depozitimit të të dhënave, në mënyrë të veçantë bazuar në vendin në të cilin mallrat janë paraqitur.

3. Deri në implementimin e sistemit të informatizuar të kontrollit të importit të përmendur në Planin e punës, të miratuar nga ministri i përgjegjës për financat, pikat 1 dhe 2, të këtij neni, nuk do të zbatohen.

Neni 235

Rastet kur detyrimi për të depozituar një deklaratë përmbledhëse të hyrjes nuk zbatohet

(Shkronja “b”, e pikës 2, të nenit 119, të Kodit)

(Ndryshuar shkronjat “dh” dhe “ë” të pikës 1 me VKM nr. 872, datë 30.12.2024)

1. Depozitimi i një deklarate përmbledhëse të hyrjes nuk bëhet në lidhje me mallrat e mëposhtme:

- a) Energjinë elektrike;
- b) Mallrat që hyjnë nëpërmjet tubacioneve;
- c) Artikujt e korrespondencës;
- ç) Sendet shtëpiake, sipas përcaktimit të shkronjës “c”, të nenit 399, me kusht që ato të mos jenë transportuar në bazë të një kontrate transporti;
- d) Mallrat, për të cilat lejohet deklarimi doganor me gojë, në përputhje me nenet 304 dhe 305, pika 1, me kusht që ato të mos jenë transportuar sipas një kontrate transporti;
- dh) mallrat e përmendura në shkronjat “b” deri në shkronjat “ç” dhe “ë”, të nenit 308, ose në pikën 1, të nenit 309, të cilat konsiderohen të deklaruar në përputhje me nenin 311, me kusht që nuk shoqërohen nga një kontratë transporti.
- e) Mallrat e ndodhura në bagazhin personal të udhëtarëve;
- ë) mallrat e transportuara ose të përdorura në kuadër të aktiviteteve ushtarake, në bazë të formularit 302 të NATO-s.
- f) Armët dhe pajisjet ushtarake të sjella në territorin doganor të Republikës së Shqipërisë nga autoritetet përgjegjëse të mbrojtjes ushtarake, nën transportin ushtarak ose transportin për përdorim vetëm të autoriteteve ushtarake;
- g) Mallrat e mëposhtme, të sjella në territorin doganor të Republikës së Shqipërisë drejtpërdrejt nga instalimet në det të hapur, që operohen nga një person i vendosur në territorin doganor të Republikës së Shqipërisë:
 - i. Mallrat, të cilat janë trupëzuar në këto instalime në det të hapur për qëllime të ndërtimit, riparimit, mirëmbajtjes apo këmbimit të tyre;
 - ii. Mallrat, të cilat janë përdorur për t’u përshtatur ose për të pajisur instalimet në det të hapur;
 - iii. pjesët për t’u përdorur apo konsumuar në instalimet në det të hapur;
 - iv. mbetjet jo të rrezikshme që dalin nga këto instalime në det të hapur;
- gj) Mallra që gëzojnë të drejtën e lehtësirave në përputhje me Konventën e Vjenës për marrëdhëniet diplomatike të 18 prillit 1961, Konventën e Vjenës mbi marrëdhëniet konsullore, të datës 24 prill 1963, si dhe konventa të tjera konsullore ose Konventën e Nju Jorkut, të 16 dhjetorit 1969, për misione të posaçme;
- h) Mallrat e mëposhtme, në bordin e anijeve dhe avionëve:
 - i. mallrat, të cilat janë furnizuar për t’u përfshirë si pjesë ose pajisje në këto anije dhe avionë;
 - ii. mallrat për funksionimin e motorëve, makinave dhe pajisjeve të tjera të këtyre anijeve ose avionëve;
 - iii. ushqimet dhe sende të tjera për t’u konsumuar apo shitur në bord;

i) Produktet e peshkimit dhe produkte të tjera të marra nga deti jashtë territorit doganor të Republikës së Shqipërisë nga anijet/barkat e peshkimit të Republikës së Shqipërisë;

j) Anijet/barkat dhe mallrat që ngarkohen në to, që hyjnë në ujërat territoriale të Republikës së Shqipërisë me qëllim të vetëm marrjen në bord të furnizimeve pa u lidhur me ndonjë nga pajisjet e portit;

k) Mallrat e mbuluara nga Carnet ATA ose Carnet CPD me kusht që ato të mos jenë transportuar sipas një kontrate transporti.

2. Deri më 31 dhjetor 2023, depozitimi i një deklarate përmbledhëse të hyrjes nuk do të zbatohet në lidhje me mallrat në dërgesat postare, pesha e të cilave nuk i kalon 250 gramë.

Kur mallrat në dërgesat postare, pesha e të cilave i kalon 250 gramë, janë sjellë në territorin doganor të Republikës së Shqipërisë pa një deklaratë përmbledhëse të hyrjes, nuk do të zbatohen sanksione /dënime.

Analiza e riskut duhet të kryhet pas paraqitjes së mallrave dhe, kur është e mundur, në bazë të deklaratës së magazinimit të përkohshëm ose të deklaratës doganore që mbulon këto mallra.

Deri më 31 dhjetor 2023, ministria përgjegjëse për financat dhe DPD-ja do të shqyrtojnë situatën lidhur me mallrat në dërgesat postare sipas këtij paragrafi, me qëllim marrjen e masave të nevojshme, duke marrë parasysh përdorimin e mjeteve elektronike nga operatorët postarë që mbulojnë lëvizjen e mallrave.

3. Deri në implementimin e sistemit të informatizuar të kontrollit të importit sipas planit të punës të ministrit përgjegjës për financat, pika 2, e këtij neni, nuk zbatohet dhe hiqet dorë nga paraqitja e një deklarate hyrëse, në lidhje me mallrat në dërgesat postare.

4. Deri në implementimin e sistemit të informatizuar të kontrollit të importit sipas planit të punës së ministrit përgjegjës për financat, hiqet dorë nga paraqitja e një deklarate përmbledhëse hyrëse në lidhje me mallrat në një ngarkesë, vlera e të cilave nuk i kalon 22 euro, me kusht që autoritetet doganore pranojnë, me pëlqimin e operatorit ekonomik, të kryejnë një analizë risku duke përdorur të dhëna nga sistemi i operatorit ekonomik ose informacione të marra nga ky sistem.

Nënseksioni 2

Afatet e depozitimit të deklaratës përmbledhëse të hyrjes

Neni 236

Afatet kohore për depozitimin e deklaratës përmbledhëse të hyrjes në rastin e transportit detar

(Pikat 3 dhe 7, të nenit 119, të Kodit)

(Shtuar nëndarja “vi” e shkronjës “c” me VKM nr. 872, datë 30.12.2024)

Kur mallrat hyjnë në territorin doganor të Republikës së Shqipërisë në rrugë detare, deklarata përmbledhëse e hyrjes duhet të paraqitet brenda afateve kohore të mëposhtme:

a) Për mallra në kontejnerë, përveç rasteve kur zbatohet shkronja “c”, jo më vonë se 24 orë përpara se mallrat të jenë ngarkuar në anijen që do t'i sjellë ato në territorin doganor të Republikës së Shqipërisë;

b) Për ngarkesat e plota ose të ndashme, përveç rasteve kur zbatohet shkronja “c”, jo më vonë se katër orë para mbërritjes së anijes në portin e hyrjes në territorin doganor të Republikës së Shqipërisë;

c) Jo më vonë se dy orë para mbërritjes së anijes në portin e hyrjes në territorin doganor të Republikës së Shqipërisë, në rastin e mallrave që vijnë nga ndonjë prej këtyre vendeve:

i. Groenlanda;

ii. Ishujt Faroe;

iii. Islanda;

iv. portet në Detin Baltik, Detin e Veriut, Detin e Zi dhe Detin Mesdhe;

v. të gjitha portet e Marokut.

vi. portet e Mbretërisë së Bashkuar të Britanisë së Madhe dhe Irlandës së Veriut, me përjashtim të porteve të vendosura në Irlandën e Veriut dhe portet e Ishujve të Kanalit (*Channel*) dhe Ishullit të Njeriut (*Man*).

Neni 237

Afatet kohore për depozitimin e deklaratës përmbledhëse të hyrjes në rast të transportit ajror

(Pikat 3 dhe 7, të nenit 119, të Kodit)

1. Kur mallrat hyjnë në territorin doganor të Republikës së Shqipërisë në rrugë ajrore, deklarata përmbledhëse e hyrjes duhet të depozitohet sa më shpejt që të jetë e mundur.

Të dhënat minimale të deklaratës përmbledhëse të hyrjes duhet të depozitohen të paktën para se mallrat të ngarkohen në avionin që i sjell në territorin doganor të Republikës së Shqipërisë.

2. Kur janë dhënë vetëm të dhënat minimale të deklaratës përmbledhëse të hyrjes brenda afatit të përmendur në paragrafin e dytë, të pikës 1, të dhënat e tjera sigurohen brenda afateve të mëposhtme kohore:

a) Për fluturimet me një kohëzgjatje prej më pak se 4 orësh, të paktën deri në kohën e nisjes faktike të avionit;

b) Për fluturimet e tjera, të paktën 4 orë para mbërritjes së avionit në aeroportin e parë në territorin doganor të Republikës së Shqipërisë.

3. Duke anashkaluar pikat 1 dhe 2, të këtij neni, deri në implementimin e sistemit të informatizuar të kontrollit të importit sipas planit të punës së ministrit përgjegjës për financat, deklarata përmbledhëse e hyrjes duhet të depozitohet brenda afateve kohore të mëposhtme:

a) Për fluturimet me një kohëzgjatje prej më pak se 4 orësh, që nga koha e nisjes së avionit;

b) Për fluturimet me një kohëzgjatje prej 4 orësh ose më shumë, dhe jo më vonë se 4 orë, përpara arritjes së avionit në aeroportin e parë të Republikës së Shqipërisë.

Neni 238

Afatet kohore për depozitimin e deklaratës përmbledhëse të hyrjes në rastin e transportit

hekurudhor

(Pikat 3 dhe 7, të nenit 119, të Kodit)

Kur mallrat hyjnë në territorin doganor të Republikës së Shqipërisë në rrugë hekurudhore, deklarata përmbledhëse e hyrjes duhet të depozitohet brenda afateve kohore të mëposhtme:

a) Kur udhëtimi me tren nga stacioni i fundit i trenit i vendosur në një vend jashtë territorit të Republikës së Shqipërisë në zyrën doganore të hyrjes në territorin doganor të Republikës së Shqipërisë zgjat më pak se 2 orë, të paktën 1 orë para mbërritjes së mallit në zyrën doganore të hyrjes;

b) Në të gjitha rastet e tjera, të paktën 2 orë para mbërritjes së mallit në zyrën doganore të hyrjes.

Neni 239

Afatet kohore për depozitimin e deklaratës përmbledhëse të hyrjes në rastin e transportit

rrugor

(Pikat 3 dhe 7, të nenit 119, të Kodit)

Kur mallrat hyjnë në territorin doganor të Republikës së Shqipërisë nëpërmjet transportit rrugor, deklarata përmbledhëse e hyrjes duhet të depozitohet jo më vonë se 1 orë para mbërritjes së mallit në zyrën doganore të hyrjes.

Neni 240

Afatet kohore për depozitimin e deklaratës përmbledhëse të hyrjes në rastin e transportit në

rrugë ujore të brendshme
(Pikat 3 dhe 7, të nenit 119, të Kodit)

Kur mallrat hyjnë në territorin doganor të Republikës së Shqipërisë në rrugë ujore të brendshme, deklarata përmbledhëse e hyrjes duhet të paraqitet jo më vonë se 2 orë para mbërritjes së mallit në zyrën doganore të hyrjes.

Neni 241
Afatet kohore për depozitimin e deklaratës përmbledhëse të hyrjes në rastin e transportit të kombinuar
(Pikat 3 dhe 7, të nenit 119, të Kodit)

Kur mallrat hyjnë në territorin doganor të Republikës së Shqipërisë me një mjet transporti që, në vetvete, është transportuar me një mjet aktiv transporti, afati kohor për depozitimin e deklaratës përmbledhëse të hyrjes do të jetë sa afati i zbatueshëm për mjetin aktiv të transportit.

Neni 242
Afatet kohore për depozitimin e deklaratës përmbledhëse të hyrjes në rastin e forcave madhore
(Pikat 3 dhe 7, të nenit 119, të Kodit)

Afatet kohore të referuara në nenet 236 deri 240 nuk zbatohen në rastet e forcave madhore.

Nënseksioni 3
Raste të veçanta për deklaratën përmbledhëse të hyrjes

Neni 243
Sigurimi i të dhënave të deklaratës përmbledhëse të hyrjes nga ana e personave të tjerë në raste të veçanta të transportit hekurudhor në rrugë detare apo përmes rrugëve ujore të brendshme

(Pika 6, e nenit 119, të Kodit)
(Shtuar fjalë në titull dhe ndryshuar pika 2 me VKM nr. 872, datë 30.12.2024)

1. Në rastin e transportit në rrugë detare apo përmes rrugëve ujore të brendshme, kur për të njëjtat mallra të mbuluara nga një ose më shumë fatura ngarkimi (*Bill of Lading B/L*), për të cilat janë lidhur një ose më shumë kontrata të tjera transporti nga një ose më shumë persona të tjerë përveç transportuesit, dhe kur personi që lëshon faturën e ngarkimit nuk i ofron të dhënat e kërkuara për deklaratën përmbledhëse të hyrjes partnerit të tij kontraktual, për të cilin lëshon një faturë ngarkimi, ose partnerit të tij kontraktual, me të cilin ka lidhur një marrëveshje për bashkëngarkimin e mallrave, atëherë personi, i cili nuk i ofron të dhënat e kërkuara, duhet t'i sigurojë këto të dhëna për zyrën doganore të hyrjes në përputhje me pikën 6, të nenit 119, të Kodit.

Kur marrësi i treguar në faturën e ngarkimit nuk disponon faturën kryesore të ngarkimit dhe nuk ofron të dhënat e kërkuara për deklaratën përmbledhëse të hyrjes, personi që lëshon faturën e ngarkimit duhet t'i sigurojë këto të dhëna për zyrën doganore të hyrjes.

2. Kur në rastin e transportit hekurudhor për të njëjtat mallra, një ose më shumë kontrata transporti shtesë të mbuluara nga një ose më shumë fletëdërgesa janë lidhur nga një ose më shumë persona të ndryshëm nga transportuesi dhe personi lëshues i fletëdërgesës nuk i vë në dispozicion të dhënat e kërkuara për deklaratën përmbledhëse të hyrjes ortakut të tij/saj kontraktual, i cili i lëshon

një fletëdërgesë atij ose partnerit të tij/saj kontraktues, me të cilin ai ose ajo ka lidhur një marrëveshje për bashkëngarkimin e mallrave, personi që nuk vendos të dhënat e kërkuara në dispozicion, ia paraqet ato të dhëna zyrës doganore të hyrjes së parë, në përputhje me pikën 6, të nenit 119, të Kodit.

Kur marrësi i treguar në fletëngarkesë, që nuk ka fletëdërgesë bazë, nuk i vendos të dhënat e kërkuara për deklaratën përmbledhëse të hyrjes në dispozicion të personit, që lëshon atë fletëdërgesë, ai ose ajo do t'ia japë ato të dhëna zyrës doganore të hyrjes së parë.

3. Deri në implementimin e sistemit të informatizuar të kontrollit të importit sipas planit të punës të ministrit përgjegjës për financat, pikat 1 dhe 2, të këtij neni, nuk do të zbatohen.

Neni 244

Sigurimi i të dhënave të deklaratës përmbledhëse të hyrjes nga ana e personave të tjerë në raste të veçanta të transportit në rrugë ajrore (Pika 6, e nenit 119, të Kodit)

1. Në rastin e transportit në rrugë ajrore, kur për të njëjtat mallra të mbuluara nga një ose më shumë fatura ngarkimi (*Air Way Bill/AWB*), për të cilat janë lidhur një ose më shumë kontrata të tjera të transportit nga një apo më shumë persona të tjerë, përveç transportuesit, dhe kur personi që lëshon faturën e ngarkimit AWB nuk i ofron të dhënat e kërkuara për deklaratën përmbledhëse të hyrjes partnerit të tij kontraktual për të cilin lëshon një faturë ngarkimi AWB ose partnerit të tij kontraktual me të cilin ka lidhur një marrëveshje për bashkëngarkimin e mallrave, atëherë personi, i cili nuk i ofron të dhënat e kërkuara, duhet t'i sigurojë këto të dhëna për zyrën doganore të hyrjes në përputhje me pikën 6, të nenit 119, të Kodit.

2. Në rastin e transportit në rrugë ajrore, kur mallrat janë zhvendosur sipas rregullave të akteve të Bashkimit Postar Universal dhe operatori postar nuk i ofron transportuesit të dhënat e kërkuara për deklaratën përmbledhëse të hyrjes, operatori postar duhet t'i sigurojë këto të dhëna për zyrën doganore të hyrjes në përputhje me pikën 6, të nenit 119, të Kodit.

3. Çdo person që paraqet të dhënat e përmendura në pikën 5, të nenit 119, të Kodit, do të jetë përgjegjës për këto të dhëna në përputhje me përcaktimet e shkronjave “a” dhe “b”, të pikës 2, të nenit 23, të Kodit.

4. Deri në implementimin e sistemit të informatizuar të kontrollit të importit sipas Planit të punës së ministrit përgjegjës për financat, pikat 1 dhe 3, të këtij neni, nuk do të zbatohen.

Neni 245

Detyrimet për të informuar në lidhje me të dhënat e deklaratës përmbledhëse hyrëse nga persona të ndryshëm nga transportuesi (Pika 6, e nenit 119, të Kodit)

1. Në rastet e përmendura në pikën 1, të nenit 243, transportuesi dhe çdo person që lëshon një faturë ngarkese, në grupimin e të dhënave të pjesshme të deklaratës përmbledhëse të hyrjes, siguron identitetin e çdo personi që ka lidhur një kontratë transporti me ta, ka lëshuar një faturë ngarkese në lidhje me të njëjtat mallra dhe nuk ka vënë në dispozicion të tyre të dhënat e kërkuara për deklaratën përmbledhëse të hyrjes.

Kur marrësi i treguar në faturën e ngarkesës (*bill of lading*) nuk ka faturat bazë të ngarkesës dhe nuk vë në dispozicion të dhënat e nevojshme të personit që lëshon faturën e ngarkesës, ky i fundit duhet të sigurojë identitetin e marrësit.

2. Në rastet e përmendura në pikën 1, të nenit 243, personi që lëshon faturën e ngarkesës, informon për lëshimin e kësaj fature të ngarkesës, personin i cili përmbylli një kontratë transporti me të dhe

lëshon faturën e ngarkesës së tij.

Në rastin e një marrëveshjeje të përbashkët ngarkimi të mallrave, personi që lëshon faturën e ngarkesës informon për lëshimin e kësaj fature të ngarkesës personin me të cilin ai hyri në atë marrëveshje.

3. Në rastet e përmendura në pikën 1, të nenit 244, transportuesi dhe çdo person që lëshon një dokument transporti ajror (*air waybill*), do të sigurojë në pjesën e grupimit të të dhënave të pjesshme të deklaratës përmbledhëse të hyrjes, identitetin e çdo personi i cili ka nënshkruar një kontratë transporti me ta, ka lëshuar një dokument transporti ajror në lidhje me të njëjtat mallra dhe nuk i plotëson të dhënat e kërkuara për deklaratën përmbledhëse të hyrjes në dispozicion të tyre.

4. Në rastet e përmendura në pikën 1, të nenit 244, personi që lëshon një dokument transporti ajror do të informojë për lëshimin e këtij dokumenti personin me të cilin ka lidhur një kontratë transporti dhe i lëshon këtij të fundit dokumentin e transportit ajror.

Në rastin e një marrëveshjeje të përbashkët ngarkese të mallrave, personi që lëshon dokumentin e transportit ajror do të informojë për lëshimin e këtij dokumenti personin me të cilin ka lidhur këtë marrëveshje.

5. Në rastet e përmendura në pikën 2, të nenit 244, transportuesi, në pjesën e grupimit të të dhënave të pjesshme të deklaratës përmbledhëse të hyrjes, do të sigurojë identitetin e operatorit postar i cili nuk vë të dhënat e nevojshme për deklaratën përmbledhëse të hyrjes në dispozicion të tij.

6. Deri në implementimin e sistemit të informatizuar të kontrollit të importit të përmendur në planin e punës, të miratuar nga ministri përgjegjës për financat, pikat 1 deri 5, të këtij neni, nuk do të zbatohen.

Nënseksioni 4

Regjistrimi dhe ndryshimi i deklaratës përmbledhëse të hyrjes

Neni 246

Regjistrimi i deklaratës përmbledhëse të hyrjes

(Pika 1, e nenit 119, të Kodit)

1. Autoritetet doganore regjistrojnë deklaratën përmbledhëse hyrëse pas depozitimit të saj dhe njoftojnë, menjëherë, personin që ka e depozituar atë për regjistrim dhe i komunikojnë MRN e deklaratës përmbledhëse të hyrjes dhe datën e regjistrimit.

2. Nëse të dhënat e deklaratës përmbledhëse të hyrjes janë siguruar duke paraqitur më shumë se një grupim të dhënash, autoritetet doganore regjistrojnë secilën prej këtyre të dhënave të deklaratës përmbledhëse të hyrjes pas depozitimit të saj dhe duhet të njoftojnë, menjëherë, personin që ka bërë depozitimin e të dhënave për regjistrim duke i komunikuar një MRN për çdo depozitim dhe datën e regjistrimit.

3. Autoritetet doganore njoftojnë menjëherë transportuesin për regjistrimin, me kusht që transportuesi të ketë kërkuar që të njoftohet dhe të ketë akses në sistemin elektronik të përmendur në nenin 233, në ndonjë nga rastet e mëposhtme:

a) Kur deklarata përmbledhëse e hyrjes është paraqitur nga personi i përmendur në shkronjën “b”, të pikës 4, të nenit 119, të Kodit;

b) Kur të dhënat e deklaratës përmbledhëse të hyrjes janë dhënë në përputhje me pikën 6, të nenit 119, të Kodit.

4. Deri në implementimin e sistemit të informatizuar të kontrollit të importit, të përmendur në planin e punës, të miratuar nga ministri përgjegjës për financat, pika 2 dhe shkronja “b” e pikës 3, nuk do të zbatohen.

Neni 247

Ndryshimi i deklaratës përmbledhëse të hyrjes

(Pika 1, e nenit 121, të Kodit)

1. Kur të dhënat e deklaratës përmbledhëse të hyrjes janë depozituar nga persona të ndryshëm, çdo person mund të lejohet të ndryshojë vetëm të dhënat, të cilat ai person ka depozituar.
2. Autoritetet doganore njoftojnë menjëherë personin që ka paraqitur ndryshime në të dhënat e deklaratës përmbledhëse hyrëse për vendimin e tyre për të regjistruar ose për të refuzuar ndryshimet.
3. Kur ndryshimet në të dhënat e deklaratës përmbledhëse të hyrjes janë paraqitur nga një person i ndryshëm nga transportuesi, autoritetet doganore do të njoftojnë transportuesin, me kusht që transportuesi të ketë kërkuar që të njoftohet dhe të ketë akses në sistemin elektronik të përmendur në nenin 233.
4. Deri në implementimin e sistemit të informatizuar të kontrollit të importit të përmendur në planin e punës, të miratuar nga ministri përgjegjës për financat, pika 1, e këtij neni, nuk do të zbatohet.

Nënseksioni 5

Analiza e riskut për deklarimin përmbledhës të hyrjes

Neni 248

Analiza e riskut

(Nenet 119, pika 3 dhe 120, të Kodit)

1. Analiza e riskut duhet të kryhet para ardhjes së mallrave në zyrën doganore të hyrjes, me kusht që deklarata përmbledhëse e hyrjes të jetë depozituar brenda afateve kohore të përcaktuara në nenet 236 deri 240, përveç nëse identifikohet një risk, ose nevojitet të kryhet një analizë risku shtesë.

Në rastin e ngarkesave me kontejnerë të sjella në territorin doganor të Republikës së Shqipërisë nga deti, siç përmendet në shkronjën “a”, të nenit 236, autoritetet doganore përfundojnë analizën e riskut brenda 24 orëve nga depozitimi i deklaratës përmbledhëse të hyrjes, ose në rastet e përmendura në pikën 6, të nenit 119, të Kodit, nga të dhënat e deklaratës përmbledhëse të hyrjes, të paraqitura nga transportuesi.

Përveç paragrafit të parë, në rastin e mallrave të sjella në territorin doganor të Republikës së Shqipërisë në rrugë ajrore, analiza e riskut do të kryhet pas marrjes së dhënave minimale të deklaratës përmbledhëse të hyrjes, të referuar në paragrafin e dytë, të pikës 1, të nenit 237.

2. Analiza e riskut duhet të plotësohet, kur është e nevojshme, përmes shkëmbimit të informacionit lidhur me riskun dhe rezultatet e analizave të riskut, siç përmendet në pikën 5, të nenit 47, të Kodit.

3. Kur përfundimi i analizës së riskut kërkon informacion të mëtejshëm mbi veçoritë e deklaratës përmbledhëse të hyrjes, analiza duhet të përfundojë vetëm pasi informacioni është dhënë.

Për këto qëllime, autoritetet doganore kërkojnë këtë informacion nga personi që paraqet deklaratën përmbledhëse të hyrjes, ose, kur është e zbatueshme, nga personi që ka depozituar detajet e deklaratës përmbledhëse të hyrjes. Nëse ai person është i ndryshëm nga transportuesi, autoritetet doganore informojnë transportuesin, me kusht që transportuesi ta ketë kërkuar që të njoftohet dhe të ketë akses në sistemin elektronik të përmendur në nenin 234.

4. Nëse autoritetet doganore, në rastin e mallrave që hyjnë në territorin doganor të Republikës së Shqipërisë në rrugë ajrore, kanë baza të arsyeshme për të dyshuar se dërgesa mund të përbëjë një kërcënim serioz për sigurinë e aviacionit, njoftojnë personin që paraqet deklaratën përmbledhëse të hyrjes ose, kur është e zbatueshme, personin që ka paraqitur të dhënat e deklaratës përmbledhëse të hyrjes dhe, kur ky person është i ndryshëm nga transportuesi, informon transportuesin, me kusht që transportuesi të ketë akses në sistemin elektronik të përmendur në nenin 234, se dërgesa duhet të

kontrollon si ngarkesë dhe postë me risk të lartë, para se të ngarkohen në bordin e një avioni në territorin doganor të Republikës së Shqipërisë. Pas njoftimit,

ai person duhet të informojë autoritetet doganore nëse dërgesa është kontrolluar ose tashmë u kontrollua në përputhje me kërkesat e lartpërmendura dhe të sigurojë të gjithë informacionin e duhur lidhur me këtë kontroll. Analiza e riskut duhet të kryhet vetëm pasi informacioni është dhënë.

5. Kur në rastin e ngarkesave me kontejnerë të sjella në territorin doganor të Republikës së Shqipërisë në rrugë detare, siç përmendet në shkronjën “a”, të nenit 236, ose në rastin e mallrave të sjella në territorin doganor të Republikës së Shqipërisë në rrugë ajrore, analiza e riskut ofron baza të arsyeshme për autoritetet doganore duke konsideruar se hyrja e mallrave në territorin doganor të Republikës së Shqipërisë përbën një kërcënim serioz për sigurinë dhe mbrojtjen, që kërkon një ndërhyrje të menjëhershme, autoritetet doganore njoftojnë personin që depoziton deklaratën përmbledhëse të hyrjes, ose, kur është e zbatueshme, personin që ka paraqitur të dhënat e deklaratës përmbledhëse të hyrjes dhe, kur ky person është i ndryshëm nga transportuesi, informon transportuesin, me kusht që transportuesi të ketë akses në sistemin elektronik të përmendur në nenin 234, se mallrat nuk duhet të ngarkohen. Një njoftim i tillë bëhet dhe informacioni përkatës jepet menjëherë pas identifikimit të riskut dhe, në rastin e mallrave të sjella me kontejnerë në territorin doganor të Republikës së Shqipërisë në rrugë detare, siç përmendet në shkronjën “a”, të nenit 236, brenda afatit kohor të përcaktuar në paragrafin e dytë, të pikës 1.

6. Kur një dërgesë është identifikuar se paraqet një kërcënim të një natyre të tillë që kërkon veprim të menjëhershëm pas mbërritjes, zyra doganore e hyrjes do ta bëjë atë veprim me mbërritjen e mallrave.

7. Kur risku i identifikuar nuk përbën një kërcënim të tillë serioz për sigurinë dhe mbrojtjen që do të kërkonte masa të menjëhershme, zyra doganore e hyrjes ia kalon rezultatet e analizës së riskut, duke përfshirë, kur është e nevojshme, informacionin në lidhje me vendin më të përshtatshëm ku duhet të kryhet kontrolli si dhe të dhënat e deklaratës përmbledhëse të hyrjes, të gjitha zyrave doganore që preken nga lëvizja e mallrave.

8. Për mallrat për të cilat detyrimi për të paraqitur një deklaratë përmbledhëse të hyrjes është hequr, në përputhje me shkronjat “c” deri “g”, dhe “i”, të pikës 1, dhe paragrafi i parë i pikës 2, të nenit 235, janë sjellë në territorin doganor të Republikës së Shqipërisë, analiza e riskut duhet të kryhet me paraqitjen e mallrave, nëse janë të disponueshëm, bazuar në deklaratën e magazinimit të përkohshëm ose në deklaratën doganore të mallrave në fjalë.

9. Mallrat e paraqitura në doganë mund të vendosen nën një regjim doganor ose të rieksporthen sapo analiza e riskut të jetë përfunduar dhe rezultatet e analizës së riskut dhe, sipas rastit, masat e marra lejojnë një vendosje të tillë.

10. Analiza e riskut, gjithashtu, duhet të kryhet në qoftë se të dhënat e deklaratës përmbledhëse të hyrjes janë ndryshuar në përputhje me nenin 121, të Kodit. Në këtë rast, analiza e riskut duhet të kryhet, menjëherë, pas marrjes së të dhënave, përveç nëse identifikohet një risk, ose nevojitet të kryhet një analizë risku shtesë.

Neni 249

Analiza e Riskut

(Neni 120 i Kodit)

1. Deri në implementimin e sistemit të informatizuar të kontrollit të importit të përmendur në planin e punës, të miratuar nga ministri përgjegjës për financat, pikat 1 deri 8, neni 247, nuk do të zbatohet.

2. Analiza e riskut duhet të kryhet para ardhjes së mallrave në zyrën doganore të hyrjes, me kusht që deklarata përmbledhëse e hyrjes të jetë depozituar brenda afateve kohore të përcaktuara në nenin 236 deri 240, përveçse kur është identifikuar një risk.

3. Në rast të ngarkesave me kontejnerë të sjella në territorin doganor të Republikës së Shqipërisë në

rrugë detare, siç përmendet në shkronjën “a”, të nenit 236, autoritetet doganore duhet të përfundojnë analizën e riskut brenda 24 orëve nga depozitimi i deklaratës përmbledhëse të hyrjes. Kur analiza ofron baza të arsyeshme për autoritetet doganore që të marrin në konsideratë, se hyrja e mallrave në territorin doganor të Republikës së Shqipërisë përbën një kërcënim serioz për sigurinë dhe mbrojtjen dhe një veprim i menjëhershëm është i nevojshëm, autoritetet doganore njoftojnë personin që ka depozituar deklaratën përmbledhëse të hyrjes, dhe, nëse ai person është i ndryshëm nga transportuesi, informon transportuesin me kusht që transportuesi të ketë akses në sistemin elektronik të përmendur në nenin 233, se mallrat nuk do të ngarkohen. Ky njoftim duhet të bëhet dhe informacioni duhet të jepet menjëherë pas zbulimit të riskut përkatës dhe brenda 24 orëve nga depozitimi i deklaratës përmbledhëse të hyrjes.

4. Kur një anije ose avion duhet të ndalojë në më shumë se një port ose aeroport në territorin doganor të Republikës së Shqipërisë, me kusht që të lëvizë mes tyre, pa ndaluar në asnjë port ose aeroport jashtë territorit doganor të Republikës së Shqipërisë, do të veprohet si në vijim:

a) Për të gjitha mallrat e transportuara si më lart me anije ose avion, një deklaratë përmbledhëse hyrëse depozitohet në portin ose në aeroportin e parë të Republikës së Shqipërisë. Autoritetet doganore të portit ose aeroportit të hyrjes, duhet të kryejnë analizën e riskut për qëllime të sigurisë dhe të mbrojtjes për të gjitha mallrat e anijes ose avionit në fjalë. Analizat shitesë të riskut mund të kryhen për këto mallra në portin apo aeroportin në të cilin ato janë shkarkuar;

b) Në rastin e dërgesave të identifikuara se paraqesin një kërcënim serioz, ku kërkohet një ndërhyrje e menjëhershme, zyra doganore e portit ose aeroportit të hyrjes në Republikën së Shqipërisë do të marrë masa ndaluese, dhe në çdo rast, do t'i kalojë rezultatet e analizës së riskut në portet ose aeroportet e mëpasshme;

c) Në portet ose aeroportet e mëpasshme në territorin doganor të Republikës së Shqipërisë, për mallrat e paraqitura në doganë në atë port ose aeroport do të zbatohet neni 135, i Kodit.

5. Kur mallrat, për të cilat detyrimi për të paraqitur deklaratën përmbledhëse të hyrjes është hequr në përputhje shkronjat “c” deri “g”, dhe “i” të pikës 1, dhe pika 2, të nenit 235, janë sjellë në territorin doganor të Republikës së Shqipërisë, analiza e riskut bëhet me paraqitjen e mallrave, nëse janë të disponueshëm, bazuar në deklaratën e magazinimit të përkohshëm ose në deklaratën doganore të mallrave në fjalë.

KREU 2

Mbërritja e mallrave

Seksioni 1

Hyrja e mallrave në territorin doganor të Republikës së Shqipërisë

Nënseksioni 1

Vendi ku paraqiten mallrat

Neni 250

Miratimi i një vendi për paraqitjen e mallrave në doganë dhe magazinimi i përkohshëm (pika 1 e nenit 130 dhe pika 1 e nenit 137, të Kodit)

(Ndryshuar me VKM nr. 872, datë 30.12.2024)

1. Një vend i ndryshëm nga zyra kompetente doganore mund të miratohet për qëllime të paraqitjes së mallrave, kur përmbushen kushtet e mëposhtme:

a) Përmbushen kërkesat e përcaktuara në nenet 97 dhe 138, pikat 2 deri 3, të Kodit;

b) Mallrat deklarohen për një regjim doganor ose rieksporthen, jo më vonë se 3 (tre) ditë pas paraqitjes së tyre ose jo më vonë se 6 (gjashtë) ditë pas paraqitjes së tyre në rastin e një pritësi të

autorizuar, siç përmendet në shkronjën “b”, të pikës 4, të nenit 207, të Kodit, me përjashtim të rasteve kur autoritetet doganore kërkojnë që mallrat të verifikohen në përputhje me pikën 2, të nenit 131, të Kodit.

Kur vendi është autorizuar tashmë për qëllime të përdorimit të ambienteve të magazinimit të përkohshëm, ky miratim nuk është i nevojshëm.

2. Një vend i ndryshëm nga magazinimi i përkohshëm mund të miratohet për magazinimin e përkohshëm të mallrave, kur përmbushen kushtet e mëposhtme:

a) Kërkesat e përcaktuara në pikat 2 dhe 3, të nenit 138, dhe në nenin 97, të Kodit;

b) Mallrat deklarohen për një regjim doganor ose rieksporthen, jo më vonë se 3 (tri) ditë pas paraqitjes së tyre ose jo më vonë se 6 (gjashtë) ditë pas paraqitjes së tyre në rastin e një marrësi të autorizuar, siç përmendet në shkronjën “b”, të pikës 4, të nenit 207, të Kodit, me përjashtim të rasteve kur autoritetet doganore kërkojnë që mallrat të verifikohen, në përputhje me pikën 2, të nenit 131, të Kodit.

Neni 251

Devijimi i një anije detare ose një mjeti ajror, njoftimi i mbërritjes

(Neni 124 i Kodit)

1. Kur një anije detare ose një avion që hyn në territorin doganor të Republikës së Shqipërisë, ndërron drejtimin dhe pritët të mbërrirjes për herë të parë në një zyrë doganore të vendosur në Republikën e Shqipërisë, që nuk është treguar në deklaratën përmbledhëse të hyrjes si një vend kalimi, operatori i atij mjeti transportues informon për këtë devijim zyrën doganore që tregohet në deklaratën përmbledhëse të hyrjes, si zyrën doganore të hyrjes.

Paragrafi i parë nuk do të zbatohet kur mallrat janë sjellë në territorin doganor të Republikës së Shqipërisë nën regjimin e transitit, në përputhje me nenin 132, të Kodit.

2. Zyra doganore e treguar në deklaratën përmbledhëse të hyrjes, si zyra doganore e hyrjes, menjëherë pasi është informuar në përputhje me pikën 1, njofton zyrën doganore e cila në bazë të këtij informacioni është zyra doganore e hyrjes pas devijimit. Ajo do t'i dërgojë veçoritë përkatëse të deklaratës përmbledhëse të hyrjes dhe të rezultateve të analizës së riskut zyrës doganore të treguar në deklaratën përmbledhëse të hyrjes.

3. Deri në datat e implementimit të sistemit të informatizuar për ‘njoftimin e mbërritjes’, autoritetet doganore mund të lejojnë përdorimin e mjeteve të tjera, të ndryshme nga teknika elektronike e përpunimit të të dhënave për depozitim të një njoftimi të mbërritjes së një anije detare ose të një mjeti ajror, në përputhje me nenin 124, të Kodit.

4. Kur informacioni për mbërritjen e një anijeje detare ose të një mjeti ajror është i disponueshëm nga autoritetet doganore, në formën e një deklarate përmbledhëse të hyrjes, sipas nenit 122, të Kodit (deklaratë doganore, manifest, deklaratë magazinimi të përkohshëm), ato mund të mos kërkojnë njoftimin e mbërritjes.

Nënseksioni 2

Paraqitja, shkarkimi dhe verifikimi i mallrave

Neni 252

Paraqitja e mallrave në doganë

(Neni 130 i Kodit)

1. Autoritetet doganore mund të pranojnë përdorimin e sistemeve të portit ose të aeroportit, ose metoda të tjera të informacionit në dispozicion, për paraqitjen e mallrave në doganë.

2. Deri në datat e implementimit të sistemit të informatizuar për “njoftimin e paraqitjes”,

autoritetet doganore mund të lejojnë përdorimin e mjeteve të tjera, të ndryshme nga teknika elektronike e përpunimit të të dhënave për njoftimin e paraqitjes së mallrave në doganë, në përputhje me nenin 130, të Kodit.

3. Personi që paraqet mallrat i referohet deklaratës përmbledhëse të hyrjes ose, në rastet e parashikuara në nenin 122, të Kodit, deklaratës doganore ose deklaratës për magazinim të përkohshëm që është depozituar për këto mallra përveçse kur nuk kërkohet depozitimi i një deklarate përmbledhëse të hyrjes.

Seksioni 2 **Magazinimi i përkohshëm i mallrave**

Nënseksioni 1 **Procedurat për magazinimin e përkohshëm**

Neni 253 **Procedura e konsultimit mes autoriteteve doganore para dhënies së autorizimit të** **ambienteve për** **magazinim të përkohshëm** (Neni 27 i Kodit)

1. Procedura e referuar në nenin 31 do të ndiqet në përputhje me pikat 2 dhe 3, të këtij neni, para se të merret një vendim për të autorizuar funksionimin e ambienteve të magazinimit të përkohshëm, përveçse kur DPD-ja gjykon se nuk janë përmbushur kushtet për dhënien e një autorizimi të tillë.

2. Autoritetet doganore kompetente për marrjen e vendimit, i komunikojnë kërkesën dhe projektautorizimin autoriteteve doganore të konsultuara, brenda 30 ditëve, pas ditës në të cilën është pranuar aplikimi.

3. Nëse autoritetet doganore të konsultuara nuk komunikojnë ndonjë kundërshtim brenda afatit, aprovimi i tyre do të konsiderohet si i dhënë.

Neni 254 **Deklarata e magazinimit të përkohshëm** **(neni 135 i Kodit)** *(Shtuar togfjalësh nën titull me VKM nr. 872, datë 30.12.2024)*

1. Kur deklarata doganore është depozituar para mbërritjes së pritshme të mallrave në doganë, në përputhje me nenin 156, të Kodit, autoritetet doganore mund ta marrin në konsideratë këtë deklaratë, si një deklaratë magazinimi të përkohshëm.

2. Deri në datat e implementimit të sistemit të informatizuar për “deklaratën e magazinimit të përkohshëm”, autoritetet doganore mund të lejojnë përdorimin e mjeteve të tjera të ndryshme nga teknika elektronike të përpunimit të të dhënave për paraqitjen e një deklarate të magazinimit të përkohshëm në përputhje me nenin 135 të Kodit.

Neni 255 **Regjistrimet** (Pika 4, e nenit 138, të Kodit)

1. Regjistrimet e përcaktuara në pikën 4, të nenit 138, të Kodit, duhet të përmbajnë informacionin dhe të dhënat e mëposhtme:

a) Referencën e deklaratës përkatëse të magazinimit të përkohshëm për mallrat e magazinuara

dhe referencën përkatëse për mbylljen e magazinimit të përkohshëm;

b) Datën dhe të dhënat identifikuese të dokumenteve doganore në lidhje me mallrat e magazinuara dhe të gjitha dokumentet e tjera që lidhen me magazinimin e përkohshëm të mallrave;

c) Treguesit, numrat identifikues, numrin dhe llojin e paketimeve, sasinë dhe përshkrimin e zakonshëm tregtar apo teknik të mallrave dhe, sipas rastit, shenjat e identifikimit të kontejnerit, të nevojshme për identifikimin e mallrave;

ç) Vendndodhjen e mallrave dhe veçoritë e çdo lëvizjeje të mallrave;

d) Statusin doganor të mallrave;

dh) Të dhënat mbi format e trajtimit të përmendura në pikën 2, të nenit 137, të Kodit;

e) Në lidhje me lëvizjen e mallrave në magazinim të përkohshëm ndërmjet ambienteve të ndryshme të magazinimit të përkohshëm, të dhënat në lidhje me mbërritjen e mallrave në ambientet e magazinimit të përkohshëm të destinacionit.

Kur regjistrimet nuk janë pjesë e kontabilitetit /llogarive kryesore për qëllime doganore, duhet t'i referohen kontabilitetit/llogarive kryesore për qëllime doganore.

2. Autoritetet doganore mund të heqin dorë nga kërkesa për një pjesë të informacionit të përmendur në pikën 1, kur kjo nuk ndikon negativisht në mbikëqyrjen doganore dhe kontrollin e mallrave. Megjithatë, në rastin e lëvizjes së mallrave ndërmjet ambienteve të magazinimit të përkohshëm, ajo heqje dorë nuk zbatohet.

Neni 256

Lëvizja e mallrave në magazinim të përkohshëm

(Pika 5, e nenit 138, të Kodit)

1. Kur lëvizja bëhet mes ambienteve të magazinimit të përkohshëm, nën përgjegjësinë e autoriteteve të ndryshme doganore, mbajtësi i autorizimit për funksionimin e ambienteve të magazinimit të përkohshëm nga të cilat mallrat janë zhvendosur, informon:

a) autoritetet doganore përgjegjëse për mbikëqyrjen e ambientit të magazinimit të përkohshëm nga të cilat mallrat janë zhvendosur për lëvizjen e synuar në mënyrën e përcaktuar në autorizim dhe, pas mbërritjes së mallrave në ambientin e magazinimit të përkohshëm të destinacionit, në lidhje me përfundimin e lëvizjes në mënyrën e përcaktuar në autorizim;

b) mbajtësin e autorizimit për ambientet tek të cilat mallrat janë zhvendosur, që mallrat janë dërguar.

2. Kur lëvizja bëhet mes ambienteve të magazinimit të përkohshëm, nën përgjegjësinë e autoriteteve të ndryshme doganore, mbajtësi i autorizimit për ambientet tek të cilat mallrat janë zhvendosur, do të:

a) njoftojë autoritetet doganore përgjegjëse për ato ambiente, për mbërritjen e mallrave; dhe

b) pas mbërritjes së mallrave në ambientet e magazinimit të përkohshëm të destinacionit, informon mbajtësin e autorizimit të ambienteve të magazinimit të përkohshëm të nisjes.

3. Informacioni i përmendur në pikat 1 dhe 2, do të përfshijë një referencë të deklaratës përkatëse të magazinimit të përkohshëm dhe të datës së fundit të magazinimit të përkohshëm.

4. Kur kryhet një lëvizje e mallrave nën magazinim të përkohshëm, mallrat mbeten nën përgjegjësinë e mbajtësit të autorizimit për funksionimin e ambienteve të magazinimit të përkohshëm nga të cilat mallrat janë zhvendosur, deri sa mallrat të shënohen në regjistrat e mbajtësit të autorizimit për ambientet e magazinimit të përkohshëm në të cilën mallrat janë transferuar, përveç rastit kur parashikohet ndryshe në autorizim.

Neni 257

Raste të tjera të lëvizjes së mallrave në magazinim të përkohshëm

(Shkronja “c”, e pikës 5, të nenit 138, të Kodit)

Në përputhje me shkronjën “c”, të pikës 5, të nenit 138, të Kodit, autoritetet doganore mund të autorizojnë lëvizjen e mallrave në magazinim të përkohshëm ndërmjet ambienteve të ndryshme të magazinimit të përkohshëm, të mbuluara nga autorizime të ndryshme të magazinimit të përkohshëm me kusht që mbajtësit e këtyre autorizimeve të jenë OEAD/OEAS.

Neni 258

Shitja me pakicë

(Pika 1, e nenit 138, të Kodit)

Autorizimet për funksionimin e ambienteve të magazinimit të përkohshëm të referuara në nenin 138, të Kodit, jepen në përputhje me kushtet e mëposhtme:

- a) Ambientet e magazinimit të përkohshëm nuk përdoren për shitje me pakicë;
- b) Kur mallrat e magazinuar përbëjnë rrezik ose mund të dëmtojnë mallrat e tjera apo kërkojnë kushte të veçanta për arsye të ndryshme, ambientet e magazinimit të përkohshëm janë të pajisura posaçërisht për ruajtjen e tyre;
- c) Ambientet për magazinim të përkohshëm vihen në funksionim ekskluzivisht nga mbajtësi i autorizimit.

TITULLI V

RREGULLAT E PËRGJITHSHME PËR STATUSIN DOGANOR, VENDOSJA E MALLRAVE NËN NJË REGJIM DOGANOR, VERIFIKIMI, ÇLIRIMI DHE TJETËRSIMI/SHKATËRRIMI I MALLRAVE

KREU 1

Statusi doganor i mallrave

Seksioni 1

Dispozita të përgjithshme

Nënseksioni 1

Statusi doganor i mallrave

Neni 259

Prezumimi i statusit doganor

(Nenet 142, pika 1, dhe 144, pika 2, të Kodit)

1. Presumimi i statusit doganor të mallrave shqiptare nuk zbatohet për mallrat e mëposhtme:
 - a) Mallrat e sjella në territorin doganor të Republikës së Shqipërisë, të cilat janë nën mbikëqyrje doganore për të përcaktuar statusin e tyre doganor;
 - b) Mallrat në magazinim të përkohshëm;
 - c) Mallrat e vendosura në ndonjë nga regjimet e posaçme me përjashtim të transitit të brendshëm, të regjimit të përpunimit pasiv dhe të regjimit të përdorimit të veçantë përfundimtar (*end-use*);
 - ç) Produktet e peshkimit të kapura nga një anije/barkë peshkimi e Republikës së Shqipërisë jashtë territorit doganor të Republikës së Shqipërisë, në ujëra të tjera përveç ujërave territoriale të një vendi tjetër, të cilat janë sjellë në territorin doganor të të Republikës së Shqipërisë, sipas përcaktimit të nenit 281;
 - d) Mallrat e përftuara nga produktet e referuara në shkronjën “ç” në bordin e një anijeje/barke apo anije- fabrikë të Republikës së Shqipërisë, në prodhimin e të cilave mund të jenë përdorur produkte të tjera që kanë statusin doganor të mallrave shqiptare, të cilat janë sjellë në territorin doganor të

Republikës së Shqipërisë, sipas përcaktimit të nenit 281;

dh) Produkte të peshkimit detar dhe produkte të tjera të marra apo të kapura nga anijet/barkat që mbajnë flamurin e një vendi të tjetër në territorin doganor të Republikës së Shqipërisë.

2. Mallrat shqiptare mund të lëvizin, pa qenë objekt i një regjimi doganor, nga një pikë në tjetrën, brenda territorit doganor të Republikës së Shqipërisë dhe përkohësisht jashtë këtij territori, pa ndryshimin e statusit të tyre doganor në rastet e mëposhtme:

a) Kur mallrat janë transportuar në rrugë ajrore dhe janë ngarkuar ose transportuar në një aeroport të Republikës së Shqipërisë për dërgesë në një aeroport tjetër të Republikës së Shqipërisë, me kusht që ato të jenë transportuar përmes një dokumenti të vetëm transporti, të lëshuar në Republikën e Shqipërisë;

b) Kur mallrat janë transportuar në rrugë detare dhe janë dërguar ndërmjet porteve të ndryshme të Republikës së Shqipërisë përmes një shërbimi të rregullt të anijeve të autorizuar, në përputhje me nenin 311;

c) Kur mallrat janë transportuar në rrugë hekurudhore nëpërmjet një vendi të tjetër nën një regjim transiti të përbashkët, të mbuluar nga një dokument i vetëm transporti i lëshuar në Republikën e Shqipërisë, e parashikuar kjo nga një marrëveshje ndërkombëtare.

3. Mallrat shqiptare mund të lëvizin, pa qenë objekt i një regjimi doganor, nga një pikë në tjetrën, brenda territorit doganor të Republikës së Shqipërisë dhe përkohësisht jashtë këtij territori, pa ndryshimin e statusit të tyre doganor, në rastet e mëposhtme me kusht që të jetë provuar statusi doganor i tyre si mallra shqiptare:

a) Mallrat, të cilat janë transportuar nga një pikë në tjetrën brenda territorit doganor të Republikës së Shqipërisë dhe largohen përkohësisht nga ky territor në rrugë detare apo ajrore;

b) Mallrat, të cilat janë transportuar nga një pikë në tjetrën brenda territorit doganor të Republikës së Shqipërisë nëpërmjet një territori jashtë territorit doganor të Republikës së Shqipërisë pa u transborduar dhe janë të mbuluara nga një dokument i vetëm transporti, i lëshuar në të Republikën e Shqipërisë;

c) Mallrat, të cilat janë transportuar nga një pikë në tjetrën brenda territorit doganor të Republikës së Shqipërisë nëpërmjet një territori jashtë territorit doganor të Republikës së Shqipërisë dhe janë transportuar jashtë territorit doganor të Republikës së Shqipërisë përmes një mjeti tjetër transporti përveç atij në të cilin ishin ngarkuar fillimisht, nëpërmjet lëshimit të një dokumenti të ri transporti, që mbulon transportin nga territori jashtë territorit doganor të Republikës së Shqipërisë, me kusht që dokumenti i ri të jetë i shoqëruar me një kopje të dokumentit të vetëm origjinal të transportit;

ç) Automjetet rrugore të regjistruara në Republikën e Shqipërisë, të cilat janë larguar përkohësisht dhe kanë rihyrë në territorin doganor të Republikës së Shqipërisë;

d) Ambalazhet, paletat dhe pajisjet e tjera të ngjashme, duke përfshirë kontejnerët që i përkasin një personi të vendosur në territorin doganor të Republikës së Shqipërisë, të cilët janë përdorur për transportin e mallrave që janë larguar përkohësisht dhe kanë rihyrë në territorin doganor të Republikës së Shqipërisë; dh) Mallrat në bagazhin e një pasagjeri, të cilat nuk janë të destinuar për përdorim tregtar që janë larguar përkohësisht dhe kanë rihyrë në territorin doganor të Republikës së Shqipërisë.

Neni 260

Periudha e vlefshmërisë së një dokumenti T2L, apo e një manifesti doganor mallrash

(Pika 5, e nenit 27, të Kodit)

Prova e statusit doganor të mallrave shqiptare në formën e një dokumenti T2L ose një manifesti doganor mallrash është e vlefshme për 90 ditë nga data e regjistrimit ose kur, në përputhje me nenin 290, nuk ka asnjë detyrim për të regjistruar manifestin doganor të mallrave, nga data e krijimit. Me kërkesë të personit të interesuar dhe për shkaqe të arsyeshme, zyra doganore mund të caktojë një

periudhë më të gjatë të vlefshmërisë së dokumentit.

Neni 261

Mjetet e komunikimit të Numrit Kryesor të Lëvizjes (MRN) së një dokumenti T2L ose një manifesti doganor mallrash

(Shkronja “a”, e pikës 3, të nenit 17, të Kodit)

1. MRN i një dokumenti T2L ose një manifesti doganor mallrash mund të komunikohet me ndonjë prej mjeteve të mëposhtme, përveç teknikave informatike të përpunimit të të dhënave:

- a) një bar kod;
- b) një dokument të regjistrimit të statusit;
- c) mjete të tjera të lejuara nga autoriteti doganor pritës.

2. Deri në implementimin e sistemit të informatizuar sipas planit të punës së ministrit përgjegjës për financat, pika 1 e këtij neni nuk do të zbatohet.

Nënseksioni 2

Mjetet, miratimi, regjistrimi dhe përdorimi i mjeteve të provës së statusit

Neni 262

Mjetet e provës së statusit doganor të mallrave shqiptare

(Pika 2, e nenit 142, të Kodit)

(Shtuar shkronja “e” e pikës 1 me VKM nr. 872, datë 30.12.2024)

1. Për të provuar se mallrat kanë statusin doganor të mallrave shqiptare, sipas rastit, përdoret një nga mjetet në vijim:

- a) Të dhënat e deklarimit transit të mallrave të vendosura nën regjimin e transitit të brendshëm. Në këtë rast, pika 3, e nenit 259, nuk do të zbatohet;
- b) Të dhënat e dokumentit T2L të përmendura në nenin 269;
- c) Manifesti doganor i mallrave i përmendur në nenin 270;
- ç) Fatura apo dokumenti i transportit të përmendura në nenin 273;
- d) Sipas rastit, regjistri i peshkimit, deklarata e zbarkimit në tokë, deklarata e transbordit dhe të dhënat e sistemit të monitorimit të anijes, të përmendur në nenin 28;
- dh) Një mjet prove i përmendur në nenet 276 deri 279;
- e) Etiketa e përmendur në nenin 608.
- ë) të dhënat e deklarates së akcizës, të përmendura në nenet 36 dhe 37, të ligjit nr.61/2014, “Për akcizat në Republikën e Shqipërisë”, të ndryshuar.

2. Duke anashkaluar pikën 1, të këtij neni, deri në implementimin e sistemit të informatizuar të provës së Republikës së Shqipërisë sipas planit të punës të miratuar nga ministri përgjegjës për financat, prova e statusit doganor të mallrave shqiptare mund të jepet përmes manifestit të kompanisë së transportit detar në lidhje me këto mallra.

3. Duke anashkaluar shkronjën “ç”, të pikës 1, të këtij neni, deri në implementimin e sistemit të informatizuar të provës së Republikës së Shqipërisë, sipas planit të punës të miratuar nga ministri përgjegjës për financat, prova e statusit doganor të mallrave shqiptare mund të jepet përmes faturës ose një dokumenti transporti, që lidhet me mallrat, vlera e të cilave e tejkalon ekuivalentin në lekë të 15 000 eurove.

4. Kur mjetet e provave të referuara në pikën 1 janë përdorur për mallrat me status doganor të mallrave shqiptare, me një paketim që nuk ka statusin doganor të mallrave shqiptare, në mjetin e provës duhet të vendoset edhe shënimi: “Paketimi N - [kodi 98200]”

5. Kur mjetet e provave të përmendura në shkronjat “b”, “c” dhe “ç”, të pikës 1, janë lëshuar në

mënyrë retrospektive (*a-posteriori*), ato duhet të përfshijnë edhe shënimin: “Lëshuar në mënyrë retrospektive - [kodi 98201]”

6. Mjetet e provës të referuara në pikën 1 nuk do të përdoren në lidhje me mallrat për të cilat formalitetet e eksportit kanë përfunduar ose janë vendosur nën regjimin e përpunimit pasiv.

Neni 263

Miratimi, regjistrimi dhe përdorimi i mjeteve të caktuara të provës së statusit doganor të mallrave shqiptare

(Pika 2, e nenit 142, të Kodit)

1. Zyra doganore kompetente konfirmon dhe regjistron mjetet e provës së statusit doganor të mallrave shqiptare të përmendura në shkronjat “b” dhe “c”, të pikës 1, të nenit 262, me përjashtim të rasteve të përmendura në pikën 1, të nenit 290, dhe i komunikon MRN e këtyre mjeteve të provës personit të interesuar.

2. Një dokument që konfirmon regjistrimin e mjeteve të provës së përmendur në pikën 1, do të vihet në dispozicion me kërkesë të personit të interesuar nga zyra doganore kompetente. Ky dokument do të përgatitet duke përdorur formularin e aneksit 51-01, të shtojcës B, bashkëlidhur këtij vendimi dhe pjesë përbërëse e tij.

3. Mjetet e provës të referuara në pikën 1, duhet të paraqiten në zyrën kompetente doganore ku mallrat janë paraqitur pas rihyrjes në territorin doganor të Republikës së Shqipërisë, duke treguar MRN e tyre.

4. Zyra doganore kompetente do të monitorojë përdorimin e mjeteve të provës të përmendur në pikën 1, me qëllim që të sigurojë në mënyrë të veçantë që mjetet e provës nuk janë përdorur për mallra të ndryshme nga ato për të cilat janë lëshuar.

Neni 264

Miratimi i një fature

(Pika 2, e nenit 142, të Kodit)

Deri në implementimin e sistemit të informatizuar të provës së Republikës së Shqipërisë, sipas planit të punës të miratuar nga ministri përgjegjës për financat, kur vlera e përgjithshme e mallrave shqiptare tejkalon vlerën ekuivalente në lekë të 15 000 (pesëmbëdhjetë) eurove, fatura ose dokumenti i transportit i përmendur në pikën 3, të nenit 262, e plotësuar dhe e nënshkruar siç duhet nga personi në fjalë, do të miratohet (vërtetohen) nga zyra doganore kompetente.

Neni 265

Miratimi i dokumenteve T2L

(Pika 2, neni 142, të Kodit)

Deri në implementimin e sistemit të informatizuar të provës së Republikës së Shqipërisë, sipas planit të punës të miratuar nga ministri përgjegjës për financat, kur DPD ka siguruar mundësinë e përdorimit të mjeteve të tjera nga teknika elektronike e përpunimit të të dhënave, zyra doganore kompetente miraton dokumentet T2L dhe kur është e nevojshme, çdo fletë plotësuese ose listë ngarkesat e përdorura.

Neni 266

Miratimi i manifestit të kompanisë së transportit detar

(Pika 2, e nenit 142, të Kodit)

Deri në implementimin e sistemit të informatizuar të provës së Republikës së Shqipërisë, sipas planit të punës të miratuar nga ministri përgjegjës për financat, me kërkesë të kompanisë së anijeve, manifesti i plotësuar dhe nënshkruar siç duhet, miratohet nga zyra kompetente doganore.

Neni 267

Autorizimi lidhur me manifestin “e ditës pasuese”

(Pika 2, e nenit 142, të Kodit)

Deri në implementimin e sistemit të informatizuar të provës së Republikës së Shqipërisë, sipas planit të punës të miratuar nga ministri përgjegjës për financat, autoritetet doganore mund të autorizojnë që manifesti i përmendur në pikën 2, të nenit 262, që shërben për të treguar statusin doganor të mallrave shqiptare, të hartohet maksimumi një ditë pas largimit të anijes. Megjithatë, manifesti hartohet gjithmonë para ardhjes së anijes në portin e destinacionit.

Nënseksioni 3

Prova e statusit doganor të mallrave shqiptare

Neni 268

Prova e statusit doganor të mallrave shqiptare sipas një dokumenti “T2L”

(Shkronja “a”, e pikës 3, të nenit 17, të Kodit)

(Ndryshuar fjalë dhe togfjalësh në paragrafin e fundit të shkronjës “b” të pikës 1 me VKM nr. 872, datë 30.12.2024)

1. Deri në implementimin e sistemit të informatizuar për provën e statusit doganor të mallrave sipas planit të punës së ministrit të financave dhe kur lëshohet një dokument “T2L” në letër, do të zbatohen:

a) Personi i interesuar shënon “T2L” në nënndarjen e djathtë të kutisë 1, të formularit, dhe “T2Lbis” në nënndarjen e djathtë të kutisë 1, të çdo flete në vazhdim;

b) Autoritetet doganore mund të autorizojnë çdo person për të përdorur listëngarkesat, të cilat nuk janë në përputhje me të gjitha kërkesat, kur këta persona:

- janë vendosur në Republikën e Shqipërisë;

- lëshojnë rregullisht prova të statusit doganor të mallrave shqiptare ose autoritetet doganore vlerësojnë se këta persona plotësojnë detyrimet ligjore për përdorimin e këtyre provave;

- nuk kanë kryer shkelje të rëndë ose të përsëritura të legjislacionit doganor, të akcizës ose tatimor.

c) Autorizimi i përmendur në shkronjën “b” jepet vetëm kur:

- autoritetet doganore janë në gjendje të mbikëqyrin procedurën dhe të kryejnë kontrolle pa një përpjekje

- administrative joproporcionale me kërkesat e personit në fjalë; dhe

- personi në fjalë mban të dhënat të cilat mundësojnë autoritetet doganore të kryejnë kontrolle efektive.

ç) Dokumenti “T2L” duhet të hartohet në origjinal.

d) Kur miratohet nga autoriteti doganor, për aq sa është e mundur, duhet të paraqiten në kutinë “C”, ‘Zyra e nisjes’, elementët e mëposhtëm:

- në rastin e dokumentit “T2L”, emri dhe vula e zyrës kompetente, nënshkrimi i një zyrtari të kësaj zyre, -

- data e nënshkrimit, por jo numri i regjistrimit ose numri i mbylljes së deklaratës, përveçse kur ajo kërkohet;

- në rastin e fletëve në vazhdim ose të listëngarkesës, numri i shfaqur në dokumentin “T2L” paraqitet me anë të një vule ose e shënuar me dorë, duke përfshirë emrin e zyrës kompetente. Kur

numri i dokumentit shënohet me dorë, ajo duhet të shoqërohet me vulën zyrtare të zyrës në fjalë.

2. Dokumentet duhet t'i kthehen personit të interesuar.

Neni 269

Prova e statusit doganor të mallrave shqiptare në formën e të dhënave të dokumentit T2L

(Pika 2, e nenit 142, të Kodit)

1. Kur tregohet MRN për të vërtetuar statusin doganor si mallra shqiptare, të dhënat e dokumentit T2L, që shërbejnë si bazë për MRN, mund të përdoren vetëm për paraqitjen e parë të mallrave.

Kur dokumenti T2L përdoret vetëm për një pjesë të mallrave në paraqitjen e tyre të parë, një provë e re do të jepet për pjesën e mbetur të mallrave në përputhje me nenet 260 dhe 263.

2. Udhëtarët, të ndryshëm nga operatorët ekonomikë, do të dorëzojnë kërkesat e tyre për miratimin e një dokumenti T2L duke përdorur formularin e përcaktuar në aneksin 51-01, të shtojcës B, bashkëlidhur këtij vendimi dhe pjesë përbërëse e tij.

Neni 270

Prova e statusit doganor të mallrave shqiptare në formën e një manifesti doganor të mallrave

(Pika 2, e nenit 142, të Kodit)

1. Çdo manifest doganor i mallrave merr një MRN. Një manifest i tillë mund të marrë një MRN vetëm kur mbulon mallra që kanë statusin doganor të mallrave shqiptare, të ngarkuara në anije në një port të Republikës së Shqipërisë.

2. Autoritetet doganore mund të pranojnë që të përdoren sistemet informatike të operatorëve ekonomik, të portit apo të transportit, për paraqitjen e kërkesës për miratimin dhe regjistrimin e manifestit doganor të mallrave dhe paraqitjen e tij në zyrën doganore kompetente, me kusht që sisteme të tilla të përmbajnë gjithë informacionin e kërkuar për një manifest të tillë.

Nënseksioni 4

Provat e dorëzuara përmes mjeteve të tjera përveç teknikave informatike të përpunimit të të dhënave

Neni 271

Prova e statusit doganor të mallrave shqiptare për udhëtarë, të ndryshëm nga operatorët ekonomikë

(Shkronja “a”, e pikës 3, të nenit 17, të Kodit)

Një udhëtar, i cili nuk është operator ekonomik, mund të bëjë një kërkesë me shkrim në letër për të provuar statusin doganor të mallrave shqiptare.

Neni 272

Prova e statusit doganor të mallrave shqiptare nëpërmjet lëshimit të një fature apo dokumenti transporti

(Neni 17, pikat 2 e 3, shkronja “a”, i Kodit)

1. Prova e statusit doganor të mallrave shqiptare, vlera e të cilave nuk e tejkalon vlerën ekuivalente në lekë të shumës 15 000 (pesëmbëdhjetë mijë) euro, mund të paraqitet me ndonjë prej mjeteve të mëposhtme, përveç teknikave informatike të përpunimit të të dhënave:

- a) faturë në lidhje me mallrat;
- b) dokument transporti në lidhje me mallrat.

Fatura ose dokumenti i transportit, të përmendura në pikën 1, duhet të përfshijë të paktën emrin e plotë dhe adresën e dërguesit apo të personit të interesuar kur nuk ka dërgues, zyrën kompetente doganore, numrin e kolive, llojin, shenjat dhe numrat e referencës së tyre, përshkrimin e mallrave, peshën bruto (kg), vlerën e tyre dhe, nëse është e nevojshme, numrat e kontejnerëve.

2. Dërguesi ose personi i interesuar, kur nuk ka dërgues, do të identifikojë statusin doganor të mallrave shqiptare duke treguar kodin “T2L”, sipas rastit, të shoqëruar me nënshkrimin e tij në faturë apo në dokumentin e transportit.

Deri në implementimin e sistemit të informatizuar për provën e statusit doganor të mallrave sipas planit të punës së ministrit përgjegjës për financat, kur miratohet nga autoriteti doganor, dokumenti duhet të përmbajë emrin dhe vulën e zyrës kompetente doganore, nënshkrimin e një zyrtari të kësaj zyre dhe datën e miratimit dhe numrin e regjistrimit ose numrin e mbylljes së deklaratës, kur kjo është e nevojshme.

Neni 273

Prova e statusit doganor të mallrave shqiptare për mallrat, vlera e të cilave nuk i kalon 15 000 euro

(Pika 2, e nenit 142, të Kodit)

Në rastin e mallrave që kanë statusin doganor të mallrave shqiptare, vlera e të cilave nuk tejkalon vlerën ekuivalente në lekë të 15 000 eurove, statusi doganor i mallrave shqiptare mund të provohet përmes paraqitjes së faturës apo dokumentit të transportit për këto mallra, me kusht që të lidhet vetëm me mallrat që kanë statusin doganor të mallrave shqiptare.

Neni 274

Prova e statusit doganor të mallrave shqiptare nga lëshimi i manifestit i një shoqërie të transportit detar

(Shkronja “a”, e pikës 3, të nenit 17, të Kodit)

1. Deri në implementimin e sistemit të informatizuar për provën e statusit doganor të mallrave sipas planit të punës së ministrit përgjegjës për financat, manifesti i shoqërive të transportit detar përfshin të paktën informacionin e mëposhtëm:

- a) Emrin dhe adresën e plotë shoqërisë së transportit detar;
- b) Emrin e mjetit lundrues;
- c) Vendin dhe datën e ngarkimit;
- ç) Vendin e shkarkimit.

2. Manifesti, për çdo dërgesë, duhet të përfshijë gjithashtu:

- a) referencën për faturën e ngarkimit ose çdo dokument tjetër tregtar;
- b) numrin, përshkrimin, shenjat dhe numrat e referencës të pakove;
- c) përshkrimin e mallrave, përfshirë detaje të mjaftueshme për të mundësuar identifikimin e tyre;
- ç) peshën bruto në kg;
- d) numrat e identifikimit të mjeteve lundruese kur është e aplikueshme;
- dh) të dhënat për të përcaktuar statusin e mallrave, si më poshtë:

- Shkronja “C” (ekuivalente me “T2L”), për mallrat të cilat statusi doganor i mallrave shqiptare mund të vërtetohet;

- Shkronja “N” për të gjitha mallrat e tjera.

3. Kur miratohet nga autoriteti doganor, manifesti i shoqërisë së transportit detar duhet përfshijë emrin dhe vulën e zyrës kompetente doganore, nënshkrimin e një zyrtari të asaj zyre dhe datën e miratimit.

Neni 275

Prova e statusit doganor të mallrave shqiptare në karnetet e TIR ose ATA ose në formularët 302 të NATO-s

(Shkronja “a”, e pikës 3, të nenit 17, të Kodit)

(Ndryshuar me VKM nr. 872, datë 30.12.2024)

Kur mallrat shqiptare transportohen në përputhje me Konventën TIR, Konventën ATA, Konventën e Stambollit ose në bazë të një formulari 302 të NATO-s, prova e statusit doganor të mallrave shqiptare mund të dorëzohet me mjete të ndryshme nga teknikat kompjuterike të përpunimit të të dhënave.

Neni 276

Prova e statusit doganor të mallrave shqiptare në Carnet TIR ose ATA apo formularin 302

(Pika 2, e nenit 142, të Kodit)

1. Në përputhje me nenin 275, mallrat shqiptare do të identifikohen në Carnet TIR apo ATA ose në formularin 302 me anë të kodit 'T2L'. Mbajtësi i regjimit, sipas rastit, mund të përfshijë një nga këto kode, shoqëruar me nënshkrimin e tij në dokumentet përkatëse në hapësirën e rezervuar për përshkrimin e mallrave para paraqitjes në zyrën doganore të nisjes për autentifikim. Kodi i përshtatshëm 'T2L' duhet të autentifikohet me vulën e zyrës doganore të nisjes, shoqëruar nga nënshkrimi i zyrtarit kompetent.

Në rast të një formulari elektronik 302, mbajtësi i regjimit mund të përfshijë edhe një nga këto kode në formularin 302 të të dhënave. Në këtë rast, autentifikimi nga zyra e nisjes, bëhet në rrugë elektronike.

2. Kur Carnet TIR, Carnet ATA ose formulari 302, mbulojnë si mallra shqiptare, ashtu dhe ato jo shqiptare, mallra të tillë do të jenë të listuara veçmas dhe kodi 'T2L', sipas rastit, do të vendoset në një mënyrë të tillë që, në mënyrë të qartë, të ketë të bëjë vetëm me mallrat shqiptare.

Neni 277

Prova e statusit doganor të mallrave shqiptare për automjetet rrugore të motorizuara

(Pika 2, e nenit 142, të Kodit)

1. Në rastin e mjeteve rrugore të motorizuara të regjistruara në Republikën e Shqipërisë, të cilat janë larguar përkohësisht dhe kanë rihyrë në territorin doganor të Republikës së Shqipërisë, statusi doganor i mallrave shqiptare do të konsiderohet i provuar kur ato janë të shoqëruara nga targa e tyre dhe dokumentet e regjistrimit, dhe kur të dhënat e regjistrimit të treguara në targë dhe në dokumente tregojnë qartë këtë regjistrim.

2. Kur statusi doganor i mallrave shqiptare nuk mund të konsiderohet i provuar në përputhje me pikën 1, prova e statusit doganor të mallrave shqiptare do të sigurohet nga një prej mjeteve të tjera të renditura në nenin 262.

Neni 278

Prova e statusit doganor të mallrave shqiptare për paketimin

(Pika 2, e nenit 142, të Kodit)

1. Në rastin e paketimit, paletat dhe pajisje të tjera të ngjashme, duke përjashtuar kontejnerët, që i përkasin një personi të vendosur në territorin doganor të Republikës së Shqipërisë, të cilat janë përdorur për transportin e mallrave që janë larguar përkohësisht dhe rihyrë në territorin doganor të Republikës së Shqipërisë statusi doganor i mallrave shqiptare konsiderohet i provuar kur paketimi, paletat dhe pajisje të tjera të ngjashme mund të identifikohen se i përkasin atij personi, janë deklaruar se kanë

statusin doganor të mallrave shqiptare dhe nuk ka dyshim te vërtetësia e deklarimit.

2. Kur statusi doganor i mallrave shqiptare nuk mund të konsiderohet i provuar në përputhje me pikën 1, prova e statusit doganor të mallrave shqiptare, do të sigurohet nga një prej mjeteve të tjera të renditura në nenin 262.

Neni 279

Prova e statusit doganor të mallrave shqiptare për mallrat në bagazhet e mbajtura nga një pasagjer

(Pika 2, e nenit 142, të Kodit)

Në rastin e mallrave të bagazheve të mbajtura nga një pasagjer, të cilat nuk janë të destinuara për përdorim tregtar dhe janë larguar përkohësisht dhe rihyrë në territorin doganor të Republikës së Shqipërisë, statusi doganor i mallrave shqiptare do të konsiderohet i provuar, kur udhëtari deklaron se ato kanë statusin doganor të mallrave shqiptare dhe nuk ka dyshime te vërtetësia e deklaratës.

Neni 280

Verifikimi i mjeteve të provës dhe ndihma administrative

(Pika 2, e nenit 142, të Kodit)

Degët doganore dhe autoritetet kompetente duhet të ndihmojnë në kontrollin e origjinalitetit dhe saktësinë e mjeteve të provës të përmendur në nenin 262 dhe në verifikimin se informacioni dhe dokumentet e dhëna në përputhje me dispozitat e këtij titulli dhe nenet 260, 261, 271, 272, 275, 281, 282, 286, 287, 288, janë të sakta dhe se procedurat e përdorura për të vërtetuar statusin doganor të mallrave shqiptare janë zbatuar në mënyrë korrekte.

Nënseksioni 5

Dispozita të veçanta në lidhje me produktet e peshkimit dhe mallrat e përftuara nga produkte të tilla

Neni 281

Statusi doganor i produkteve të peshkimit dhe mallrave të përftuara nga produkte të tilla

(Pika 2, e nenit 142, të Kodit)

Për të provuar statusin doganor të produkteve dhe mallrave të listuara në shkronjat “ç” e “d”, të pikës 1, të nenit 259, si mallra shqiptare, pranohet se këto mallra janë transportuar direkt në territorin doganor të Republikës së Shqipërisë në një nga mënyrat e mëposhtme:

a) Nga anijet e peshkimit të Republikës së Shqipërisë, të cilat kapin produktet dhe, në rastet kur është e mundur, bëjnë përpunimin e tyre;

b) Nga anijet e peshkimit të Republikës së Shqipërisë që transbordojnë produktet nga anijet e përmendura në shkronjën “a”;

c) Nga anijet-fabrikë të Republikës së Shqipërisë, të cilat përpunojnë produktet pas transbordit të tyre nga anijet e referuara në shkronjën “a”;

ç) Nga ndonjë anije tjetër, në të cilën produktet dhe mallrat janë transborduar nga anijet e përmendura në shkronjat “a”, “b” ose “c”, pa bërë ndonjë ndryshim të mëtejshëm;

d) Nga një mjet transporti që shoqërohet nga një dokument i vetëm transporti i lëshuar në një vend apo territor që nuk është pjesë e territorit doganor të Republikës së Shqipërisë, në të cilin produktet apo mallrat janë shkarkuar nga anijet e përmendura në shkronjat “a”, “b”, “c” ose “ç”.

Neni 282

Prova e statusit doganor të produkteve të peshkimit dhe mallrave të përftuara nga produkte

të tilla

(Neni 17, pikat 2 e 3, shkronja “a”, të Kodit)

1. Për të provuar statusin doganor në përputhje me nenin 281, ditari i peshkimit, deklarata e zbarkimit, deklarata e transbordit dhe të dhënat e sistemit të monitorimit të anijes, sipas rastit, siç kërkohet në përputhje me legjislacionin në fuqi, duhet të përfshijnë informacionin e mëposhtëm:

a) Vendin, ku produktet e peshkimit janë kapur, duke lejuar që të përcaktohet se produktet apo mallrat kanë statusin doganor të mallrave shqiptare në përputhje me nenin 281;

b) Produktet e peshkimit (emri dhe lloji) dhe peshën bruto të tyre (kg);

c) Llojin e mallrave të përfuara nga produktet e peshkimit të përmendura në shkronjën “b”, të përshkruara në një mënyrë të tillë që të lejojë klasifikimin e tyre sipas Nomenklaturës së Kombinuar dhe peshën e tyre bruto (kg).

2. Në rastin e transbordimit të produkteve dhe mallrave të përmendura në shkronjat “ç” dhe “d”, të pikës 1, të nenit 259, në një anije peshkimi të Republikës së Shqipërisë ose anije-fabrikë të Republikës së Shqipërisë (anije marrëse), në ditarin e peshkimit ose deklaratën e transbordit të një anijeje të tillë, nga e cila këto produkte dhe mallra janë transborduar, përfshihen, përveç informacionit të listuar në pikën 1, edhe emri, flamuri i shtetit, numri i regjistrimit dhe emir i plotë i kapitenit të anijes marrëse në të cilën janë transborduar produktet dhe mallrat.

Ditari i peshkimit ose deklarata e transbordit të anijes marrëse përfshin, përveç informacionit të listuar në shkronjat “b” dhe “c”, të pikës 1, edhe emrin, flamurin e shtetit, numrin e regjistrimit dhe emrin e plotë të kapitenit të anijes së peshkimit të Republikës së Shqipërisë ose anijes-fabrikë të Republikës së Shqipërisë nga e cila janë transborduar produktet apo mallrat.

3. Për qëllime të pikave 1 dhe 2, autoritetet doganore pranojnë të shkruar në letërditarin e peshkimit, deklaratën e zbarkimit ose të transbordimit, për anijet që kanë një gjatësi të përgjithshme të barabartë ose më shumë se 10 metra, por jo më shumë se 15 metra.

Neni 283

Prova e statusit doganor të mallrave shqiptare për produktet e peshkimit detar dhe mallrave të përfuara nga produkte të tilla

(Pika 2, e nenit 142, të Kodit)

Ku produktet dhe mallrat e përmendura në shkronjat “ç” dhe “d”, të pikës 1, të nenit 259, janë sjellë në territorin doganor të Republikës së Shqipërisë, në përputhje me nenin 281, statusi doganor i mallrave shqiptare provohet nga regjistrimi në ditarin e udhëtimit të peshkimit, deklarata e zbarkimit në tokë, deklarata e transbordit dhe monitorimit të të dhënave të sistemit të anijes, sipas rastit, siç kërkohet në përputhje me legjislacionin për peshkimin.

Megjithatë, autoritetet doganore të cilat janë përgjegjëse për portin e shkarkimit në Republikën e Shqipërisë, në të cilin ato produkte dhe mallra janë transportuar drejtpërsëdrejti nga anija shqiptare e peshkimit, e cila ka kapur produktet dhe, kur është e zbatueshme, i ka përpunuar ato, mund të marrë në konsideratë se statusi doganor i mallrave shqiptare provohet në njërin nga rastet e mëposhtme:

a) Nuk ka asnjë dyshim në lidhje me statusin e këtyre produkteve dhe/ose mallrave;

b) Anija e peshkimit ka një gjatësi të përgjithshme prej më pak se 10 metra.

Neni 284

Produktet e peshkimit detar dhe mallrat e përfuara nga produkte të tilla të transborduar dhe të transportuara përmes një vendi apo territori i cili nuk është pjesë e territorit doganor të

Republikës së Shqipërisë

(Pika 2, e nenit 142, të Kodit)

(Shtuar pika 3 me VKM nr. 872, datë 30.12.2024)

1. Kur, para mbërritjes në territorin doganor të Republikës së Shqipërisë produktet apo mallrat e përmendura në shkronjat “ç” dhe “d”, të pikës 1, të nenit 259, janë transborduar dhe transportuar përmes një vendi ose territori, që nuk është pjesë e territorit doganor të Republikës së Shqipërisë, një certifikim nga organi doganor i atij vendi që produktet apo mallrat ishin nën mbikëqyrje doganore, ndërkohë që ishin në atë vend dhe nuk kanë pësuar asnjë përpunim tjetër veç përpunimit të nevojshëm të tyre për ruajtjen, do të paraqitet për ato produkte dhe mallra në hyrjen e tyre në territorin doganor të Republikës së Shqipërisë.

2. Certifikimi për produktet dhe mallrat e transborduar dhe të transportuar përmes një vendi tjetër, do të bëhet në një kopje të ditarit të peshkimit të përmendur në nenin 288, shoqëruar, kur është rasti, nga një kopje e deklaratës së transbordimit.

3. Certifikimi i kërkuar, në përputhje me pikën 1, mund të jepet me anë të formularëve ose dokumenteve të ndryshme nga kopja e librit të anijes së peshkimit, duke përfshirë një referencë për atë libër të anijes së peshkimit.

Neni 285

Prova e statusit doganor të mallrave shqiptare për produkte të peshkimit detar dhe produkte të tjera

të marra ose të kapura nga anijet që mbajnë flamurin e një vendi tjetër në territorin doganor të Republikës së Shqipërisë
(Pika 2, e nenit 142, të Kodit)

Prova e statusit doganor të mallrave shqiptare për produkte të peshkimit detar dhe produkte të tjera të marra ose të kapura nga anijet që mbajnë flamurin e një vendi tjetër në territorin doganor të Republikës së Shqipërisë, do të sigurohet përmes ditarit të udhëtimit të peshkimit ose çdo mjeti tjetër të përmendur në nenin 262.

Neni 286

Transbordi

(Pika 3, e nenit 17, të Kodit)

1. Në rast të transbordit të produkteve dhe mallrave të përmendura në shkronjat “ç” dhe “d”, të pikës 1, të nenit 259, për anije të tjera marrëse, përveç anijeve të peshkimit të Republikës së Shqipërisë ose anijeve- fabrikë të Republikës së Shqipërisë, prova e statusit doganor të mallrave shqiptare jepet me anë të një kopjeje të deklaratës së transbordimit të anijes marrëse, e shoqëruar nga një kopje e ditarit të peshkimit, e deklaratës së transbordit dhe të dhënave të sistemit të monitorimit të anijes, sipas rastit, nga anijet e peshkimit të Republikës së Shqipërisë ose anijet-fabrikë të Republikës së Shqipërisë nga të cilat janë transborduar produktet apo mallrat.

2. Në rast se ka më shumë se një transbordim duhet të dorëzohet, gjithashtu, një kopje e të gjitha deklaratave të transbordit.

Neni 287

Prova e statusit doganor të mallrave shqiptare për produkte të peshkimit dhe produkte të tjera të marra apo të kapura nga anijet që mbajnë flamurin e një vendi të tjetër, në territorin doganor të Republikës së Shqipërisë

(Shkronja “a”, e pikës 3, të nenit 17, të Kodit)

Prova e statusit doganor të mallrave shqiptare për produktet e peshkimit dhe produkte të tjera të marra ose të kapura nga anijet që mbajnë flamurin e një vendi të tjetër, në territorin doganor të

Republikës së Shqipërisë, mund të sigurohet me anë të një kopjeje të ditarit të peshkimit.

Neni 288

Produktet dhe mallrat e transborduara dhe të transportuara nga një shtet ose territor, që nuk është pjesë e territorit doganor të Republikës së Shqipërisë (pika 2, e nenit 17, të Kodit)

(Ndryshuar me VKM nr. 872, datë 30.12.2024)

1. Kur produktet dhe mallrat e përmendura në shkronjat “ç” dhe “d”, të pikës 1, të nenit 259, transbordohen dhe transportohen nga një shtet ose territor, i cili nuk është pjesë e territorit doganor të Republikës së Shqipërisë, për qëllime të vërtetimit të statusit doganor, në përputhje me nenin 281, jepet një kopje e librit të anijes së peshkimit, të anijes shqiptare të peshkimit ose të anijes-fabrikë shqiptare, e shoqëruar nga një kopje e deklaratës së transbordimit, sipas rastit, në të cilën, përveç informacionit të renditur në pikën 1, të nenit 282, jepet edhe informacioni i mëposhtëm:

- a) Një miratim nga autoriteti doganor i atij shteti ose territori;
- b) Datat e mbërritjes dhe të nisjes së produkteve dhe mallrave nga ai shtet ose territor;
- c) Mjetet e transportit të përdorura për ridërgim në territorin doganor të Republikës së Shqipërisë;
- ç) Adresa e autoritetit doganor, të përmendur në shkronjën “a”.

Për qëllime të paraqitjes pranë autoritetit doganor të një shteti ose territori, që nuk është pjesë e territorit doganor të Republikës së Shqipërisë, nuk është e nevojshme që kopja e librit të anijes së peshkimit, të përmendur në nënparagrafin e parë, të përfshijë informacionin për vendin ku janë kapur produktet e peshkimit detar, siç përcaktohet në shkronjën “a”, të pikës 1, të nenit 282.

2. Kur formularë ose dokumente të ndryshme nga kopja e librit të anijes së peshkimit përdoren për qëllime të pikës 1, këto formularë ose dokumente, përveç informacionit të kërkuar, sipas pikës 1, përfshijnë një referencë për librin e anijes së peshkimit, e cila lejon identifikimin e udhëtimit përkatës të peshkimit.

Nënseksioni 6

Sistemi elektronik lidhur me provën e statusit doganor

Neni 289

Sistemi elektronik lidhur me provën e statusit doganor të mallrave shqiptare (Pika 1, e nenit 17, të Kodit)

Për shkëmbimin dhe ruajtjen e informacionit lidhur me provën e statusit doganor të mallrave shqiptare, parashikuar në shkronjat “b” dhe “c”, të pikës 1, të nenit 262, do të ngrihet një sistem elektronik në bazë të pikës 1, të nenit 17, të Kodit.

Paragrafi i parë i këtij neni do të zbatohet nga implementimi i sistemit të informatizuar të statusit shqiptar, të përmendur në planin e punës të miratuar nga ministri përgjegjës për financat.

Seksioni 2

Statusi i lëshuesit të autorizuar

Nënseksioni 1

Prova e statusit doganor të mallrave shqiptare e lëshuar nga një lëshues i autorizuar

Neni 290

Lehtësira për lëshimin e një prove nga një lëshues i autorizuar

(Pika 2, e nenit 142, të Kodit)

(Ndryshuar fjalë dhe togfjalësh në shkronjën “a” të pikës 4 me VKM nr. 872, datë 30.12.2024)

1. Çdo person i vendosur në territorin doganor të Republikës së Shqipërisë dhe që përmbush kriteret e përcaktuara në shkronjat “a” dhe “b”, të nenit 41, të Kodit, mund të autorizohet të lëshojë:

- a) dokumentin T2L, pa qenë e nevojshme të kërkojë miratim;
- b) manifestin doganor të mallrave, pa qenë e nevojshme të kërkojë miratimin dhe regjistrimin e provës nga zyra doganore kompetente.

2. Deri në implementimin e sistemit të informatizuar për provën e statusit doganor të mallrave sipas planit të punës së ministrit përgjegjës për financat, autoritetet doganore mund të autorizojnë çdo person të vendosur në territorin doganor të Republikës së Shqipërisë, që aplikon për të qenë i autorizuar të lëshojë statusin doganor të mallrave shqiptare me anë të një fature ose një dokumenti transporti, lidhur me statusin e mallrave, vlera ekuivalente në lekë e të cilave tejkalon 15 000 (pesëmbëdhjetë mijë) euro, një dokument ‘T2L’ ose manifesti të një shoqërie të transportit detar, të përdorë këto dokumente, pa pasur nevojë për t’i paraqitur ato për miratim në zyrën doganore kompetente.

3. Autorizimet e përmendura në pikat 1 dhe 2 lëshohen nga zyra doganore kompetente me kërkesë të personit të interesuar.

4. Autorizimi, i referuar në pikën 2, jepet vetëm kur:

a) personi i interesuar nuk ka kryer asnjë shkelje të rëndë ose të përsëritur të legjislacionit doganor, të akcizës ose tatimor.

b) autoritetet doganore janë në gjendje të mbikëqyrin procedurën dhe të kryejnë kontrolle pa një përpjekje administrative joproportionale me kërkesat e personit të interesuar;

c) personi i interesuar mban të dhëna, të cilat u mundësojnë autoriteteve doganore të kryejnë kontrolle efektive; dhe

ç) personi i interesuar lëshon rregullisht vërtetimin e statusit doganor për mallrat shqiptare apo autoritetet doganore kompetente vlerësojnë se ai mund të përmbushë detyrimet ligjore për përdorimin e këtyre provave.

5. Kur personit të interesuar i është dhënë statusi i OEA, në përputhje me nenin 40 të Kodit, kushtet e listuara sipas shkronjave “a”, deri “c”, të pikës 4 të këtij neni, konsiderohen të përmbushura.

Neni 291

Formalitetet për lëshimin e një dokumenti “T2L”, një fature ose dokumenti transporti nga një lëshues i autorizuar

(Shkronja “a”, e pikës 3, të nenit 17, të Kodit)

1. Deri në implementimin e sistemit të informatizuar për provën e statusit doganor të mallrave sipas Planit të punës së ministrit të përgjegjës për financat, lëshuesi i autorizuar duhet të bëjë një kopje të secilit dokument të lëshuar “T2L”. Autoritetet doganore duhet të specifikojnë kushtet nën të cilat do të paraqitet kopja për qëllime doganore dhe të ruhet për të paktën tre vjet.

2. Autorizimi i përmendur në pikën 2, të nenit 290, duhet të specifikojë, në mënyrë të veçantë:

a) përgjegjësinë e zyrës doganore të caktuar për të vërtetuar, paraprakisht, formularët “T2L” të përdorur për hartimin e dokumenteve në fjalë, për qëllime të nenit 292, pika 1;

b) mënyrën sipas së cilës lëshuesi i autorizuar duhet të vendosë se formularët janë përdorur siç duhet;

c) kategoritë e përjashtuara ose lëvizjet e mallrave;

ç) periudhën brenda së cilës dhe mënyrën përmes së cilës lëshuesi i autorizuar njofton zyrën doganore kompetente në mënyrë që kryhen të gjitha kontrollet përpara nisjes së mallrave.

d) pjesën e përparme të dokumenteve tregtare në fjalë ose kutinë ‘C’, “Zyra e nisjes”, në faqet e para të formularit, e përdorur për qëllimet e plotësimit të dokumenteve “T2L” dhe, sipas rastit, fletët në vazhdim:

i. e vulosur paraprakisht me vulën e zyrës doganore të referuar në shkronjën “a” të pikës 2 dhe e

nënshkruar nga një zyrtar i asaj zyre; ose

ii. e vulosur nga një lëshues i autorizuar me një vulë të veçantë. Vula mund të vendoset paraprakisht në formular, nga një person i miratuar për këtë qëllim. Kutitë 1 dhe 2 dhe 4 deri në 6 në lidhje me vulën e veçantë duhet të plotësohet me informacionin e mëposhtëm:

- stemën apo ndonjë shenjë të tjera ose letër që karakterizon vendin;
- zyrën doganore kompetente;
- datën;
- lëshuesin e autorizuar; dhe
- numrin e autorizimit.

dh) Nga momenti i dërgimit të mallrave, lëshuesi i autorizuar plotëson dhe firmos formularin. Tregon gjithashtu kutinë “D. Kontrolli i zyrës doganore të nisjes” të dokumentit “T2L”, ose në një pikë qartësisht të dukshme në dokumentin tregtar të përdorur, emrin e zyrës doganore kompetente, datën e hartimit të dokumentit dhe dërguesi i autorizuar.

Nënseksioni 2

Lehtësirat

Neni 292

Lehtësira për një lëshues të autorizuar

(Shkronja “a”, e pikës 3, të nenit 17, të Kodit)

1. Deri në implementimin e sistemit të informatizuar për provën e statusit doganor të mallrave sipas Planit të punës së ministrit përgjegjës për financat, lëshuesi i autorizuar mund të autorizohet të mos nënshkruajë dokumentin ‘T2L’ ose dokumentet tregtare të përdorura që mbajnë vulën e veçantë sipas nënndarjes “ii”, të shkronjës “ç”, të pikës 2, të nenit 291, të cilat janë hartuar nga një sistem elektronik i shkëmbimit dhe përpunimit të të dhënave. Për një autorizim të tillë lëshuesi i autorizuar i paraqet autoritetit doganor paraprakisht një marrëveshje me shkrim, ku njihet përgjegjësinë e tij për pasojat juridike që rrjedhin nga dokumenti ‘T2L’ ose dokumentet tregtare që mbajnë vulën e veçantë.

2. Dokumentet ‘T2L’ ose dokumentet tregtare të hartuara në përputhje me pikën 1 duhet të përmbajnë në vend të nënshkrimit të lëshuesit të autorizuar shënimin: - Firma hiqet.

Neni 293

Autorizimi për të plotësuar manifestin e shoqërive të transportit detar pas nisjes

(Pika 2, e nenit 142, të Kodit)

Deri në implementimin e sistemit të informatizuar për provën e statusit doganor të mallrave sipas Planit të punës së ministrit përgjegjës për financat, autoritetet doganore të Republikës së Shqipërisë mund të autorizojnë shoqëritë e transportit detar për të mos plotësuar manifestin e shoqërive të transportit detar përmendur në pikën 2, të nenit 262, që shërbejnë për të treguar statusin doganor të mallrave shqiptare, jo më vonë se një ditë pas largimit të anijes dhe, në çdo rast, para mbërritjes së saj në portin e destinacionit.

Neni 294

Kushtet për autorizimin për të plotësuar manifestin e shoqërive të transportit detar pas nisjes

(Pika 2, e nenit 142, të Kodit)

(Ndryshuar fjalia hyrëse e pikës 1 dhe fjalë e togfjalësh në shkronjën “c” të pikës 1 me VKM nr. 872, datë 30.12.2024)

1. Autorizimi i përmendur në nenin 293, jepet vetëm për kompanitë ndërkombëtare të

transportit, të cilat plotësojnë kushtet e mëposhtme:

- a) Janë vendosura në Republikën e Shqipërisë;
- b) Personi i interesuar lëshon rregullisht vërtetimin e statusit doganor për mallrat shqiptare apo autoritetet doganore kompetente vlerësojnë se ai mund të përmbushë detyrimet ligjore për përdorimin e këtyre provave;
- c) Nuk kanë kryer ndonjë shkelje të rëndë ose të përsëritur të legjislacionit doganor, të akcizës ose tatimor.
- ç) Përdorin sistemet elektronike të shkëmbimit të të dhënave për të shkëmbyer informacion midis portit të nisjes dhe destinacionit në territorin doganor të Republikës së Shqipërisë;
- d) Ndërmarrin një numër të konsiderueshëm udhëtimesh në Republikën e Shqipërisë në rrugët e njohura.

2. Autorizimi i përmendur në pikën 1 jepet vetëm kur:

- a) autoritetet doganore janë në gjendje të mbikëqyrin procedurën dhe të kryejnë kontrolle pa një përpjekje administrative joproporcionale me kërkesat e personit në fjalë; dhe
- b) personi në fjalë mban të dhënat, të cilat umundësojnë autoriteteve doganore të kryejnë kontrolle efektive.

3. Kur personi i interesuar është mbajtës i një certifikate OEA, sipas parashikimit të pikës 2, të nenit 40, të Kodit, kërkesat e parashikuara në pikat 1, shkronja “c”, dhe 2, shkronja “b”, të këtij neni, konsiderohen të përmbushura.

4. Me marrjen e kërkesës, autoritetet doganore të Republikës së Shqipërisë, aty ku shoqëria e transportit detar është vendosur njofton autoritetet doganore të porteve të nisjes dhe destinacionit sipas kërkesës.

Nëse nuk ka kundërshtim brenda 60 (gjashtëdhjetë) ditëve, nga data e njoftimit, autoritetet doganore duhet të autorizojnë përdorimin e procedurës së thjeshtuar të përshkruar në nenin 293.

Ky autorizim është i vlefshëm në Republikën e Shqipërisë dhe zbatohet vetëm për transportin midis porteve të cilave i referohet.

5. Për thjeshtimin veprohet, si më poshtë vijon:

- a) Manifesti për portin e nisjes transmetohet nga sistemi elektronik i shkëmbimit të të dhënave në portin e destinacionit;
- b) Shoqëria e transportit detar përfshin në manifest informacionin e treguar në nenin 274;
- c) Manifesti i transmetuar nëpërmjet sistemit elektronik të shkëmbimit të të dhënave (manifesti i shkëmbimit të të dhënave) paraqitet pranë autoriteteve doganore në portin e nisjes jo më vonë se ditën e punës pas ditës së nisjes së anijes dhe, në çdo rast, përpara mbërritjes në portin e destinacionit. Autoritetet doganore mund të kërkojnë të paraqitet një kopje në letër e manifestit të shkëmbimit të të dhënave, kur nuk kanë akses në një sistem informacioni të tillë, siç është miratuar nga autoritetet doganore që mbajnë këtë sistem të shkëmbimit të të dhënave të manifestit.

ç) Manifesti i paraqitur nëpërmjet sistemit elektronik të shkëmbimit të të dhënave paraqitet pranë autoriteteve doganore në portin e destinacionit. Autoritetet doganore mund të kërkojnë t’u paraqitet një kopje në letër e manifestit të paraqitur nëpërmjet sistemit të shkëmbimit të të dhënave, kur ata nuk kanë akses në një sistem informacioni të miratuar nga autoritetet doganore që përmbajnë manifestin e shkëmbimit të të dhënave.

6. Njoftimet duhet të bëhen, si më poshtë vijon:

- a) Kompanitë dhe mjeteve të lundrimit duhet të njoftojnë të gjitha shkeljet e parregullsitë tek autoritetet doganore;
- b) Autoritetet doganore në portin e destinacionit duhet të njoftojnë autoritetet doganore në portin e nisjes dhe autoritetin doganor që ka lëshuar autorizimin për të gjitha shkeljet dhe parregullsitë në rastin e parë.

Seksioni 3
Shërbimi i rregullt i transportit detar për qëllime doganore

Neni 295
Autorizimi për të lejuar shërbime të rregullta të transportit detar
(Pika 2, e nenit 144, të Kodit)

1. Drejtoria e Përgjithshme e Doganave mund të japë një autorizim për një shoqëri të transportit detar për qëllime të shërbimeve të rregullta të transportit detar, duke i dhënë të drejtën e lëvizjes të mallrave shqiptare nga një pikë në tjetrën, brenda territorit doganor të Republikës së Shqipërisë dhe përkohësisht jashtë këtij territori, pa ndryshimin e statusit doganor të tyre.

2. Autorizimi i jepet shoqërisë së transportit detar vetëm në rastet kur:

- a) është i vendosur në territorin doganor të Republikës së Shqipërisë;
- b) plotëson kriterin e përcaktuar në shkronjën “a”, të nenit 41, të Kodit;
- c) merr përsipër, t’i komunikojë Drejtorisë së Përgjithshme të Doganave informacionin që referohet në pikën 1, të nenit 296, pasi është lëshuar autorizimi; dhe
- ç) merr përsipër, të mos bëjë ndalesa në rrugët e shërbimit të rregullt të transportit detar, në asnjë port jashtë territorit doganor të Republikës së Shqipërisë apo në zonë të lirë të një porti të Republikës së Shqipërisë dhe që të mos kryejë transbordim të mallrave në det.

3. Shoqëria e transportit detar, që ka marrë një autorizim në përputhje me këtë nen, ofron shërbim të rregullt të transportit detar të përcaktuar në autorizim.

Shërbimi i rregullt i transportit detar sigurohet duke përdorur anije të regjistruara për këtë qëllim në përputhje me nenin 296.

Neni 296
Regjistrimi i anijeve dhe porteve
(Nenet 27, pika 4, dhe 144, pika 2, të Kodit)

1. Shoqëria e autorizuar për transportin detar, për të krijuar shërbime të rregullta të transportit detar për qëllime të shkronjës “b”, të pikës 2, të nenit 259, duhet të regjistrojë anijet që do të përdorë dhe portet ku do të ndalet për qëllimet e këtij shërbimi, duke i komunikuar Drejtorisë së Përgjithshme të Doganave informacionet e mëposhtme:

- a) Emrat e anijeve që do të përdorë për shërbimin e rregullt të transportit detar;
- b) Portin, ku anija fillon veprimtarinë e saj si një shërbim i rregullt i transportit detar;
- c) Portet e ndalimit.

2. Regjistrimi i përmendur në pikën hyn në fuqi në ditën e parë të punës që pason atë të regjistrimit nga Drejtoria e Përgjithshme e Doganave.

3. Shoqëria e autorizuar për të ofruar shërbime të rregullta të transportit detar për qëllime të shkronjës “b”, të pikës 2, të nenit 259, njofton Drejtorinë e Përgjithshme të Doganave për çdo ndryshim në informacionin e përcaktuar në shkronjat “a”, “b” dhe “c” të pikës 1, si dhe datën e orën kur ky ndryshim hyn në fuqi.

Neni 297
Rrethana të paparashikuara gjatë shërbimeve të rregullta të transportit detar
(Nenet 142, pika 1, dhe 144, pika 2, të Kodit)

Kur një anije e regjistruar në një shërbim të rregullt të transportit detar për qëllimet e shkronjës “b”, të pikës 2, të nenit 259, si rezultat i rrethanave të paparashikuara gjatë transportit të mallrave në det, ndalon, ngarkon apo shkarkon mallra në një port jashtë territorit doganor të Republikës së Shqipërisë,

në një port që nuk është pjesë e shërbimit të rregullt të transportit detar ose në një zonë të lirë të një porti të Republikës së Shqipërisë, atëherë statusi doganor i këtyre mallrave nuk do të ndryshohet, nëse ato ngarkohen apo shkarkohen në ato vende.

Kur autoritetet doganore kanë arsye për të dyshuar nëse mallrat i plotësojnë këto kushte, atëherë statusi doganor i këtyre mallrave duhet të provohet.

Neni 298

Konsultimi i autoriteteve doganore nga ana e shërbimit të rregullt të anijeve

(Neni 27 i Kodit)

Para dhënies së një autorizimi të përmendur në nenin 295, pasi janë shqyrtuar nëse janë plotësuar kushtet e përcaktuara në pikën 2, të nenit 295, për dhënien e autorizimit, autoriteti doganor kompetent për marrjen e vendimit do të konsultohet me autoritetet doganore që preken nga ana e shërbimit të rregullt të anijeve për qëllim të shkronjës “b”, të pikës 2, të nenit 259, si dhe autoritetet e tjera doganore, për të cilat aplikanti deklaron të ketë plane për të ardhme për shërbime të transportit të rregullt, në plotësimin e kushteve të shkronjës “b”, të pikës 2, të nenit 295.

Afati për konsultim do të jetë 15 ditë, nga data kur autoriteti doganor kompetent komunikon kushtet dhe kriteret që duhet të shqyrtohen nga autoritetet doganore të konsultuara.

Neni 299

Regjistrimi i anijeve dhe porteve

(Neni 27 i Kodit)

Informacioni i regjistrimit të anijeve dhe porteve do të jetë në dispozicion të autoriteteve doganore që preken nga ana e shërbimit të rregullt të anijeve.

Neni 300

Rrethana të paparashikuara gjatë transportit nga shërbimet e rregullta të transportit detar

(Pika 2, e nenit 144, të Kodit)

Kur një anije e regjistruar në një shërbim të rregullt të anijeve, si rezultat i rrethanave të paparashikuara, transbordon në det, ndalon ose ngarkon apo shkarkon mallra në një port jashtë territorit doganor të Republikës së Shqipërisë, në një port që nuk është pjesë e shërbimit të rregullt të anijeve, ose në një zonë të lirë të një porti të Republikës së Shqipërisë, shoqëria e lundrimit informon menjëherë për ndalesën autoritetet doganore të porteve pasuese të Republikës së Shqipërisë, përfshirë ato përgjatë rrugës së planifikuar të kësaj anijeje.

Data në të cilën anija rifillon punën e saj në shërbim të rregullt të anijeve, paraprakisht do t'i komunikohet autoriteteve doganore.

Neni 301

Verifikimi i kushteve për shërbimet e rregullta të transportit detar

(Neni 142 i Kodit)

1. Autoritetet doganore mund të kërkojnë prova nga kompania e lundrimit se janë respektuar dispozitat e parashikuara në shkronjat “c” dhe “ç” të pikës 2, dhe pika 3, e nenit 295, pikat 1 dhe 3, të nenit 296 si dhe neni 300.

2. Kur një autoritet doganor përcakton se dispozitat e përmendura në pikën 1, nuk janë respektuar nga kompania e lundrimit, autoriteti informon menjëherë autoritetet doganore të tjera që preken nga shërbimi i rregullt i anijeve.

Këto autoritete duhet të marrin masat e nevojshme.

Seksioni 4
Formularët për provën e statusit doganor

Neni 302
Formularët për provën e statusit doganor të mallrave shqiptare

1. Deri në datën e implementimit të sistemit të informatizuar për 'statusin doganor të mallrave shqiptare', autoritetet doganore mund të lejojnë përdorimin e mjeteve të tjera të ndryshme nga teknika elektronike të përpunimit të të dhënave për shkëmbimin dhe ruajtjen e informacionit në lidhje me vërtetimin e statusit doganor të mallrave shqiptare.

2. Kur përdoren mënyra të tjera të ndryshme nga teknika elektronike të përpunimit të të dhënave për të provuar statusin doganor të mallrave shqiptare, dokumenti T2L do të sigurohet duke përdorur formularin Kopje 4, Titulli III të aneksit B-01, të shtojcës A, bashkëlidhur këtij vendimi dhe pjesë përbërëse e tij.

3. Kur është e nevojshme, ky formular mund të plotësohet nga një ose më shumë fletë të vazhdueshme që i korrespondojnë kopjes 4, kapitulli IV, aneksi B-01, të shtojcës A, bashkëlidhur këtij vendimi dhe pjesë përbërëse e tij.

4. Deri në datën e implementimit të sistemit të informatizuar, autoritetet doganore mund të lejojnë përdorimin e listëngarkesave duke përdorur formularin e paraqitur në Kreun II, Kapitulli III të aneksit 72-04, të shtojcës B, bashkëlidhur këtij vendimi dhe pjesë përbërëse e tij, në vend të fletëve të vazhdueshme si pjesën përshkruese e dokumentit T2L.

5. Kur autoritetet doganore përdorin teknika elektronike të përpunimit të të dhënave për të prodhuar dokumentin T2L dhe kjo nuk lejon përdorimin e fletëve të vazhdueshme sipas formës së përcaktuar në paragrafin 2 të këtij neni, ai do të plotësohet nga një ose më shumë formularë që korrespondojnë me kopjen

4, përcaktuar në titullin III, aneksi B-01, të shtojcës A, bashkëlidhur këtij vendimi dhe pjesë përbërëse e tij.

6. Kur një lëshues i autorizuar përdor vulën e veçantë, të përmendur në nenin 291, vula duhet të miratohet nga autoritetet doganore dhe të korrespondojë me modelin e përcaktuar në kapitullin II të kreut II të aneksit 72-04, të shtojcës A, bashkëlidhur këtij vendimi dhe pjesë përbërëse e tij. Zbatohen pika 23 dhe 23.1 e këtij aneksi.

KREU 2
Vendosja e mallrave në një regjim doganor

Seksioni 1
Dispozita të përgjithshme

Neni 303
Sistemi elektronik në lidhje me vendosjen e mallrave nën një regjim doganor
(Pika 1, e nenit 17, të Kodit)

1. Për përpunimin dhe shkëmbimin e informacionit për vendosjen e mallrave në një regjim doganor, do të përdoren sistemet elektronike të ngritura në bazë të pikës 1, të nenit 17, të Kodit.

2. Pika 1, e këtij neni do të zbatohet nga data e implementimit të sistemit të informatizuar të importit, sipas planit të punës të miratuar nga ministri i përgjegjës për financat.

3. Deri në datën e implementimit të sistemit të informatizuar për Importin, sipas Planit të Punës së ministrit përgjegjës për financat, kur janë përdorur mjete të ndryshme nga teknika elektronike e

përpunimit të të dhënave për regjimet doganore të përmendura në pikën 4, deklaratat doganore mund të depozitohen duke përdorur formularët përkatës në aneksin B-01, të shtojcës A, bashkëlidhur këtij vendimi dhe pjesë përbërëse e tij.

4. Deri në datën e implementimit të kodeve dhe formateve në sistemin e informatizuar të Import/Eksportit, sipas planit të punës të ministrit të përgjegjës për financat, autoritetet doganore mund të lejojnë përdorimin e kodeve dhe formateve të përpunimit të të dhënave sipas sistemit kompjuterik doganor dhe kodeve të parashikuara në aneksin 5, të shtojcës C, bashkëlidhur këtij vendimi dhe pjesë përbërëse e tij, për paraqitjen e një deklarate doganore për vendosjen e mallrave nën një nga regjimet doganore të mëposhtme:

- a) Çlirimin në qarkullim të lirë;
- b) Magazinimin doganor;
- c) Lejimin e përkohshëm;
- ç) Përdorimin e veçantë përfundimtar (*end-use*);
- d) Përpunimin aktiv;
- dh) Eksport;
- e) Rieksport;
- ë) Transit.

Neni 304

Deklarata me gojë për vendosjen në qarkullim të lirë

(Pika 2, e nenit 146, të Kodit)

1. Deklarata doganore për vendosjen në qarkullim të lirë mund të bëhet me gojë, për mallrat e mëposhtme:

- a) Mallrat e natyrës jotregtare;
- b) Mallrat e natyrës tregtare që gjenden në bagazhin personal të udhëtarëve, me kusht që ato të mos kalojnë vlerën ekuivalente në lekë të shumës 1 000 (një mijë) euro vlerë ose 1 000 kg në peshë neto;
- c) Produktet e përftuara nga fermerët shqiptarë, produktet nga fermat e peshkimit dhe aktivitetet e gjetisë, në prona të vendosura në një vend tjetër, të cilat përfitojnë nga përjashtimi prej detyrimeve sipas neneve 432 deri 435;
- ç) Farat, plehrat dhe produktet për trajtimin e tokës dhe kulturave të importuara nga prodhuesit bujqësorë në vendet e tjera për përdorim në pronat fqinje me ato vende, të cilat përfitojnë nga përjashtimi prej detyrimeve në bazë të neneve 436 dhe 437.

2. Deklaratat doganore për vendosjen në qarkullim të lirë mund të bëhen me gojë për mallrat e përmendura në pikën 1, të nenit 305, me kusht që mallrat të përfitojnë përjashtim nga detyrimi i importit si mallra të kthyera.

Neni 305

Deklarata me gojë për lejim të përkohshëm dhe rieksport

(Pika 2, e nenit 146, të Kodit)

(Ndryshuar shkronja "a" dhe "g" e pikës 1 me VKM nr. 872, datë 30.12.2024)

1. Deklarata doganore për lejim të përkohshëm mund të bëhet me gojë për mallrat e mëposhtme:
- a) Paletat, kontejnerët dhe mjetet e transportit, si dhe pjesët e këmbimit, aksesoret dhe pajisjet për këto paleta, kontejnerë dhe mjete transporti, siç përmenden në nenet 653 deri në 661.
 - b) Sendet personale dhe mallrat për qëllime sportive të referuara në nenin 664;
 - c) Materialet ndihmëse që përdoren nga detarët në bordin e një anijeje të trafikut detar ndërkombëtar të referuar në shkronjën "a" të nenit 665;

- c) Pajisjet mjekësore, kirurgjikale dhe laboratorike të referuara në nenin 667;
 - d) Kafshët e referuara në nenin 668, me kusht që ato të jenë të destinuara për kullotje, për punë apo transport;
 - dh) Pajisjet e referuara në shkronjën “a”, të nenit 669;
 - e) Instrumentet dhe aparatet e nevojshme për një mjek për t’i ofruar ndihmë pacientit në pritje për transplant organesh në përputhje me kushtet e parashikuara në pilën 1, të nenit 671;
 - ë) Materialet ndihmëse në raste fatkeqësish të përdorura në lidhje me masat e marra për përballimin e pasojave të fatkeqësive apo situatave të ngjashme që prekin territorin doganor të Republikës së Shqipërisë;
 - f) Instrumentet portative muzikore të importuara përkohësisht nga udhëtarët dhe të destinuara për t’u përdorur si pajisje profesionale;
 - g) Paketimet/ambalazhet, që importohen të mbushura ose bosh dhe janë të destinuara për rieksporim, qofshin të mbushura apo të zbrazëta, që mbajnë shenja të përhershme, që nuk hiqen e që identifikojnë një person të vendosur brenda ose jashtë territorit doganor të Republikës së Shqipërisë.
 - gj) Materialet për realizimin e prodhimeve radiofonike e televizive, pajisjet e transmetimit si dhe automjetet e përshtatura posaçërisht për përdorim për qëllime të prodhimit dhe transmetimit radioteleviziv dhe pajisjeve të tyre, të importuara nga organizatat publike ose private, të vendosura jashtë territorit doganor të Republikës së Shqipërisë dhe të miratuara nga autoritetet doganore që lëshojnë autorizimin për lejimin e përkohshëm të pajisjeve e të mjeteve të tilla;
 - h) Mallra të tjera, kur autorizohet nga autoritetet doganore.
2. Deklarata e rieksporit mund të bëhet me gojë kur mbyllet regjimi i lejimit të përkohshëm për mallrat e përmendura në pikën 1.

Neni 306

Deklarata me gojë për eksport

(Pika 2, e nenit 146, të Kodit)

1. Deklarata doganore për eksport mund të bëhet me gojë për mallrat e mëposhtme:
- a) Mallrat e natyrës jotregtare;
 - b) Mallrat e natyrës tregtare me kusht që ato të mos kalojnë vlerën ekuivalente në lekë të shumës 1 000 (një mijë) euro në vlerë ose 1 000 kg në peshë neto;
 - c) Mjetet e transportit të regjistruara në territorin doganor të Republikës së Shqipërisë dhe të destinuara për riimport dhe pjesët e këmbimit, aksesoret dhe pajisjet për mjetet e transportit;
 - ç) Kafshët shtëpiake të eksportuara në kohën e transferimit të aktiviteteve bujqësore nga Republika e Shqipërisë në një vend tjetër, të cilat përfitojnë nga përjashtimi prej detyrimit doganor në bazë të pikës 1, të nenit 425;
 - d) Produktet e përftuara nga prodhuesit bujqësorë në pronat që gjenden në Republikën e Shqipërisë, të cilat përfitojnë nga përjashtimi prej detyrimit doganor në bazë të neneve 432-434;
 - dh) Fara të eksportuara nga prodhuesit bujqësorë për përdorim në prona që ndodhen në vende të tjera, të cilat përfitojnë nga përjashtimi prej detyrimit doganor në bazë të neneve 436 dhe 437;
 - e) Foragjeret dhe lëndët ushqyese që shoqërojnë kafshët gjatë eksportimit të tyre dhe që përfitojnë nga përjashtimi prej detyrimit doganor në bazë të nenit të 510.
2. Deklarata doganore për eksport mund të bëhet me gojë për mallrat e referuara në pikën 1, të nenit 305, kur këto mallra janë të destinuara për riimport.

Neni 307

Lëshimi i faturës për deklaratat me gojë

(Pika 2, e nenit 146, të Kodit)

Kur deklarata doganore bëhet me gojë në përputhje me nenet 304 ose 306, për mallrat që i nënshtrohen detyrimit të importit ose eksportit ose pagesave të tjera, autoritetet doganore do të lëshojnë një faturë për personin e interesuar kundrejt pagesës të shumës për ato detyrime ose pagesave të tjera. Fatura duhet të përfshijë, të paktën, informacionin e mëposhtëm:

- a) Një përshkrim të saktë të mallrave për të mundësuar identifikimin e tyre;
- b) Vlerën e faturës ose, kur kjo nuk është në dispozicion, sasinë e mallrave;
- c) Shumën e detyrimit dhe pagesave të tjera të mbledhura;
- ç) Datën në të cilën ajo është lëshuar;
- d) Zyrën doganore që e ka lëshuar atë.

Neni 308

Mallra që konsiderohen si të deklaruar për çlirim në qarkullim të lirë, në përputhje me nenin 311

(Pika 2, e nenit 146, të Kodit)

(Ndryshuar shkronja "c" dhe shtuar shkronjat "e" dhe "ë" në pikën 1 me VKM nr. 872, datë 30.12.2024)

1. Në rast se nuk janë deklaruar me mjete të tjera, mallrat e mëposhtme konsiderohen se janë deklaruar për çlirim në qarkullim të lirë në përputhje me nenin 311:

- a) mallrat e natyrës jotregtare që ndodhen në bagazhet personale të udhëtarëve, të cilat përfitojnë nga përjashtimi prej detyrimit të importit sipas nenit 438, ose si mallra të rikthyera;
- b) mallrat e referuara në shkronjat "c" dhe "ç", të pikës 1, të nenit 304;
- c) mallrat e përmendura në shkronjat "a" dhe "g", të nenit 305, që përfitojnë nga përjashtimi nga detyrimet e importit, si mallra të kthyera në përputhje me nenin 185 të Kodit.
- ç) instrumentet portative muzikore të riimportuara nga udhëtarët dhe që përfitojnë nga përjashtimi prej detyrimit të importit si mallra të rikthyera në përputhje me nenin 185 të Kodit;
- d) artikujt e korrespondencës;
- dh) mallrat në një dërgesë postare, të cilat përfitojnë nga përjashtimi prej detyrimit të importit në përputhje me nenet 420 deri 424, të Këshillit të Ministrave.
- e) organe dhe inde të tjera njerëzore ose shtazore ose gjak njeriu, i përshtatshëm për transplantim, implantim ose transfuzion, në rast emergjencash.”;
- ë) mallra të mbuluara nga një formular 302 i NATO-s, të cilat përfitojnë nga përjashtimi i detyrimeve të importit, si mallra të kthyera, në përputhje me nenin 185 të Kodit.

2. Deri në implementimin e sistemit të informatizuar të importit sipas Planit të punës të ministrit përgjegjës për financat, do të zbatohen të dhënat, si më poshtë vijon:

- a) Sipas përcaktimit të shkronjës "dh", të pikës 1, vetëm kur mallrat në fjalë përfitojnë nga çlirimi nga detyrimet e tjera; dhe
- b) Mallra, vlera e të cilave nuk i kalon 22 euro konsiderohen të deklaruar për çlirim për qarkullim të lirë, në përputhje me nenin 311.

Neni 309

Mallrat që konsiderohen të deklaruar për lejim të përkohshëm, transit, riekспорт, në përputhje me nenin 311

(pika 2, e nenit 146, të Kodit)

(Ndryshuar me VKM nr. 872, datë 30.12.2024)

1. Kur nuk deklarohen me anë të mjeteve të tjera, mallrat e përmendura në shkronjat "a" deri në "ç", "ë", "P" dhe "g", të pikës 1, të nenit 305, konsiderohen të deklaruar për lejim të përkohshëm,

në përputhje me nenin 311.

2. Kur nuk deklarohen me anë të mjeteve të tjera, mallrat e përmendura në shkronjat “a” deri në “ç”, “ë”, “f” dhe “g”, të pikës 1, të nenit 305, konsiderohen të deklaruar për rieksporim, në përputhje me nenin 311, duke mbyllur procedurën e lejimit të përkohshëm.

3. Kur nuk deklarohen me anë të mjeteve të tjera, mallrat e mbuluara nga një formular 302 i NATO-s konsiderohen të deklaruar për lejim të përkohshëm, në përputhje me nenin 311.

4. Kur nuk deklarohen me anë të mjeteve të tjera, mallrat e mbuluara nga një formular 302 i NATO-s konsiderohen të deklaruar për rieksporim, në përputhje me nenin 311.

Neni 310

Mallra që konsiderohen të deklaruar për eksport, në përputhje me nenin 311

(Pika 2, e nenit 146, të Kodit)

(Shtuar shkronjat “c”, “ç”, “d” dhe “dh” me VKM nr. 872, datë 30.12.2024)

Kur nuk deklarohen me mjete të tjera, mallrat e mëposhtme konsiderohen se janë deklaruar për eksport, në përputhje me nenin 311:

- a) Mallrat e referuara në nenin 306;
- b) Instrumentet muzikore portative të udhëtarëve;
- c) artikuj të korrespondencës;
- ç) mallra në një dërgesë postare ose të shpejtë, vlera e të cilave nuk kalon vlerën ekuivalente në lekë të shumës 1000 euro dhe të cilat nuk përjashtohen nga detyrimet e eksportit;
- d) organe dhe inde të tjera njerëzore ose shtazore ose gjak i njeriut, i përshtatshëm për transplantim, implantim ose transfuzion, në rast emergjencash;
- dh) mallra të mbuluara nga një formular 302 i NATO-s.

Neni 311

Veprimet që konsiderohen si deklaratë doganore ose deklaratë riekporti

(Pika 2, e nenit 146, të Kodit)

(Ndryshuar fjalia hyrëse e pikës 1, shtuar shkronja “ç” e pikës 1, pika 4/1 dhe pika 6 me VKM nr. 872, datë 30.12.2024)

1. Në lidhje me mallrat e përmendura në nenin 308, shkronja “a” deri në “ç” dhe “ë”, në nenin 309, dhe pikën 1, të nenit 310, veprimet e mëposhtme konsiderohen si deklaratë doganore ose deklaratë riekporti;

a) Kalimi nëpër korsinë e gjelbër ose “asgjë për të deklaruar” në një zyrë doganore, ku sistemi i dy korsive është në funksionim;

b) Kalimi nëpër një zyrë doganore, ku nuk funksionon sistemi me dy korsitë;

c) Vendosja e një etikete ngjyeshme “asgjë për të deklaruar” në xhamin e përparmë të automjeteve të udhëtarëve, kur kjo mundësi parashikohet me udhëzim të drejtorit të Përgjithshëm të Doganave.

ç) kalimi i kufirit të territorit doganor të Republikës së Shqipërisë, në cilëndo nga situatat e mëposhtme, kur:

i. një përjashtim nga detyrimi për të transportuar mallrat në vendin e duhur zbatohet në përputhje me rregullat e veçanta, të përmendura në pikën 3, të nenit 126, të Kodit;

ii. mallrat konsiderohen të deklaruar për rieksporim, në përputhje me pikën 2, të nenit 130, të Kodit;

iii. ku mallrat konsiderohen të deklaruar për eksport, në përputhje me pikën 1, të nenit 131, të Kodit;

iv. mallrat e përmendura në shkronjat “a” dhe “g”, të pikës 1, të nenit 305, konsiderohen të deklaruar për lejim të përkohshëm, në përputhje me pikën 1, të nenit 309;

v. mallrat e përmendura në shkronjat “a” dhe “g”, të nenit 305, janë në përputhje me kushtet e përcaktuara në nenin 185, të Kodit, sillen në territorin doganor të Republikës së Shqipërisë në përputhje me shkronjën “c”, të nenit 308.

2. Artikujt e korrespondencës konsiderohen të deklaruar për çlirim në qarkullim të lirë me hyrjen e tyre në territorin doganor të Republikës së Shqipërisë.

Artikujt e korrespondencës konsiderohen të deklaruar për eksport ose riekспорт me daljen e tyre nga territori doganor i Republikës së Shqipërisë.

3. Mallrat në një dërgesë postare, të cilat përfitojnë nga përjashtimi prej detyrimit të importit në përputhje me nenet 420 deri 424, konsiderohen të deklaruar për hedhje në qarkullim të lirë me paraqitjen e tyre në doganë në përputhje me nenin 130 të Kodit, me kusht që të dhënat e kërkuara të jenë pranuar nga autoritetet doganore.

4. Mallrat në një dërgesë postare që nuk kalojnë vlerën ekuivalente në lekë të shumës 1 000 (një mijë) euro, të cilat nuk kanë detyrim eksporti, konsiderohen të deklaruar për eksport me daljen e tyre nga territori doganor i Republikës së Shqipërisë.

4/1. Mallrat në një dërgesë të shpejtë, vlera e të cilave nuk kalon vlerën ekuivalente në lekë të shumës 1000 (një mijë) euro dhe të cilat nuk janë të detyruara të paguajnë detyrimet e eksportit, konsiderohen të deklaruar për eksport nga paraqitja e tyre në zyrën doganore të daljes, me kusht që të dhënat në dokumentin e transportit dhe/ose në faturë të jenë në dispozicion dhe të pranohen nga autoritetet doganore.

5. Deri në implementimin e sistemit të informatizuar të importit sipas Planit të punës së ministrit përgjegjës për financat, mallrat, vlera e të cilave nuk kalon 22 euro konsiderohen të deklaruar për çlirim për qarkullim të lirë me paraqitjen e tyre në doganë, në përputhje me nenin 130, të Kodit, me kusht që të dhënat e kërkuara të jenë pranuar nga autoritetet doganore.

6. Mallrat që do të transportohen ose përdoren në kuadër të aktiviteteve ushtarake, në bazë të formularit 302 të NATO-s, konsiderohen të deklaruar për vendosje në qarkullim të lirë, lejim të përkohshëm, eksportim ose riekспортim nga paraqitja e tyre në doganë, sipas nenit 130 ose 239, pika 2, të Kodit, respektivisht, me kusht që të dhënat e paraqitura në formularin 302 të NATO-s të pranohen dhe të jenë në dispozicion të autoriteteve doganore.

Ky formular mund të depozitohet me mjete të ndryshme nga teknikat kompjuterike të përpunimit të të dhënave.

Neni 312

Formalitetet doganore që konsiderohet se janë kryer përmes një veprimi të përmendur në pikat 1, 2, 4, 4/1, 5 dhe 6, të nenit 311

(Nenet 17, pika 3, shkronja “a” dhe 146, pika 2, të Kodit)

(Ndryshuar togfjalësh në titull dhe në fjalinë e parë me VKM nr. 872, datë 30.12.2024)

Për qëllimet e neneve 308, 309 dhe 310, formalitetet e mëposhtme doganore do të konsiderohen se janë kryer përmes një veprimi të përmendur në pikat 1, 2, 4, 4/1, 5 dhe 6, të nenit 311:

a) Transporti i mallrave, në përputhje me nenin 126, të Kodit dhe paraqitjen e mallrave në doganë në përputhje me nenin 130, të Kodit;

b) Paraqitja e mallrave në doganë në përputhje me nenin 239, të Kodit;

c) Pranimi i deklarës doganore nga autoritetet doganore në përputhje me nenin 157, të Kodit;

ç) Çlirimi i mallrave nga autoritetet doganore, në përputhje me nenin 175, të Kodit.

Neni 313

Mallra të cilat nuk mund të deklarohen me gojë ose në përputhje me nenin 311

(Pika 2, e nenit 146, të Kodit)

(Ndryshuar shkronjat “b”, “c”, “ç” me VKM nr. 872, datë 30.12.2024)

Nenet 304 deri në 310 nuk zbatohen për:

a) mallrat për të cilat janë kryer formalitetet me qëllim marrjen e rimbursimeve ose përparësive financiare në eksport në bazë të politikave bujqësore;

b) mallrat për të cilat është bërë një aplikim për shlyerjen e detyrimit ose tarifave të tjera, me përjashtim të rasteve kur një aplikim i tillë lidhet me shfuqizimin e deklaratës doganore për vendosje në qarkullim të lirë të mallrave, të cilat janë objekt i përjashtimit të detyrimeve të importit, në përputhje me pikën 1, të nenit 420, ose me pikën 1, të nenit 422;

c) mallrat, të cilat janë objekt i ndalimeve dhe kufizimeve, me përjashtim të mallrave të transportuara ose të përdorura në bazë të një formulari 302 të NATO-s;

ç) mallrave, të cilat janë objekt i çdo formaliteti tjetër të veçantë të parashikuar në legjislacionin shqiptar, të cilin duhet ta zbatojnë autoritetet doganore, me përjashtim të mallrave të transportuara ose të përdorura në bazë të formularit 302 të NATO-s.

Neni 314

Rastet kur një deklaratë doganore nuk konsiderohet të jetë paraqitur në përputhje me nenin 311

(Nenet 17, pika 3, shkronja “a” dhe 146, pika 2, të Kodit)

Kur një kontroll tregon se është kryer një veprim në përputhje me nenin 311, por mallrat që hyjnë apo dalin, nuk janë mallrat e përmendura në nenet 308, 309 dhe 310, deklarata doganore për këto mallra do të konsiderohet se nuk është paraqitur.

Neni 315

Deklarata doganore në letër

(Pika 2, e nenit 146, të Kodit)

Udhëtarët mund të paraqesin një deklaratë doganore në letër në lidhje me mallrat që po transportojnë.

Neni 316

Deklarata doganore për mallrat në dërgesat postare

(Pika 2, e nenit 17, të Kodit)

1. Një operator postar mund të paraqesë një deklaratë doganore për çlirim në qarkullim të lirë që përmban një grup të reduktuar të dhënash të përmendura në aneksin B, të shtojcës A bashkëlidhur këtij vendimi dhe pjesë përbërëse e tij, në lidhje me mallrat në një dërgesë postare, kur ato përmbushin të gjitha kushtet e mëposhtme:

a) Vlera e tyre nuk kalon vlerën ekuivalente në lekë të shumës 1 000 (një mijë) euro;

b) Nuk është bërë ndonjë aplikim për rimbursim ose falje në lidhje me to;

c) Nuk janë objekt i ndalimeve dhe kufizimeve.

2. Deri në implementimin e sistemit të informatizuar të importit, të nevojshëm për dorëzimin e paraqitjes së njoftimeve, sipas Planit të ministrit përgjegjës për financat, deklarata doganore për çlirim në qarkullim të lirë, të cilës i referohet pika 1, konsiderohet e paraqitur dhe e pranuar me aktin e paraqitjes së saj në doganë, nëse mallrat janë të shoqëruara nga një deklaratë CN22 ose CN23 ose nga të dyja së bashku.

3. Në rastet e përmendura në paragrafin e parë, të pikës 2, të nenit 311, dhe në pikën 3, të këtij neni, marrës konsiderohet të jetë deklaruesi dhe, sipas rastit, si debitor. Në rastet e përmendura në paragrafin e dytë, të pikës 2, të nenit 311, dhe në pikën 4, të këtij neni, dërguesi konsiderohet të jetë deklaruesi dhe, sipas rastit, si debitor. Autoritetet doganore mund të sigurojnë që operatorët postarë të

konsiderohen deklarues dhe, sipas rastit, si debitor.

Neni 317

Artikujt e korrespondencës dhe mallrat në dërgesat postare

(Nenet 157 dhe 169, të Kodit)

(Ndryshuar titulli me VKM nr. 872, datë 30.12.2024)

1. Deklarata doganore për mallrat e përmendura në pikat 2, 3, 4, të nenit 311, do të konsiderohet se është pranuar dhe mallrat janë çliruar, si më poshtë:

a) Kur deklarimi doganor ka të bëjë me çlirimin për qarkullim të lirë, kur mallrat i janë dorëzuar pritësit;

b) Kur deklarata doganore ka të bëjë me eksportin dhe riekportin, kur mallrat janë nxjerrë jashtë territorit doganor të Republikës së Shqipërisë.

2. Kur deklarata doganore ka të bëjë me çlirimin për qarkullim të lirë dhe nuk ka qenë e mundur t'i dorëzohet pritësit të mallrave të përmendur në pikat 2 dhe 3, të nenit 311, deklarata doganore do të konsiderohet se nuk është paraqitur.

Mallrat, të cilat nuk i janë dorëzuar pritësit do të konsiderohen se janë në magazinim të përkohshëm deri sa të shkatërrohen, riekportohen ose të sistemohen ndryshe, në përputhje me nenin 179, të Kodit.

Neni 317/1

Rregullat procedurale që zbatohen për përdorimin e formularit 302 të NATO-s për regjime doganore të ndryshme nga transiti

(pika 3, e nenit 17, dhe pika 2, e nenit 146, të Kodit)

(Shtuar me VKM nr. 872, datë 30.12.2024)

1. Zyra doganore e caktuar, ku fillon aktiviteti ushtarak në territorin doganor të Republikës së Shqipërisë, furnizon forcat e NATO-s të stacionuara në territorin e saj, me formularët 302 të NATO-s të cilët:

a) janë paraprakisht me vulën dhe nënshkrimin e një zyrtari të kësaj zyre;

b) kanë një numër serial;

c) mbajnë adresën e plotë të zyrës doganore të caktuar për kopjen e kthimit të formularit 302 të NATO-s.

2. Në kohën e dërgimit të mallrave, forcat e NATO-s kryejnë një nga veprimet e mëposhtme:

a) Depozitojnë të dhënat e formularit 302 të NATO-s në mënyrë elektronike në zyrën doganore të caktuar;

b) Plotësojnë formularin 302 të NATO-s me një deklaratë që tregon se mallrat po transportohen nën kontrollin e tyre dhe e autorizojnë këtë deklaratë me nënshkrimin e tyre, vulën dhe datën.

3. Kur forcat e NATO-s vijnë në përputhje me shkronjën “b”, të pikës 2, ato, pa vonesë, i dorëzojnë një kopje të formularit 302 të NATO-s zyrës doganore të caktuar si përgjegjëse për formalitetet dhe kontrollet doganore që kanë të bëjnë me forcat e NATO-s që dërgojnë mallrat ose në emër të të cilave po dërgohen mallrat.

Kopjet e tjera të formularit 302 të NATO-s, shoqërojnë dërgesën në doganën e destinacionit të forcave të NATO-s, të cilat duhet t'i vulosin dhe t'i nënshkruajnë ato pas mbërritjes së mallrave.

Në kohën e mbërritjes së mallrave, dy kopje të formularit i jepen zyrës doganore, të caktuar si përgjegjëse për formalitetet dhe kontrollet doganore që kanë të bëjnë me doganën e destinacionit të forcave të NATO-s.

Kjo zyrë doganore mban një kopje dhe ia kthen kopjen tjetër zyrës doganore përgjegjëse për formalitetet dhe kontrollet doganore që kanë të bëjnë me forcat e NATO-s që dërgojnë mallrat ose

në emër të të cilave po dërgohen mallrat.

Neni 318

Zyra doganore kompetente për vendosjen e mallrave nën një regjim doganor

(Neni 147, i Kodit)

(Shtuar pika 4 me VKM nr. 872, datë 30.12.2024)

1. Për qëllimet të heqjes së detyrimit për të paraqitur mallrat në përputhje me pikën 3, të nenit 165, të Kodit, zyra doganore mbikëqyrëse e përmendur në shkronjën “c”, të pikës 3, të nenit 165, të Kodit do të jetë zyra kompetente doganore për vendosjen e mallrave nën një regjim doganor të përmendur në pikën 3, të nenit 147, të Kodit.

2. Zyrat e mëposhtme doganore janë kompetente për vendosjen e mallrave nën regjimin e eksportit:

- a) Zyra doganore kompetente për vendin ku është vendosur eksportuesi;
- b) Zyra doganore kompetente për vendin ku mallrat janë paketuar ose ngarkuar për eksport;
- c) Një zyrë doganore tjetër, e cila është kompetente për arsye administrative për procedurat në fjalë. Kur mallrat nuk kalojnë vlerën ekuivalente në lekë të 3 000 eurove për dërgesë dhe për deklarues dhe nuk janë objekt i ndalimeve ose kufizimeve, përveç zyrave doganore të identifikuar në pikën 1, zyra doganore kompetente për vendin e daljes së mallrave nga territori doganor i Republikës së Shqipërisë, do të jetë kompetente për vendosjen e mallrave nën regjimin e eksportit.

Në rastet kur është i përfshirë nën-kontraktuesi, përveç zyrave doganore të identifikuar në pikat 1, dhe 2, zyra doganore kompetente për vendin ku nënkontraktori është vendosur, do të jetë kompetente për vendosjen e mallrave nën regjimin e eksportit.

Kur justifikohet nga rrethanat e një rasti individual, një tjetër zyrë doganore e vendosur më mirë për paraqitjen e mallrave në doganë, do të jetë kompetente për vendosjen e mallrave nën regjimin e eksportit.

3. Deklaratat doganore me gojë për eksportin dhe riekportin duhet të bëhen në zyrën doganore kompetente për vendin e daljes së mallrave.

4. Autoriteti doganor me udhëzim përcakton zyrën ose zyrat doganore përgjegjëse për formalitetet dhe kontrollet doganore në lidhje me mallra që do të transportohen nga ose në emër të forcave të NATO-s, që kanë të drejtë të përdorin formularin 302 të NATOS-s.

Neni 319

Artikujt

(Neni 149, i Kodit)

1. Kur deklarata doganore mbulon dy ose më shumë artikuj, të dhënat e paraqitura në këtë deklaratë në lidhje me çdo artikull do të konsiderohen se përbëjnë një deklaratë të ndarë doganore.

2. Përveç rasteve kur mallrat e veçanta, të përfshira në një ngarkesë, janë objekt i masave të ndryshme, mallrat e përfshira në një dërgesë do të konsiderohen se përbëjnë një artikull të vetëm për qëllimet e pikës 1, kur plotësohet secili nga kushtet e mëposhtme:

- a) Ato klasifikohen në një nënkre të vetëm tarifor;
- b) Janë objekt i një aplikimi për thjeshtim, në përputhje me nenin 161, të Kodit.

Seksioni 2

Deklarata doganore të thjeshtuara

Neni 320

Formularët për deklarime doganore të thjeshtuara

Deri në datat e përmirësimit të sistemit të informatizuar sipas planit të punës së ministrit përgjegjës për financat, kur një deklaratë doganore e thjeshtuar, siç përmendet në nenin 152, të Kodit, është paraqitur duke përdorur mjete të ndryshme nga teknika elektronike e përpunimit të të dhënave për një regjim doganor të referuar në pikën 4, të nenit 303, kjo do të bëhet duke përdorur formularët që përmbajnë, të paktën, të dhënat për një deklaram të thjeshtuar (paplote), të përcaktuar në aneksin B, të shtojcës A, bashkëlidhur këtij vendimi dhe pjesë përbërëse e tij.

Neni 321

Kushtet për autorizimin e përdorimit të vazhdueshëm të deklaratave doganore të thjeshtuara

(Pika 2, e nenit 152, të Kodit)

1. Autorizimi për t'i vendosur rregullisht mallrat nën një regjim doganor në bazë të deklaratës të thjeshtuar, në përputhje me pikën 2, të nenit 152, të Kodit, jepet nëse plotësohen kushtet e mëposhtme:

- a) Aplikuesi është në përputhje me kriterin e parashikuar në shkronjën “a”, të nenit 41, të Kodit;
- b) Aplikuesi, kur është e zbatueshme, disponon procedura të përshtatshme për trajtimin e licencave dhe autorizimeve të dhëna në përputhje me masat e politikës tregtare ose në lidhje me tregtinë e produkteve bujqësore;
- c) Aplikuesi siguron që punonjësit e tij janë udhëzuar të informojnë autoritetet doganore sa herë që hasin vështirësi në zbatimin e legjislacionit doganor dhe përcakton procedura për informimin e autoriteteve doganore për vështirësi të tilla;
- ç) Aplikuesi, kur është e zbatueshme, disponon procedura të përshtatshme për trajtimin e licencave/lejeve të importit dhe eksportit lidhur me ndalimet dhe kufizimet, duke përfshirë masat për të dalluar mallrat që i nënshtrohen ndalimeve ose kufizimeve nga mallrat e tjera dhe për të siguruar zbatimin e legjislacionit në fuqi lidhur me këto ndalime dhe kufizime.

2. OEAD konsiderohet se i plotëson kushtet e përmendura në shkronjat “b”, “c” dhe “ç”, të pikës 1, për sa kohë që të dhënat për këta operatorë janë në përputhje me qëllimet e vendosjes së mallrave nën një regjim doganor në bazë të deklaratës së thjeshtuar.

Neni 322

Menaxhimi i kuotës tarifore në deklaratat e thjeshtuara doganore

(Neni 152 i Kodit)

1. Kur një deklaratë e thjeshtuar është paraqitur për çlirim për qarkullim të lirë të mallrave, subjekt i një kuote tarifore të menaxhuar në përputhje me rendin kronologjik të datave të pranimit të deklaratave doganore, deklaruesi mund të kërkojë dhënien e kuotës tarifore vetëm kur të dhënat e domosdoshme janë në dispozicion ose në deklaratën e thjeshtuar ose në një deklaratë plotësuese.

2. Kur aplikimi për dhënien e një kuote tarifore të menaxhuar në përputhje me rendin kronologjik të datave të pranimit të deklaratave doganore është bërë në një deklaratë plotësuese, aplikimi nuk mund të përpunohet deri kur deklarata plotësuese të jetë depozituar.

3. Për qëllime të ndarjes së kuotës tarifore, duhet të merret parasysh data e pranimit të deklaratës të thjeshtuar.

Neni 323

Dokumentet shoqëruese për deklaratat e thjeshtuara

(Neni 152 i Kodit)

Kur mallrat janë vendosur nën një regjim doganor në bazë të deklaratës së thjeshtuar, dokumentet shoqëruese të përmendura në pikën 2, të nenit 150, të Kodit i jepen autoriteteve doganore para çlirimit

të mallrave.

Neni 324
Deklarata plotësuese
(Pika 1, e nenit 153, të Kodit)

1. Kur autoritetet doganore duhet të kontabilizojnë shumën e detyrimit të importit ose të eksportit për t'u paguar në përputhje me paragrafin e parë, të pikës 1, të nenit 99, të Kodit, deklarata plotësuese e referuar në paragrafin e parë, të pikës 1, të nenit 153, të Kodit, duhet të paraqitet brenda 10 (dhjetë) ditëve nga data e çlirimit të mallrave.

2. Kur kontabilizimi kryhet në përputhje me paragrafin e dytë, të pikës 1, të nenit 99, të Kodit, dhe deklarata plotësuese është e një natyre të përgjithshme, periodike apo përmbledhëse, periudha kohore e mbuluar nga deklarata plotësuese nuk duhet të kalojë një muaj kalendarik.

3. Afati për depozitimin e deklarates plotësuese të referuar në pikën 2 është maksimumi 10 ditë nga përfundimi i afatit të mbuluar prej deklarates plotësuese.

4. Deri në implementimin e sistemeve elektronike të eksportit dhe të importit, sipas planit të punës së ministrit përgjegjës për financat dhe pa rënë ndesh me pikën 1, të nenit 99, të Kodit, autoritetet doganore mund të lejojnë afate kohore të tjera përveç atyre të përcaktuara në pikat 1 dhe 3, të këtij neni.

Neni 325
Afati brenda të cilit deklaruesi duhet të ketë në posedim dokumentet mbështetëse në rastin e deklaratave plotësuese
(Pika 1, e nenit 153, të Kodit)

(Ndryshuar togfjalësh në pikën 1, shfuqizuar pikat 2 dhe 3 me VKM nr. 872, datë 30.12.2024)

1. Dokumentet mbështetëse, që mungonin në momentin e depozitimit të deklarates së thjeshtuar, duhet të jenë në posedim të deklaruesit brenda afatit për depozitimin e deklarates plotësuese, në përputhje me pikat 1, 3 ose 4 të nenit 324.

2. Shfuqizuar.

3. Shfuqizuar.

Neni 326
Deklarata plotësuese në rastin e hyrjes në regjistrimet e deklaruesit
(Pika 4, e nenit 153, të Kodit)

Në rastin e hyrjes në regjistrimet e deklaruesit sipas nenit 165, të Kodit, kur deklarata plotësuese është e një natyre të përgjithshme, periodike apo përmbledhëse dhe operatori ekonomik është i autorizuar sipas vetëvlerësimit për të llogaritur shumën e detyrimit të importit dhe eksportit për t'u paguar, mbajtësi i autorizimit duhet të depozitojë një deklarata plotësuese apo autoritetet doganore mund të lejojnë që deklarata plotësuese të vihet në dispozicion përmes aksesit të drejtpërdrejtë elektronik në sistemin e mbajtësit të autorizimit.

Seksioni 3
Dispozita të zbatueshme për të gjitha deklaratat doganore

Neni 327
Numri Kryesor i Lëvizjes (MRN)
(Neni 157 i Kodit)

Me përjashtim të rasteve kur deklarata doganore është paraqitur me gojë ose me anë të një veprimi, që konsiderohet të jetë një deklarata doganore, apo kur deklarata doganore merr formën e një hyrjeje në regjistrimet e deklaruesit në përputhje me nenin 165, të Kodit, autoritetet doganore do të njoftojnë

deklaruesin për pranimin e deklaratës doganore dhe do ta pajisin atë me një MRN për atë deklaratë dhe datën e pranimin të saj.

Ky nen nuk do të zbatohet deri në implementimin dhe përmirësimin e sistemit të informatizuar kombëtar të importit të përmendur në planin e punës të miratuar nga ministri përgjegjës për financat.

Neni 328

Deklarata doganore e depozituar para paraqitjes së mallrave

1. Kur deklarata doganore është depozituar në përputhje me nenin 156, të Kodit, autoritetet doganore përputhojnë të dhënat e ofruara para paraqitjes së mallrave, në veçanti për qëllime të analizës së riskut.

2. Deri në datën e implementimit të sistemit të informatizuar për Eksportin/Importin, sipas planit të punës së ministrit përgjegjës për financat, kur një deklaratë doganore është depozituar përpara paraqitjes së mallrave sipas nenit 156 të Kodit, autoritetet doganore mund të lejojnë përdorimin e mjeteve të ndryshme nga teknika elektronike të përpunimit të të dhënave, për depozitimin e njoftimit të paraqitjes.

Neni 329

Anulimi i një deklarate doganore pas çlirimit të mallrave

(Pika 2, e nenit 159, të Kodit)

(Hequr togfjalësh në shkronjën "b" të pikës 4, shtuar shkronja "dh" e pikës 4 me VKM nr. 872, datë 30.12.2024)

1. Kur vërtetohet se mallrat janë deklaruar gabimisht për një regjim doganor sipas të cilit lind një borxh doganor në import, në vend që të deklarohen për një regjim tjetër doganor, atëherë deklarata doganore anulohet pasi mallrat të jenë çliruar, përmes një aplikimi të arsyetuar nga deklaruesi, në qoftë se përmbushen kushtet e mëposhtme:

- a) Aplikimi bëhet brenda 90 ditëve, nga data e pranimin të deklaratës;
- b) Mallrat nuk janë përdorur në një mënyrë që nuk përputhet me regjimin doganor nën të cilin ato do të ishin deklaruar po të mos kishte ndodhur gabimi;
- c) Në kohën e deklarimit të gabuar janë përmbushur kushtet për vendosjen e mallrave nën regjimin doganor nën të cilin ato do të ishin deklaruar po të mos kishte ndodhur gabimi;
- ç) Është depozituar një deklaratë doganore për regjimin doganor nën të cilin mallrat do të ishin deklaruar po të mos kishte ndodhur gabimi.

2. Kur vërtetohet se mallrat janë deklaruar gabimisht në vend të mallrave të tjera, për një regjim doganor nën të cilin lind një borxh doganor në import, atëherë deklarata doganore anulohet edhe pasi të jenë çliruar mallrat, me aplikim të arsyetuar nga deklaruesi, në qoftë se plotësohen kushtet e mëposhtme:

- a) Aplikimi bëhet brenda 90 ditëve, nga data e pranimin të deklaratës;
- b) Mallrat e deklaruar gabimisht nuk janë përdorur në mënyra të tjera, përveç atyre të autorizuar në gjendjen e tyre fillestare dhe janë kthyer në gjendjen e tyre fillestare;
- c) E njëjta zyrë doganore është kompetente në lidhje me mallrat e deklaruar në mënyrë të gabuar dhe mallrat që deklaruesi ka për qëllim të deklarojë;
- ç) Mallrat deklarohen për të njëjtin regjim doganor si ato të deklaruar gabimisht.

3. Kur mallrat, të cilat janë shitur me një kontratë në distancë/largësi, sipas përcaktimit të nenit 32, të ligjit "Për mbrojtjen e konsumatorit", janë çliruar në qarkullim të lirë dhe janë kthyer, atëherë deklarata doganore anulohet pasi të jenë çliruar mallrat me aplikim të arsyetuar nga deklaruesi, në qoftë se

plotësohen kushtet e mëposhtme:

- a) Aplikimi bëhet brenda 90 ditëve nga data e pranimi të deklaratës doganore;
 - b) Mallrat janë eksportuar me qëllim kthimin e tyre në adresën e furnizuesit fillestar ose në një tjetër adresë të treguar nga ai furnizues.
4. Përveç rasteve të referuara në pikat 1, 2 dhe 3, deklaratat doganore anulohen edhe pasi mallrat të jenë çliruar me aplikim të arsyetuar nga deklaruesi, në ndonjë nga rastet e mëposhtme:
- a) Kur mallrat janë çliruar për eksport, riekспорт ose përpunim pasiv dhe nuk janë larguar nga territori doganor i Republikës së Shqipërisë;
 - b) Kur mallrat shqiptare janë deklaruar gabimisht në regjimin doganor të zbatueshëm për mallrat joshqiptare dhe statusi doganor i tyre si mallra shqiptare është provuar më pas;
 - c) Kur mallrat janë deklaruar gabimisht në më shumë se një deklaratë doganore;
 - ç) Kur një autorizim me efekt prapaveprues është dhënë në përputhje me pikën 2, të nenit 192, të Kodit;
 - d) Kur mallrat shqiptare janë vendosur nën regjimin e magazinimit doganor në përputhje me pikën 2, të nenit 210, të Kodit, dhe nuk mund të vendosen më nën atë regjim në përputhje me këtë nen të Kodit.
 - dh) Kur mallrat janë çliruar në qarkullim të lirë dhe provat që i janë dhënë autoritetit doganor provojnë që mallrat nuk janë përdorur ose konsumuar në territorin doganor të Republikës së Shqipërisë, me kusht që:
 - i. aplikimi bëhet brenda 1 (një) viti nga data e pranimi të deklaratës doganore;
 - ii. mallrat u janë dhënë pa pagesë organizatave bamirëse ose filantropike, që kryejnë aktivitetet e tyre në territorin doganor të Republikës së Shqipërisë dhe në momentin që deklarata doganore, e përmendur në nënndarjen “iii” është pranuar, mallrat do të ishin të pranueshme për t’u përjashtuar nga detyrimet e importit nëse ato do të çliroheshin në qarkullim të lirë;
 - iii. një deklaratë doganore për çlirim në qarkullim të lirë, me përjashtim të plotë nga detyrimet e importit për mallrat në fjalë është paraqitur nga ose në emër të atyre organizatave bamirëse ose filantropike, brenda afatit kohor të vendosur në nënndarjen “i”.
5. Deklarata doganore lidhur me mallrat që i nënshtrohen detyrimit të eksportit, aplikimit për rimbursim të detyrimit të importit për rimbursimet ose shumat e tjera të eksportit ose masave të tjera të posaçme për eksport mund të anulohet në përputhje me shkronjën “a”, të pikës 4, në qoftë se plotësohen kushtet e mëposhtme:
- a) Deklaruesi i dorëzon zyrës doganore të eksportit ose, në rastin e përpunimit pasiv, zyrës doganore të vënies nën regjim, provën se mallrat nuk janë larguar nga territori doganor i Republikës së Shqipërisë;
 - b) Kur deklarata doganore është në letër, deklaruesi kthen në zyrën doganore të eksportit ose, në rastin e përpunimit pasiv, në zyrën doganore të vënies nën regjim, të gjitha kopjet e deklaratës doganore, së bashku me të gjitha dokumentet e tjera të lëshuara për të pas pranimi të deklaratës;
 - c) Deklaruesi i dorëzon zyrës doganore të eksportit provën se janë ripaguar të gjitha rimbursimet dhe shumat e tjera ose përfitimet financiare të parashikuara në eksport për mallrat në fjalë ose që nga autoritetet kompetente janë marrë masat e nevojshme për t’u siguruar që ato nuk janë paguar;
 - ç) Deklaruesi pajtohet me të gjitha detyrimet e tjera për sa u përket mallrave me të cilat ai është i lidhur;
 - d) Janë anuluar të gjitha rregullimet e bëra në një licencë/leje eksporti të paraqitur në mbështetje të deklaratës doganore.

Seksioni 4

Thjeshtësime të tjera

Nënseksioni 1

Mallrat që bien në nënkrerë të ndryshëm tariforë

Neni 330

Mallrat që klasifikohen në nënkrerë të ndryshëm tariforë të deklaruar në një nënkre të vetëm
(Pika 1, e nenit 161, të Kodit)

1. Për qëllimet e nenit 161, të Kodit, kur mallrat në një ngarkesë klasifikohen në nënkrerë tariforë, objekt i një detyrimi doganor specifik, që i referohet të njëjtës njësi mase, detyrimi doganor që do të zbatohet mbi të gjithë ngarkesën do të bazohet në nënkreun tarifor me nivelin tarifor më të lartë të detyrimit doganor specifik.

2. Për qëllimet e nenit 161, të Kodit, kur mallrat në një ngarkesë klasifikohen në nënkrerë tariforë, objekt i një detyrimi doganor specifik që i referohet njërive të ndryshme të masës, detyrimi doganor specifik më i lartë për çdo njësi të masës, do të zbatohet për të gjithë mallrat e ngarkesës për të cilat detyrimi specifik shprehet duke iu referuar kësaj njësie dhe do të konvertohet në një detyrim *ad valorem* për secilin lloj të këtyre mallrave.

Detyrimi që do të zbatohet mbi të gjithë ngarkesën do të bazohet në nënkreun tarifor objekt i një niveli më të lartë të detyrimit doganor *ad valorem*, që rezulton nga konvertimi në përputhje me pikën 1.

3. Për qëllimet e nenit 161, të Kodit, kur mallrat në një ngarkesë që klasifikohen në nënkrerë tariforë që i nënshtrohen një detyrimi doganor *ad valorem* dhe një detyrimi doganor specifik, detyrimi specifik më i lartë i përcaktuar në përputhje me pikat 1 ose 2, do të konvertohet në një detyrim *ad valorem*, për secilin lloj të mallrave për të cilat detyrimi specifik shprehet duke iu referuar së njëjtës njësi.

Detyrimi që do të zbatohet mbi të gjithë ngarkesën do të bazohet në nënkreun tarifor, objekt i nivelit më të lartë të detyrimit doganor *ad valorem*, duke përfshirë detyrimin *ad valorem*, që rezulton nga konvertimi në përputhje me pikën 1.

Neni 331

Kushtet për dhënien e autorizimit për zhdoganim të centralizuar

(Pika 1, e nenit 163, të Kodit)

1. Aplikimi për autorizim të zhdoganimit të centralizuar, në përputhje me nenin 163 të Kodit, duhet t'i përkasë njërit prej regjimeve të mëposhtme:

- a) Çlirimit në qarkullim të lirë;
- b) Magazinimit doganor;
- c) Lejimit të përkohshëm;
- ç) Përdorimit të veçantë përfundimtar (*end-use*);
- d) Përpunimit aktiv; dh) Përpunimit pasiv; e) Eksportit;
- ë) Rieksportit.

2. Kur deklarata doganore është në formën e një hyrjeje në regjistrimet e deklaruesit, zhdoganimi i centralizuar mund të autorizohet sipas kushteve të parashikuara në nenin 336.

Nënseksioni 2

Zhdoganimi i centralizuar

Neni 332

Procedura e konsultimit mes autoriteteve doganore në rastin e autorizimeve për zhdoganimin e centralizuar

(Neni 27 i Kodit)

(Ndryshuar togfjalësh në pikën 1 me VKM nr. 872, datë 30.12.2024)

1. Procedura e konsultimit referuar në nenin 31, do të ndiqet kur DPD merr një aplikim për një autorizim për zhdoganimin e centralizuar të përmendur në nenin 163, të Kodit, që përfshin më shumë se një zyrë doganore, përveç nëse DPD gjykon se kushtet për dhënien e një autorizimi të tillë nuk

janë përmbushur.

2. Brenda 45 ditësh pas datës së pranimit të aplikimit, DPD do t'i komunikojë zyrave doganore të përfshira, sa më poshtë:

a) Aplikimin dhe draftautorizimin, duke përfshirë afatet kohore të përmendura në pikat 5 dhe 6, të nenit 334;

b) Kur është e përshtatshme, një plan kontrolli për kryerjen e kontrolleve të veçanta që do të kryhen nga zyrat doganore të përfshira, sapo të jetë dhënë një autorizim;

c) Çdo informacion tjetër, që konsiderohet i nevojshëm nga autoritetet doganore të përfshira.

3. Autoritetet doganore të konsultuara do ta komunikojnë miratimin ose kundërshtimet e tyre, si dhe çdo ndryshim në draftautorizimin ose në planin e kontrollit të propozuar, brenda 45 ditëve nga data në të cilën u është komunikuar draftautorizimi. Kundërshtimet duhet të justifikohen në mënyrë të arsyetuar.

Kur kundërshtimet janë komunikuar dhe nuk arrihet mirëkuptimi brenda 90 ditëve nga data në të cilën është komunikuar draftautorizimi, autorizimi nuk do të jepet për pjesët mbi të cilat janë ngritur kundërshtime. Kur autoritetet doganore të konsultuara nuk komunikojnë kundërshtime brenda afatit të caktuar, miratimi i tyre do të konsiderohet si i dhënë.

4. Deri në implementimin e sistemit të informatizuar të referuar në planin e punës të miratuar nga ministri përgjegjës për financat, me përjashtim të pikës 2 dhe paragrafit të parë të pikës 3, të këtij neni, periudhat e referuara mund të zgjaten me 15 ditë nga autoritetet doganore kompetente për marrjen e këtij vendimi.

Me përjashtim të paragrafit të dytë të pikës 3 të këtij neni, periudha e përmendur në to mund të shtyhet me 30 ditë nga autoritetet doganore kompetente për marrjen e këtij vendimi.

5. Deri në implementimin e sistemit të informatizuar të vendimeve të përmendur në planin e punës të miratuar nga ministri përgjegjës për financat, me përjashtim të shkronjës “b”, të pikës 2, të këtij neni, do të komunikohet plani i kontrollit i përmendur aty.

Neni 333

Monitorimi i autorizimit

(Pika 5, e nenit 28, të Kodit)

1. Zyrat doganore duhet të informojnë pa vonesë DPD, mbi çdo faktor që lind pas dhënies së autorizimit për zhdoganimin e centralizuar, i cili mund të ndikojë në vazhdimësinë apo përmbajtjen.

2. DPD, do të vërë të gjithë informacionin përkatës në dispozicion të zyrave doganore në lidhje me aktivitetet doganore të kryera nga operatori ekonomik, që përfiton nga zhdoganimi i centralizuar sipas autorizimit.

Neni 334

Formalitetet doganore dhe kontrollet në lidhje me zhdoganimin e centralizuar

(Pika 4, e nenit 163, të Kodit)

1. Mbajtësi i autorizimit për zhdoganimin e centralizuar duhet të paraqesë mallrat në zyrën doganore kompetente, siç është përcaktuar në këtë autorizim, duke depozituar në zyrën doganore mbikëqyrëse, një nga këto dokumente:

a) Një deklaratë standarde doganore, siç përmendet në nenin 149, të Kodit;

b) Një deklaratë e thjeshtuar doganore, siç përmendet në nenin 152, të Kodit;

c) Një njoftim paraqitje të përmendur në shkronjën “a”, të pikës 1, të nenit 338.

2. Kur deklarata doganore merr formën e një hyrjeje në regjistrimet e deklaruesit, do të zbatohen nenet 338, 339 dhe 340.

3. Përjashtimi nga detyrimi për paraqitjen e mallrave në përputhje me pikën 3, të nenit 165, të Kodit,

do të aplikohet për zhdoganimin e centralizuar, me kusht që mbajtësi i autorizimit për të paraqitur një deklaratë doganore në formën e një hyrjeje në regjistrimet e deklaruesit, ka përmbushur detyrimin e përcaktuar në shkronjën “dh”, të pikës 1, të nenit 338.

4. Kur zyra doganore mbikëqyrëse ka pranuar deklaratën doganore ose ka marrë njoftimin e përmendur në shkronjën “c”, të pikës 1, do të:

- a) kryejë kontrollet e duhura për verifikimin e deklaratës doganore ose njoftimin e paraqitjes;
- b) transmetojë menjëherë në zyrën doganore të paraqitjes së deklaratës doganore apo njoftimit edhe rezultatet e analizës së riskut që lidhen me të;
- c) informojë zyrën doganore të paraqitjes për secilën, sa më poshtë:
 - i) Që mallrat mund të vendosen për regjimin doganor në fjalë;
 - ii) Që kontrollet doganore janë të nevojshme në përputhje me shkronjën “c”, të pikës 3, të nenit 163, të kodit.

5. Kur zyra doganore mbikëqyrëse informon zyrën doganore të paraqitjes se mallrat mund të vendosen nën regjimin doganor në fjalë, zyra doganore e paraqitjes, brenda afatit kohor të përcaktuar në autorizim për zhdoganimin e centralizuar, informon zyrën mbikëqyrëse doganore nëse kontrollet e veta mbi mallrat, duke përfshirë kontrollet lidhur me ndalimet dhe kufizimet kombëtare, ndikojnë në një vendosje të tillë.

6. Kur zyra doganore mbikëqyrëse informon zyrën doganore të paraqitjes se kontrollet doganore janë të nevojshme në përputhje me shkronjën “c”, të pikës 3, të nenit 163, të Kodit, zyra doganore e paraqitjes, brenda afatit kohor të përcaktuar në autorizimin për zhdoganimin e centralizuar, konfirmon marrjen e kërkesës së zyrës doganore mbikëqyrëse për të kryer kontrollet e nevojshme dhe, sipas rastit, informon zyrën doganore mbikëqyrëse për kontrollet e veta mbi mallrat, duke përfshirë kontrollet lidhur me ndalimet dhe kufizimet.

7. Zyra doganore mbikëqyrëse duhet të informojë zyrën doganore të paraqitjes për çlirimin e mallrave.

8. Në eksport, zyra doganore mbikëqyrëse duhet, pas çlirimit të mallrave, të shënojë të dhënat e deklaratës së eksportit, të plotësuara sipas rastit, në përputhje me nenin 699, në dispozicion të zyrës doganore të daljes. Zyra doganore e daljes informon zyrën doganore mbikëqyrëse për daljen e mallrave në përputhje me nenin 704. Zyra doganore mbikëqyrëse vërteton daljen e mallrave deklaruesit në përputhje me nenin 705.

9. Duke anashkaluar pikën 1, të këtij neni, deri në implementimin e sistemit të informatizuar të referuar në planin e punës të miratuar nga ministri përgjegjës për financat, për mallrat e mbuluara nga një autorizim për zhdoganimin e centralizuar, mbajtësi i autorizimit ose deklaruesi duhet:

- a) të paraqesë mallrat në vendet e përcaktuara në autorizim dhe të paracaktuara ose të miratuara nga autoritetet doganore, në përputhje me nenin 130, të Kodit, përveç kur detyrimi për paraqitjen e mallrave është hequr në përputhje me pikën 3, të nenit 165, të Kodit; dhe
- b) të paraqesë një deklaratë doganore ose të regjistrojë mallrat në regjistrat e tij, në zyrën doganore të përcaktuar në autorizim.

10. Deri në implementimin e sistemit të informatizuar të referuar në planin e punës të miratuar nga ministri përgjegjës për financat, autoritetet doganore kompetente duhet të zbatojnë planin e kontrollit, i cili përcakton një nivel minimal të kontroleve.

11. Duke anashkaluar pikat 5 dhe 6, të këtij neni, deri në implementimin e sistemit të informatizuar të referuar në planin e punës të miratuar nga ministri i përgjegjës për financat, zyrat doganore ku mallrat janë paraqitur, mund të kryejnë kontrole të tjera nga ato të përcaktuara në planin e kontrollit, me kërkesën e zyrës doganore mbikëqyrëse apo me nismën e tyre, duke komunikuar rezultatet në zyrën mbikëqyrëse.

Neni 335

Zhdoganimi i centralizuar që përfshin më shumë se një autoritet doganor
(Neni 163 i Kodit)

1. Zyra doganore mbikëqyrëse do ti transmetojë zyrës doganore të paraqitjes:
 - a) çdo ndryshim apo anulim të deklaratës standarde doganore që ka ndodhur pas çlirimit të mallrave;
 - b) kur një deklaratë plotësuese është paraqitur, atë deklaratë dhe çdo ndryshim apo anulim të saj.
2. Kur autoritetet doganore kanë akses në deklaratat plotësuese në sistemin elektronik të operatorëve në përputhje me nenin 326, zyra doganore mbikëqyrëse transmeton të dhënat, jo më vonë se 10 ditë nga përfundimi i afatit të përcaktuar nga deklarata plotësuese dhe, çdo ndryshim apo anulim të asaj deklarate plotësuese të dhënë nga sistemi.

Nënseksioni 3
Hyrja në regjistrimet e deklaruesit

Neni 336
Kushtet për dhënien e autorizimit për hyrje në regjistrimet e deklaruesit
(Pika 1, e nenit 165, të Kodit)

1. Autorizimi për të depozituar një deklaratë doganore në formën e një hyrjeje në regjistrimet e deklaruesit jepet kur aplikuesi tregon se i plotëson kriteret e përcaktuara në shkronjat “a”, “b” dhe “ç”, të nenit 41, të Kodit.
2. Në mënyrë që autorizimi për të depozituar një deklaratë doganore në formën e një hyrjeje në regjistrimet e deklaruesit të jepet në përputhje me pikën 1, të nenit 165, të Kodit, aplikimi duhet t'i përkasë njërit prej regjimeve të mëposhtme:
 - a) Çlirimit në qarkullim të lirë;
 - b) Magazinimit doganor;
 - c) Lejimit të përkohshëm;
 - ç) Përdorimit të veçantë përfundimtar (*end-use*);
 - d) Përpunimit aktiv;
 - dh) Përpunimit pasiv;
 - e) Eksportit dhe rieksporit.
3. Kur aplikimi për autorizim i përket çlirimit në qarkullim të lirë, autorizimi nuk mund të jepet për:
 - a) çlirim të njëkohshëm për qarkullim të lirë dhe hedhje për konsum të mallrave, të cilat janë të përjashtuara nga TVSH në përputhje me ligjin nr.92/2014, “Për tatimin mbi vlerën e shtuar në Republikën e Shqipërisë”, të ndryshuar, dhe, kur është e zbatueshme, me pezullim nga detyrimi i akcizës në përputhje me nenin 30, të ligjit nr.61/2014, “Për akcizat në Republikën e Shqipërisë”, të ndryshuar;
 - b) riimport me njëkohësisht çlirim për qarkullim të lirë dhe hedhje për konsum të mallrave, të cilat janë të përjashtuara nga TVSH, në përputhje me ligjin nr.92/2014, “Për tatimin mbi vlerën e shtuar në Republikën e Shqipërisë”, të ndryshuar, dhe kur është e zbatueshme, me pezullim nga detyrimi i akcizës në përputhje me nenin 30, të ligjit nr.61/2014, “Për akcizat në Republikën e Shqipërisë”, të ndryshuar;
4. Kur aplikimi për autorizim ka të bëjë me eksportin dhe rieksportin, autorizimi jepet vetëm kur plotësohen të dy kushtet e mëposhtme:
 - a) Është hequr dorë nga detyrimi për të paraqitur një deklaratë para nisjes në përputhje me pikën 2, të nenit 236, të Kodit;
 - b) Zyra doganore e eksportit është dhe zyrë doganore e daljes ose zyra doganore e eksportit dhe

zyra doganore e daljes kanë të përcaktuara procedura që sigurojnë mbikëqyrjen doganore të mallrave në dalje.

5. Kur aplikimi për autorizim ka të bëjë me eksportin dhe riekспортin, eksporti i mallrave të akcizës nuk lejohet.

6. Autorizimi për hyrje në regjistrimet e deklaruesit nuk jepet kur aplikimi ka të bëjë me një regjim për të cilin nevojitet një shkëmbim standard informacioni mes autoriteteve doganore, në përputhje me nenin 552, përveç rasteve kur autoritetet doganore bien dakord që të përdoren mjete të tjera të shkëmbimit elektronik të informacionit.

Neni 337

Plani i kontrollit

(Pika 5, e nenit 28, të Kodit)

1. Autoritetet doganore do të përcaktojnë një plan specifik kontrolli të operatorit ekonomik, kur jepet një autorizim për të paraqitur (depozituar) një deklaratë doganore në formën e një hyrjeje në regjistrimet e deklaruesit në përputhje me pikën 1, të nenit 165, të Kodit, duke siguruar mbikëqyrjen e procedurave doganore që kryhen në bazë të autorizimit, që përcakton frekuencën e kontrolleve doganore dhe duke siguruar, ndër të tjera, se kontrollet doganore efektive mund të kryhen në të gjitha fazat e procedurës së hyrjes në regjistrimet e deklaruesit.

2. Sipas rastit, plani i kontrollit duhet të marrë parasysh periudhën e parashkrimit për njoftimin e borxhit doganor të përmendur në pikën 1, të nenit 97, të Kodit.

3. Plani i kontrollit do të sigurojë që kontrolli të kryhet në rast se është dhënë përjashtimi për mos paraqitjen e mallrave në përputhje me pikën 3, të nenit 165, të Kodit.

4. Në rast të zhdoganimit të centralizuar, plani i kontrollit që përcakton ndarjen e detyrave ndërmjet zyrës doganore mbikëqyrëse dhe zyrës doganore të paraqitjes, duhet të marrë parasysh ndalimet dhe kufizimet e zbatueshme në vendin ku ndodhet zyra doganore e paraqitjes.

Neni 338

Detyrimet e mbajtësit të autorizimit për të paraqitur një deklaratë doganore në formën e një hyrjeje

në regjistrimet e deklaruesit

(Pika 1, e nenit 165, të Kodit)

(Shtuar pika 3 me VKM nr. 872, datë 30.12.2024)

1. Mbajtësi i autorizimit për të paraqitur një deklaratë doganore në formën e një hyrjeje në regjistrimet e deklaruesit duhet:

a) përveç rastit, kur zbatohet pika 3, e nenit 165, të Kodit, t'i paraqesë mallrat në doganë dhe të shënojë datën e njoftimit të paraqitjes në regjistra;

b) të shënojë në regjistra, së paku të dhënat e një deklarate doganore të thjeshtuar dhe dokumentet e mundshme mbështetëse;

c) me kërkesë të zyrës doganore mbikëqyrëse, të vërë në dispozicion të dhënat e deklaratës doganore të shënuar në regjistra dhe çdo dokument të mundshëm mbështetës, përveç rastit kur autoritetet doganore lejojnë që deklaruesi të ketë një akses të kompjuterizuar të drejtpërdrejtë në këtë informacion në regjistrat e veta;

ç) të vërë në dispozicion të zyrës mbikëqyrëse doganore informacionin për mallrat, të cilat i nënshtrohen ndalimeve dhe kufizimeve;

d) të pajisë zyrën doganore mbikëqyrëse me dokumente mbështetëse, siç përmendet në pikën 2, të nenit 150, të Kodit, para se mallrat e deklaruarat të mund të çlirohen;

dh) kur zbatohet përjashtimi i përmendur në pikën 3, të nenit 165, të Kodit, të sigurojë që mbajtësi i autorizimit për funksionimin e ambienteve të magazinimit të përkohshëm ka informacionin e nevojshëm për të provuar përfundimin e magazinimit të përkohshëm;

e) përveç kur detyrimi për të paraqitur një deklaratë plotësuese është hequr në përputhje me pikën 2, të nenit 153, të Kodit, të paraqesë deklaratën plotësuese për zyrën doganore mbikëqyrëse në mënyrën dhe brenda afatit kohor të përcaktuar në autorizim.

2. Autorizimi për të paraqitur një deklaratë doganore në formën e një hyrjeje në regjistrimet e deklaruesit nuk zbatohet për deklaratat e mëposhtme:

a) Deklaratat doganore, të cilat përbëjnë një aplikim për një autorizim për një regjim të posaçëm në përputhje me nenin 142, të vendimit “Për miratimin e rregullave të detajuara të disa dispozitave të ligjit nr. 102/2014, datë 31.7.2014, “Kodi Doganor i Republikës së Shqipërisë”, të Këshillit të Ministrave;

b) Deklaratat doganore të paraqitura në vend të deklaratës përmbledhëse të hyrjes në përputhje me pikën 1, të nenit 122, të Kodit.

3. Në rastet kur zyra doganore mbikëqyrëse kërkon, në përputhje me nënparagrafin e tretë, të pikës 3, të nenit 165, të Kodit, që mallrat të paraqiten në doganë, pasi autoritetet doganore kanë identifikuar një rrezik të ri financiar ose një situatë specifike në lidhje me një autorizim për të depozituar një deklaratë doganore në formë të një hyrjeje në regjistrimet e deklaruesit, që përjashton detyrimin e paraqitjes së mallrave, zyra doganore mbikëqyrëse i paraqet mbajtësit të këtij autorizimi:

a) periudhën specifike, gjatë së cilës duhen paraqitur në doganë mallrat e mbuluara nga këto situata;

b) detyrimin për të shënuar datën e njoftimit të paraqitjes në regjistra;

c) detyrimin për të zbatuar shkronjën “b” deri në shkronjat “e” dhe “g”, të pikës 1.

Në këto situata, çlirimi i mallrave kryhet në përputhje me nenin 175, të Kodit.

Neni 339

Çlirimi i mallrave kur deklarata doganore është paraqitur në formën e një hyrjeje në regjistrimet e deklaruesit

(Neni 165 i Kodit)

1. Kur autorizimi për të paraqitur një deklaratë doganore në formën e një hyrjeje në regjistrimet e deklaruesit, përcakton një afat kohor për të informuar mbajtësin e këtij autorizimi për çdo kontroll që do të kryhet, mallrat do të konsiderohen se janë çliruar në momentin e përfundimit të këtij afati, përveç rasteve kur zyra doganore mbikëqyrëse ka njoftuar brenda atij afati kohor qëllimin e saj për të kryer një kontroll.

2. Kur autorizimi nuk përcakton një afat kohor, siç referohet në pikën 1, zyra doganore mbikëqyrëse do të çlirojë mallrat në përputhje me nenin 175, të Kodit.

Neni 340

Kuota tarifore

(Neni 165 i Kodit)

1. Kur deklarata doganore është paraqitur në formën e një hyrjeje në regjistrimet e deklaruesit për çlirim për qarkullim të lirë të mallrave që i nënshtrohen një kuote tarifore të menaxhuar në përputhje me rendin kronologjik të datave të pranimit të deklaratave doganore, mbajtësi i autorizimit që do të paraqesë një deklaratë doganore në atë formë, do të kërkojë dhënien e kuotës tarifore në një deklaratë plotësuese.

2. Kur kërkesa për dhënien e një kuote tarifore të menaxhuar në përputhje me rendin kronologjik të datave të pranimit të deklaratave doganore është bërë në një deklaratë plotësuese, kërkesa mund të

përpunohet vetëm pas depozitimit të asaj deklarate. Megjithatë, data në të cilën mallrat janë regjistruar në regjistrimet e deklaruesit, do të merret parasysh për qëllime të shpërndarjes së kuotave tarifore.

3. Me përjashtim nga pika 1, e këtij neni, deri në implementimin e sistemit të informatizuar kombëtar të deklarave të importit, të përmendur në planin e punës të miratuar, nga ministri përgjegjës për financat, mundet që kërkesa për të përfituar nga një kuotë tarifore e menaxhuar në përputhje me nenet 92 deri 95, bëhet në një formë të ndryshme nga ajo e përmendur në pikën 1, të këtij neni, me kusht që të gjitha të dhënat e nevojshme të jenë në dispozicion për të gjykuar mbi vlefshmërinë e kërkesës.

Nënseksioni 4

Zhdoganimi në ambientet e operatorit ekonomik (zhdoganimi lokal)

Neni 341

Të përgjithshme

1. Në zbatim të neneve 6 (33), 130, 165 të Kodit, nenit 250, deri në funksionimin e sistemit të informatizuar për hyrjen në regjistrimet e deklaruesit do të zbatohen nenet e parashikuara në këtë nënseksion për zhdoganimin në ambientet e operatorit ekonomik (zhdoganimi lokal).

2. Për qëllime të këtij nënseksioni, me “zhdoganim lokal” do të kuptohet kryerja e formaliteteve doganore për vendosjen e mallrave nën regjimin doganor vijues në ambientet e operatorit ekonomik, apo në vende të tjera të caktuara ose të miratuara nga Drejtoria e Përgjithshme e Doganave, sipas përcaktimeve në këtë nënseksion.

3. Çdo person mund të aplikojë për marrjen e një autorizimi për “zhdoganim lokal” për përdorim vetjak ose për përdorim si një përfaqësues, me kusht që të përmbushen kushtet dhe kriteret e përcaktuara në këtë nënseksion, dhe t'i mundësojë autoritetit doganor të identifikojë personat e përfaqësuar dhe të kryejë kontrollet e duhura doganore.

4. Përdorimi i “zhdoganimit lokal” kushtëzohet nga garantimi i detyrimeve të importit, eksportit dhe pagesat e tjera, sipas njërës prej formave të garancisë, të parashikuara në Kod.

5. Mbajtësi i autorizimit përmbush kushtet dhe kriteret e përcaktuara në këtë nënseksion dhe detyrimet që përcaktohen nga autorizimi, pa cenuar detyrimet e deklaruesit dhe rregullat për lindjen e një borxhi doganor.

6. Përdorimi i “zhdoganimit lokal” kushtëzohet me përdorimin e sistemeve kompjuterike të përpunimit të të dhënave për paraqitjen e deklarimeve dhe njoftimeve doganore elektronike, duke zbatuar dispozitat përkatëse lidhur me këto teknika apo sisteme.

7. Megjithatë, në rastet kur sistemet e kompjuterizuara të autoriteteve doganore apo operatorëve ekonomikë nuk funksionojnë, autoritetet doganore mund të pranojnë forma të tjera deklarimesh apo njoftimesh, siç përcaktohet nga këto autoritete, me kusht që të kryhen analiza efektive risku.

8. Përdorimi i procedurës së “zhdoganimit lokal” kushtëzohet nga përfitimi i autorizimit për magazinim të përkohshëm.

Neni 342

Aplikimi dhe kriteret

1. Aplikimet për autorizimin e procedurës së “zhdoganimit lokal” paraqiten pranë DPD duke përdorur modelin e aplikimit të përcaktuar në aneksin 6, të shtojcës C bashkëlidhur këtij vendimi dhe pjesë përbërëse e tij, bashkëlidhur këtij vendimi dhe pjesë përbërëse e tij, në letër ose formatin elektronik që i korrespondon.

2. Kur DPD përcakton që aplikimi nuk përmban të gjitha hollësitat e kërkuara, duhet që, brenda 30 ditësh pas marrjes së aplikimit, t'i kërkojë aplikuesit informacionin përkatës, duke përcaktuar bazën

ligjore për këtë kërkesë.

3. Aplikuesi, për të përfutur autorizimin për “zhdoganim lokal”, duhet të plotësojë këto kritere:

- a) të përmbushë kriterin e konformitetit të përcaktuar në nenin 49;
- b) të përmbushë kriteret e përcaktuara në germenat “dh”, “ë” dhe “f” të pikës 1, të nenit 50;
- c) të përmbushë kriterin e aftësisë paguese financiare të përcaktuar në nenin 51;

4. Aplikimi nuk pranohet, kur:

- a) nuk është në përputhje me modelin e aplikimit;
- b) nuk plotësohen kriteret e përcaktuara në pikën 3 të këtij neni;
- c) aplikuesi është në procedurë falimentimi, ndarje apo bashkimi, në kohën e paraqitjes së aplikimit.

5. Përpara dhënies së autorizimit, autoritetet doganore auditojnë të dhënat e aplikuesit, përveç rasteve kur mund të përdoren rezultatet e një auditi të mëparshëm.

6. DPD për dhënien e autorizimit duhet të marrë parasysh karakteristikat e veçanta të operatorëve ekonomikë, në mënyrë të veçantë të ndërmarrjeve të vogla dhe të mesme.

7. Kur aplikuesi ka një “Certifikatë OEAD”, kushtet dhe kriteret e përmendura në pikën 3, të këtij neni, konsiderohen si të plotësuara.

8. Mbajtësi i autorizimit informon autoritetin doganor që ka lëshuar autorizimin për të gjithë faktorët e dalë pas dhënies së autorizimit, të cilët mund të ndikojnë në vazhdimësinë apo përmbajtjen e tij.

9. Autoriteti doganor që ka lëshuar autorizimin bën rivlerësim të një autorizimi për “zhdoganim lokal”, në rastet e:

- a) ndryshimeve të mëdha në legjislacionin përkatës;
- b) treguesve të arsyeshëm që kushtet përkatëse nuk përmbushen më nga mbajtësi i autorizimit.

Në rastin e lëshimit të një autorizimi për “zhdoganim lokal” për një aplikues të themeluar për më pak se tre vjet, gjatë vitit të parë pas lëshimit të tij autoriteti doganor duhet të kryejë një monitorim të detajuar.

Neni 343 **Pezullimi**

1. Një autorizim për “zhdoganim lokal” pezullohet nga DPD kur:

- a) zbulohen mospërputhje me kushtet dhe kriteret e referuara në nenin 345;
- b) autoriteti doganor ka arsye të mjaftueshme të besojë që një veprim, i cili mund të shkaktojë procedim penal lidhur me shkelje të legjislacionit doganor, është kryer nga mbajtësi i autorizimit, aplikuesi ose nga personat e përmendur në nenin 49;

2. Megjithatë, në rastin e përmendur në shkronjën “b” të pikës 1, DPD mund të vendosë që të mos e pezullojë autorizimin nëse konstaton shkelje me rëndësi të papërfillshme në raport me numrin apo madhësinë e operacioneve dhe nuk krijon dyshime që kanë të bëjnë me mirëbesimin apo vullnetin e mirë të operatorit ekonomik.

3. Para marrjes së vendimit për pezullim, DPD ia komunikon konstatimet e saj operatorit ekonomik. Operatori ekonomik ka të drejtë të korrigjojë situatën dhe /ose të shprehë qëndrimin e tij brenda 30 ditëve nga data e komunikimit.

4. Nëse mbajtësi i autorizimit nuk e rregullon situatën brenda afatit, DPD e njofton atë për pezullimin e autorizimit për një periudhë kohore prej 30 ditësh, për ti dhënë mundësi për rregullimin e situatës.

5. Në rastin e referuar në shkronjën “b” të pikës 1, DPD pezullon autorizimin deri në fund të procedimit në gjykatë, duke e njoftuar atë për pezullimin.

6. Kur mbajtësi i autorizimit nuk është në gjendje të rregullojë situatën brenda 30 ditësh, por mund të

japë prova që mund të përmbushen kushtet nëse shtyhet periudha e pezullimit, DPD e pezullon autorizimin për një periudhë tjetër prej 30 ditësh kalendarike.

7. Pezullimi i një autorizimi nuk ndikon në asnjë procedurë tjetër doganore që ka filluar përpara datës së pezullimit, por që ende nuk ka përfunduar.

8. Kur DPD vlerëson se mbajtësi i autorizimit ka marrë masat e nevojshme për rregullimin e situatës heq pezullimin dhe e njofton atë. Pezullimi mund të hiqet përpara përfundimit të afatit kohor të përcaktuar në pikat 4 ose 6, më sipër.

9. Nëse mbajtësi i autorizimit dështon përsëri për marrjen e masave për rregullimin e situatës brenda periudhës kohore të kërkuar, zbatohet pika 10.

10. Kur përkohësisht mbajtësi i autorizimit nuk është në gjendje të rregullojë situatën mund të kërkojë pezullimin e autorizimit. Në këtë rast, mbajtësi i autorizimit njofton DPD, duke përcaktuar datën kur ai do të jetë në gjendje të përmbushë kushtet dhe kriteret dhe duke paraqitur masat e planifikuara dhe afatet kohore të tyre.

11. Nëse mbajtësi i një autorizimi dështon të rregullojë situatën brenda periudhës kohore të përcaktuar në njoftimin e tij, DPD mund të autorizojë një shtyrje të arsyeshme, me kusht që ai të ketë vepruar me vullnet të mirë.

Neni 344

Revokimi

1. Pa cenuar dispozitat për vendimet e favorshme, autorizimi për zhdoganim lokal revokohet nga DPD në rastet e mëposhtme:

- a) Kur mbajtësi i autorizimit dështon të rregullojë situatën e referuar në nenin 343;
- b) Kur janë kryer shkelje të rënda ose të përsëritura të legjislacionit doganor nga mbajtësi i autorizimit ose personat e tjerë të përcaktuar në nenin 49 dhe kur ka shteruar e drejta e ankimit;
- c) me kërkesë të mbajtësit të autorizimit.

2. Megjithatë, në rastin e përmendur në shkronjën “b” të pikës 1, DPD mund të vendosë që të mos e revokojë autorizimin nëse e konsideron shkeljen si të një rëndësie të papërfillshme në krahasim me numrin apo masën e operacioneve doganore dhe nuk krijon dyshime për vullnetin e mirë të mbajtësit të autorizimit.

Neni 345

Procedura e zhdoganimit lokal

1. Autorizimi për përdorimin e procedurës së “zhdoganimit lokal” jepet ndaj çdo aplikuesi që dëshiron të vendosë mallrat nën një regjim doganor, përveç transitit ose t’i riekspertojë ato në/nga ambientet e miratuara për këtë qëllim pas kryerjes së formaliteteve doganore të transitit në doganën hyrëse.

2. Mbajtësi i autorizimit për t’ju provuar autoriteteve doganore kryerjen e rregullt të operacioneve, përpara përfundimit të afatit kohor për vendosjen e mallrave nën një regjim doganor përveç transitit ose rieksporit të tyre, kryen procedurat në vijim:

a) njofton zyrën doganore mbikëqyrëse sipas formës dhe mënyrës së përcaktuar prej saj për mbërritjen e mallrave dhe vendosjen e tyre nën regjimin doganor përkatës; Në eksport ose riekспорт, mbajtësi i autorizimit duhet, përpara lëvizjes së mallrave nga ambientet e miratuara të depozitojë paraprakisht për zyrën doganore të eksportit një deklaratë eksporti për këtë lëvizje;

b) hedh të dhënat e mallrave në regjistrat e tij, të cilat duhet të përmbajnë datën kur është bërë hedhja e tyre dhe informacionin që përmban aneksi 7, të shtojcës C bashkëlidhur këtij vendimi dhe pjesë përbërëse e tij;

i) në rastin e regjimit të magazinimit doganor hedh në regjistrin e magazinës doganore sasinë e mallrave dhe informacione për identifikimin e tyre;

ii) bën të disponueshëm për autoritetet doganore të gjitha dokumentet që kërkohen për regjimin doganor përkatës; Në eksport ose riekспорт mbajtësi i autorizimit duhet të tregojë në çdo dokument shoqërues ose ndonjë mënyrë tjetër që e zëvendëson atë të dhëna lidhur me referencën për regjistrimin në regjistrat e tij, datën e regjistrimit dhe numrin e autorizimit.

c) depoziton deklaratën doganore;

3. Në autorizimin e referuar në pikën 1, të këtij neni, përcaktohen rregullat specifike për zbatimin e procedurës dhe, në mënyrë të veçantë, përcaktohen:

a) mallrat për të cilat zbatohet;

b) detyrimet e operatorit ekonomik referuar në pikën 2, të këtij neni, si dhe referenca për garancinë kur kërkohet nga regjimi;

c) koha e çlirimit të mallrave;

ç) në rastin e eksportit ose riekспортit, përveç sa më lart edhe përmbajtja e çdo dokumenti shoqërues ose çdo mënyrë tjetër që e zëvendëson atë dhe mënyrat se si do të bëhet i vlefshëm.

4. Autoritetet doganore, bazuar në analizën e riskut, njoftojnë operatorin ekonomik nëse do të procedohet

me kontroll dokumentar apo fizik. Në rast se autoritetet doganore do të kryejnë kontrollin fizik të mallrave, operatori ekonomik është i detyruar të presë punonjësit doganorë për kryerjen e formaliteteve të nevojshme të kontrollit në mjediset e operatorit ekonomik pa cenuar elementet e sigurisë.

5. Në eksport ose riekспорт, për të vërtetuar që mallrat aktualisht janë larguar nga territori doganor i Republikës së Shqipërisë, shërben dokumenti i daljes së mallrave (urdhër çlirimi). Në autorizim duhet të përcaktohet që kopja nr. 3 e dokumentit të vetëm administrativ (DAV) të autentifikohet (vulose) paraprakisht.

Autentifikimi paraprak mund të kryhet në një nga mënyrat e mëposhtme:

a) Kutia A e DAV mund të vuloset paraprakisht me vulën e zyrës doganore mbikëqyrëse dhe të nënshkruhet nga një zyrtar i kësaj zyre;

b) Eksportuesi i autorizuar mund të vulosë deklaratën duke përdorur një vulë speciale sipas modelit të treguar në aneksin 61, të shtojcës C bashkëlidhur këtij vendimi dhe pjesë përbërëse e tij.

6. Në eksport ose riekспорт, autorizimi duhet të përfshijë detyrimin dhe angazhimin e eksportuesit për të marrë masa për ruajtjen e vulës speciale ose të formave që kanë stampën e vulës së zyrës doganore të eksportit, plumbçeve ose stampat e vulës speciale.

Nënseksioni 4

Vetëvlerësimi

Neni 346

Kushtet për dhënien e autorizimit për vetëvlerësim

(Pika 1, e nenit 167, të Kodit)

Kur aplikuesi i referuar në pikën 2, të nenit 167, të Kodit, është mbajtës i një autorizimi për hyrje në regjistrimet e deklaruesit, autorizimi për vetëvlerësim jepet me kusht që aplikimi të lidhet me regjimet doganore të referuara në pikën 2, të nenit 336, ose me riekспортin.

Neni 347

Formalitetet dhe kontrollet doganore bazuar në vetëvlerësim

(Pika 1, e nenit 167, të Kodit)

Mbajtësit e autorizimeve për vetëvlerësim mund të jenë të autorizuar për të kryer kontrolle nën mbikëqyrje doganore, lidhur me ndalimet dhe kufizimet siç përcaktohet në autorizim.

Neni 348

Përcaktimi i shumës së detyrimit të importit ose eksportit për t'u paguar

(Pika 1, e nenit 167, të Kodit)

1. Kur një operator ekonomik është i autorizuar për të përcaktuar shumën e detyrimit të importit ose eksportit që duhet paguar në përputhje me pikën 1, të nenit 167, të Kodit, ai operator, në fund të periudhës së caktuar nga autoritetet doganore në autorizim, do të përcaktojë shumën e detyrimit të importit ose eksportit për t'u paguar për atë periudhë, në përputhje me rregullat e përcaktuara në autorizim.

2. Brenda 10 ditëve pas përfundimit të periudhës së caktuar nga autoritetet doganore në autorizim, mbajtësi i këtij autorizimi duhet t'i paraqesë zyrës mbikëqyrëse doganore, detajet e shumës së përcaktuar në përputhje me pikën 1. Borxhi doganor konsiderohet i njoftuar në kohën e këtij dorëzimi.

3. Mbajtësi i autorizimit duhet të paguajë shumën e përmendur në pikën 2, brenda afatit të parashikuar në autorizim dhe jo më vonë se afati i parashikuar në pikën 1, të nenit 101, të Kodit.

KREU 3

Verifikimi dhe çlirimi i mallrave

Seksioni 1

Verifikimi

Neni 349

Vendi dhe koha e verifikimit të mallrave

(Neni 170 i Kodit)

Për të verifikuar nëse të gjitha mallrat që dalin nga një zonë doganore, korrespondojnë me të dhënat në dokumentet doganore shoqëruese, autoritetet doganore organizojnë kontrollet që parashikohen në pikën 2, të nenit 10, të Kodit.

Kur autoritetet kompetente doganore kanë vendosur të verifikojnë mallrat në përputhje me shkronjën “c”, të nenit 169, të Kodit, ose të marrë mostrat në përputhje me shkronjën “ç”, të nenit 169, të Kodit, caktojnë kohën dhe vendin për këtë qëllim dhe informojnë deklaruesin e tyre.

Me kërkesë të deklaruesit, autoriteti doganor kompetent mund të caktojë një vend të ndryshëm nga ambientet doganore dhe një kohë jashtë orarit zyrtar për të kryer verifikimin.

Neni 350

Verifikimi i mallrave

(Nenet 170 dhe 171, të Kodit)

1. Kur autoritetet doganore vendosin të verifikojnë vetëm një pjesë të mallrave, informojnë deklaruesin për artikujt të cilët ata dëshirojnë të verifikojnë.

2. Kur deklaruesi refuzon të jetë i pranishëm në verifikimin e mallrave ose nuk siguron ndihmën e nevojshme, siç kërkohet nga autoritetet doganore, këto të fundit do të caktojnë një afat për praninë apo ndihmën e tij.

Kur deklaruesi nuk ka vepruar në përputhje me kërkesat e autoriteteve doganore me kalimin e afatit, autoritetet doganore do të vazhdojnë me verifikimin e mallrave, me risk dhe shpenzime të deklaruesit. Kur është e nevojshme, autoritetet doganore mund të kërkojnë edhe shërbimet e një eksperti të jashtëm

të licencuar në përputhje me ligjin.

Neni 351

Marra e mostrave

(Nenet 170 dhe 171, të Kodit)

1. Kur zyra doganore vendos të marrë mostrat e mallrave, ajo informon deklaruesin e tyre.

Kur deklaruesi refuzon të jetë i pranishëm kur mostrat merren ose nuk siguron ndihmën e nevojshme, siç kërkohet nga autoritetet doganore, këto të fundit do të caktojnë një afat për praninë apo ndihmën e tij.

2. Kur deklaruesi nuk ka vepruar në përputhje me kërkesat e autoriteteve doganore me kalimin e afatit, autoritetet doganore do të vazhdojnë me marrjen e mostrave, me risk dhe shpenzime të deklaruesit.

3. Mostrat duhet të merren nga vetë autoritetet doganore. Megjithatë, në raste specifike kur është e pamundur marrja e mostrave nga autoritetet doganore për shkak të llojit të mallit dhe ekspertizës apo mjeteve të posaçme që kërkohen për marrjen e mostrave, ato mund të kërkojnë që mostra të merret nga deklaruesi ose të thërrasin një ekspert të licencuar për të marrë mostrat, nën mbikëqyrjen e tyre. Eksperti duhet të jetë i licencuar në përputhje me ligjin.

4. Për analizat merren tre mostra, secila prej të cilave vendoset në një kuti/paketim dhe secila kuti vulozet/plumboset me vulën e doganës. Nga tre mostrat e marra një mbahet në zyrën doganore, tjetra dërgohet për analiza në laboratorin doganor dhe e treta i jepet deklaruesit. Sasitë e marra si mostra nuk duhet të tejkalojnë atë që është e nevojshme për analiza apo ekzaminim më të detajuar, duke përfshirë analizën e mundshme të mëposhtme.

5. Sasitë e marra si mostra nuk do të zbriten nga sasia e deklaruar.

6. Kur bëhet fjalë për një deklaratë të përpunimit pasiv ose të eksportit, deklaruesi mund të zëvendësojë sasinë e mallrave të marra si mostra nga mallrat identike, në mënyrë që të bëhet dërgesa.

Neni 352

Shqyrtimi i mostrave

(Nenet 170 dhe 171, të Kodit)

1. Kur shqyrtimi i mostrave të të njëjtave mallra, çon në rezultate të ndryshme që kërkojnë trajtim të ndryshëm doganor, kur është e mundur do të merren mostra të mëtejshme.

2. Kur rezultatet e shqyrtimit të mostrave të mëtejshme konfirmojnë rezultate të ndryshme, mallrat do të konsiderohen si të përbëra nga mallra të ndryshme në sasi që korrespondojnë me rezultatet e shqyrtimit. E njëjta gjë zbatohet kur nuk është e mundur të merren mostra të mëtejshme.

Neni 353

Kthimi ose asgjësimi i mostrave të marra

(Nenet 170 dhe 171, të Kodit)

1. Mostrat e marra i kthehen deklaruesit me kërkesën e tij, përveç në rastet e mëposhtme:

a) Kur mostrat janë shkatërruar nga analizimi apo verifikimi;

b) Kur mostrat duhet të mbahen nga autoritetet doganore për qëllimet e mëposhtme:

i) Shqyrtim i mëtejshëm;

ii) Ankimi ose procedura gjyqësore.

2. Kur deklaruesi nuk ka bërë një kërkesë për t'ia kthyer mostrat, autoritetet doganore mund t'i kërkojnë deklaruesit të heqë mostrat që kanë mbetur ose t'i shkatërrojë ato në përputhje me shkronjën “c”, të pikës 1, të nenit 179, të Kodit.

Neni 354
Rezultatet e verifikimit të deklaratës doganore dhe të kontrollit të mallrave
(Neni 172 i Kodit)

1. Kur autoritetet doganore verifikojnë saktësinë e të dhënave të një deklarate doganore, ato duhet të regjistrojnë faktin se është kryer një verifikim si dhe rezultatet e atij verifikimi. Në këtë rast, një punonjës doganor do të jetë përgjegjës për të shënuar në kutinë përkatëse të deklaratës doganore rezultatet e kontroleve të kryera.

Kur vetëm një pjesë e mallrave është kontrolluar, mallrat e kontrolluara duhet të regjistrohen. Kur deklaruesi mungon, do të regjistrohet mungesa e tij.

2. Autoritetet doganore i informojnë deklaruesit rezultatet e verifikimit.

3. Kur rezultatet e verifikimit të deklaratës doganore nuk janë në përputhje me të dhënat e deklaratës, autoritetet doganore regjistrojnë të dhënat, të cilat janë detaje që duhet të merren parasysh për qëllimet, si më poshtë:

- a) Llogaritjen e shumës së detyrimit të importit ose të eksportit dhe pagesave të tjera për mallrat;
- b) Llogaritjen e çdo rimbursimi ose shumave të tjera apo avantazheve financiare të parashikuara në eksport në bazë të politikave bujqësore;
- c) Aplikimin e të gjitha dispozitave që rregullojnë regjimin doganor nën të cilën janë vendosur mallrat.

4. Kur deklarimi i origjinës jopreferenciale konstatohet si i pasaktë, origjina që do të merret parasysh për qëllime të shkronjës “a”, të pikës 3, do të vendoset në bazë të provave të paraqitura nga deklaruesi ose, kur kjo nuk është e mjaftueshme ose e pranueshme, mbi bazën e çdo informacioni në dispozicion.

Seksioni 2
Çlirimi i mallrave

Neni 355
Depozitimi i një garancie
(Neni 172 i Kodit)

Kur autoritetet doganore gjykojnë se verifikimi i deklaratës doganore mund të rezultojë në një shumë më të lartë të detyrimit të importit ose të eksportit ose të detyrimeve të tjera të pagueshme se ajo që rezulton nga të dhënat e deklaratës doganore, çlirimi i mallrave do të jetë i kushtëzuar me depozitimin e një garancie të mjaftueshme për të mbuluar diferencën midis shumës sipas deklaratës doganore dhe shumës e cila në fund mund të jetë e pagueshme.

Megjithatë, deklaruesi mund të kërkojë njoftimin e menjëhershëm të borxhit doganor, ndaj të cilit mallrat përfundimisht mund t'i nënshtrohen, në vend të depozitimit të kësaj garancie.

Neni 356
Çlirimi i pakushtëzuar nga dhënia e një garancie
(Pika 2, e nenit 176, të Kodit)

Nëse para çlirimit të mallrave që janë objekt i një kërkesë për përfitim nga një kuotë tarifore dhe kjo kuotë tarifore nuk konsiderohet kritike, çlirimi i mallrave nuk kushtëzohet nga dhënia e një garancie në lidhje me ato mallra.

Neni 357
Çlirimi i mallrave pas verifikimit

(Nenet 172 dhe 175, pika 1, të Kodit)

1. Kur, në bazë të verifikimit të deklarës doganore, autoritetet doganore përcaktojnë një shumë të detyrimit të importit ose të eksportit, të ndryshme nga shuma që rezulton nga të dhënat në deklarë, pika 1, e nenit 176, të Kodit do të zbatohet lidhur me shumën e vlerësuar në këtë mënyrë.

2. Kur autoritetet doganore kanë dyshime nëse një ndalim apo kufizim do të zbatohet apo jo dhe kjo nuk mund të zgjidhet deri sa rezultatet e kontrolleve të kryera nga autoritetet doganore të jenë në dispozicion, mallrat në fjalë nuk do të çlirohen.

Neni 358

Regjistrimi dhe njoftimi i çlirimit të mallrave

(Pika 3, e nenit 27, të Kodit)

Autoritetet doganore njoftojnë çlirimin e mallrave deklaruesit dhe regjistrojnë vendosjen e mallrave nën regjimin doganor në fjalë, duke treguar të paktën referencën e deklarës doganore ose njoftimit dhe datën e çlirimit të mallrave.

Neni 359

Njoftimi i çlirimit të mallrave

(Shkronja “a”, e pikës 3, të nenit 17, të Kodit)

1. Kur deklarata për një regjim doganor ose riekспорт është depozituar duke përdorur mjete të ndryshme nga teknikat informatike të përpunimit të të dhënave, autoritetet doganore me qëllim njoftimin e deklaruesit për çlirimin e mallrave mund të përdorin mjete të ndryshme nga teknikat informatike të përpunimit të të dhënave.

2. Kur mallrat kanë qenë në magazinim të përkohshëm para çlirimit të tyre dhe autoritetet doganore duhet të informojnë mbajtësin e autorizimit të magazinimit të përkohshëm për çlirimin e mallrave, informacioni mund të jepet duke përdorur mjete të tjera, përveç teknikave informatike të përpunimit të të dhënave.

Neni 360

Mallrat e pa çliruara

(Pika 3, e nenit 27, të Kodit)

1. Kur, për ndonjë nga arsyet e renditura në shkronjën “b”, të pikës 1, të nenit 179, të Kodit, mallrat nuk mund të çlirohen ose kur, pas çlirimit të tyre, konstatohet se mallrat nuk kanë plotësuar kushtet për këtë çlirim, autoritetet doganore do t’i japin deklaruesit një afat kohor të arsyeshëm për të korrigjuar situatën e mallrave.

2. Autoritetet doganore mund, me risk dhe shpenzime të deklaruesit, të transferojnë mallrat e përmendura në pikën 1, në ambiente të veçanta nën mbikëqyrjen e autoriteteve doganore.

KREU 4

Shkatërrimi i mallrave

Neni 361

Rregullat procedurale për shkatërrimin e mallrave

(nenet 178, 179 dhe 180, të Kodit)

(Ndryshuar me VKM nr. 872, datë 30.12.2024)

1. Në përputhje me përcaktimet e nenit 178, të Kodit:

a) njoftimi i personit të interesuar për shkatërrimin e mallrave nga autoritetet doganore bëhet me shkrim, në rrugë shkresore ose elektronike, kur kjo gjë është e mundur;

b) në rastet kur shkatërrimi i mallrave kërkohet nga personi i interesuar, kërkesa nënshkruhet prej tij. Kërkesa bëhet në kohë të përshtatshme për të lejuar autoritetet doganore të mbikëqyrin shkatërrimin.

2. Mallrat joshqiptare, që shkatërrohen, regjistrohen në regjistrat e operatorit të magazinës së përkohshme ose, kur ato mbahen nga autoritetet doganore, në regjistrat e këtyre të fundit.

Kur mallrat e destinuara për t'u shkatërruar kanë qenë ndërkohë objekt i një deklarate doganore, autoritetet doganore anulojnë deklaratën doganore dhe referencat e saj shënohen në regjistrimet e cituara në paragrafin e parë, si dhe në deklaratën që regjistrohet për shkatërrimin.

3. Shkatërrimi ose dërgimi në vendin e autorizuar të shkatërrimit kryhet nën mbikëqyrjen e autoriteteve doganore. Autoritetet doganore të pranishme në shkatërrimin e mallrave verifikojnë llojin dhe sasinë e çdo mbetjeje ose hedhurine, që rezulton nga shkatërrimi i mallrave me qëllim të përcaktimit të ndonjë detyrimi doganor dhe pagesave të tjera të zbatueshme për atë mbeturinë apo hedhurinë, kur vendosen nën një regjim doganor ose rieksporthen.

4. Kur shkatërrimi kryhet për arsye të masave ndaluese apo kufizuese, sipas një vendimi të një institucioni tjetër shtetëror, atëherë ky i fundit mbikëqyr shkatërrimin e mallrave.

5. Për mallrat e braktisura në favor të shtetit dhe që shkatërrohen, pikat 1 deri 4 zbatohen “*mutatis mutandis*”.”

Neni 362

Braktisja e mallrave

(Neni 180 i Kodit)

1. Autoritetet doganore mund të refuzojnë një kërkesë për leje për të braktisur mallrat në favor të shtetit, në përputhje me nenin 180, të Kodit, kur përmbushet një nga kushtet e mëposhtme:

a) Mallrat nuk mund të shiten brenda territorit doganor të Republikës së Shqipërisë ose kostoja e kësaj shitjeje do të jetë në disproporcion me vlerën e mallrave;

b) Mallrat do të shkatërrohen.

2. Një kërkesë për braktisje në favor të shtetit do të konsiderohet se është bërë në përputhje me nenin 180, të Kodit, kur autoritetet doganore kanë bërë një njoftim publik për pronarin e mallrave që të paraqitet dhe pronari nuk është paraqitur brenda 90 ditësh.

Neni 363

Shitja e mallrave dhe masa të tjera të marra nga autoritetet doganore

(Pika 1, e nenit 179, të Kodit)

1. Autoritetet doganore mund t'i shesin mallrat e braktisura ose të konfiskuara, vetëm me kusht që blerësi të kryejë menjëherë formalitetet për të vendosur mallrat nën një regjim doganor ose t'i rieksportoje ato.

2. Kur mallrat janë shitur me një çmim gjithëpërfshirës të shumës së detyrimit të importit dhe pagesave të tjera, mallrat konsiderohen se janë çliruar për qarkullim të lirë. Autoritetet doganore llogarisin shumën e detyrimeve dhe e shënojnë atë në llogari.

3. Mallrat e braktisura apo të konfiskuara shiten nga dega doganore kompetente që ka bërë konfiskimin, në përputhje me legjislacionin në fuqi për ankandin publik, me përjashtim të rastit kur Kodi Doganor apo akte të tjera ligjore parashikojnë ndryshe.

KREU 5

Pronësia intelektuale në doganë

Seksioni 1 **Të përgjithshme**

Neni 364 **Objekti dhe fusha e zbatimit** (Nenet 125 dhe 131, të Kodit)

1. Ky kre përcakton kushtet dhe procedurat lidhur me veprimet që ndërmerren nga autoritetet doganore, kur ekzistojnë shkaqe të arsyeshme dyshimi se shkelet një e drejtë e pronësisë intelektuale nga mallra, të cilat janë ose duhet të ishin objekt i mbikëqyrjes doganore apo kontrollit doganor, brenda territorit doganor të Republikës së Shqipërisë, në përputhje me Kodin Doganor, në veçanti për mallrat në rrethana, si më poshtë:

a) Kur deklarohen për çlirim për qarkullim të lirë, eksport apo riekспорт; b) Kur hyjnë apo dalin nga territori doganor i Republikës së Shqipërisë; c) Kur vendosen në regjim pezullimi apo në zonë ose magazinë të lirë.

2. Pa cenuar nenet 378 dhe 379, në përputhje me kriteret e analizës së riskut, me qëllim parandalimin e veprimeve që shkelin ligjin për pronësinë intelektuale në territorin e Republikës së Shqipërisë, autoritetet doganore kryejnë kontrollin e nevojshme doganore në lidhje me mallrat, objekt i mbikëqyrjes doganore ose kontrollit doganor, dhe marrin masat e duhura të identifikimit, siç parashikohet në nenet 10, 125, 131 dhe 239, të Kodit.

3. Ky kapitull nuk zbatohet për:

a) mallra, të cilat janë çliruar për qarkullim të lire nën regjimin e përdorimit të veçantë përfundimtar (*end-use*);

b) mallrat e natyrës jotregtare të mbajtura në bagazhet personale të udhëtarëve;

c) mallra, të cilat janë prodhuar nga një person me pëlqimin e mbajtësit të së drejtës apo për mallra, të cilat janë prodhuar nga një person i autorizuar ligjërisht nga mbajtësi i së drejtës për prodhimin e një sasive të caktuar të mallrave, në tejkallim të sasive për të cilat është rënë dakord ndërmjet personit në fjalë dhe mbajtësit të së drejtës.

4. Për qëllime të këtij kreu, pa cenuar legjislacionin në fuqi:

a) “E drejtë e pronësisë intelektuale”, nënkupton:

i. një markë tregtare;

ii. një dizeno industriale;

iii. të drejtën e autorit dhe të drejtat e tjera të lidhura me të, siç përcaktohet në legjislacionin në fuqi;

iv. një tregues gjeografik;

v. një patentë për shpikje, sipas përcaktimit të legjislacionit në fuqi;

vi. një certifikatë mbrojtjeje shtesë për barnat, sipas përcaktimit në legjislacionin në fuqi në lidhje me certifikatën e mbrojtjes shtesë për barnat;

vii. një certifikatë mbrojtjeje shtesë për produktet e mbrojtjes së bimëve, sipas përcaktimit në legjislacionin

në fuqi në lidhje me krijimin e një certifikate mbrojtjeje shtesë për produktet e mbrojtjes së bimëve;

viii. një e drejtë e varietetit bimor siç përcaktohet në legjislacionin në fuqi;

ix. një topografi e produkteve gjysmëkonduktorë sipas përcaktimit në legjislacionin në fuqi;

x. një model përdorimi i njohur si e drejtë e pronësisë intelektuale e mbrojtur nga legjislacioni në fuqi;

xi. një emër tregtar i njohur si e drejtë ekskluzive e pronësisë intelektuale e mbrojtur nga legjislacioni në fuqi.

b) “Markë tregtare”, nënkupton:

- i. një markë tregtare të regjistruar në Republikën e Shqipërisë;
- ii. një markë tregtare të regjistruar, sipas marrëveshjeve ndërkombëtare në të cilat Republika e Shqipërisë është palë.
- c) “Dizenjo industriale”, nënkupton:
 - i. një dizenjo industriale të regjistruar në Republikën e Shqipërisë;
 - ii. një dizenjo industriale të regjistruar, sipas marrëveshjeve ndërkombëtare në të cilat Republika e Shqipërisë është palë.
- ç) “Tregues gjeografik”, nënkupton:
 - i. një tregues gjeografik të mbrojtur, sipas legjislacionit në fuqi;
 - ii. një tregues gjeografik për verërat, sipas përcaktimeve të legjislacionit në fuqi;
 - iii. një tregues gjeografik për pijet e aromatizuara të bazuara në produktet e verës, sipas përcaktimit në legjislacionin në fuqi;
 - iv. një tregues gjeografik për pijet alkoolike, sipas përcaktimit në legjislacionin në fuqi;
 - v. një tregues gjeografik, sipas përcaktimeve në marrëveshjet ndërmjet Republikës së Shqipërisë dhe shteteve të tjera.
- d) “Mallra të falsifikuara”, nënkupton:
 - i. mallra, të cilat janë objekt i një veprimi që shkel një markë tregtare dhe pa lejen e mbajtësit të së drejtës mbajnë një shenjë identike me markën tregtare të regjistruar rregullisht për të njëjtat lloje mallrash ose që në thelb është e padallueshme nga kjo markë;
 - ii. mallra, të cilat janë objekt i një veprimi që shkel një tregues gjeografik dhe mbajnë ose janë të përshkruara me një emër ose term të mbrojtur në lidhje me atë tregues gjeografik;
 - iii. çdo paketim, etiketë, ngjitës, broshurë, udhëzues përdorimi, dokument garancie ose artikull tjetër i ngjashëm, edhe nëse paraqitet veçmas, që është objekt i një veprimi që shkel një markë tregtare ose një tregues gjeografik, që përfshin një shenjë, emër ose term që është identik me një markë tregtare të regjistruar rregullisht ose tregues gjeografik të mbrojtur, ose që në thelb është e padallueshme nga një markë tregtare apo tregues gjeografik i tillë dhe që mund të përdoret për të njëjtin lloj mallrash si ai për të cilin është regjistruar marka tregtare ose treguesi gjeografik.
- dh) “Mallra pirate”, nënkupton mallrat, të cilat janë objekt i një veprimi që shkel të drejtat e autorit dhe të drejtat e tjera të lidhura me të ose me një dizenjo industriale në Republikën e Shqipërisë dhe të cilat janë/ose përmbajnë kopje të bëra pa pëlqimin e mbajtësit të të drejtave të autorit dhe të drejtave të tjera të lidhura me të ose me dizenjon industriale apo të një personi të autorizuar prej mbajtësit, në vendin e prodhimit.
- e) “Mallra që dyshohet se shkelin një të drejtë të pronësisë intelektuale”, nënkupton mallrat e identifikuar në Republikën e Shqipërisë, të cilat pamje të parë kanë tregues të arsyeshëm se:
 - i. janë objekt i një veprimi që shkel një të drejtë të pronësisë intelektuale në Republikën e Shqipërisë;
 - ii. kanë pajisje, produkte apo komponentë që janë projektuar, prodhuar apo përshtatur kryesisht, me qëllim për të mundësuar apo lehtësuar shmangien nga çdo teknologji, pajisje apo komponent, që në rrjedhën normale të operacionit të tij parandalon apo kufizon veprime lidhur me vepra të paautorizuara nga mbajtësi i të drejtave të autorit dhe çdo të drejtë tjetër lidhur me të dhe e cila lidhet me një veprim që shkel këto të drejta në Republikën e Shqipërisë;
 - iii. kanë çdo format apo matricë të dizenuar apo të përshtatur specifikisht për prodhimin e mallrave që shkelin të drejtën e pronësisë intelektuale, nëse këto formate apo matrica lidhen me një veprim që shkel të drejtën e pronësisë intelektuale në Republikën e Shqipërisë.
- ë) “Mbajtës i së drejtës”, nënkupton mbajtësin e një të drejte të pronësisë intelektuale.
- f) “Aplikim”, nënkupton kërkesën që paraqitet pranë Drejtorisë së Përgjithshme të Doganave për të ndërmarrë veprime në lidhje me mallra që dyshohet se shkelin një të drejtë të pronësisë intelektuale.

g) “Aplikues”, nënkupton një person, sipas përcaktimit në pikën 4, të nenit 6, të Kodit, në emër të të cilit paraqitet një aplikim.

gj) “Mbajtës i vendimit”, nënkupton një person ndaj të cilit është dhënë vendimi në bazë të aplikimit.

h) “Mbajtës i mallrave”, nënkupton personin që ka në pronësi mallrat që dyshohet se shkelin një të drejtë të pronësisë intelektuale apo që ka të drejta të ngjashme për tjetërsimin/shkatërrimin ose kontrollin fizik të këtyre mallrave.

i) “Deklarues”, nënkupton deklaruesin sipas përcaktimit në pikën 15, të nenit 6, të Kodit.

j) “Shkatërrim”, nënkupton shkatërrimin fizik, riciklimin ose asgjësimin e mallrave jashtë kanaleve tregtare në një mënyrë të tillë që të parandalojë dëmtimet ndaj mbajtësit të vendimit.

k) “Territor doganor”, nënkupton territorin doganor të Republikës së Shqipërisë, sipas përcaktimit në nenin 3, të Kodit.

l) “Çlirim i mallrave”, nënkupton çlirimin e mallrave, sipas përcaktimit në pikën 26, të nenit 6, të Kodit.

ll) “Dërgesa të vogla”, nënkupton dërgesa postare apo me korrier ekspres që:

i. përmbajnë tre apo më pak njësi; ose

ii. kanë një peshë bruto prej më pak se 2 kilogramë.

Me “njësi”, nënkuptohen mallra sipas klasifikimit në Nomenklaturën e Kombinuar të Mallrave në fuqi, të paketuar ose jo, për mallra të shitura me pakicë ndaj konsumatorit përfundimtar.

Për qëllim të këtij përkufizimi, mallrat e ndara që përfshihen në të njëjtin kod të Nomenklaturës së Kombinuar të Mallrave do të konsiderohen si njësi të ndryshme dhe mallrat e paraqitura si grup i klasifikuar në një kod të Nomenklaturës së Kombinuar do të konsiderohen si një njësi.

m) “Mallra që prishen shpejt”, nënkupton mallrat që vlerësohen nga autoritetet doganore si mallra që prishen nga qëndrimi deri në 20 ditë, nga data e pezullimit të çlirimit të tyre apo ndalimit.

n) “Licencë ekskluzive”, nënkupton një licencë (të përgjithshme ose të kufizuar) që autorizon personin e licencuar, duke përjashtuar çdo person tjetër, përfshirë edhe personin që e lëshon atë, për të përdorur një të drejtë të pronësisë intelektuale në mënyrën e autorizuar nga licenca.

Seksioni 2

Aplikimet

Neni 365

E drejta e paraqitjes së aplikimit

(Nenet 125 dhe 131, të Kodit)

Paraqesin aplikim, në masën që legjitimohen, për të filluar një procedurë që ka si qëllim të përcaktojë nëse është shkelur një e drejtë e pronësisë intelektuale në Republikën e Shqipërisë personat fizikë dhe juridikë, si më poshtë vijon:

a) Mbajtësit e së drejtës;

b) Organet që administrojnë të drejtat kolektive të pronësisë intelektuale, sipas përcaktimeve të ligjit “Për të drejtat e autorit dhe të drejtat e tjera të lidhura me të”;

c) Organet e mbrojtjes profesionale, sipas përcaktimeve në legjislacionin në fuqi;

ç) Grupet e prodhuesve të produkteve të mbrojtura si tregues gjeografikë apo përfaqësuesit e këtyre grupeve, personat me të drejtë për të përdorur treguesin gjeografik në fjalë;

d) Personat fizikë apo juridikë të autorizuar për të përdorur të drejtat e pronësisë intelektuale, të cilët janë autorizuar zyrtarisht nga mbajtësi i të drejtave për të filluar një procedurë me qëllim që të përcaktojnë nëse është shkelur një e drejtë e pronësisë intelektuale.

Neni 366

Paraqitja e aplikimeve
(Neni 27 i Kodit)

1. Aplikimet paraqiten pranë Drejtorisë së Përgjithshme të Doganave, duke përdorur formularin specifik për këtë qëllim, i cili përmban informacionin e përcaktuar në nenin 367.
2. Kur aplikimi paraqitet pas njoftimit nga autoritetet doganore për pezullimin e çlirimit apo ndalimin e mallrave, në përputhje me pikën 3, të nenit 379, aplikimi në fjalë duhet:
 - a) të paraqitet pranë Drejtorisë së Përgjithshme të Doganave, brenda 4 ditëve pune nga data e njoftimit për pezullimin e çlirimit apo ndalimin e mallrave;
 - b) të jetë sipas formularit të përmendur në pikën 1, të nenit 367;
 - c) të përmbajë informacionin e përcaktuar në pikën 2, të nenit 367. Megjithatë, aplikuesi mund të mos përfshijë informacionin e përmendur në shkronjat “dh”, “e” apo “ë”, të pikës 2, të nenit 367.
3. Kur është e mundur, marrja dhe përpunimi i aplikimeve, si dhe dokumentet shoqëruese të nevojshme paraqiten duke përdorur teknika elektronike të përpunimit të të dhënave.

Neni 367
Formulari i aplikimit
(Neni 27 i Kodit)

(Ndryshuar pika 1, shfuqizuar pika 3 me VKM nr. 872, datë 30.12.2024)

1. Formulari i aplikimit është sipas aneksit 62 të shtojcës B.
2. Në formularin e aplikimit duhet të përfshihet të paktën informacioni i mëposhtëm:
 - a) Detaje në lidhje me aplikuesin;
 - b) Statusi i aplikuesit, sipas kuptimit të nenit 365;
 - c) Dokumente që i vërtetojnë se aplikuesi ka të drejtë të paraqesë aplikimin;
 - ç) Kur aplikuesi paraqet aplikimin me anë të një përfaqësuesi, detajet e personit që e përfaqëson dhe provën se personi ka kompetenca të veprojë në cilësinë e përfaqësuesit, në përputhje me legjislacionin në fuqi;
 - d) E drejta apo të drejtat e pronësisë intelektuale që zbatohen;
 - dh) Të dhëna teknike dhe specifike për mallrat origjinale, përfshirë shenjat, si bar-kodi dhe imazhet nëse është e nevojshme;
 - e) Informacioni i nevojshëm për t'u mundësuar autoriteteve doganore të identifikojnë menjëherë mallrat në fjalë;
 - ë) Informacioni që u duhet autoriteteve doganore për analizën dhe vlerësimin e riskut të shkeljeve të së drejtës apo të të drejtave të pronësisë intelektuale, i tillë si informacioni për distributorët e autorizuar;
 - f) Detajet e çdo përfaqësuesi të caktuar nga aplikuesi për të marrë përgjegjësi për çështjet teknike dhe ligjore;
 - g) Një deklaratë e aplikuesit që njofton Drejtorinë e Përgjithshme të Doganave për një nga situatat e parashikuara në nenin 376;
 - gj) Një deklaratë dhe përditësimin e çdo informacioni që i duhet Drejtorisë së Përgjithshme të Doganave për analizën dhe vlerësimin e riskut të shkeljeve të të drejtave apo të së drejtës së pronësisë intelektuale në fjalë;
 - h) Një deklaratë e aplikuesit, sipas së cilës ai merr përgjegjësitë sipas kushteve të përcaktuara në nenin 389;
 - i) Një deklaratë e aplikuesit, sipas së cilës ai merr përsipër kostot e referuara sipas kushteve të përcaktuara në nenin 390;
 - j) Një marrëveshje e aplikuesit, sipas së cilës të dhënat e vëna në dispozicion nga ai mund të përpunohen nga Drejtoria e Përgjithshme e Doganave;
 - k) Nëse aplikuesi kërkon përdorimin e procedurës së referuar në nenin 387 dhe në vijim të kërkesës

së autoriteteve doganore, aplikuesi bie dakord të mbulojë kostot që lidhen me shkatërrimin e mallrave sipas kësaj procedure.

3. Shfuqizuar.

Seksioni 3 **Vendimet për aplikimet**

Neni 368 **Përpunimi i aplikimeve të paplota** (Neni 27 i Kodit)

1. Kur, pas marrjes së aplikimit, Drejtoria e Përgjithshme e Doganave vlerëson se aplikimi nuk përmban të gjithë informacionin e kërkuar sipas pikës 2, të nenit 367, i kërkon aplikuesit të vërë në dispozicion informacionin që mungon brenda 10 (dhjetë) ditëve pune nga data e njoftimit të kërkesës.

Në këto raste, afati përfundimtar i referuar në pikën 1, të nenit 370, pezullohet deri sa të merret informacioni i nevojshëm.

2. Kur aplikuesi nuk vë në dispozicion informacionin e kërkuar brenda afatit të referuar në paragrafin e parë, të pikës 1, Drejtoria e Përgjithshme e Doganave refuzon aplikimin.

Neni 369 **Pagesat** (Neni 53 i Kodit)

Aplikuesit nuk i kërkohet asnjë pagesë për të mbuluar kostot administrative për shqyrtimin e aplikimit.

Neni 370 **Njoftimi i vendimeve të miratimit ose refuzimit të aplikimit** (Neni 27 i Kodit)

1. Aplikimi shqyrtohet nga Drejtoria e Përgjithshme e Doganave, e cila merr vendim për miratimin apo refuzimin e aplikimit, që i njoftohet me shkrim kërkuar brenda 30 (tridhjetë) ditëve pune nga data e marrjes së aplikimit. Në rast refuzimi, Drejtoria e Përgjithshme e Doganave jep arsyet mbi të cilat është bazuar vendimi, si dhe vënë dukje të drejtën për ankim.

2. Nëse aplikuesi është njoftuar për pezullimin e çlirimit apo ndalimin e mallrave nga autoritetet doganore përpara paraqitjes së aplikimit, Drejtoria e Përgjithshme e Doganave duhet të njoftojë aplikuesin për vendimin e miratimit apo refuzimit të aplikimit, brenda 2 (dy) ditëve pune nga data e marrjes së aplikimit.

Neni 371 **Vendime në lidhje me aplikimet** (Neni 27 i Kodit)

1. Vendimi për miratimin e aplikimit dhe çdo vendim për revokimin apo ndryshimin e tij kanë efekt nga e nesërmja e datës së marrjes së vendimit.

2. Vendimi, që zgjat afatin gjatë së cilit autoritetet doganore ndërmarrin veprime, ka efekt nga e nesërmja e datës së përfundimit të afatit që do të zgjatet.

Neni 372 **Periudha gjatë së cilës autoritetet doganore ndërmarrin veprime**

(Neni 28 i Kodit)

1. Kur miratohet një aplikim, Drejtoria e Përgjithshme e Doganave specifikon afatin gjatë së cilit autoritetet doganore do të ndërmarrin veprime.

Ky afat fillon ditën në të cilën fillon efektet vendimi i miratimit të aplikimit, sipas nenit 371, dhe nuk duhet të kalojë një vit nga e nesërmeja e datës së marrjes të vendimit.

2. Kur aplikimi i paraqitur, pas njoftimit të autoritetit doganor për pezullimin e çlirimit apo ndalimit të mallrave në përputhje me pikën 3, të nenit 379, nuk përmban informacionin e përmendur në shkronjat “dh”, “e” apo “ë”, të pikës 2, të nenit 367, aplikimi miratohet vetëm për pezullimin e çlirimit apo ndalimin e mallrave në fjalë, përveçse kur ky informacion vihet në dispozicion brenda 10 (dhjetë) ditëve pune, pas njoftimit për pezullimin e çlirimit apo ndalimin e mallrave.

3. Kur e drejta e pronësisë intelektuale nuk ka më efekt ligjor/pushon së qeni e vlefshme ose kur aplikuesi, për arsye të tjera, nuk ka më të drejtë të paraqesë aplikim, autoritetet doganore nuk ndërmarrin asnjë veprim. Vendimi për miratimin e aplikimit revokohet apo ndryshohet nga Drejtoria e Përgjithshme e Doganave në përputhje me rrethanat.

Neni 373

Zgjatja e afatit gjatë të cilit autoritetet doganore ndërmarrin veprime

(Neni 28 i Kodit)

(Ndryshuar pika 7 me VKM nr. 872, datë 30.12.2024)

1. Me përfundimin e afatit gjatë të cilit autoritetet doganore duhet të ndërmarrin veprime dhe nëse paraprakisht është shlyer çdolloj detyrimi ndaj autoriteteve doganore, sipas këtij vendimi, në ngarkim të mbajtësit të vendimit, ky i fundit mund të kërkojë zgjatjen e afatit dhe Drejtoria e Përgjithshme e Doganave, që ka miratuar vendimin fillestar, mund të zgjatë afatin në fjalë.

2. Nëse kërkesa për zgjatje të afatit, gjatë të cilit autoritetet doganore ndërmarrin veprime, paraqitet në më pak se 30 (tridhjetë) ditë pune përpara përfundimit të afatit të miratuar me vendimin fillestar për ndërmarrjen e veprimeve, kërkesa mund të refuzohet.

3. Drejtoria e Përgjithshme e Doganave i njofton mbajtësit të vendimit vendimin për zgjatjen e afatit brenda 30 (tridhjetë) ditëve pune nga data e marrjes së kërkesës së referuar në pikën 1.

4. Drejtoria e Përgjithshme e Doganave specifikon në vendim afatin gjatë të cilit do të ndërmarrë veprime. Afati i zgjatur gjatë të cilit autoritetet doganore ndërmarrin veprime fillon në datën vijuese të datës së përfundimit të periudhës së mëparshme dhe nuk duhet të kalojë një vit.

5. Kur e drejta e pronësisë intelektuale nuk ka më efekt ligjor/pushon së qeni e vlefshme ose kur aplikuesi, për arsye të tjera, nuk ka më të drejtë të paraqesë aplikim, autoritetet doganore nuk marrin asnjë masë mbrojtëse.

Vendimi që lejon zgjatjen e afatit revokohet ose ndryshohet nga Drejtoria e Përgjithshme e Doganave, në përputhje me rrethanat.

6. Mbajtësit të vendimit nuk i kërkohet asnjë pagesë për të mbuluar kostot administrative për shqyrtimin e kërkesës për zgjatje të afatit.

7. Formulari i aplikimit është sipas aneksit 63, të shtojcës B.

Neni 374

Ndryshimi i vendimit lidhur me të drejtat e pronësisë intelektuale

(Neni 27 dhe 28 i Kodit)

1. Drejtoria e Përgjithshme e Doganave, me kërkesë të mbajtësit të vendimit, mund të ndryshojë listën e të drejtave të pronësisë intelektuale të miratuara në atë vendim.

2. Kur shtohet një e drejtë e re e pronësisë intelektuale, kërkesa duhet të përmbajë informacionin e

referuar në shkronjat “c”, “d”, “dh”, “e”, “ë”, të pikës 2, të nenit 367.

Neni 375

Detyrimet për njoftim të Drejtorisë së Përgjithshme të Doganave

(Neni 28 i Kodit)

1. Drejtoria e Përgjithshme e Doganave, pranë të cilës është paraqitur një aplikim apo një kërkesë, menjëherë pas miratimit, njofton degët doganore për vendimet për:

- a) miratimin e aplikimit;
- b) revokimin e vendimeve që miratojnë aplikimin;
- c) ndryshimin e vendimeve që miratojnë aplikimin;
- ç) zgjatjen e afatit gjatë të cilit autoritetet doganore ndërmarrin veprime.

2. Drejtoria e Përgjithshme e Doganave njofton degët doganore për vendimin për pezullimin e veprimeve, menjëherë pas miratimit, sipas pikës 2, të nenit 377.

Neni 376

Detyrimet për njoftim të mbajtësit të vendimit

(Neni 27 i Kodit)

Mbajtësi i vendimit duhet të njoftojë, menjëherë, Drejtorinë e Përgjithshme të Doganave, për secilin nga rastet e mëposhtme:

- a) Kur një e drejtë e pronësisë intelektuale, për të cilën është miratuar aplikimi, pushon së qeni e vlefshme;
- b) Kur mbajtësi i vendimit, për arsye të tjera, nuk ka më të drejtë të paraqesë një aplikim;
- c) Kur ka ndryshime në informacionin e përmendur në pikën 2, të nenit 367.

Neni 377

Pamundësia e mbajtësit të vendimit për të përmbushur detyrimet e tij

(Neni 28 i Kodit)

1. Kur mbajtësi i vendimit përdor informacionin e vënë në dispozicion nga autoritetet doganore, për qëllime të ndryshme nga ato të parashikuara në nenin 382 ose e keqpërdor atë, Drejtoria e Përgjithshme e Doganave mund të revokojë vendimin me të cilin është miratuar një aplikim ndaj mbajtësit të vendimit dhe të refuzojë zgjatjen e afatit për ndërmarrjen e veprimeve nga autoritetet doganore.

2. Drejtoria e Përgjithshme e Doganave mund të vendosë pezullimin e ndërmarrjes së veprimeve nga autoritetet doganore deri në përfundimin e afatit të kryerjes së këtyre veprimeve, kur mbajtësi i vendimit:

- a) nuk përmbush detyrimet e njoftimit, të përcaktuara në nenin 376;
- b) nuk përmbush detyrimet e kthimit të mostrave, të përcaktuara në pikën 3, të nenit 380;
- c) nuk përmbush detyrimet për kostot dhe përkthimin, të përcaktuara në pikat 1 dhe 3, të nenit 390;
- ç) nuk fillon asnjë procedurë sipas përcaktimeve të pikës 3, të nenit 384, apo pikës 9, të nenit 387 pa arsye të bazuar.

Seksioni 4

Pezullimi i çlirimit apo ndalimi i mallrave

Neni 378

Pezullimi i çlirimit apo ndalimi i mallrave pas miratimit të aplikimit

(Nenet 10, 27, 125, 131 të Kodit)

1. Kur autoritetet doganore identifikojnë mallra që dyshohet se shkelin një të drejtë të pronësisë intelektuale, për të cilën është miratuar një vendim për aplikimin në lidhje me këto mallra, ato pezullojnë apo ndalojnë çlirimin e mallrave në fjalë.

2. Përpara pezullimit të çlirimit apo ndalimit të mallrave, autoritetet doganore mund t'i kërkojnë mbajtësit të vendimit që t'i vërë në dispozicion atyre informacionin e nevojshëm në lidhje me mallrat. Autoritetet doganore mund, gjithashtu, t'i vënë në dispozicion mbajtësit të të drejtave informacion për sasinë reale apo të vlerësuar të mallrave, imazhin dhe natyrën e tyre aktuale apo të supozuar, sipas nevojës.

3. Autoritetet doganore njoftojnë deklaruesin apo mbajtësin e mallrave për pezullimin e çlirimit të mallrave apo ndalimin e tyre, brenda 1 (një) ditë pune nga data e pezullimit apo ndalimit.

Kur autoritetet doganore vendosin të njoftojnë mbajtësin e mallrave dhe nëse dy apo më shumë persona konsiderohen si mbajtës të tyre, autoritetet doganore nuk kanë detyrim të njoftojnë më shumë se një nga personat në fjalë. Autoritetet doganore njoftojnë mbajtësin e vendimit për pezullimin e çlirimit të mallrave apo ndalimin e tyre në të njëjtën ditë ose menjëherë pas njoftimit të deklaruesit apo mbajtësit të mallrave. Njoftimet duhet të përfshijnë informacion për procedurën e përcaktuar në nenin 384.

4. Autoritetet doganore njoftojnë mbajtësin e vendimit dhe deklaruesin ose mbajtësin e mallrave për sasinë dhe natyrën reale apo të vlerësuar të mallrave, përfshirë imazhet e disponueshme, sipas nevojës, çlirimi i të cilave është pezulluar apo nëse mallrat në fjalë janë ndaluar. Autoritetet doganore, sipas kërkesës dhe kur është e mundur, njoftojnë mbajtësin e vendimit për emrat dhe adresat e marrësit të ngarkesës, dërguesin dhe deklaruesin apo mbajtësin e mallrave, për procedurat doganore dhe origjinën, prejardhjen dhe destinacionin e mallrave, për të cilat është pezulluar çlirimi ose që janë ndaluar.

Neni 379

Pezullimi i çlirimit apo ndalimi i mallrave përpara miratimit të aplikimit

(Neni 10, 125, 131 i Kodit)

1. Kur autoritetet doganore identifikojnë mallra që dyshohet se shkelin një të drejtë të pronësisë intelektuale, por që nuk përfshihen në vendimin me të cilin është miratuar aplikimi, ato mund, përveç se në rastet e mallrave që prishen shpejt, të pezullojnë çlirimin e këtyre mallrave apo t'i ndalojnë ato.

2. Përpara pezullimit të çlirimit apo ndalimit të mallrave që dyshohet se shkelin një të drejtë të pronësisë intelektuale, autoritetet doganore mund t'i kërkojnë çdo personi fizik apo juridik, që mund të ketë të drejtë të paraqesë aplikim në lidhje me shkeljen e dyshuar të të drejtave të pronësisë intelektuale, për t'i ofruar atyre informacionin e nevojshëm, pa dhënë informacion tjetër përveç të dhënave për sasinë dhe natyrën reale apo të vlerësuar të mallrave, përfshirë imazhet e disponueshme, kur është e duhur.

3. Autoritetet doganore duhet të njoftojnë deklaruesin apo mbajtësin e mallrave për pezullimin e çlirimit të mallrave apo ndalimin e tyre brenda një dite pune nga data e pezullimit apo ndalimit. Kur autoritetet doganore vendosin të njoftojnë mbajtësin e mallrave dhe nëse dy apo më shumë persona konsiderohen si mbajtës të tyre, autoritetet doganore nuk kanë detyrim të njoftojnë më shumë se një nga personat në fjalë. Autoritetet doganore njoftojnë personat fizikë apo juridikë, që kanë të drejtë të paraqesin aplikim në lidhje me shkeljen e dyshuar të të drejtave të pronësisë intelektuale, për pezullimin e çlirimit të mallrave apo ndalimin e tyre në të njëjtën datë apo menjëherë pasi kanë njoftuar deklaruesin apo mbajtësin e mallrave.

Autoritetet doganore mund të konsultohen me autoritetet publike përgjegjëse, me qëllim identifikimin e personave fizikë apo juridikë që kanë të drejtë të paraqesin aplikim. Në njoftime duhet të përfshihet informacion për procedurën e përcaktuar në nenin 384.

4. Autoritetet doganore çlirojnë mallrat ose heqin masën e ndalimit të tyre menjëherë pas përfundimit të të gjitha formaliteteve doganore, në rastet e mëposhtme:

a) Kur nuk kanë identifikuar asnjë person fizik apo juridik që ka të drejtë të paraqesë aplikim në lidhje me shkeljen e pretenduar të të drejtave të pronësisë intelektuale, brenda një dite pune nga data e pezullimit të çlirimit apo ndalimit të mallrave;

b) Kur nuk kanë marrë aplikim në përputhje me pikën 2, të nenit 366, apo nëse e kanë refuzuar një aplikim të tillë.

5. Kur miratohet aplikimi, autoritetet doganore, sipas kërkesës dhe kur është e mundur, njoftojnë mbajtësin e vendimit për emrat dhe adresat e marrësit të ngarkesës, dërguesin dhe deklaruesin apo mbajtësin e mallrave, për procedurat doganore dhe origjinën, prejardhjen dhe destinacionin e mallrave, për të cilat është pezulluar çlirimi ose që janë ndaluar.

Neni 380

Inspektimi dhe marrja e mostrave të mallrave për të cilat është pezulluar çlirimi apo që janë ndaluar

(Nenet 10, 131 të Kodit)

1. Autoritetet doganore i japin mundësi mbajtësit të vendimit dhe deklaruesit apo mbajtësit të mallrave që të kontrollojnë/të inspektojnë mallrat për të cilat është pezulluar çlirimi apo që janë ndaluar.

2. Autoritetet doganore mund të marrin mostra që përfaqësojnë mallrat. Ato mund t'ia dorëzojnë apo t'ia dërgojnë mostrat në fjalë mbajtësit të vendimit, në bazë të kërkesës së tij dhe vetëm për bërjen e analizave e përshejtimin e procedurave në lidhje me mallrat e falsifikuara apo pirate. Çdo analizë e këtyre mostrave kryhet vetëm nën përgjegjësinë dhe me shpenzimet e mbajtësit të vendimit.

3. Mbajtësi i vendimit duhet, përveçse kur nuk e lejojnë rrethanat, t'ua kthejë mostrat e referuara në pikën 2 autoriteteve doganore, pas bërjes së analizave dhe jo më vonë se periudha kur mallrat janë çliruar apo ka përfunduar ndalimi i tyre.

Neni 381

Kushtet e magazinimit

(Neni 131 i Kodit)

Kushtet e magazinimit të mallrave gjatë periudhës së pezullimit të çlirimit apo ndalimit të tyre përcaktohen nga autoritetet doganore.

Neni 382

Përdorimi i lejuar i një informacioni të caktuar nga mbajtësi i vendimit

(Neni 20 i Kodit)

Kur mbajtësi i vendimit ka marrë informacionin e përmendur në pikën 4, të nenit 378, pikën 5, të nenit 379, nenin 380 ose pikën 8, të nenit 387, ai mund ta japë apo ta përdorë informacionin në fjalë vetëm për qëllimet e mëposhtme:

a) Për të filluar një procedim gjyqësor, që përcakton nëse është shkelur një e drejtë e pronësisë intelektuale, si dhe gjatë kohëzgjatjes së procedimit;

b) Në lidhje me hetimet penale për shkelje të një të drejte të pronësisë intelektuale, të kryera nga autoritete të tjera proceduese kompetente;

c) Për të filluar një procedim penal dhe gjatë procedimit;

ç) Për të kërkuar kompensim nga shkelësi apo persona të tjerë;

d) Për të rënë dakord me deklaruesin apo mbajtësin e mallrave që mallrat të shkatërrohen në

përputhje me pikën 1, të nenit 384;

dh) Për të rënë dakord me deklaruesin apo mbajtësin e mallrave për shumën e garancisë, të referuar në shkronjën “a”, të pikës 2, të nenit 385.

Neni 383

Shkëmbimi i informacionit dhe të dhënave ndërmjet autoriteteve doganore

(Neni 20 i Kodit)

1. Pa cenuar legjislacionin në fuqi për mbrojtjen e të dhënave dhe me qëllim dhënien e kontributit për shmangien e tregtisë ndërkombëtare të mallrave që shkelin të drejtat e pronësisë intelektuale, autoritetet doganore mund të shkëmbejnë informacionin dhe të dhënat që disponojnë me autoritetet përgjegjëse të vendeve të tjera, sipas përcaktimeve në marrëveshjet ndërkombëtare në fuqi.

2. Informacioni dhe të dhënat e referuara në pikën 1, shkëmbehen për të lejuar zbatimin efikas të ligjit për dërgesat e mallrave që shkelin një të drejtë të pronësisë intelektuale. Informacioni dhe të dhënat e tilla mund të lidhen me konfiskime, tendencat dhe informacion të përgjithshëm për riskun, duke përfshirë edhe mallrat transit në territorin doganor të Republikës së Shqipërisë dhe që kanë origjinën nga/apo destinacion një vend tjetër jashtë territorit doganor të Republikës së Shqipërisë. Në këto të dhëna mund të përfshihet, kur është e nevojshme, informacion për:

- a) natyrën dhe sasinë e mallrave;
- b) të drejtën e pronësisë intelektuale që dyshohet se shkelet;
- c) origjinën, prejardhjen dhe destinacionin e mallrave;
- ç) lëvizjet e mjeteve të transportit, në veçanti:
 - i) emri i anijes dhe regjistrimi i mjetit të transportit;
 - ii) numrat e referencës së faturës së ngarkesës apo dokumente të tjera transporti;
 - iii) numri i kontejnerëve;
 - iv) pesha e ngarkesës;
 - v) përshkrimi dhe/ose kodi i mallrave;
 - vi) numri i rezervimit;
 - vii) numri i vulës;
 - viii) vendi i ngarkimit të parë;
 - ix) vendi i shkarkimit të fundit;
 - x) vendet e transbordimit;
 - xi) data e parashikuar e mbërritjes në vendin e shkarkimit të fundit.
- d) lëvizjet e kontejnerëve, në veçanti:
 - i) numri i kontejnerit;
 - ii) statusi i ngarkesës së kontejnerit;
 - iii) data e lëvizjes;
 - iv) lloji i lëvizjes (ngarkim, shkarkim, transferim, hyrje, dalje etj.);
 - v) emri i anijes ose regjistrimi i mjetit të transportit;
 - vi) numri i udhëtimit/lundrimit;
 - vii) vendi;
 - viii) fatura e ngarkesës apo dokumente të tjera transporti.

3. Rregullat për shkëmbimin e të dhënave, të referuara në pikat 1 dhe 2, të këtij neni, përcaktohen në marrëveshjet ndërkombëtare dy dhe shumëpalëshe.

Seksioni 5

Shkatërrimi i mallrave, fillimi i procedurave dhe çlirimi i hershëm i mallrave

Neni 384
Shkatërrimi i mallrave dhe fillimi i procedurave
(Neni 178 i Kodit)

1. Mallrat që dyshohet se shkelin një të drejtë të pronësisë intelektuale mund të shkatërrohen nën mbikëqyrje doganore, pa qenë e nevojshme të vërtetohet nëse është shkelur një e drejtë e pronësisë intelektuale, kur plotësohen të gjitha kushtet e mëposhtme:

a) Mbajtësi i vendimit u konfirmon me shkrim autoriteteve doganore, brenda 10 (dhjetë) ditëve pune ose 3 (tri) ditëve pune në rastet e mallrave që prishen shpejt, nga data e njoftimit për pezullimin e çlirimit ose ndalimin e mallrave se, sipas bindjes së tij, është shkelur një e drejtë e pronësisë intelektuale;

b) Mbajtësi i vendimit u jep me shkrim autoriteteve doganore, brenda 10 (dhjetë) ditëve pune, ose 3 (tri) ditëve pune në rastet e mallrave që prishen shpejt, nga data e njoftimit për pezullimin e çlirimit ose ndalimin e mallrave, pëlqimin e tij për shkatërrimin e mallrave;

c) Deklaruesi apo mbajtësi i mallrave u jep me shkrim autoriteteve doganore, brenda 10 (dhjetë) ditëve pune ose 3 (tri) ditëve pune në rastet e mallrave që prishen shpejt, nga data e njoftimit për pezullimin e çlirimit ose ndalimin e mallrave, pëlqimin e tij për shkatërrimin e mallrave. Kur deklaruesi apo mbajtësi i mallrave nuk ka dhënë pëlqimin e tij për shkatërrimin e mallrave dhe as nuk ka njoftuar kundërshtimin e tij pranë autoriteteve doganore brenda këtyre afateve, autoritetet doganore mund të vlerësojnë se deklaruesi apo mbajtësi i mallrave ka dhënë pëlqimin për shkatërrimin e mallrave.

Autoritetet doganore çlirojnë mallrat apo përfundojnë ndalimin e tyre, menjëherë pas përfundimit të të gjitha formaliteteve doganore, kur brenda afateve të përcaktuara në shkronjat “a”, dhe “b”, të pikës 1, ata nuk i kanë marrë të dyja, konfirmimin me shkrim nga mbajtësi i vendimit se, sipas bindjes së tij, është shkelur një e drejtë e pronësisë intelektuale dhe pëlqimin e tij me shkrim për shkatërrimin e mallrave, përveçse kur këto autoritete janë informuar ligjërisht për fillimin e procedimit gjyqësor, nëpërmjet paraqitjes së një kopjeje të aktpadisë, të paraqitur pranë gjykatës kompetente për të vendosur nëse është shkelur një e drejtë e pronësisë intelektuale.

2. Shkatërrimi i mallrave kryhet nën kontrollin doganor dhe nën përgjegjësinë e mbajtësit të vendimit.

Autoritetet doganore mund të marrin mostra përpara shkatërrimit të mallrave. Mostrat që merren mund të përdoren për qëllime edukative.

3. Kur deklaruesi apo mbajtësi i mallrave nuk ka dhënë me shkrim pëlqimin e tij për shkatërrimin e mallrave dhe kur nuk vlerësohet se ai ka dhënë pëlqimin e tij për shkatërrimin, brenda afatit të përcaktuar në shkronjën “c”, të paragrafit të parë, të pikës 1, autoritetet doganore njoftojnë për këtë menjëherë mbajtësin e vendimit. Mbajtësi i vendimit, brenda 10 (dhjetë) ditëve pune ose 3 (tri) ditëve pune në rastin e mallrave që prishen shpejt, nga njoftimi i pezullimit të çlirimit apo ndalimit të mallrave, duhet të fillojë procedimin gjyqësor, nëpërmjet paraqitjes së një kopjeje të aktpadisë, të paraqitur pranë gjykatës kompetente për të vendosur nëse është shkelur një e drejtë e pronësisë intelektuale.

4. Përveçse në rastin e mallrave që prishen shpejt, autoritetet doganore, në raste të përshtatshme, mund të zgjatin afatin e përcaktuar në pikën 3, deri në 10 (dhjetë) ditë pune, me kërkesë të justifikuar nga mbajtësi i vendimit.

5. Autoritetet doganore çlirojnë mallrat apo përfundojnë ndalimin e tyre, menjëherë pas përfundimit të të gjitha formaliteteve doganore, nëse, brenda afateve të përcaktuara në pikat 3 dhe 4, nuk janë informuar ligjërisht, në përputhje me pikën 3, për fillimin e procedimit gjyqësor, nëpërmjet paraqitjes së një kopjeje të aktpadisë, të paraqitur pranë gjykatës kompetente për të vendosur nëse është shkelur një e drejtë e pronësisë intelektuale.

Neni 385

Çlirimi i hershëm i mallrave (Nenet 87 dhe 88, të Kodit)

1. Kur autoritetet doganore janë njoftuar për fillimin e procedurës gjyqësore për të përcaktuar nëse një dizajno industriale, patentë për shpikje, model përdorimi, topografi e një produkti gjysmëpërçues apo varieteti bimor është shkelur, deklaruesi apo mbajtësi i mallrave mund t'u kërkojë autoriteteve doganore çlirimin e mallrave përpara përfundimit të procedurave në fjalë.

2. Autoritetet doganore çlirojnë mallrat apo përfundojnë ndalimin e tyre vetëm kur plotësohen të gjitha kushtet e mëposhtme:

a) Deklaruesi apo mbajtësi i mallrave depoziton një garanci me një vlerë të mjaftueshme për të mbrojtur interesat e mbajtësit të vendimit;

b) Gjykata kompetente, që përcakton nëse është shkelur një e drejtë e pronësisë intelektuale, nuk ka dhënë një masë për sigurim padie për mallrat në fjalë;

c) Kur janë kryer të gjitha formalitetet doganore.

3. Depozitimi i garancisë së referuar në shkronjën "a", të pikës 2, nuk cenon mjetet juridike në dispozicion të mbajtësit të vendimit.

Neni 386

Mallrat për shkatërrim

(Nenet 178 dhe 179, të Kodit)

1. Mallrat që do të shkatërrohen sipas nenit 384 ose nenit 387 nuk duhet:

a) të çlirohen për qarkullim të lirë, përveçse kur autoritetet doganore, me pëlqimin e mbajtësit të vendimit, vendosin se është e nevojshme, në rastin kur mallrat do të riciklohen apo do të asgjësohen /do të shkatërrohen jashtë kanaleve tregtare, përfshirë për qëllime ndërgjegjësimi dhe edukative.

Kushtet sipas të cilave mallrat mund të çlirohen për qarkullim të lirë përcaktohen nga autoritetet doganore;

b) të largohen nga territori doganor i Republikës së Shqipërisë;

c) të eksportohen;

ç) të rieksporthen;

d) të vendosen nën një regjim/procedure pezullimi;

dh) të vendosen në zonë të lirë apo magazinë të lirë.

2. Autoritetet doganore mund të lejojnë që mallrat e referuara në pikën 1, të lëvizin nën mbikëqyrje doganore brenda territorit doganor të Republikës së Shqipërisë me qëllim shkatërrimin e tyre nën mbikëqyrje doganore.

Neni 387

Procedura për shkatërrimin e mallrave në dërgesa të vogla

(Nenet 178 dhe 179, të Kodit)

1. Ky nen zbatohet kur mallrat përmbushin të gjitha kushtet e mëposhtme:

a) Dyshohet se mallrat janë të falsifikuara apo pirate;

b) Janë mallra që nuk prishen shpejt;

c) Ka një vendim që miraton aplikimin për mallrat;

ç) Mbajtësi i vendimit ka aplikuar për përdorimin e procedurës të përcaktuar në këtë nen;

d) Mallrat janë transportuar në dërgesa të vogla.

2. Kur zbatohet procedura e përcaktuar në këtë nen, pikat 3 dhe 4, të nenit 378, dhe pikat 2 dhe 3, të nenit 380, nuk zbatohen.

3. Autoritetet doganore njoftojnë deklaruesin apo mbajtësin e mallrave për pezullimin e çlirimit të

mallrave apo ndalimin e tyre brenda 1 (një) dite pune nga data e pezullimit apo ndalimit në fjalë. Në njoftimin e pezullimit të çlirimit apo ndalimit të mallrave duhet të përfshihet:

- a) informacioni se autoritetet doganore kanë për qëllim të shkatërrojnë mallrat;
- b) të drejtat e deklaruesit apo të mbajtësit të mallrave sipas pikave 4, 5 dhe 6.

4. Deklaruesit apo mbajtësit të mallrave i jepet mundësia për t'u shprehur brenda 10 (dhjetë) ditëve pune nga data e njoftimit të pezullimit të çlirimit apo ndalimit të mallrave.

5. Mallrat në fjalë mund të shkatërrohen kur, brenda 10 (dhjetë) ditëve pune nga data e njoftimit të pezullimit të çlirimit të mallrave apo ndalimit të tyre, deklaruesi apo mbajtësi i mallrave ka dhënë pëlqimin e tij për shkatërrimin e mallrave, pranë autoriteteve doganore.

6. Kur deklaruesi apo mbajtësi i mallrave nuk ka dhënë pëlqimin e tij për shkatërrimin e mallrave, por as nuk ka njoftuar kundërshtimin e tij pranë autoriteteve doganore, brenda afatit të referuar në pikën 5, autoritetet doganore mund të vlerësojnë se deklaruesi apo mbajtësi i mallrave ka dhënë pëlqimin e tij për shkatërrimin e tyre.

7. Shkatërrimi duhet të kryhet nën mbikëqyrje doganore. Autoritetet doganore, sipas kërkesës dhe kur është e mundur, i vënë në dispozicion mbajtësit të vendimit informacion për sasinë reale apo të vlerësuar të mallrave të shkatërruara dhe natyrën e tyre.

8. Kur deklaruesi apo mbajtësi i mallrave nuk ka dhënë me shkrim pëlqimin e tij dhe kur nuk vlerësohet se ka dhënë pëlqimin e tij për shkatërrimin e mallrave në përputhje me pikën 6, autoritetet doganore njoftojnë menjëherë mbajtësin e vendimit për këtë dhe për sasinë e natyrën e mallrave, përfshirë imazhet nëse është e nevojshme. Autoritetet doganore, gjithashtu, në bazë të një kërkesë dhe nëse i disponon, i njoftojnë mbajtësit të vendimit emrat dhe adresat e pritësit të mallit, të dërguesit dhe deklaruesit apo mbajtësit të mallrave, procedurën doganore dhe originën, prejardhjen dhe destinacionin e mallrave, çlirimi i të cilave është pezulluar apo që janë ndaluar.

9. Autoritetet doganore çlirojnë mallrat apo përfundojnë ndalimin e tyre menjëherë pas përfundimit të të gjitha formaliteteve doganore, kur nuk kanë marrë informacion nga mbajtësi i vendimit për fillimin e procedimit gjyqësor, nëpërmjet paraqitjes së një kopjeje të aktpadisë, të paraqitur pranë gjykatës kompetente për të vendosur nëse është shkelur një e drejtë e pronësisë intelektuale, brenda 10 (dhjetë) ditëve pune nga data e njoftimit të referuar në pikën 8.

Seksioni 6

Përgjegjësia, kostot dhe sanksionet

Neni 388

Përgjegjësia e autoriteteve doganore

Vendimi që miraton një aplikim nuk i jep të drejtë mbajtësit të vendimit për të kërkuar kompensim nëse mallrat që dyshohen për shkelje të një të drejte të pronësisë intelektuale nuk janë zbuluar nga zyra doganore dhe, si rrjedhojë, janë çliruar apo nuk është kryer asnjë veprim për ndalimin e tyre.

Neni 389

Përgjegjësia e mbajtësit të vendimit

(Neni 265 i Kodit)

Kur një procedurë gjyqësore e filluar sipas këtij vendimi ndërpritet/pushohet për shkak të një veprimi apo mosveprimi nga mbajtësi i vendimit, kur mostrat e marra sipas pikës 2, të nenit 380, nuk kthehen apo janë dëmtuar dhe janë jashtë përdorimit, për shkak të një veprimi apo mosveprimi nga mbajtësi i vendimit, apo kur vërtetohet se mallrat në fjalë nuk shkelin një të drejtë të pronësisë intelektuale, mbajtësi i vendimit është përgjegjës kundrejt çdo mbajtësi të mallrave apo deklaruesi, i cili

ka pësuar dëm nga kjo situatë, në përputhje me legjislacionin specifik në fuqi.

Neni 390
Kostot
(Neni 53 i Kodit)

1. Kur kërkohet nga autoritetet doganore, mbajtësi i vendimit duhet të kompensojë kostot e përballuara nga autoritetet doganore apo palët e tjera që veprojnë për llogari të autoriteteve doganore, nga momenti i pezullimit të çlirimit të mallrave apo ndalimit të tyre, përfshirë magazinimin dhe trajtimin e mallrave, në përputhje me pikën 1, të nenit 378, pikën 1, të nenit 379, dhe pikat 2 e 3, të nenit 380, dhe kur përdoren masa korrigjuese, siç është shkatërrimi i mallrave, në përputhje me nenet 384 dhe 387. Mbajtësi i vendimit, të cilit i është njoftuar pezullimi i çlirimit të mallrave apo ndalimi i tyre, në bazë të kërkesës së tij, informohet nga autoritetet doganore për vendin dhe mënyrën e magazinimit të këtyre mallrave dhe për koston e parashikuar të magazinimit, referuar në këtë pikë. Informacioni për kostot e vlerësuara mund të shprehet në terma të kohës, produkteve, volumit, peshës ose shërbimit në varësi të rrethanave të magazinimit dhe natyrës së mallrave.

2. Ky nen nuk cenon të drejtën e mbajtësit të vendimit për të kërkuar kompensim nga shkelësi apo personat e tjerë në përputhje me legjislacionin në fuqi.

3. Mbajtësi i vendimit paguan çdo përkthim që kërkohet nga autoritetet doganore në lidhje me mallrat që dyshohet se shkelin të drejtat e pronësisë intelektuale.

Seksioni 7
Baza e të dhënave qendrore dhe mbrojtja e të dhënave

Neni 391
Krijimi dhe administrimi i bazës elektronike të të dhënave
(Neni 20 i Kodit)

1. Drejtoria e Përgjithshme e Doganave krijon dhe mirëmban bazën e të dhënave në formë elektronike. Baza e të dhënave përmban të dhëna që kanë të bëjnë me mbrojtjen e të drejtave të pronësisë intelektuale, përfshirë informacionin e përmendur në pikën 2, të nenit 367, dhe nenin 375.

2. Personeli doganor që administron bazën e të dhënave është përgjegjës për hedhjen dhe/ose ndryshimin e të dhënave, saktësinë, përshtatshmërinë, rëndësinë dhe konfidencialitetin e tyre.

Nëse është e nevojshme, ajo ndryshon, shton apo korrigjon të dhënat në fjalë. Të dhënat personale trajtohen në përputhje me dispozitat në fuqi, në veçanti, me dispozitat për mbrojtjen e të dhënave.

3. Drejtori i Përgjithshëm miraton strukturat doganore dhe pozicionet e punës së punonjësve që kanë akses në bazën e të dhënave, sipas përgjegjësisë dhe funksioneve që ato/ata kanë.

4. Baza e të dhënave është konfidenciale dhe në të kanë të drejtë të regjistrojnë të dhëna apo t'i përdorin ato vetëm punonjësit doganorë të autorizuar për këtë qëllim nga drejtori i Përgjithshëm i Doganave.

Neni 392
Dispozitat për mbrojtjen e të dhënave
(Neni 20 i Kodit)

1. Përpunimi i të dhënave personale nga autoriteti doganor kompetent do të kryhet në përputhje me dispozitat e legjislacionit në fuqi për mbrojtjen e të dhënave në Republikën e Shqipërisë.

2. Të dhënat personale merren dhe përdoren vetëm për qëllimet e këtij vendimi. Të dhënat personale të mbledhura duhet të jenë të sakta dhe të përditësuara.

3. Drejtoria e Përgjithshme e Doganave, që përfshin të dhëna personale në bazën e të dhënave, kontrollojnë përpunimin e këtyre të dhënave.

4. Një subjekt të dhënash ka të drejtë aksesit për të dhënat personale në lidhje me atë vetë, të cilat përpunohen nëpërmjet bazës të të dhënave, nëse është e nevojshme, si dhe ka të drejtë të ndryshojë, të fshijë apo të ndalojë të dhënat personale, në përputhje me legjislacionin në fuqi për mbrojtjen e të dhënave personale.

5. Kërkesat për ushtrimin e të drejtave të aksesit, ndryshimit, fshirjes apo ndalimit të të dhënave duhet të paraqiten pranë Drejtorisë së Përgjithshme të Doganave, e cila është organi kompetent që i shqyrton ato.

6. Të dhënat personale nuk ruhen për më shumë se gjashtë muaj nga data e revokimit të vendimit që miraton aplikimin apo nga data e përfundimit të afatit, gjatë të cilit autoritetet doganore duhet të kryejnë veprimet për mbrojtjen e një të drejte të pronësisë intelektuale.

7. Kur mbajtësi i vendimit ka filluar një procedim gjyqësor, në përputhje me pikën 3, të nenit 384, ose pikën 9, të nenit 387, dhe ka njoftuar autoritetet doganore për fillimin e procedurës në fjalë, të dhënat personale ruhen gjashtë muaj pas vendimit gjyqësor të formës së prerë, që përcakton nëse ka pasur shkelje të një të drejte të pronësisë intelektuale.

TITULLI VI

ÇLIRIMI PËR QARKULLIM TË LIRË DHE PËRJASHTIMI NGA DETYRIMI I IMPORTIT

KREU 1

Çlirimi për qarkullim të lirë

Neni 393

Autorizimi për hartimin e certifikatës për peshimin e bananeve

(Pika 3, e nenit 150, të Kodit)

Drejtoria e Përgjithshme e Doganave jep autorizim për hartimin e dokumentit shoqërues për deklaratat doganore standarde që vërteton peshën e bananeve të freskëta, të klasifikuara sipas kodit 0803 90 10 të NK, të cilat janë objekt i detyrimit të importit ('certifikatat e peshës së bananeve'), nëse aplikuesi përmbush të gjitha kushtet e mëposhtme:

- a) Plotëson kriterin e përcaktuar në shkronjën "a", të nenit 41, të Kodit;
- b) Është i përfshirë në importin, transportin, magazinimin ose trajtimin e bananeve të freskëta, të klasifikuara në kodin 0803 90 10 të NK, që janë objekt i taksës së importit;
- c) Jep garancitë e nevojshme për zhvillimin e duhur të peshimit;
- ç) Ka në dispozicion të tij pajisje peshimi të përshtatshme;
- d) Mban regjistrime që u mundësojnë autoriteteve doganore kryerjen e kontrolleve të nevojshme.

Neni 394

Afati kohor

(Pika 3, e nenit 27, të Kodit)

Vendimi mbi aplikimin për autorizimin e referuar në nenin 393 merret pa vonesë dhe jo më vonë se 30 ditë nga data e depozitimit të aplikimit.

Neni 395

Certifikata e peshimit të bananeve

(Pika 1, e nenit 150, të Kodit)

1. Operatori ekonomik i autorizuar për të hartuar certifikata në përputhje me nenin 393 (certifikatat e peshimit të bananeve), i jep autoriteteve doganore njoftim paraprak të peshimit të një ngarkese bananesh të freskëta për qëllimin e hartimit të një certifikate, duke dhënë detajet e llojit të paketimit, origjinën, kohën dhe vendin e peshimit.

2. Certifikata e peshimit të bananeve do të jetë në posedim të deklaruesit dhe në dispozicion të autoriteteve doganore në kohën e depozitimit të deklaratës për çlirim për qarkullim të lirë të bananeve të freskëta me kodin NK 0803 90 10, objekt i detyrimit doganor të importit.

3. Duke anashkaluar pikën 2, me kërkesë të deklaruesit për një autorizim, siç përcaktohet në nenin 152, të Kodit, autoritetet doganore mund të vendosin, për çlirimin e dërgesave të bananeve të freskëta për qarkullim të lirë, në bazë të një deklarate të thjeshtuar të peshimit në kushtet e mëposhtme:

a) Autorizimi do të detyrojë importuesin t'i transportojë bananet në gjendjen e tyre të pandryshuar nga e njëjta ngarkesë e caktuar e peshimit të autorizuar, të përmendur në deklaratën e thjeshtuar, ku do të përcaktohet pesha dhe vlera e saktë;

b) Deklaruesi është përgjegjës për dorëzimin e certifikatës së peshimit në zyrën doganore për çlirim në qarkullimit të lirë brenda 10 ditëve kalendrike nga pranimi i deklaratës së thjeshtuar;

c) Deklaruesi duhet të paraqesë një garanci siç përcaktohet në pikën 1, të nenit 176, të Kodit. Pesha e përkohshme mund të përcaktohet duke u nisur nga një certifikatë e mëparshme e peshimit për bananet e të njëjtës lloj dhe origjinë.

4. Certifikata e peshimit të bananeve do të hartohet duke përdorur formularin e paraqitur në aneksin 61- 02, të shtojcës B bashkëlidhur këtij vendimi dhe pjesë përbërëse e tij.

Neni 396

Mjetet e komunikimit të certifikatës për peshën e bananeve

(Neni 17, pikat 2 dhe 3, shkronja “a”, të Kodit)

Certifikata e peshës së bananeve mund të hartohet dhe të dorëzohet duke përdorur mjete të ndryshme nga teknikat informatike të përpunimit të të dhënave.

Neni 397

Kontrolli i peshimit të bananeve të freskëta

(Neni 169 i Kodit)

Zyrat doganore do të kontrollojnë të paktën 5% të numrit të përgjithshëm të certifikatave të peshimit të bananeve të paraqitura çdo vit, duke qenë të pranishëm në peshimin e mostrave të bananeve nga operatori ekonomik i autorizuar për të hartuar certifikatat e peshimit të bananeve, ose duke peshuar ato mostra vetë në përputhje me procedurën e parashikuar në pikat 1, 2 dhe 3 të aneksit 61-03, të shtojcës B, bashkëlidhur këtij vendimi dhe pjesë përbërëse e tij.

KREU 2

Operacione të privileguara

Seksioni 1

Përjashtime nga detyrimi i importit

Neni 398

Fusha e zbatimit, të përgjithshme

1. Mbështetur në nenin 184 dhe 188 të Kodit, ky kre përcakton rregullat procedurale dhe rastet në të

cilat, për shkak të rrethanave të veçanta, jepet përjashtimi nga detyrimet e importit kur mallrat çlirohen për qarkullim të lirë.

2. Kreu 2, zbatohet si për mallrat e deklaruar për qarkullim të lirë që vijnë direkt nga vendet e tjera, ashtu edhe për mallrat e deklaruar për qarkullim të lirë pasi i janë nënshtruar një regjim tjetër doganor.

3. Autoritetet kompetente doganore, marrin të gjitha masat e nevojshme për të siguruar që mallrat e vendosura në qarkullim të lirë, kur përjashtimi nga detyrimet e importit është dhënë me kusht të vendosjes së mallrave në një përdorim të veçantë nga marrësi, të mos përdoren për qëllime të tjera pa paguar më parë detyrimet e importit, përveçse kur një përdorim i ndryshëm përputhet me kushtet e përcaktuara në këtë vendim.

4. Kur i njëjti person në të njëjtën kohë plotëson kushtet e përcaktuara për dhënien e përjashtimit nga detyrimet e importit, në bazë të më shumë se një dispozite të këtij vendimi, këto të fundit zbatohen njëkohësisht.

5. Në rastet kur ky vendim parashikon që përjashtimi përfitohet kundrejt plotësimit të kushteve të caktuara, personi i interesuar duhet të paraqesë prova të mjaftueshme për autoritetet doganore mbi plotësimin e këtyre kushteve.

6. Në rast të importimit me përjashtim nga detyrimet e importit, që jepet brenda vlerës ekuivalente në lekë të shumës të përcaktuar në Euro, autoritetet kompetente doganore rumbullakosin shumën e dalë nga këmbimi/ konvertimi i asaj shume në lekë.

Kursi i këmbimit aplikohet në përputhje me nenet 54 dhe 55 të ligjit nr. 102, datë 31.7.2014, “Kodi Doganor i Republikës së Shqipërisë”, i ndryshuar.

Neni 399 **Përkufizime**

Për qëllim të këtij kreu me termat e mëposhtme nënkuptohen:

a) “detyrim importi”, detyrimi doganor që bazohet në Tarifën Doganore të Republikës së Shqipërisë;
b) “sende vetjake”, çdo pronë e destinuar për përdorim personal nga personat përkatës apo për plotësimin e nevojave të tyre shtëpiake.

Në veçanti, “sende vetjake” përbëjnë,:

i. sendet shtëpiake;
ii. biçikletat, motomjetet dhe ciklomotorët, automjetet private dhe rimorkiot, rulotët për kamping, barkat/jartet private (familjare) apo për argëtim dhe mjetet ajrore private.

Sende shtëpiake përbëjnë gjithashtu dhe sendet e nevojshme shtëpiake, të cilat plotësojnë nevojat normale familjare, kafshët shtëpiake, manarët dhe kafshët me samar, si dhe instrumentet e mbartshëm të arteve të aplikuara, të cilat janë të nevojshme për të ushtruar profesionin apo zanatin e personit përkatës. Prona personale duhet të jetë e tillë që për nga natyra dhe sasia të tregojë se nuk importohet për qëllime tregtare.

c) “sende shtëpiake”, sendet personale, shtresa dhe mbulesa për përdorim shtëpiak, mobilie, dhe pajisje për qëllime të përdorimit personal të të interesuarit ose për të plotësuar nevojat e tij shtëpiake;

ç) “produkte alkoolike”, produktet (birrë, verë, aperitivë me përmbajtje vere ose alkooli, konjak ose brendi, liker, ose pije të tjera alkoolike etj.), që përfshihen në kërret nga 2203 deri 2208 të Nomenklaturës së Kombinuar të Mallrave.

Nënseksioni 1

Sendet vetjake që u përkasin individëve, që ndryshojnë vendqëndrimin (vendbanimin) nga një vend tjetër për në Republikën e Shqipërisë

Neni 400

Sendet vetjake

1. Në përputhje me nenet 401 deri 408, sendet vetjake që importohet nga individë që ndryshojnë vendqëndrimin e tyre të zakonshëm nga një vend tjetër për në Republikën e Shqipërisë, përjashtohet nga detyrimet e importit.

2. Në këto raste do të përdoret formulari i sigurimit të përjashtimit nga detyrimet e importit i përcaktuar në aneksin 8, të shtojcës D bashkëlidhur këtij vendimi dhe pjesë përbërëse e tij.

Neni 401

Kufizimi në sende vetjake

1. Përjashtimi kufizohet në sende vetjake të cilat:

a) kanë qenë në posedim nga individ i interesuar dhe në rastet e mallrave jo të konsumueshme të jenë përdorur nga individ i interesuar në vendin e mëparshëm të qëndrimit, për të paktën 6 muaj përpara datës në të cilën ai pushon së qeni banor i vendit prej nga është nisur, me përjashtim të rasteve të veçanta të justifikuara nga rrethanat;

b) kanë për qëllim të përdoren për të njëjtat qëllime edhe në vendbanimin e ri.

2. Për automjetet private dhe rimorkiot, motomjetet dhe ciklomotorët, rulotët për kamping, barkat/jahetet private (familjare) apo për argëtim dhe mjetet ajrore private, përjashtimi kufizohet nga përmbushja e kushteve të mëposhtme:

a) i interesuari ka qenë pronari i regjistruar për automjetin, motomjetin dhe ciklomotorin, rulotën, mjetin lundrues ose mjetin ajror, në vendet ku zbatohet një regjistrim mjetes, për të paktën 12 muaj përpara transferimit të tij në Republikën e Shqipërisë;

b) ka qenë pronë e të interesuarit për të paktën 12 muaj, përpara se të sillej në territorin doganor të Republikës së Shqipërisë;

c) ka qenë përdorur nga i interesuari në një vend tjetër normalisht për të paktën 12 muaj përpara se të sillej në territorin doganor të Republikës së Shqipërisë;

ç) pasi të importohet duke u përjashtuar nga detyrimet e importit, nuk mund të jepen hua, vendosen si garanci, jepen me qira ose tjetërsohet/transferohen si kundrejt pagesës, ashtu edhe falas, deri në dy vjet pas kryerjes së formaliteteve doganore, përveçse kur paguan detyrimet e importit dhe gjithë taksat e tjera prej të cilave ishte përjashtuar;

d) përjashtimi nga detyrimet e importit i nënshtrohet depozitimit të një garancie.

Forma dhe shumica e garancisë përcaktohen nga autoritetet doganore kompetente. Garancia çlirohet pas kalimit të dy vjetëve nga momenti i depozitimit të saj në zyrën ku është bërë çlirimi i mallrave mbi bazën e paraqitjes së provave bindëse që personi i interesuar është dhe ka qenë gjatë gjithë kësaj periudhe kohe pronari i regjistruar i automjetit, motomjetit dhe ciklomotorit, ruletës, mjetit të lundrimit, ose mjetit të fluturimit për të cilin është dhënë përjashtimi.

Neni 402

Ratet kur jepet përjashtimi

1. Përjashtimi jepet vetëm për individët të cilët kanë pasur vendbanim të zakonshëm, për të paktën 12 muaj në mënyrë të vazhdueshme, jashtë territorit doganor të Republikës së Shqipërisë.

2. Megjithatë, autoritetet doganore kompetente mund të lejojnë anashkalim nga rregulli i parashikuar në pikën 1 të këtij neni me kusht që synimi i të interesuarit të ketë qenë qartësisht qëndrimi jashtë territorit doganor të Republikës së Shqipërisë për një periudhë të vazhdueshme prej të paktën 12 muaj.

Neni 403

Mallrat për të cilat nuk jepen përjashtime

Përjashtimi nuk jepet për:

- a) produktet alkoolike;
- b) duhanin dhe produktet e duhanit;
- c) mjetet tregtare të transportit;
- ç) artikuj për përdorim në ushtrimin e një tregtie ose profesioni, të ndryshëm nga instrumentet e mbartshëm të arteve të aplikuara ose të lira.

Neni 404

Hedhja në qarkullim të lirë

1. Përveç rasteve të veçanta, përjashtimi jepet vetëm për sendet vetjake të hedhura në qarkullim të lirë brenda 12 muajsh nga data në të cilën individi i interesuari është vendosur në vendbanimin e tij normal në territorin doganor të Republikës së Shqipërisë.

2. Sendet vetjake mund të vendosen në qarkullim të lirë, pjesë-pjesë, brenda afatit të përmendur në pikën 1 të këtij neni.

Neni 405

Kushtëzime

1. Me përjashtim të përcaktimit të shkronjës “ç”, të pikës 2 të nenit 401, sendet vetjake që janë lejuar me përjashtim nga detyrimet e importit, deri në përfundimin e afatit prej 12 muajsh nga data në të cilën është pranuar deklarata për vendosjen në qarkullim të lirë, nuk mund të jepen hua, vendosen si garanci, jepen me qira ose transferohen, si kundrejt pagesës, ashtu edhe falas, pa njoftuar paraprakisht autoritetet kompetente doganore për këtë qëllim.

2. Huadhënia, lënia si garanci, qiradhënia apo tjetërsimi përpara përfundimit të afatit të përmendur në pikën 1, sjell si pasojë zbatimin e detyrimeve përkatëse të importit për sendin në fjalë, sipas nivelit të detyrimeve të importit në fuqi në datën në të cilën kryhet huadhënia, dhënia si garanci, qiradhënia apo tjetërsimi, dhe në bazë të llojit të mallrave si dhe të vlerës doganore të verifikuar apo të pranuar në po atë datë nga autoritetet doganore kompetente.

Neni 406

Caktimi i vendbanimit

1. Pavarësisht nga sa parashikohet në pikën 1, të nenit 404, përjashtim mund të jepet për sendet vetjake të hedhura në qarkullim të lirë, përpara se i interesuari të caktojë vendbanimin e tij të zakonshëm në territorin doganor të Republikës së Shqipërisë, me kusht që ai të marrë përsipër të caktojë vendbanimin e zakonshëm në Shqipëri, brenda një afati 6 mujor. Marrja përsipër e këtij detyrimi shoqërohet nga dhënia e një garancie, forma dhe shuma e së cilës përcaktohet nga autoritetet doganore kompetente.

2. Kur zbatohet pika 1 e këtij neni, afati i përcaktuar në shkronjën “a” të nenit 401, llogaritet nga data në të cilën sendet vetjake janë sjellë në territorin doganor të Republikës së Shqipërisë.

Neni 407

Angazhimet profesionale

1. Kur, për shkak të angazhimeve profesionale, individi i interesuar largohet nga vendi ku ka patur vendbanimin e përhershëm, pa u vendosur në vendbanimin e tij në Republikën e Shqipërisë, edhe pse qëllimi i tij është ta bëjë këtë, autoriteti doganor mund të lejojë përjashtimin nga detyrimet doganore për sendet vetjake të cilat ai i transferon në Republikën e Shqipërisë.

2. Përfshirja nga detyrimet e importit për sendet vetjake të përmendura në pikën 1 do të lejohet, sipas kushteve të parashikuara në nenet 400 deri 405, me kushtin që:

a) afatet e përcaktuara në shkronjën “a” të nenit 401 dhe pikës 1 të nenit 404, të llogariten prej datës në të cilën sendet vetjake janë sjellë në territorin doganor të Republikës së Shqipërisë;

b) afati i përcaktuar në pikën 1 të nenit 405, të llogaritet nga data kur individi i interesuar realisht përcakton vendbanimin e tij normal në Republikën e Shqipërisë.

3. Përfshirja nga detyrimet është subjekt i deklarimit nga individi i interesuar se ai më të vërtetë do të vendoset në Republikën e Shqipërisë, brenda një afati të caktuar nga autoriteti doganor, në përputhje me rrethanat. Autoriteti doganor kompetent mund të kërkojë që deklarimi të shoqërohet me depozitimin e një garancie, forma dhe shuma e së cilës përcaktohet nga këto autoritete.

Neni 408

Rrethanat politike të veçanta

Autoriteti doganor kompetent mund të anashkalojë dispozitat e shkronjave “a” dhe “b” të nenit 401, shkronjave “c” dhe “ç” të nenit 403, dhe nenit 405, kur një individ transferon vendbanimin e tij nga një vend tjetër në Republikën e Shqipërisë, si rezultat i rrethanave politike të veçanta.

Nënseksioni 2

Mallrat e importuara në raste martesë

Neni 409

Përfshirje në raste martesë

1. Në përputhje me nenet 410 deri 413, veshjet martesore dhe sendet shtëpiake, të reja ose jo, që i përkasin një individ që me rastin e martesës së tij/saj transferon vendbanimin e tij të zakonshëm nga një vend tjetër, në territorin doganor të Republikës së Shqipërisë, importohen duke u përfshirë nga detyrimet importit.

2. Në të njëjtat kushte, dhuratat e dhëna me rastin e martesës dhe që janë marre nga një individ i cili plotëson kushtet e përcaktuara në pikën 1, që e ka vendbanimin e tij të zakonshëm në një vend tjetër, përfshihet gjithashtu nga detyrimet e importit. Megjithatë, vlera e çdo dhurate që përfshihet nga detyrimet e importit, nuk duhet të kalojë vlerën ekuivalente në lekë të shumës 1 000 Euro.

Neni 410

Kushtëzime

Përfshirja i referuar në nenin 409, mund të jepet vetëm për individë:

a) vendbanimi i zakonshëm i të cilëve ka qenë jashtë territorit doganor të Republikës së Shqipërisë për të paktën 12 muaj të vazhdueshme. Megjithatë, përfshirje nga ky rregull mund të jepet, me kusht që i interesuari të provojë qartë se synonte të qëndronte jashtë territorit doganor të Republikës së Shqipërisë për një periudhë të pandërprerë kohe prej të paktën 12 muajsh;

b) që paraqesin prova të martesës së tyre.

Neni 411

Produktet alkoolike dhe duhani

Asnjë përfshirje nuk duhet të jepet për produktet alkoolike, duhanin dhe produktet e duhanit.

Neni 412

Hedhja në qarkullim të lirë

1. Me përjashtim të rrethanave të jashtëzakonshme, përjashtimi nga detyrimet e importit jepet vetëm për mallrat e vendosura në qarkullim të lirë:

a) jo më herët se dy muaj përpara datës së caktuar për martesë (në këtë rast përjashtimi jepet vetëm kundrejt depozitimit të garancisë përkatëse, forma dhe shuma e të cilës caktohet nga autoritetet doganore kompetente); dhe

b) jo më vonë se katër muaj pas datës së martesës.

2. Mallrat e referuara në nenin 409, mund të vendosen në qarkullim të lirë në disa dërgesa të veçanta, brenda afatit të përmendur në pikën 1.

Neni 413

Kushtëzime

1. Mallrat që janë lejuar me përjashtim nga detyrimet e importit në përputhje me nenin 409, deri në përfundimin e afatit prej 12 muajsh nga data në të cilën është pranuar deklarata për vendosjen në qarkullim të lirë, nuk mund të jepen hua, vendosen si garanci, jepen me qira ose transferohen, si kundrejt pagesës, ashtu edhe falas, pa njoftuar paraprakisht autoritetet kompetente doganore për këtë qëllim.

2. Huadhënia, dhënia si garanci, qiradhënia ose tjetërsimi përpara përfundimit të periudhës 12 mujore bëhet vetëm kundrejt pagesës së detyrimeve përkatëse të importit për mallrat në fjalë, duke zbatuar nivelin e detyrimeve të importit në fuqi në datën në të cilën kryhet huadhënia, lënia si garanci, qiradhënia ose tjetërsimi, në baze të llojit të mallrave dhe vlerës doganore të tyre, të verifikuar apo të pranuar në po atë datë nga autoritetet doganore kompetente.

Nënseksioni 3

Sendet personale të fituara nga trashëgimia

Neni 414

Sendet personale

1. Në përputhje me nenet 415, 416 dhe 417, sendet personale të fituara nëpërmjet trashëgimisë, nga një individ me vendbanim të zakonshëm në territorin doganor të Republikës së Shqipërisë, lejohet të importohet me përjashtim nga detyrimet e importit.

2. Për qëllim të pikës 1, “sende personale” do të thotë gjithë pasuria e referuar në shkronjën “b” të nenit 399, të cilat përbëjnë pasurinë e trashëgimlënësit.

Përjashtimi nuk jepet për:

a) produktet alkoolike;

Neni 415

Mallrat për të cilat nuk jepen përjashtime

b) duhanin dhe produktet e duhanit;

c) mjetet e transportit tregtar;

ç) artikuj për përdorim gjatë ushtrimit të një tregtie apo profesioni, të ndryshme nga instrumentet e arteve të aplikuara ose të lira, të cilat i nevojiteshin trashëgimlënësit për ushtrimin e tregtisë ose të profesionit;

d) stoqet e lëndëve të para dhe produkteve ose gjysmë produkteve;

dh) stoqet e produkte bujqësore dhe blegtorale, përfshi bagëtitë, që kalojnë sasi të përshtatshme për nevoja të përdorimit familjar.

Neni 416 **Kufizime**

1. Përrjashtimi lejohet vetëm për sendet personale të vendosur në qarkullim të lirë jo më vonë se dy vjet nga data në të cilën i interesuari fiton të drejtën e pronësisë mbi këto sende (ndarja përfundimtare e trashëgimisë).

Megjithatë, për raste të veçanta, kjo periudhë mund të zgjatet nga autoritetet doganore kompetente.

2. Sendet personale mund të importohen në disa dërgesa të veçanta brenda afatit të përmendur në pikën

Neni 417 **Trashëgimia nga personat juridikë**

Nenet 414, 415 dhe 416, zbatohen rast pas rasti në mënyrë analoge, për sendet personale të fituara me trashëgimi nga personat juridikë që merren me aktivitet jo fitimprurës, të vendosur në territorin doganor të Republikës së Shqipërisë.

Nënseksioni 4 **Uniformat shkollore, materialet e studimit dhe pajisjet shtëpiake për përdorim nga nxënës e studentë**

Neni 418 **Përrjashtime për nxënësit dhe studentët**

1. Uniformat shkollore, materialet e studimit dhe pajisjet shtëpiake që përbëjnë në vetvete materiale të zakonshme për dhomat studentore dhe që i përkasin nxënësve ose studenteve të huaj që do të qëndrojnë në territorin doganor të Republikës së Shqipërisë për qëllime studimi dhe u nevojiten atyre për përdorim vetjak gjatë kohës së studimeve të tyre, përrjashtohen nga detyrimet e importit.

2. Për qëllim të pikës 1:

a) “nxënës ose student”, është çdo person i regjistruar në një institucion edukimi për të ndjekur me kohë të plotë mësimet e ofruara në këtë institucion;

b) “uniformë” është veshmbathje, shtresa shtëpiake si dhe veshje, të reja ose jo;

c) “materiale shkollore”, janë sendet dhe instrumentet (përfshirë makinat llogaritëse dhe makinat e shkrimit), që zakonisht përdoren nga nxënësit apo studentët për nevoja të studimeve të tyre.

Neni 419 **Kufizim**

Përrjashtimi lejohet të paktën një herë për çdo vit shkollor.

Nënseksioni 5 **Dërgesat me vlerë të papërfillshme**

Neni 420 **Mallra me vlerë të papërfillshme**

1. Në përputhje me nenin 421, çdo dërgesë mallrash me karakter jotregtar, e përbërë nga mallra me vlerë të papërfillshme, të dërguara drejtpërdrejt nga një vend tjetër te një marrës në Republikën e Shqipërisë, përrjashtohet nga detyrimet e importit.

2. Për qëllime të pikës 1, mallra me vlerë të papërfillshme janë:
- a) mallrat e blera nëpërmjet porosisë nga interneti, që importohen nëpërmjet dërgesave postale, vlera e të cilave nuk kalon vlerën ekuivalente në lekë të shumës 22 euro;
 - b) dërgesat e mallrave nga një individ jashtë Republikës së Shqipërisë për një individ në Republikën e Shqipërisë, të një natyre rastësore, pa pagesë dhe që përmbajnë vetëm mallrat e destinuara për përdorim personal ose familjar prej marrësit, vlera e të cilave nuk e kalon vlerën ekuivalente në lekë të shumës 45 euro.

Neni 421

Mallrat për të cilat nuk jepen përjashtime

Përjashtimi nuk zbatohet për mallrat e mëposhtme:

- a) produktet alkoolike;
- b) parfumet dhe ujë tualeti;
- c) duhanet dhe produktet e duhanit.

Nënseksioni 6

Dërgesa të dërguara falas nga një individ tek një tjetër

Neni 422

Përjashtime për dërgesa të dërguara falas

1. Në përputhje me nenet 423 dhe 424, mallrat që përbëjnë dërgesat që dërgohen nga një individ nga një vend tjetër tek një individ tjetër që jeton në territorin doganor të Republikës së Shqipërisë përjashtohen nga detyrimet e importit, me kusht që këto importe nuk janë të natyrës tregtare.
2. Për qëllime të pikës 1, dërgesat e importuara janë ‘mallra të natyrës jotregtare’ nëse ato:
 - a) janë të një natyre rastësore;
 - b) përmbajnë mallra që ekskluzivisht janë për përdorim personal të pritësit të dërgesës apo familjes së tij dhe të cilat sipas natyrës apo sasisë së tyre, nuk lënë dyshim se do të përdoren për qëllime tregtare;
 - c) i dërgohen pritësit nga dërguesi pa asnjë lloj pagese.

Neni 423

Vlera e dërgesës

1. Përjashtimi i parashikuar në pikën 1 të nenit 422, zbatohet për dërgesa vlera e së cilës nuk kalon vlerën ekuivalente në lekë të shumës 45 Euro, duke përfshirë edhe vlerën e mallrave të përmendur në nenin 424.
2. Kur vlera e përgjithshme për një dërgesë e përbërë prej dy ose më shumë artikujve e kalon shumën e përmendur në pikën 1, përjashtimi deri në atë shumë jepet për këta artikuj, nëse të importuar veçmas do t'u jepej përjashtimi, me kusht që vlera e një artikulli individual nuk mund të ndahet.

Neni 424

Kufizime

Përjashtimi i parashikuar në pikën 1 të nenit 422, duhet të kufizohet, për dërgesë, në sasi të dhëna për çdo mall të listuar si më poshtë:

- a) produkte të duhanit:
 - 50 cigare,
 - 25 cigarillo (puro e hollë e vogël me peshë maksimale deri në tri gramë secila),
 - 10 cigare puro,

- 50 gramë duhan për tymosje, ose
- një përzgjedhje proporcionale nga këto produkte të ndryshme;
- b) alkool dhe pije alkoolike:
 - pije të distiluara dhe pije alkoolike me përbërje alkooli mbi 22% të vëllimit; etil alkool jo i denaturuar me vëllim 80% e më tepër: 1 liter, ose
 - pije të distiluara dhe pije alkoolike, si dhe aperitivë me bazë vere apo alkooli, rum, sake apo pije të ngjashme alkoolike me përbërje alkooli që nuk kalon 22% të vëllimit; verëra me gaz, verëra liker: një litër apo një përzierje proporcionale nga këto produkte të ndryshme, dhe
 - verë e pa gazuar: dy litra;
- c) parfume:
 - 50 gram, ose
 - ujëra tualeti: 0,25 litra.

Nënseksioni 7

Mjetet kryesore të prodhimit dhe pajisjet e tjera të importuara gjatë transferimit të aktiviteteve nga një vend tjetër në Republikën e Shqipërisë

Neni 425

Përfshirje për mjetet kryesore të prodhimit dhe pajisjet e tjera

1. Pa cenuar legjislacionin në fuqi lidhur me politikën industriale dhe tregtare dhe në përputhje me nenet 426 deri 430, përfshihen nga detyrimet e importit mjetet kryesore dhe pajisjet e tjera që u përkasin ndërmarrjeve që përfundimisht mbyllin aktivitetin e tyre në një vend tjetër dhe transferohen në territorin doganor të Republikës së Shqipërisë, në mënyrë që të kryejnë një aktivitet të ngjashëm.

Në rastet kur ndërmarrja e transferuar është investim bujqësor, atëherë edhe gjëja e gjallë e cila i përket këtij investimi, po ashtu përfshihet nga detyrimet e importit.

2. Për qëllime të pikës 1, “ndërmarrje” nënkupton një njësi të pavarur ekonomike që merret me veprimtari prodhuese ose industri shërbimi.

Neni 426

Kufizime

Përfshirja nga detyrimet e importit kufizohet për mjetet kryesore dhe pajisje të tjera të cilat:

- a) përveç rasteve të veçanta që justifikohen nga rrethanat, kanë qenë aktualisht të përdorura në ndërmarrje për një minimum prej 12 muajsh përpara datës në të cilën ndërmarrja pushoi së funksionuari në vendin tjetër nga i cili ka transferuar aktivitetin;
- b) janë të destinuara që të përdoren për të njëjtin qëllim pas transferimit;
- c) janë të përshtatshme për natyrën dhe madhësinë e ndërmarrjes në fjalë.

Neni 427

Raste kur nuk jepet përfshirja

Përfshirja nuk jepet për ndërmarrje, transferimi i të cilave në territorin doganor të Republikës së Shqipërisë është rrjedhojë ose ka për qëllim shkrirjen me, ose përthithjen nga, një ndërmarrje e vendosur në territorin doganor të Republikës së Shqipërisë, pa vendosur / ngritur/ krijuar një aktivitet të ri.

Neni 428

Raste të tjera kur nuk jepet përfshirja

Përrjashtimi nuk do të jepet për:

- a) mjetet e transportit që nuk janë të natyrës së instrumenteve të prodhimit apo të industrisë së shërbimit;
- b) furnizimet e çfarëdo lloji që janë të destinuara për konsum njerëzor apo për ushqim për kafshët;
- c) karburantet dhe stoku i lëndës së parë apo i produkteve finale, apo gjysmë produkteve;
- ç) gjëja e gjallë në posedim nga tregtarët.

Neni 429

Kufizime lidhur me afatin kohor

Përveç rasteve të veçanta të justifikuara nga rrethanat, përrjashtimi i referuar në nenin 425, jepet vetëm për mjete kryesore të prodhimit dhe pajisje të tjera të vendosura në qarkullim të lirë, përpara mbarimit të një afati kohor prej 12 muajsh nga data kur ndërmarja mbyll aktivitetin e saj në vendin tjetër të nisjes.

Neni 430

Kushtëzime

1. Mjetet themelore dhe pajisjet tjera të përrjashtuara nga detyrimet e importit nuk mund të jepen hua, si garanci, me qira ose të tjetërsohen përpara kalimit të afatit 12 mujor, nga data kur është pranuar deklarata për hedhjen në qarkullim të lirë, pa informuar paraprakisht autoritetin doganor kompetent.

Në rastet e dhënies për përdorim apo transferim, kur ka rrezik për abuzim, ky afat mund të zgjatet deri në 36 muaj.

2. Çdo dhënie hua, si garanci, dhënie në përdorim apo transferim para kalimit të afatit të përmendur në pikën 1 bëhet vetëm kundrejt pageses së detyrimeve të importit për mallrat përkatëse, sipas normës që zbatohet në datën e dhënies hua, dhënies si garanci, dhënies në përdorim apo transferim, në bazë të llojit të mallrave dhe vlerës doganore të vërtetuar apo pranuar në atë datë nga autoriteti doganor kompetent.

Neni 431

Transferimi i personave të angazhuar në profesione të lira dhe personave juridikë të angazhuar në aktivitete jo-fitimprurëse

Nenet 425 deri në 430, zbatohen rast pas rasti në mënyrë analoge për mjetet themelore dhe pajisjet e tjera që u përkasin personave të angazhuar në profesione të lira dhe personave juridikë të angazhuar në aktivitete jofitimprurëse që e transferojnë këtë aktivitet nga një vend tjetër për në territorin doganor të Republikës së Shqipërisë.

Nënseksioni 8

Produktet e përrftuara nga fermerët e Republikës së Shqipërisë në prona të vendosura në vende kufitare me Republikën e Shqipërisë

Neni 432

Përrjashtime për produktet bujqësore, blegtorale, të bletarisë, të kopshtarisë dhe pyjeve

1. Në përrputhje me nenet 433 dhe 434, produktet bujqësore, blegtorale, të bletarisë, të kopshtarisë dhe pyjeve të përrftuara nga prona të vendosura në një vend tjetër fqinj me territorin doganor të Republikës së Shqipërisë, të cilat punohen nga një prodhues bujqësor që ka ndërmarjen e tij kryesore

brenda territorit shqiptar dhe e kryen këtë veprimtari në tokën që është në kufirin ngjitur me vendin tjetër, përjashtohen nga detyrimet doganore.

2. Për të përfituar nga dispozitat e pikës 1, produktet blegtorale duhet të përfitohen nga kafshë të origjinuara në Republikën e Shqipërisë ose që janë vendosur në qarkullim të lirë aty.

Neni 433

Kufizime

Përjashtimi kufizohet për produkte të cilat nuk i janë nënshtruar trajtimeve të tjera përveç atyre që kryhen normalisht pas korjes/vjeljes apo prodhimit të tyre.

Neni 434

Lejimi

Përjashtimi lejohet vetëm për produkte që janë sjellë në territorin doganor të Republikës së Shqipërisë nga prodhuesi bujqësor apo për llogari të tij.

Neni 435

Produktet e peshkimit apo të kultivimit të peshkut

Nenet 432, 433 dhe 434, zbatohen rast pas rasti në mënyrë analoge për produktet e peshkimit apo të kultivimit të peshkut, aktivitete të cilat kryhen në liqenet apo lumenjtë e lundrueshëm që kufizojnë një vend tjetër me Republikën e Shqipërinë nga peshkatarë shqiptar, apo edhe për produktet e aktivitetit të gjuetisë, që zhvillohet në liqene apo lumenj të tillë nga gjahtarët për sport të Shqipërisë.

Nënseksioni 9

Farat, plehrat dhe produktet për trajtimin e tokës dhe të mbjellave, të importuara nga prodhuesit bujqësorë të vendeve të tjera, për përdorim në pronat fqinje me këto vende

Neni 436

Përjashtime për farat, plehrat dhe produktet për trajtimin e tokës dhe të mbjellave

Në përputhje me nenin 437, farat, plehrat dhe produktet për trajtimin e tokës dhe të mbjellave, të destinuara për t'u përdorur në prona të vendosura në territorin doganor të Republikës së Shqipërisë, fqinj me një vend tjetër dhe e cila punohet nga një prodhues bujqësor që ka ndërmarrjen e tij kryesore brenda këtij vendi tjetër dhe në kufi ngjitur me territorin doganor të Republikës së Shqipërisë, përjashtohen nga detyrimet e importit.

Neni 437

Kufizime

1. Përjashtimi kufizohet për ato sasi farash, plehrash dhe produkte të tjera që nevojiten për punimin e pronës.

2. Përjashtimi jepet vetëm për ato fara, plehra apo produkte tjera të importuara drejtpërdrejt për në territorin doganor të Republikës së Shqipërisë nga prodhuesi bujqësor apo për llogari të tij.

3. Këshilli i Ministrave mund të vendosë kushte për përjashtimin bazuar në parimin e reciprocitetit.

Nënseksioni 10

Mallrat që gjenden në bagazhin personal të udhëtarit

Neni 438

Mallrat që gjenden në bagazhin personal

1. Në përputhje me nenet 438 deri 445, mallrat që gjenden në bagazhin personal të udhëtarëve, që vijnë nga një vend tjetër, përjashtohen nga detyrimet e importit, me kusht që këto importe të jenë të natyrës jo tregtare.

2. Për qëllime të këtij nënseksioni:

a) “bagazh personal” është tërësia e bagazhit që udhëtari i paraqet autoriteteve doganore me mbërritjen e tij në territorin doganor të Republikës së Shqipërisë, si dhe çdo bagazh që i paraqitet këtyre autoriteteve në një datë të mëvonshme, me kusht që të paraqiten prova që ditën e largimit të udhëtarit, ishte regjistruar si bagazh shoqërues, në momentin e nisjes, pranë shoqërisë që ka siguruar transportin nga vendi i nisjes për në territorin doganor të Republikës së Shqipërisë. Karburanti i ndryshëm nga ai i referuar në nenin 443, nuk përbën bagazh personal;

b) “importe me natyrë jo tregtare” janë importe, të cilat:

i) kanë natyrë rastësore;

ii) përbëhen vetëm prej mallrash për përdorim vetjak të udhëtarëve ose familjeve të tyre ose prej mallratve për dhurata.

Lloji dhe sasia e mallrave nuk duhet të jetë e tillë që të tregojë se kanë për qëllim përdorimin tregtar.

c) “udhëtar ajror” dhe “udhëtar detar” janë çdo pasagjer që udhëton në rrugë ajrore apo detare, ndryshe nga fluturimi privat për argëtim apo udhëtimi detar për argëtim.

ç) “fluturim privat për argëtim” dhe “udhëtim detar për argëtim” nënkupton përdorimin e një mjeti ajror apo një mjeti ujor nga pronari ose personi fizik ose juridik i cili ka të drejtën e përdorimit qoftë nëpërmjet qirasë ose me çdo mjet tjetër, për qëllime të ndryshme nga ato tregtare dhe në mënyrë të veçantë të ndryshme nga transporti i udhëtarëve ose mallrave ose për furnizimin e shërbimeve për qëllime të autoriteteve publike;

d) “zonë kufitare” është: pa cenuar konventat ekzistuese në këtë fushë, një zonë, shtrirja e së cilës në vije të drejtë ajrore, nuk i kalon 10 km nga kufiri.

dh) “punonjës zone kufitare” nënkupton çdo person aktiviteti normal i të cilit kërkon që ai të shkojë në anën tjetër kufitare gjatë ditëve të punës.

Neni 439

Kufijtë monetarë

1. Përjashtimet e parashikuara në nenin 438, jepet për mallra vlera e përgjithshme e të cilave nuk e kalon vlerën ekuivalente në lekë të shumës prej 300 euro për çdo udhëtar për mallra të ndryshme nga ato të renditura në nenet 440 dhe 441.

Në rastin e udhëtarëve me rrugë ajrore dhe rrugë detare, shuma e përmendur në paragrafin e parë do të jetë vlera ekuivalente në lekë të shumës 430 euro.

2. Për udhëtarët nën 15 vjeç, kjo shumë reduktohet në vlerën ekuivalente në lekë të shumës 150 euro.

3. Për qëllime të zbatimit të kufirit monetar të mësipërm, vlera e një artikulli të veçantë nuk mund të ndahet.

4. Vlera e bagazhit personal të udhëtarit, që është importuar përkohësisht ose është ri-importuar pas eksportit të përkohshëm, dhe vlera e produkteve mjekësore të nevojshme për të përmbushur nevojat personale të udhëtarit nuk merren në konsideratë për qëllime të zbatimit të përjashtimit të përcaktuar në pikat 1 dhe 2.

Neni 440

Kufijtë sasiorë për produktet e duhanit

1. Përjashtimi i parashikuar në pikën 1 të nenit 438, për produktet e duhanit, zbatohet në varësi të kufizimeve sasiore në jo më shumë se:

- a) 200 cigare;
- b) 100 cigarillo;
- c) 50 puro;
- ç) 250 gram duhan.

Secila sasi e specifikuar në shkronjat “a” deri “ç” për qëllimet e pikës 2 të këtij neni, përbën 100 % të përjashtimit total për produktet e duhanit.

Cigarillo janë cigare pesha maksimale e të cilave është 3 gram secila.

2. Për një udhëtar, përjashtimi mund të zbatohet për çdo kombinim të produkteve të duhanit, me kushtin që totali i sasisë (përqindjes) së përdorur nga individi të mos kalojë 100%.

Neni 441

Kufijtë sasiore për produktet e alkoolit dhe pijet alkoolike

1. Përjashtimi i parashikuar në pikën 1 të nenit 438, për alkoolin dhe pijet alkoolike, ndryshe nga verërat e qeta dhe birra, zbatohet mbi bazën e kufizimeve sasiore të mëposhtme:

- a) 1 litër alkool dhe pije alkoolike me fortësi alkoolike më të lartë se 22% ndaj volumit, ose alkool etilik i pa denaturuar me fortësi alkoolike 80% ndaj volumit dhe më shumë;
- b) 2 litra: alkool dhe pije të distiluara me fortësi alkoolike që nuk e kalon 22% ndaj volumit.

Secila sasi e specifikuar në shkronjat “a” dhe “b” për qëllimet e pikës 2 të këtij neni, përbën 100 % të përjashtimit total për produktet e alkoolit dhe pijeve alkoolike.

2. Për një udhëtar, përjashtimi mund të zbatohet për çdo kombinim të produkteve të alkoolit dhe pijeve alkoolike të përcaktuara në pikën 1, me kushtin që totali i sasisë (përqindjes) së përdorur nga individi të mos kalojë 100%.

3. Përjashtohen nga detyrimet e importit edhe 2 litra verë e qetë dhe 10 litra birrë.

Neni 442

Udhëtarët nën moshën 17 vjeç

Nuk jepet përjashtim për mallrat e përmendura në nenet 440 dhe 441, për udhëtarët nën moshën 17 vjeç.

Neni 443

Karburanti që ndodhet në serbatorë

Përjashtohet nga detyrimet e importit, për çdo mjet transporti motorik, karburanti që ndodhet në serbatorë/depozita standard si dhe jo më shumë se 10 litra karburant në serbatorë të lëvizshëm.

Neni 444

Vlera e mallrave që nuk do të merren në konsideratë

Vlera e mallrave e përmendur në Nenet 440, 441 ose 443, nuk do të merren në konsideratë për qëllime të zbatimit të përjashtimit të parashikuar në pikën 1 të nenit 439.

Neni 445

Raste të veçanta

1. Ministri përgjegjës për financat me Urdhër mund të zvogëlojë kufijtë monetarë ose kufizimet sasiore, apo të dyja, në rastet e udhëtarëve sipas kategorive të mëposhtme:

- a) personave që banojnë në një zonë kufitare;
- b) punonjësve të zonës kufitare;
- c) ekuipazhet e mjeteve të transportit të përdorura për të udhëtuar nga një vend tjetër.

2. Pika 1 nuk zbatohet kur një udhëtar i njëres prej kategorive të mësipërme provon që po kalon përtej zonës kufitare të Republikës së Shqipërisë ose nuk po kthehet nga një zonë kufitare e një vendi fqinj. Megjithatë, pika 1 zbatohet kur punonjësit e zonave kufitare apo ekuipazhi i mjeteve të transportit të përdorur në udhëtim ndërkombëtar, importojnë mallra kur bëjnë udhëtime, gjatë punës së tyre.

Nënsекsioni 11

Materialet arsimore, shkencore dhe kulturore; Instrumentet dhe aparatet shkencore

Neni 446

Materialet arsimore, shkencore dhe kulturore

Materialet arsimore, shkencore dhe kulturore të listuara në aneksin 9, të shtojcës D bashkëlidhur këtij vendimi dhe pjesë përbërëse e tij, përjashtohen nga detyrimet e importit, pavarësisht se cili është pranuesi i dërgesës apo për çfarë qëllimi mund të përdoren këto materiale.

Neni 447

Kushtëzime

Materialet arsimore, shkencore dhe kulturore të listuara në aneksin 10, të shtojcës D bashkëlidhur këtij vendimi dhe pjesë përbërëse e tij, përjashtohen nga detyrimet e importit me kusht që ato kanë për qëllim të përdoren nga:

- a) institucione apo organizata publike arsimore, shkencore apo kulturore, ose
- b) institucione apo organizata që i përkasin kategorive të specifikuar në kolonën e 3 (tretë) të aneksit 10, të shtojcës D bashkëlidhur këtij vendimi dhe pjesë përbërëse e tij, me kusht që ato të jenë të miratuara nga autoritetet kompetente doganore për të marrë artikuj të tillë me detyrime importi të përjashtuara.

Neni 448

Instrumentet dhe aparatet shkencore

1. Në përputhje me nenet 449 deri 453, instrumentet dhe aparatet shkencore, të cilat nuk janë përfshirë në nenin 447, përjashtohen nga detyrimet e importit, nëse ato importohen ekskluzivisht për qëllime jotregtare.

2. Përjashtimi sipas pikës 1, kufizohet për instrumentet dhe aparatet shkencore, të cilat kanë për qëllim të përdoren nga:

- a) institucione/ente publike që merren kryesisht me arsimimin apo kërkime shkencore dhe për ato departamente të institucioneve publike, që merren kryesisht me arsimimin apo kërkime shkencore, ose
- b) institucione private që merren kryesisht me arsimimin apo kërkime shkencore dhe të miratuara nga autoritetet kompetente për të marrë artikuj të tillë me detyrime importi të përjashtuara.

Neni 449

Pjesët e këmbimit/rezervë, pjesët përbërëse apo pjesët ndihmëse

Përjashtimi i parashikuar në pikën 1 të nenit 448, zbatohet gjithashtu për:

- a) Pjesët e këmbimit/rezervë, pjesët përbërëse apo pjesët ndihmëse që i përshtaten

posaçërisht instrumenteve apo aparateve shkencore, me kusht që këto pjesë këmbimi/ rezervë, pjesë përbërëse apo pjesë ndihmëse importohen në të njëjtën kohë me instrumentet apo aparatet e tilla ose, nëse ato importohen më pas, me kushtin që ato të mund të identifikohen si pjesë që i përkasin dhe janë të destinuara për instrumentet apo aparatet të cilat:

i. janë përjashtuar më parë nga detyrimet e importit, me kusht që këto instrumente apo aparate janë ende të një natyre shkencore në momentin kur kërkohet përjashtimi për pjesët përkatëse këmbimi / rezervë, pjesët përbërëse apo ato ndihmëse, ose;

ii. të cilat do të përjashtoheshin në momentin kur kërkohet një përjashtim i tillë për pjesët rezervë përkatëse, pjesët përbërëse apo ato ndihmëse;

b) Veglat që përdoren për mirëmbajtjen, kontrollin, kalibrimin apo riparimin e instrumenteve apo aparateve shkencore, me kusht që këto vegla të importohen në të njëjtën kohë me instrumentet apo aparatet e tilla ose nëse ato importohen më pas, me kusht që ato të mund të identifikohen si pjesë që i përkasin dhe janë të destinuara për instrumentet apo aparatet të cilat:

i. janë përjashtuar më parë nga detyrimet e importit, me kusht që këto instrumente apo aparate janë ende të një natyre shkencore në momentin kur kërkohet përjashtimi për veglat ose;

ii. të cilat do të përjashtoheshin, në momentin kur është bërë kërkesa për përjashtim për veglat.

Neni 450 **Përkufizime**

Për qëllime të neneve 448 dhe 449:

a) “instrumente apo aparate shkencore” nënkuptohet çdo instrument apo aparat i cili, për shkak të karakteristikave objektive teknike të tij dhe për shkak të rezultateve që arrihen me të, është kryesisht apo ekskluzivisht i përshtatshëm për veprimtari shkencore;

b) “të importuara për qëllime jotregtare”, nënkuptohen instrumentet apo aparatet shkencore që destinohen për t’u përdorur për kërkime shkencore apo qëllime edukative jofitimprurëse.

Neni 451 **Mos përjashtimi nga detyrimet e importit**

Nëse është e nevojshme, disa instrumente apo aparate mund të mos përjashtohen nga detyrimet e importit, nëse vërtetohet se përjashtimi nga detyrimet e importit dëmton interesat e industrisë së vendit, në sektorin përkatës të prodhimit.

Neni 452 **Kushtëzime**

1. Artikujt e përcaktuar në nenin 447 dhe instrumentet apo aparatet shkencore të cilat janë përjashtuar nga detyrimet e importit në përputhje me kushtet e parashikuara me nenin 449, 450 dhe 451, nuk mund të huazohen, të jepen në shfrytëzim apo të transferohen, qoftë me apo pa pagesë, pa njoftuar paraprakisht autoritetin doganor kompetent.

2. Nëse, një artikull huazohet, jepet në përdorim apo transferohet në një institucion apo organizatë që përfiton nga përjashtimi sipas nenit 447 ose pikës 2 të nenit 448, përjashtimi vazhdon të jepet me kusht që institucioni apo organizata ta përdorë atë artikull, instrument apo aparat për qëllime, për të cilin është dhënë përjashtimi.

Në raste të tjera, huazimi, dhënia në përdorim apo transferimi kërkon pagesën paraprake të detyrimeve të importit, sipas nivelit tarifor që zbatohet në datën e huazimit, dhënies në përdorim apo

transferimit, në bazë të llojit të mallit dhe vlerës doganore të vërtetuar apo pranuar në atë datë nga autoritetet doganore.

Neni 453

Ndërprerja e përmbushjes së kushteve

1. Institucionet apo organizatat e përmendura në nenet 447 dhe 448, të cilat nuk përmbushin më kushtet mbi bazën e të cilave kanë fituar të drejtën e përjashtimit, apo synojnë t'i përdorin artikujt e përjashtuar nga detyrimet e importit, për qëllime të tjera nga ato të parashikuara nga dispozitat e këtij Nënseksioni duhet të njoftojnë autoritetin doganor kompetent.

2. Artikujt që mbesin në posedim të institucioneve apo organizatave të cilat ndërpresin përmbushjen e kushteve për përfitimin e përjashtimit, do t'i nënshtrohen detyrimeve përkatëse të importit sipas nivelit tarifor që zbatohet në datën, në të cilën ndërpritet përmbushja e atyre kushteve, në bazë të llojit të artikullit dhe vlerës doganore të vërtetuar apo pranuar në atë datë nga autoritetet doganore.

3. Artikujt e përdorur nga institucionet ose organizatat përfituese të përjashtimit, për qëllime ndryshme nga ato të parashikuara në nenet 447 dhe 448, i nënshtrohen detyrimeve përkatëse të importit, që zbatohen në datën kur ato janë vënë në një përdorim tjetër, në bazë të llojit të artikullit dhe vlerës doganore të vërtetuar apo pranuar në atë datë nga autoritetet doganore.

Neni 454

Kushtëzime të tjera

Nenet 451, 452 dhe 453, zbatohen rast pas rasti në mënyrë analoge për produktet e referuara në nenin 449.

Neni 455

Pajisje të importuara për qëllime jo-tregtare

1. Pajisjet e importuara për qëllime jo-tregtare nga apo në emër të një institucioni apo organizate për kërkime shkencore të vendosur jashtë Shqipërisë, përjashtohen nga detyrimet e importit.

2. Përjashtimi do të lejohet me kusht që pajisjet:

a) të jenë të destinuara për t'u përdorur nga apo me miratimin e pjesëtarëve ose përfaqësuesve të institucioneve dhe organizatave të përmendura në pikën 1, në kontekst dhe brenda kufijve të marrëveshjeve për bashkëpunim shkencor, qëllimi i të cilave është që të kryhen programe kërkimesh shkencore

ndërkombëtare në institucione për kërkime shkencore të bazuara dhe të vendosura në Shqipëri.

b) të mbeten pronë e personit fizik apo juridik me vendqëndrim jashtë Shqipërisë, gjatë kohës së qëndrimit të tyre në Shqipëri.

3. Në kuptim të këtij neni dhe nenit 456:

a) "pajisje", janë instrumentet, aparatet, makinat dhe pjesët e tyre, përfshirë pjesët e këmbimit/rezervë dhe veglat e projektuara posaçërisht për mirëmbajtjen, kontrollimin, kalibrimin apo riparimin e tyre, që përdoren për nevoja kërkimi shkencor;

b) pajisjet e destinuara për t'u përdorur për qëllime të kërkimeve shkencore të kryera për qëllime jo-fitimprurëse, konsiderohen se janë "të importuara për qëllime jo-tregtare".

Neni 456

Kushtëzime

1. Pajisjet e përjashtuara nga detyrimet e importit në përputhje me kushtet e parashikuara me nenin

455, nuk mund të huazohen, të jepen për përdorim apo të transferohen, me pagesë ose jo, pa lajmëruar paraprakisht autoritetin doganor kompetent.

2. Nëse pajisjet huazohen, jepen në përdorim apo transferohen në një institucion apo organizatë që përfiton nga përjashtimi sipas nenit 455, përjashtimi vazhdon të jepet me kusht që institucioni apo organizata ta përdorë atë artikull, instrument apo aparat për qëllime, për të cilin është dhënë përjashtimi. Në raste të tjera dhe pa cenuar nenet 448 dhe 449, huazimi, dhënia në përdorim apo transferimi i nënshtrohen pagesës paraprake të detyrimeve të importit, sipas nivelit tarifor që zbatohet në datën e huazimit, dhënies në përdorim apo transferimit, në bazë të llojit të pajisjeve dhe vlerës doganore të vërtetuar apo pranuar në atë datë nga autoritetet doganore kompetente.

3. Institucionet apo organizatat e referuara në pikën 1 të nenit 455, të cilat nuk i përmbushin më kushtet për përjashtim, apo të cilat synojnë t'i përdorin pajisjet e përjashtuara nga detyrimet e importit për qëllime të tjera nga ato të parashikuara nga ky nen, duhet të njoftojnë për këtë autoritetin doganor kompetent.

4. Pajisjet e përdorura nga institucionet ose organizatat të cilat nuk përmbushin më kushtet për të përfituar nga përjashtimi, i nënshtrohen detyrimeve përkatëse të importit sipas nivelit tarifor që zbatohet në datën, në të cilën ndërpritet përmbushja e atyre kushteve, në bazë të llojit të artikullit dhe vlerës doganore të vërtetuar apo pranuar në atë datë nga autoritetet doganore.

Pa rënë ndesh me nenet 448 dhe 449, pajisjet e përdorura nga institucionet apo organizatat përfituese të përjashtimit për qëllime tjera nga ato të parashikuara me nenin 455, i nënshtrohen detyrimeve përkatëse të importit që zbatohen në datën në të cilën ato janë përdorur për një qëllim tjetër, në bazë të llojit të pajisjes dhe vlerës doganore të vërtetuar apo pranuar në atë datë nga autoritetet doganore kompetente.

Nënseksioni 12

Kafshët laboratorike dhe lëndët biologjike ose kimike që nevojiten për kërkime

Neni 457

Kafshët laboratorike dhe lëndët biologjike

1. Përjashtimi nga detyrimet e importit jepet për:
 - a) kafshët e posaçme për përdorim laboratorik;
 - b) lëndët biologjike ose kimike që nevojiten për kërkime, të cilat importohen ekskluzivisht për qëllime jotregtare.
2. Përjashtimi i parashikuar në pikën 1 kufizohet për kafshët dhe lëndët biologjike ose kimike, të cilat destinohen për:
 - a) institucione publike që merren kryesisht me arsimim ose kërkime shkencore dhe ato departamente ose institucione publike të cilat merren kryesisht me arsimim ose kërkime shkencore; ose
 - b) institucione private që merren kryesisht me arsimim ose kërkime shkencore dhe të autorizuar nga autoritetet kompetente doganore të Republikës së Shqipërisë të marrin artikuj të tillë me përjashtim nga detyrimet e importit.
3. Lëndët e përcaktuara në shkronjën “b” të pikës 1, mund të përfshijnë vetëm lëndët biologjike ose kimike, për të cilat nuk ekziston prodhimi ekuivalent në Shqipëri dhe të cilat, për arsye të specifikimit ose shkallës së pastërtisë, kryesisht ose ekskluzivisht janë të përshtatshme për kërkime shkencore.

Nënseksioni 13

Substanca terapeutike me origjinë njerëzore dhe reagentët për analizat e gjakut dhe indeve

Neni 458

Substanca terapeutike dhe reagentët

1. Në përputhje me nenin 459, përjashtohen nga detyrimet e importit:

- a) substancat terapeutike me origjinë njerëzore;
- b) reagentët për përcaktimin e grupit të gjakut;
- c) reagentët për përcaktimin e përbërjes së indeve.

2. Për qëllime të pikës 1:

a) “substanca terapeutike me origjinë njerëzore”, janë gjaku i njeriut dhe derivatet e tij (gjaku i njeriut në gjendje të natyrshme, plazmë e tharë, albumina dhe solucione të qëndrueshme të proteinave plazmatike njerëzore, imunoglobulin dhe fibrinogjeni i njeriut);

b) “reagentët për përcaktimin e grupit të gjakut”, janë të gjitha reagentët, qoftë të origjinës njerëzore, shtazore, bimore ose të ndonjë origjine tjetër, që përdoren për përcaktimin e grupit të gjakut dhe për zbulimin e anomalive të gjakut;

c) “reagentët për përcaktimin e përbërjes së indeve”, janë të gjithë reagentët qoftë të origjinës njerëzore, shtazore, bimore apo të një origjine tjetër që përdoren për përcaktimin e përbërjes së indeve të njeriut.

Neni 459

Kufizime

Përjashtimi kufizohet për produkte të cilat:

- a) destinohen për institucione ose laboratorë të miratuara nga autoritetet doganore kompetente, për t’u përdorur ekskluzivisht për qëllime jo-tregtare mjekësore ose shkencore;
- b) shoqërohen nga një certifikatë e konformitetit e lëshuar nga organi i autorizuar në vendin e nisjes;
- c) janë të vendosura në enë, me etiketë të veçantë identifikuese;

Neni 460

Paketimi

Përjashtimi nga detyrimet e importit përfshin, paketimin special të domosdoshëm për transportin e substancave terapeutike me origjinë njerëzore apo të reagentëve për përcaktimin e grupeve të gjakut apo të përbërjes së indeve dhe gjithashtu çdo tretës dhe aksesore të nevojshëm për përdorimin e tyre, që mund të përfshihen në dërgesë.

Nënseksioni 14

Instrumentet dhe aparaturat e destinuara për kërkime mjekësore, për përcaktimin e diagnozës mjekësore ose për kryerjen e trajtimeve mjekësore

Neni 461

Instrumentet dhe aparaturat e destinuara për kërkime, diagnozë ose trajtime mjekësore

1. Përjashtohen nga detyrimet e importit, instrumentet dhe aparaturat që destinohen për kërkime mjekësore, për përcaktim diagnoze ose kryerje të trajtimit mjekësor, të cilat dhurohen nga një organizatë filantropike ose bamirëse ose nga një individ privat, autoriteteve të shëndetësisë, spitaleve ose institucioneve kërkimore mjekësore të miratuara nga autoritetet kompetente doganore të marrin këta artikuj me përjashtim të detyrimeve të importit, ose pajisje e instrumente të blera nga këto autoritete shëndetësore, spitale ose institucione kërkimore mjekësore krejtësisht me fonde të dhuruara nga organizata bamirësie apo filantropike ose me kontribute vullnetare, me kusht që gjithmonë të provohet se:

- a) dhurimi i instrumenteve ose aparateve në fjalë nuk fsheh në vetvete asnjë synim tregtar nga ana

e dhuruesit; dhe

b) dhuruesi nuk është i lidhur në asnjë mënyrë me prodhuesin e instrumenteve ose aparateve për të cilat kërkohet përjashtim.

2. Përjashtimi zbatohet gjithashtu, duke iu nënshtuar të njëjtave kushte, për:

a) pjesët e këmbimit/rezervë, pjesët përbërëse ose aksesoret e përshtatshëm pikërisht për instrumentet ose aparatet e përmendura më sipër, me kusht që këto pjesë këmbimi/rezervë, pjesë përbërëse ose pjesë ndihmëse të importohen në të njëjtën kohë me ato instrumente ose aparate, ose kur janë importuar me vonë, të mund të identifikohen se destinohen për instrumente ose aparate të importuara më parë me përjashtim nga detyrimet e importit;

b) veglat që përdoren për mirëmbajtjen, kontrollin, kalibrimin ose riparimin e instrumenteve apo aparateve, me kusht që këto vegla të importohen në të njëjtën kohë me instrumentet ose aparatet në fjalë, ose kur importohen më pas, të mund të identifikohen si vegla që destinohen për instrumente ose aparate të importuara më parë me përjashtim nga detyrimet e importit.

Neni 462

Të tjera

Për qëllim të nenit 461 dhe posaçërisht në lidhje me instrumentet apo aparatet dhe subjektet përfituese të përmendura më lart, zbatohen nenet 451, 452 dhe 453, rast pas rasti në mënyrë analoge.

Nënseksioni 15

Substancat referuese për kontrollin e cilësisë së produkteve mjekësore

Neni 463

Substancat referuese

Përjashtohen nga detyrimet e importit dërgesat, të cilat përmbajnë mostra të substancave referuese të miratuara nga Organizata Botërore e Shëndetësisë, për kontrollin cilësor të materialeve të përdorura në prodhimin e produkteve mjekësore dhe të cilat i adresohen pritësve të autorizuar nga autoritetet doganore kompetente të Republikës së Shqipërisë për të marrë të tilla dërgesa.

Nënseksioni 16

Produktet farmaceutike për t'u përdorur në veprimtari sportive ndërkombëtare

Neni 464

Përjashtohen nga detyrimet e importit produktet farmaceutike për përdorim mjekësor njerëzor apo veterinar, nga personat ose kafshët që vijnë nga vende të tjera për të marrë pjesë në aktivitete sportive ndërkombëtare, të organizuara në territorin doganor të Republikës së Shqipërisë, brenda kufijve të arsyeshëm për të plotësuar kërkesat gjatë gjithë qëndrimit në këtë territor.

Nënseksioni 17

Mallra për organizata bamirësie ose filantropike; artikuj të destinuar për të verbrit dhe personat e tjerë me aftësi të kufizuara

Nënseksioni 17.1

Për organizata bamirësie ose filantropike

Dispozitat e këtij nënseksioni trajtojnë përjashtimin për mallrat e importuara nga organizata bamirësie ose filantropike.

Neni 465

Mallra për organizata bamirësie ose filantropike

1. Në përputhje me nenet 467 dhe 468, importohen me përjashtim nga detyrimet e importit, për atë sa të mos krijojnë mundësi për abuzime ose shtrembërime të konkurrencës:

a) mallra të nevojave bazë, të importuara nga institucione shtetërore, organizata bamirëse, filantropike ose fetare të miratuara nga autoritetet doganore kompetente, për t'u shpërndarë falas personave në nevojë; b) mallra të çfarëdolloj përshkrimi, të dërguara falas nga një person apo organizatë e vendosur në një

vend jashtë territorit doganor të Republikës së Shqipërisë, për qëllime jo tregtare nga ana e dërguesit, për institucione shtetërore apo organizata të tjera, bamirëse, filantropike ose fetare të miratuara nga autoritetet doganore kompetente, për t'u përdorur për mbledhje fondesh në evente/ngjarje të posaçme bamirësie, për personat në nevojë;

c) materiale dhe pajisje zyre të dërguara falas, nga një person ose një organizatë e vendosur jashtë territorit doganor të Republikës së Shqipërisë dhe pa qëllime tregtare nga ana e dërguesit, për institucione shtetërore, organizata bamirëse, filantropike ose fetare të miratuara nga autoritetet doganore kompetente, mallra këto për t'u përdorur vetëm për të plotësuar nevojat e ushtrimit të aktivitetit të tyre bamirës apo filantropik;

ç) materiale dhe pajisje për ndërtimin dhe rikonstruksionin e objekteve fetare të kultit, të institucioneve me karakter fetar, dhe mallra të tjera, të nevojshme për t'u përdorur nga këto institucione, vetëm për zhvillimin e veprimtarive fetare;

d) materiale dhe pajisje për ndërtimin, rikonstruksionin e ujësjellësve, centraleve elektrike, shkollave, spitaleve, që financohen nga institucionet fetare.

2. Për qëllim të shkronjës "a" të pikës 1, "nevoja bazë" nënkupton ato mallra të cilat nevojiten për të plotësuar nevojat elementare të qenieve njerëzore, si për shembull ushqime, barna, veshje dhe shtresa ose mbulesa krevati.

Nuk jepet përjashtim për:

a) produktet e alkoolit;

Neni 466

Mallra për të cilat nuk jepet përjashtim

b) duhanin dhe produktet e duhanit;

c) kafën dhe çajin;

ç) automjetet që janë të ndryshme nga ambulancat dhe zjarrfikëset.

Neni 467

Kushtëzime

Përjashtim përfitojnë vetëm organizatat, të cilat kanë procedura kontabiliteti, të cilat i lejojnë autoritetet doganore kompetente të mbikëqyrin veprimtarinë e tyre dhe që ofrojnë të gjitha garancitë e nevojshme.

Neni 468

Kushtëzime të tjera

1. Organizatat që përfitojnë nga përjashtimi, nuk mund të japin hua, me qira, të tjetërsojnë, falas apo

kundrejt pagesës, mallrat apo pajisjet e referuara në nenin 465, për qëllime të ndryshme nga ato të përcaktuara në shkronjat “a” dhe “b” të pikës 1 të nenit 465, pa njoftuar më parë autoritetet doganore kompetente.

2. Në rast se mallrat dhe pajisjet e përmendura me sipër i jepen hua, me qira apo i tjetërsohen një organizate që ka të drejtë të përfitojë përjashtim sipas neneve 465 dhe 467, përjashtimi vazhdon të jepet me kusht që organizata e fundit të përdorë mallrat dhe pajisjet për qëllime që përputhen me arsyen e dhënies së përjashtimit.

Në rast të kundërt, huadhënia, qiradhënia apo tjetërsimi bëhet vetëm pas pagesës të detyrimeve të importit, sipas nivelit tarifor të zbatueshëm në datën e dhënies hua, dhënies me qira apo tjetërsimit, në bazë të llojit të mallrave dhe vlerës doganore të verifikuar ose të pranuar nga autoritetet doganore kompetente në atë datë.

Neni 469

Mos përmbushja e kushteve për të përfituar përjashtim

1. Organizatat e përmendura në nenin 465, të cilat nuk përmbushin më kushtet për të përfituar përjashtimin, ose të cilat propozojnë përdorimin e mallrave dhe pajisjeve të përjashtuara nga detyrimet e importit, për qëllime të ndryshme nga ato të përshkruara në nenin në fjalë, duhet të njoftojnë për këtë qëllim autoritetet doganore kompetente.

2. Mallrat dhe pajisjet që mbeten në posedim të organizatave të cilat nuk përmbushin më kushtet për të përfituar përjashtim, janë objekt i pagesës së detyrimeve përkatëse të importit, sipas nivelit tarifor të zbatueshëm në datën në të cilën kushtet pushuan së ekzistuari, në bazë të llojit të mallrave dhe vlerës doganore të verifikuar ose pranuar nga autoritetet kompetente doganore në atë datë.

3. Mallrat dhe pajisjet e përdorura nga organizatat që përfitojnë nga përjashtimi, për qëllime të ndryshme nga ato të përmendura në nenin 465, i nënshtrohen detyrimeve përkatëse të importit sipas nivelit tarifor të zbatueshëm, në datën në të cilën ato janë vendosur në një përdorim tjetër, mbi bazën e llojit të mallrave dhe pajisjeve si dhe të vlerës doganore të verifikuar ose pranuar në datën në fjalë nga autoritetet doganore kompetente.

Në këtë nënseksion:

Nënseksioni 17.2

Për personat me aftësi të kufizuara

- Nenet 470 dhe 471 trajtojnë përjashtimin për kategorinë e personave me aftësi të kufizuar që nuk shikojnë;

- Nenet 472 dhe 473 trajtojnë përjashtimin për kategorinë e personave të tjerë me aftësi të kufizuar;

- Nenet 474 deri 477 trajtojnë përjashtimin për të dy kategoritë e personave me aftësi të kufizuar.

Neni 470

Artikujt për përdorim nga të verbrit

Artikujt e projektuar posaçërisht për përparimin arsimor, shkencor apo kulturor të personave të verbër, siç është specifikuar në aneksin 11, të shtojcës D bashkëlidhur këtij vendimi dhe pjesë përbërëse e tij, përjashtohen nga detyrimet e importit.

Neni 471

Kushtëzime

1. Artikujt e projektuar posaçërisht për përparimin arsimor, shkencor apo kulturor të personave të verbër, siç është specifikuar në aneksin 12, të shtojcës D bashkëlidhur këtij vendimi dhe pjesë përbërëse

e tij, do të përjashtohen nga detyrimet e importit, me kusht që të importohen nga:

- a) vetë personat e verbër për nevojat e tyre; ose
- b) institucione apo organizata që merren me edukimin apo dhënien e ndihmës për persona të verbër, të autorizuar nga autoritetet doganore kompetente të marrin këta artikuj me përjashtim nga detyrimet e importit.

2. Përjashtimi i përcaktuar në pikën 1, zbatohet edhe për pjesët e këmbimit/rezervë, pjesët përbërëse apo pjesët ndihmëse përkatëse të artikujve në fjalë dhe për veglat që do të shfrytëzohen për mirëmbajtjen, kontrollin, kalibrimin apo riparimin e këtyre artikujve, me kusht që këto pjesë këmbimi/rezervë, pjesë përbërëse, pjesë ndihmëse apo vegla janë importuar në të njëjtën kohë me artikujt në fjalë ose, nëse janë importuar më vonë, me kusht që ato mund të identifikohen se janë të destinuara për artikujt që janë lejuar më parë me përjashtim nga detyrimet e importit, apo të cilat do të përfitonin nga përjashtimi në momentin kur një përjashtim i tillë, kërkohet për pjesët specifike të këmbimit/rezervë, komponentët apo pajisjet ndihmëse dhe veglat në fjalë.

Neni 472

Artikujt për përdorim të personave të tjerë me aftësi të kufizuara

1. Artikujt e projektuar posaçërisht për arsimim, punësimin apo për zhvillim shoqëror të personave me aftësi të kufizuara, pa përfshirë personat e verbër, do të përjashtohen nga detyrimet e importit, me kusht që të importohen nga:

- a) vetë personat me aftësi të kufizuar për nevojat e tyre personale; ose
- b) institucione apo organizata të angazhuara kryesisht me edukimin apo dhënien e ndihmës për personat me aftësi të kufizuara të autorizuar nga autoritetet kompetente doganore për të marrë këta artikuj me përjashtim nga detyrimet e importit.

2. Përjashtimi i përcaktuar në pikën 1, zbatohet edhe për pjesët e këmbimit/rezervë, pjesët përbërëse apo pjesët ndihmëse posaçërisht për artikujt në fjalë dhe për veglat, që do të shfrytëzohen për mirëmbajtjen, kontrollin, kalibrimin apo riparimin e këtyre artikujve, me kusht që këto pjesë këmbimi/rezervë, pjesë përbërëse, pajisje ndihmëse apo vegla janë importuar në të njëjtën kohë me artikujt në fjalë ose, nëse janë importuar më vonë, me kusht që ato mund të identifikohen se janë të destinuara për artikujt që janë përjashtuar më parë nga detyrimet e importit, apo të cilat do të përfitonin nga përjashtimi në momentin kur një përjashtim i tillë kërkohet për pjesë këmbimi/rezervë, komponentë apo pajisje ndihmëse dhe vegla specifike në fjalë.

Neni 473

Mbrojtja e interesave të industrisë

Nëse është e nevojshme, disa artikuj mund të përjashtohen nga e drejta për përjashtim, nëse vërtetohet se përjashtimi i këtyre artikujve nga detyrimet është i dëmshëm për interesat e industrisë së Shqipërisë, për sektorin përkatës të prodhimit.

Neni 474

Statusi i personave të verbër ose me aftësi të kufizuara

Dhënia e përjashtimit të drejtpërdrejtë për personat e verbër apo për persona të tjerë me aftësi të kufizuara, për përdorimin e tyre personal, siç është përcaktuar në shkronjën “a” të pikës 1 të nenit 471 dhe në shkronjën “a” të pikës 1 të nenit 472, do t'i nënshtrohet kushteve të legjislacionit në fuqi për përcaktimin statusit të tyre si persona të verbër ose me aftësi të kufizuara që i jep të drejtën për një përjashtim të tillë.

Neni 475

Kushtëzime

1. Artikujt e importuar me detyrime importi të përjashtuara nga një person i përmendur në nenin 471 dhe 472, nuk mund të huazohen, jepen me qira apo të transferohen, me apo pa pagesë, pa i njoftuar paraprakisht autoritetet doganore kompetente.

2. Nëse një artikull jepet hua, me qira apo transferohet tek një person, institucion apo organizatë që ka të drejtë të përfitojë nga përjashtimi në përputhje me nenet 471 dhe 482, atëherë përjashtimi jepet me kusht që personi, institucioni ose organizata të përdorë artikullin, për qëllime që i japin të drejtën për një përjashtim të tillë.

Në raste të tjera huazimi, dhënie me qira apo transferimi, do t'i nënshtrohen pagesës paraprake të detyrimeve të importit, në nivelin tarifor që zbatohet në ditën e dhënies hua, me qira apo transferim, në bazë të llojit të mallrave apo pajisjeve dhe vlerës doganore të verifikuar apo pranuar në atë ditë nga autoritetet doganore kompetente.

Neni 476

Kushtëzime të tjera

1. Artikujt e importuar nga institucionet ose organizatat të autorizuar për përjashtim nga detyrimet e importit, në përputhje me kushtet e përcaktuara në nenet 471 dhe 472, mund të huazohen, jepen me qira apo transferohen, me pagesë ose jo, nga këto institucione ose organizata jo-fitimprurëse tek personat e verbër ose me aftësi të kufizuara me të cilët ato kanë lidhje, pa paguar detyrimet përkatëse të importit.

2. Asnjë huadhënie, dhënie me qira apo transferim nuk mund të jepet nën kushte të tjera nga ato të parashikuara në pikën 1, nëse nuk janë informuar më parë autoritetet kompetente doganore.

Nëse një artikull që huazohet, jepet me qira apo transferohet tek një person, institucion ose organizatë që ka të drejtë të përfitojë nga përjashtimi sipas pikës 1 të nenit 471 ose pikës 1 të nenit 472, përjashtimi jepet me kusht që personi, institucioni ose organizata të përdorë artikullin, për qëllime që i japin të drejtën për një përjashtim të tillë.

Në raste të tjera, huadhënia, dhënia me qira apo transferimi do t'i nënshtrohen pagesës paraprake të detyrimeve të importit, sipas nivelit tarifor të zbatuar në datën e huadhënies, dhënies me qira ose transferimit, në bazë të llojit të mallrave dhe pajisjeve, si edhe vlerës doganore të verifikuar apo të pranuar në atë datë nga autoritetet doganore kompetente.

Neni 477

Mos përmbushja e kushteve për të përfituar përjashtim

1. Institucionet apo organizatat e përmendura në nenin 471 dhe 472, të cilat nuk përmbushin më kushtet që i japin të drejtën për përjashtim, ose që synojnë të përdorin artikujt e pranuar pa detyrime importi për qëllime të tjera nga ato të parashikuara nga këto nene, duhet të informojnë autoritetet kompetente doganore.

2. Artikujt, që mbeten në posedim të institucioneve apo organizatave, të cilat pushojnë së përmbushuri kushtet për përfitimin e përjashtimit do t'u nënshtrohen detyrimeve përkatëse të importit sipas nivelit tarifor që zbatohet në datën kur nuk plotësohen më kushte, në bazë të llojit të mallrave dhe vlerës doganore, të vërtetuar apo të pranuar në atë datë nga autoritetet doganore kompetente.

3. Artikujt e përdorur nga institucioni apo organizata përfituese nga përjashtimi për qëllime të tjera nga ato të parashikuara në nenet 471 dhe 472, u nënshtrohen detyrimeve përkatëse të importit sipas normës që zbatohet në datën kur ato janë vendosur për një përdorim tjetër, në bazë të llojit të mallrave dhe vlerës doganore të verifikuar apo të pranuar në atë datë nga autoritetet doganore kompetente.

Nëseksioni 17.3

Për viktimat e fatkeqësive

Dispozitat e këtij nëseksioni trajtojnë përjashtimin për mallrat e importuara për viktimat e fatkeqësive.

Neni 478

Mallra në dobi të viktimave të fatkeqësive

1. Në përputhje me nenet 479 deri 484, mallrat e importuara, nga institucionet publike ose institucionet buxhetore shtetërore apo nga organizata të tjera bamirëse, filantropike ose fetare, të miratuara prej autoriteteve doganore kompetente, për këtë qëllim, përjashtohen nga detyrimet e importit, kur destinohen:

a) për shpërndarje falas viktimave të fatkeqësive, që godasin territorin doganor të Republikës së Shqipërisë; ose

b) për ti vënë në dispozicion falas të viktimave të fatkeqësive të tilla, ndonëse mbeten pronë e organizatave në fjalë.

2. Mallrave të importuara për qarkullim të lirë nga agjencitë, shoqatat apo strukturat e miratuara, që ndihmojnë për lehtësimin e pasojave nga fatkeqësitë, për plotësimin e nevojave të tyre gjatë periudhës së veprimtarisë, gjithashtu do t'u jepet përjashtimi i përmendur në pikën 1, nën të njëjtat kushte.

Neni 479

Kufizime

(Ndryshuar me VKM nr. 142, datë 13.2.2020)

1. Asnjë përjashtim nuk do të jepet për materiale dhe pajisje që kanë për qëllim rindërtimin e zonave të fatkeqësive.

2. Në ndryshim sa parashikohet në pikën 1, përjashtohen nga detyrimet e importit materialet, pajisjet, ndërtesat e parafabrikuara, të importuara për këtë qëllim nga organet shtetërore, organizatat bamirëse dhe filantropike, për rastet e shpalljes së “gjendjes së fatkeqësisë natyrore”, brenda programit të rindërtimit, sipas përcaktimeve të legjislacionit për rindërtimin.

Materialet, pajisjet, ndërtesat e parafabrikuara përjashtohen sipas zërave dhe sasive të parashikuara në preventivin e miratuar nga njësi zbatuese ose nga organi kompetent përkatës, sipas legjislacionit për rindërtimin.

Neni 480

Dhënia e përjashtimit

Dhënia e përjashtimit për qëllime të nëseksionit 17.3, do të jetë objekt i një Vendimi të posaçëm të Këshillit të Ministrave. Ky vendim, sipas nevojës, përcakton qëllimin dhe kushtet e përjashtimit.

Neni 481

Procedurat e kontabilitetit

Përjashtim përfitojnë vetëm organizatat të cilat përdorin procedura kontabiliteti të cilat lejojnë autoritetet doganore kompetente të mbikëqyrin veprimtarinë e tyre dhe që ofrojnë të gjitha garancitë që konsiderohen të nevojshme.

Neni 482

Kushtëzime

1. Organizatat që përfitojnë nga përjashtimi nuk mund të huazojnë, japin me qira apo transferojnë, me apo pa pagesë, mallrat e referuara në pikën 1 të nenit 478, në kushte të tjera nga ato të përcaktuara në nenin 478, pa njoftuar më parë autoritetet kompetente doganore.

2. Nëse mallrat jepen hua, me qira apo transferohen tek një organizatë që ka të drejtë të përfitojë nga përjashtimi sipas nenit 478, atëherë përjashtimi vazhdon të jepet me kusht që kjo organizatë ti përdori mallrat për të njëjtin qëllim për të cilin jepet e drejta e përjashtimit.

Në raste të tjera, dhënia hua, me qira apo transferimi i nënshtrohen pagesës paraprake të detyrimeve të importit, sipas nivelit tarifor që zbatohet në ditën e dhënies hua, me qira apo transferimit, në bazë të llojit të mallrave dhe vlerës doganore të konstatuar apo pranuar në atë ditë nga autoritetet doganore kompetente.

Neni 483

Kushtëzime të tjera

1. Mallrat e referuara në shkronjën “b” pika 1 të nenit 478, në momentin që nuk përdoren më nga të dëmtuarit në katastrofa, nuk mund të jepen hua, me qira apo të transferohen me pagesë apo falas, pa njoftuar paraprakisht autoritetet doganore kompetente.

2. Nëse mallrat jepen hua, me qira apo i transferohen organizatës e cila vetë gëzon të drejtën e përfitimit të përjashtimit sipas nenit 478 ose sipas rastit i jepet organizatës e cila gëzon të drejtën e përfitimit të përjashtimit sipas shkronjës “a” të pikës 1 të nenit 465, përjashtimi vazhdon të jepet me kusht që organizatat e tilla t’i përdorin ato për të njëjtat qëllime për të cilat jepet përjashtimi.

Në rastet të tjera, huazimi, dhënia me qira apo transferimi i nënshtrohen pagesës paraprake të detyrimeve të importit sipas nivelit tarifor, që zbatohet në datën e dhënies hua, me qira apo të transferimit në bazë të llojit të mallrave dhe të vlerës doganore të konstatuar apo të pranuar në atë datë nga autoritetet doganore kompetente.

Neni 484

Mos përmbushja e kushteve për të përfituar përjashtim

1. Organizatat e referuara në nenin 478, të cilat nuk vazhdojnë të përmbushin kushtet për të përfituar përjashtim, apo të cilat dëshirojnë të përdorin mallrat e përjashtuara nga detyrimet e importit për qëllime tjera nga ato të parashikuara nga ai nen, duhet të njoftojnë për këtë autoritetet doganore kompetente.

2. Mallrat që mbeten në posedim të organizatave të cilat nuk vazhdojnë t’i plotësojnë kushtet e përfitimit të përjashtimit, kur këto mallra transferohen tek një organizatë, e cila po ashtu gëzon të drejtën e përjashtimit sipas nenit 478, ose, sipas rastit, tek një organizatë që gëzon të drejtën e përjashtimi në zbatim të shkronjës “a” të pikës 1 të nenit 465, atëherë përjashtimi vazhdon të jepet me kusht që kjo organizatë i shfrytëzon mallrat për ato qëllime për të cilat ajo gëzon të drejtën e përjashtimit. Në raste të tjera mallrat do t’i nënshtrohen pagesës së detyrimeve përkatëse të importit, sipas nivelit tarifor që zbatohet në datën kur kushtet e tilla nuk vazhdojnë të përmbushen, në bazë të llojit të mallrave dhe vlerës doganore, të konstatuar apo pranuar në atë ditë nga autoritetet doganore kompetente.

3. Mallrat e përdorura nga organizata që kanë përfituar nga përjashtimi për qëllime të tjera nga ato të parashikuara në nenin 478, i nënshtrohen detyrimeve përkatëse të importit, sipas nivelit tarifor të zbatuar në datën në të cilën ato janë vendosur për një përdorim tjetër, në bazë të llojit të mallrave dhe vlerës doganore të konstatuar ose pranuar në atë datë nga autoritetet doganore kompetente.

Nënseksioni 18

Dekoratat apo çmimet e nderit

Neni 485

Kufizime

1. Përfshihen nga detyrimet e importit, nëse paraqiten prova të mjaftueshme pranë autoritetit doganor kompetent nga personat përkatës dhe me kusht që veprimet e përfshira, nuk janë në ndonjë mënyrë të karakterit tregtar:

a) dekoratat e dhëna nga qeveritë e huaja për ata persona vendqëndrimi (vendbanimi) i të cilëve është në territorin doganor të Republikës së Shqipërisë;

b) kupat, medaljet dhe artikujt e ngjashëm të një natyre tërësisht simbolike, të cilat i janë dhënë shpërblim jashtë Republikës së Shqipërisë, personave që kanë vendqëndrimin (vendbanimin) në Republikën e Shqipërisë, si shenjë nderi për veprimtarinë e tyre në fushën e artit, shkencës, sportit apo shërbimeve publike apo si një mirënjohje për suksesin e arritur në një ngjarje të veçantë, të cilat importohen në territorin doganor të Republikës së Shqipërisë nga vetë ata persona;

c) kupat, medaljet dhe artikujt e ngjashëm të një natyre tërësisht simbolike, të cilat jepen falas nga autoritete apo persona jashtë Republikës së Shqipërisë, për t'u prezantuar në Shqipëri për të njëjtat qëllime si ato të përcaktuara në shkronjën "b";

ç) çmime, trofe dhe dhurata të një natyre simbolike dhe me vlerë të kufizuar të destinuara për shpërndarje falas personave me vendbanim normal jashtë Republikës së Shqipërisë, në konferenca biznesi ose aktivitete të ngjashme ndërkombëtare; natyra e tyre, vlera për njësi ose karakteristika të tjera, nuk duhet të jenë të tilla që mund të tregojnë se ato janë importuar për arsye tregtare.

Nënseksioni 19

Dhurata të marra në kuadrin e marrëdhënieve ndërkombëtare

Neni 486

Përfshitimi për dhurata në kuadrin e marrëdhënieve Ndërkombëtare

Kur është rasti, pa cenuar nenin 438, dhe në përputhje me nenet 487 dhe 488, përfshitimi jepet për mallra të cilat:

a) janë importuar në territorin doganor të Republikës së Shqipërisë nga persona që kanë bërë një vizitë zyrtare në një vend tjetër dhe të cilët i kanë marrë ato mallra si dhurata nga autoritetet mikpritëse;

b) janë importuar në territorin doganor të Republikës së Shqipërisë nga persona që vijnë për vizitë zyrtare në Shqipëri dhe që kanë për qëllim t'i ofrojnë mallrat si dhurata për autoritetet mikpritëse;

c) janë dërguar si dhuratë, në shenjë të miqësisë apo të vullnetit të mirë, nga një organ zyrtar apo autoritet publik, që kryen një aktivitet në interes të publikut, i cili është vendosur në një vend tjetër, për një organ zyrtar ose autoritet publik që kryen një aktivitet në interes të publikut, i cili ndodhet në territorin doganor të Republikës së Shqipërisë dhe të aprovuara nga autoritetet kompetente doganore për të marrë artikujt të tillë me përfshitim nga detyrimet e importit.

ç) janë dërguar si dhuratë për përdorim nga njësitë ushtarake të Forcave të Armatosura dhe strukturave të Policisë së Shtetit si: instrumente, aparate dhe pjesët e tyre, veshmbathje si dhe materiale logjistike, shëndetësore, makineri dhe pajisje.

Neni 487

Produkte që nuk përfshihen përjashtim

Nuk përfshihen përjashtim produktet e alkoolit, duhani apo produktet e duhanit.

Neni 488
Kushtëzime

Përrjashtimi nga detyrimet e importit jepet vetëm nëse:

- a) artikujt e destinuar si dhurata ofrohen mbi baza rastësore;
- b) artikujt nuk pasqyrojnë qoftë për nga natyra, vlera apo sasia e tyre, ndonjë interes tregtar;
- c) artikujt nuk përdoren për qëllime tregtare.

Nenseksioni 20
Mallra për t'u përdorur nga personalitetet e larta të shtetit

Neni 489
Përrjashtimi për personalitetet e larta të shtetit

1. Do të përrjashtohen nga detyrimet e importit;
 - a) dhurata për krerët e shtetit;
 - b) mallra për t'u përdorur apo konsumuar nga monarkët në pushtet dhe krerët e shtetit të vendeve të tjera, ose persona që zyrtarisht përfaqësojnë ata, gjatë qëndrimeve të tyre zyrtare në territorin doganor të Republikës së Shqipërisë. Megjithatë, përrjashtimi mund të bëhet në varësi të parimit të reciprocitetit.
2. Përcaktimet e pikës 1, janë gjithashtu të zbatueshme për personat që gëzojnë privilegje në nivele ndërkombëtare analoge me ato që gëzojnë monarkët në pushtet ose Krerët e Shtetit.

Nënsesioni 21
Mallra të importuara me qëllim nxitjen e tregtisë

Nënsesioni 21.1
Mostra të mallrave me vlerë të papërrfillshme

Neni 490
Mostrat e mallrave

1. Pa cenuar shkronjën "a" të pikës 1 të nenit 494, mostrat e mallrave të cilat janë të një vlerë të papërrfillshme dhe të cilat mund të përdoren vetëm për të nxitur porosinë e mallrave të llojit që ato përfaqësojnë, me qëllim të importimit të tyre në Shqipëri, do të përrjashtohen nga detyrimet e importit.
2. Autoriteti doganor kompetent, mund të kërkojnë që disa artikuj, për t'u përrjashtuar sipas këtij neni, të bëhen përgjithmonë të papërdorshme, duke u grisur, shpuar, apo duke vendosur shenja të qarta dhe që nuk hiqen, ose me ndonjë proces tjetër, me kusht që këto veprime nuk dëmtojnë karakteristikat thelbësore të mostrave.
3. Për qëllime të pikës 1, "mostra të mallrave" janë çdo artikull që përfaqëson një lloj malli, që nga mënyra e prezantimit dhe sasia e tyre, për mallra të njëjtë ose cilësi njëjtë, nuk mundëson përdorimin e tyre për asnjë qëllim tjetër përveç asaj të nxitjes së porosive për atë mall.

Nënsesioni 21.2
Material i shtypur/printuar dhe ai reklamues

Neni 491
Materialët e shtypura reklamuese

Në përrputhje me nenin 492, materialët e shtypura/printuara reklamuese siç janë katalogët, listat e

çmimeve, udhëzimet për përdorim apo broshurat do të përjashtohen nga detyrimet e importi, me kusht që ato të kenë lidhje me:

- a) mallrat për shitje apo dhënie me hua; ose
- b) shërbimet e transportit, sigurimit tregtar apo shërbime bankare, që ofrohen nga një person i vendosur jashtë territorit doganor të Republikës së Shqipërisë.

Neni 492

Kufizime

Përjashtimi i parashikuar me nenin 491, kufizohet për materialet reklamuese të shtypura që plotësojnë kushtet në vijim:

- a) materiali i shtypur të paraqesë në mënyrë të qartë emrin e ndërmarrjes e cila prodhon, shet apo jep me qira mallrat, apo e cila ofron shërbimet që u referohet;
- b) secila dërgesë nuk duhet të përmbajë më tepër se një dokument ose një kopje të secilit dokument nëse përbëhet nga disa dokumente; dërgesat që përmbajnë disa kopje të të njëjtit dokument, po ashtu përjashtohen, nëse pesha e përgjithshme e tyre, nuk është më e madhe se një kilogram;
- c) materiali i shtypur nuk duhet të jetë pjesë e dërgesave në grup nga i njëjti dërgues për të njëjtin pranues.

Neni 493

Artikujt për qëllime reklamuese

Artikujt për qëllime reklamuese, që nuk kanë një vlerë të vërtetë tregtare dhe që dërgohen falas nga furnitorët për klientët e tyre, të cilat, përveç funksionit reklamues nuk mund të shfrytëzohen për diçka tjetër, përjashtohen nga detyrimet e importi.

Nënseksioni 21.3

Produktet e përdorura apo të konsumuara në një panair tregtar apo në ngjarje të ngjashme

Neni 494

Përjashtime për panair tregtare apo në ngjarje të ngjashme

1. Në përputhje me nenet 495 deri 498, përjashtohen nga detyrimet e importit:
 - a) mostra të vogla përfaqësuese të mallrave të prodhuara jashtë territorit doganor të Republikës së Shqipërisë, që destinohen për panair tregtare apo për ngjarje të ngjashme;
 - b) mallrat e importuara vetëm për t'u demonstruar apo për të demonstruar makineritë dhe aparaturat e prodhuara jashtë territorit doganor të Republikës së Shqipërisë dhe të ekspozuara në një panair tregtar apo në një ngjarje të ngjashme;
 - c) lëndë të ndryshme të një vlere të vogël siç janë ngjyrat, bojërat, letër muri etj., që përdoren për ndërtimin, rregullimin dhe dekorimin e stendave, ku janë vendosur përfaqësuesit e huaj në një panair tregtar apo një ngjarje të ngjashme, të cilat shkatërrohen duke u përdorur;
 - ç) material i shtypur, katalogë, prospekte, lista çmimesh, afishe reklame, kalendarë, me ilustrime apo jo, fotografi pa korniza si dhe artikuj të tjerë të ofruar falas për reklamimin e mallrave të prodhuara jashtë territorit doganor të Republikës së Shqipërisë dhe të ekspozuara në një panair tregtar apo në një ngjarje të ngjashme.
2. Për qëllime të pikës 1, “panair tregtar apo ngjarje e ngjashme” nënkupton:
 - a) ekspozita, panair, shfaqje dhe ngjarje të ngjashme që kanë të bëjnë me tregtinë, industrinë, bujqësinë apo artizanatin;
 - b) ekspozita dhe ngjarje që mbahen kryesisht për arsye bamirësie;
 - c) ekspozita dhe ngjarje që mbahen kryesisht për arsye shkencore, teknike, artizanati, artistike,

edukative ose kulturore, apo sportive, për arsye fetare apo kulti, aktivitete të sindikatave apo për turizëm, apo me qëllim të promovimit të njohjes ndërkombëtare;

ç) takime të përfaqësuesve të organizatave ndërkombëtare apo organeve kolegjiale;

d) ceremoni dhe mbledhje zyrtare ose përkujtimore.

Nuk përfitojnë ekspozita për qëllime private në dyqanet apo objektet tregtare për të shitur mallra të vendeve jashtë territorit doganor të Republikës së Shqipërisë.

Neni 495

Kufizime

Përjashtimet e parashikuara me shkronjën “a” pika 1 e nenit 494, kufizohen në mostra të cilat:

a) janë importuar pa pagesë si të tilla nga vende të tjera apo janë përfituar në ekspozitë nga mallra të importuara me shumicë nga ato vende;

b) ekskluzivisht shpërndahen falas për publikun nëpër ekspozita për përdorim apo konsumim nga personat të cilëve u janë ofruar;

c) janë të identifikueshme si mostra reklamuese me vlera të ulëta për njësi;

ç) nuk tregtohen lehtë dhe, kur paraqitet rasti, paketohen në atë mënyrë që sasia e artikullit përkatës është më e ulët se sasia më e vogël e të njëjtit artikull që shitet në treg;

d) në rastin e ushqimeve dhe pijeve që nuk janë të paketuara në mënyrën e përmendur në shkronjën “ç”, konsumohen aty për aty në ekspozitë;

dh) për nga vlera dhe sasia e përgjithshme e tyre, i përshtaten natyrës së ekspozitës, numrit të vizitorëve dhe kapacitetit të pjesëmarrjeve në ekspozitë.

Neni 496

Kufizime të tjera

Përjashtimet e përcaktuara në shkronjën “b” pika 1 e nenit 494, do të kufizohen për mallra të cilat:

a) janë konsumuar apo shkatërruar në ekspozitë, dhe

b) janë të përshtatshme, për nga vlera totale dhe sasia, natyra e ekspozitës, numrit të vizitorëve dhe kapacitetit të pjesëmarrësve në ekspozitë.

Neni 497

Kufizime

Përjashtimet e parashikuara në shkronjën “ç” pika 1 e nenit 494, kufizohen për materialet e shtypur dhe artikujt për qëllime reklamimi, të cilat:

a) ekskluzivisht kanë për qëllim që të shpërndahen falas për publikun në vendin ku mbahet ekspozita;

b) për nga vlera dhe sasia totale e tyre, i përshtaten natyrës së ekspozitës, numrit të vizitorëve dhe kapacitetit të pjesëmarrësve në ekspozitë.

Neni 498

Ndalime

Përjashtimet e përmendura në shkronjat “a” dhe “b” të pikës 1 të nenit 494, nuk lejohen për:

a) produktet e alkoolit;

b) duhanin dhe produktet e duhanit;

c) karburantet, qoftë në gjendje të ngurtë, lëngët apo të gaztë.

Nëseksioni 22

Mallrat e importuara për qëllime ekzaminimi, analizash ose testi

Neni 499

Përfashtime për mallrat të cilat i nënshtrohen ekzaminimeve, analizave apo testeve

Në përputhje me nenet 500 deri 505, mallrat të cilat i nënshtrohen ekzaminimeve, analizave apo testeve për të përcaktuar përbërjen, cilësinë apo karakteristikat e tjera teknike të tyre për qëllime informimi apo për kërkime industriale ose tregtare përjashtohen nga detyrimet e importit.

Neni 500

Kushtëzime

Pa cenuar nenin 503, përjashtimet e përcaktuara në nenin 499, jepen vetëm me kusht që mallrat që do të ekzaminohen, analizohen apo testohen do të shfrytëzohen apo shkatërrohen plotësisht gjatë ekzaminimit, analizës apo testimit.

Neni 501

Mallra që nuk përjashtohen

Mallrat e përdorura gjatë ekzaminimit, analizës apo testimit të cilat në vetvete paraqesin qëllimin e promovimit të shitjes, nuk përjashtohen.

Neni 502

Kushtëzime për sasinë e mallrave

Përjashtimi jepet vetëm për ato sasi mallrash të cilat janë në mënyrë strikte të nevojshme për qëllimin për të cilin importohen. Këto sasi do të përcaktohen për secilin rast nga autoritetet doganore, duke marrë parasysh qëllimin në fjalë.

Neni 503

Kushtëzime të tjera

1. Përjashtimet e përcaktuara në nenin 499, përfshijnë mallrat të cilat nuk janë konsumuar tërësisht apo shkatërruar gjatë ekzaminimit, analizës apo testimit, me kusht që produktet e mbetura, me marrëveshje dhe nën mbikëqyrjen e autoriteteve doganore kompetente:

- a) janë shkatërruar krejtësisht apo janë bërë të pavlefshme nga ana tregtare me përfundimin e ekzaminimit, analizës apo testimit; ose
- b) janë dorëzuar pranë Rezervave të Shtetit pa shkaktuar ndonjë shpenzim; ose
- c) janë eksportuar jashtë territorit doganor të Republikës së Shqipërisë, në rrethana tërësisht të justifikuara.

2. Për qëllime të pikës 1, “produktet e mbetura” nënkuptohen produktet që rezultojnë nga ekzaminimi, analiza apo testimi apo mallrat që nuk janë përdorur.

Neni 504

Produktet e mbetura pas përfundimit të ekzaminimit, analizës apo testimit

1. Me përjashtim të rasteve kur zbatohet pika 1 e nenit 503, produktet e mbetura pas përfundimit të ekzaminimit, analizës apo testimit të referuara në nenin 499, janë objekt i detyrimeve përkatëse të importit sipas nivelit tarifor që zbatohet në datën e përfundimit të ekzaminimit, analizës apo testimit, në bazë të llojit të mallrave dhe vlerës doganore të konstatuar dhe pranuar në atë ditë nga autoritetet doganore kompetente.

2. Megjithatë, pala e interesuar me marrëveshje dhe nën mbikëqyrjen e autoriteteve doganore kompetente mund t'i shndërrojë produktet e mbetura në mbeturina apo skrap. Në këtë rast, detyrimet e

importit janë ato që zbatohen për mbeturina të tilla ose skrap në momentin e shndërrimit.

Neni 505

Afatet kohore

Afatet kohore brenda të cilës duhet të kryhen ekzaminimet, analizat apo testet, si edhe të përfundohen formalitetet administrative, për të garantuar përdorimin e mallrave për qëllimet e destinuara, përcaktohet nga autoritetet doganore kompetente.

Nënseksioni 23

Dërgesat për organizatat që mbrojnë të drejtat e autorit ose patentës industriale dhe tregtare

Neni 506

Përfashtimi për markat tregtare, modelet, disenjot dhe dokumentet shoqëruese të tyre

Markat tregtare, modelet apo disenjot, si dhe dokumentet shoqëruese të tyre, si edhe aplikimet për patentë për shpikje apo të ngjashme me të, që i dorëzohen organeve kompetente për mbrojtjen e të drejtave të autorit apo për mbrojtjen e të drejtave të patentave industriale apo tregtare, përfashtohen nga detyrimet e importit.

Nënseksioni 24

Botimet informuese me karakter turistik

Neni 507

Përfashtimi për botimet informuese me karakter turistik

Pa cenuar nenet 446 deri 454, përfashtohen nga detyrimet e importit:

a) dokumentacioni (fletëpalosjet, broshurat, librat, revistat, librat udhëzues, posterat/afishet në kornizë ose jo, fotografitë pa komizë dhe zmadhimet fotografike, hartat të ilustruara apo jo, letrat transparente për xhamat/dritaret dhe kalendarë të ilustruar) për t'u shpërndarë falas dhe qëllimi kryesor i të cilëve është të nxisë publikun të vizitorëve vende të tjera, veçanërisht për të ndjekur takime ose aktivitete kulturore, turistike, sportive, fetare ose tregtare apo profesionale, me kusht që një literature e tillë të mos përmbajë më shumë se 25% reklamë tregtare private, duke përfashtuar gjithë reklamën private tregtare për shoqëritë e Republikës së Shqipërisë, dhe që nga vetë natyra e këtyre aktiviteteve të pasqyrohet dukshëm qëllimi i nxitjes së tregtisë;

b) lista hotelesh të huaja dhe vjetar të botuar nga agjenci turistike zyrtare, ose nën kujdesin e tyre, orari

për shërbimin e huaj të transportit, kur një literature e tillë destinohet të shpërndahet falas dhe nuk përmban më shumë se 25% reklamë private tregtare, duke përfashtuar gjithë reklamat tregtare për shoqëritë e Republikës së Shqipërisë;

c) materiale reference të paraqitura nga përfaqësues të akredituar ose korrespondentë të emëruar nga agjenci turistike kombëtare zyrtare, të cilat nuk destinohen për shpërndarje, si p.sh. vjetarë, listat e abonentëve telefonik ose teleksit, lista e hoteleve, katalogët e panaireve, modele të mallrave të artizanatit me vlerë të papërfillshme, dhe literaturë mbi muzetë, universitetet, qendrat termale ose institucione analoge.

Nënseksioni 25

Dokumente dhe artikuj të ndryshëm

Neni 508

Përfashtime për artikuj të ndryshëm

Përfshihen nga detyrimet e importit:

- a) dokumentet e dërguara falas për institucionet publike të Republikës së Shqipërisë;
- b) publikime të qeverive të huaja dhe publikime zyrtare të institucioneve ndërkombëtare, për t'u shpërndarë falas;
- c) fletë votime për zgjedhje të organizuara nga institucione të ngritura në vende të tjera;
- ç) objekte për t'u paraqitur si provë ose për qëllime të ngjashme në gjykata dhe agjenci të tjera zyrtare të Republikës së Shqipërisë
- d) modele nënshkrimesh dhe qarkore që kanë të bëjnë me nënshkrimet e dërguara si pjesë e shkëmbimeve të zakonshme të informacionit midis shërbimeve publike ose institucioneve bankare;
- dh) materiale zyrtare të shtypura që i dërgohen Bankës së Shqipërisë;
- e) raporte, deklarata, shënime, prospekt, formularë aplikimesh dhe dokumente të tjera të hartuara nga shoqëri të regjistruara në vende të tjera dhe të dërguara mbajtësve ose nënshkruesve të titujve të lëshuar prej këtyre shoqërive;
- ë) regjistrimet mediatike (skeda me vrima, regjistrime zanore, mikrofilma etj.) të përdorura për transmetimin e informacionit të dërguar falas pritësve, me kusht që përjashtimi nga detyrimet e importit nuk krijon mundësi për abuzime ose shtrembërime të mëdha të parimeve të konkurrencës;
- f) fashikuj, arkiva, formularë të shtypur dhe dokumente të tjera për t'u përdorur në mbledhje, konferenca ose kongrese ndërkombëtare dhe raporte mbi këto mbledhje;
- g) plane, skica teknike, dizeno në kalk, përshkrime dhe dokumente të tjera të ngjashme të importuara për të tërhequr ose kryer porosi në vende të tjera ose për të marrë pjesë në konkurse të organizuara në territorin doganor të Republikës së Shqipërisë;
- gj) dokumente që përdoren gjatë provimeve të organizuara në territorin doganor të Republikës së Shqipërisë nga institucione me qendër në vende të tjera;
- h) formularë të shtypur për t'u përdorur si dokumente zyrtare në qarkullimin ndërkombëtar të automjeteve ose mallrave, në kuadrin e konventave ndërkombëtare;
- i) formularë, etiketa, bileta dhe dokumente të ngjashme të dërguara nga agjenci transporti ose nga sipërmarrje të industrisë së hotelarisë në një vend tjetër për agjenci udhëtimi të krijuara në territorin doganor të Republikës së Shqipërisë;
- j) formularë dhe bileta, dokumente transporti (*bill of lading* ose *way-bills*) dhe dokumente të tjera tregtare ose zyrtare, të përdorura;
- k) formularë zyrtare të shtypur nga një vend tjetër ose nga autoritete ndërkombëtare, dhe materiale të shtypura në përputhje me standardet ndërkombëtare, të dërguara për shpërndarje nga shoqata të vendeve të tjera në adresë të shoqatave homologe që gjenden në territorin doganor të Republikës së Shqipërisë;
- l) fotografi, diapozitivë dhe kartonë për matrica fotografish, që mund të përmbajnë edhe udhëzime të dërguara nga agjenci shtypi ose agjenci botuese gazetash dhe revistash;
- ll) pulla takse dhe pulla të ngjashme që tregojnë pagimin e detyrimeve në vende të tjera;
- m) kartëmonedha dhe monedha në përdorim, që i dërgohen bankave ose organeve shtetërore në Republikën e Shqipërisë.

Nënseksioni 26

Materiale të ndryshme, për të fiksuar dhe ruajtur mallrat gjatë transportit të tyre

Neni 509

Përjashtime për materialet që përdoren për ruajtjen e mallrave gjatë transportit

Përfshihen nga detyrimet e importit materialet e ndryshme të tilla si litare, kashtë, copa tekstili,

letër dhe karton, lëndë drusore dhe plastike, të cilat përdoren për sistemimin dhe mbrojtjen, përfshirë këtu edhe mbrojtjen nga nxehtësia, për mallrat gjatë transportit, nga një vend tjetër, për në territorin doganor të Republikës së Shqipërisë, të pa ripërdorshme.

Nënseksioni 27

Shtrojat, foragjeret dhe ushqimet që nevojiten gjatë transportit të kafshëve

Neni 510

Përjashtime për shtrojat, foragjeret dhe ushqimet që nevojiten gjatë transportit të kafshëve

Përjashtohen nga detyrimet e importit shtrojat, foragjeret dhe ushqimet për kafshët, të çdo lloji, të cilat janë ngarkuar në mjetin e transportit që përdoret për transportimin e kafshëve nga një vend tjetër për në territorin doganor të Republikës së Shqipërisë, për t'u përdorur/konsumuar gjatë udhëtimit.

Nënseksioni 28

Karburanti dhe lubrifikantët në depozitën e mjeteve motorike tokësore, si dhe në depozita për përdorim të veçantë

Neni 511

Përjashtime për karburantin dhe lubrifikantët

1. Në përputhje me nenet 512, 513 dhe 514, përjashtohen nga detyrimet e importit:
 - a) karburanti që mbahet në serbatorët e zakonshëm të:
 - i. automjeteve tregtare apo private, dhe motoçikletave;
 - ii. depozitave të posaçme,që hyjnë në territorin doganor të Republikës së Shqipërisë.
 - b) karburanti që mbahet në serbatorë të lëvizshëm, që transportohen nga automjete private dhe motoçikleta, me një maksimum prej 10 litra për mjet dhe pa cenuar legjislacionin në fuqi lidhur me mbajtjen dhe transportin e karburantit.
2. Për qëllime të pikës 1:
 - a) “automjet tregtar” është çdo automjet rrugor i motorizuar (përfshirë traktorët rrugorë me ose pa rimorkio), i cili nga vetë lloji i ndërtimit dhe i pajisjeve që ka është i projektuar dhe është në gjendje për transportim, me ose pa pagesë, të:
 - i. më shumë se nëntë persona, përfshirë shoferin,
 - ii. mallrave, si dhe çdo automjet rrugor për qëllime të posaçme, që në thelb është i ndryshëm nga një transport i tillë;
 - b) “automjet privat” është çdo automjet, përveç atyre të cilët përfshihen në përkufizimin e referuar në shkronjën “a”;
 - c) “serbatorë të zakonshëm” janë:
 - i. serbatorët e vendosur në mënyrë të përhershme nga prodhuesi tek të gjithë automjetet e të njëjtit lloj me automjetin në fjalë dhe ndërtimi i të cilëve lejon përdorimin e drejtpërdrejtë të karburantit, si për lëvizjen e automjeteve, ashtu edhe kur është rasti, për funksionimin, gjatë transportit, të sistemeve të ftohjes dhe të sistemeve të tjerë,
 - ii. serbatorët e gazit të vendosur në automjete të projektuara për përdorimin direkt të gazit si karburant, si dhe serbatorët që i përshtaten sistemeve të tjera, me të cilat është pajisur automjeti,
 - iii. serbatorët e vendosur në mënyrë të përhershme nga prodhuesi tek të gjithë mbajtësit e të njëjtit lloj me mbajtësin në fjalë dhe vendosja e përhershme e të cilit mundëson përdorimin e drejtpërdrejtë të karburantit, gjatë transportit, të sistemeve të ftohjes dhe të sistemeve të tjerë me të cilët mbajtësi i

posaçëm është pajisur;

ç) “depozitë e posaçme”, është çdo mbajtës i pajisur me aparate veçanërisht të dizenuara për sistemet e ftohjes, sistemet e oksigjenimit, sistemet e termike të izolimit ose sisteme të tjera.

Neni 512

Kufizime

Për sa i përket karburantit që mbajnë serbatorët e zakonshëm dhe depozitat e posaçme të automjeteve tregtare, me urdhër të ministrit përgjegjës për financat mund të kufizohet zbatimi i përjashtimit deri në kufirin 200 litra për automjet, depozitat e posaçme dhe për çdo udhëtim.

Neni 513

Kufizime të tjera

Me Urdhër të ministrit përgjegjës për financat mund të kufizohet sasia e karburantit të lejuar me përjashtim, në rastin e:

a) automjeteve tregtare që kryejnë transport ndërkombëtar nëpër zonën e tyre kufitare me thellësi maksimale prej 15 km në vijë ajrore, me kusht që udhëtimet të kryhen nga banues të zonës kufitare;

b) automjete private që i përkasin banuesve të zonës kufitare.

Neni 514

Karburantet e përjashtuara që nuk mund të përdoren

1. Karburantet e përjashtuara nga detyrimet e importit, në bazë të neneve 511, 512 dhe 513, nuk mund të përdoren në një automjet të ndryshëm prej atij në të cilin gjendeshin kur u importuan, as të transferohen nga ai automjet dhe të ruhen në vend tjetër, me përjashtim të rasteve kur duhen kryer riparime të nevojshme në atë automjet, dhe as nuk mund të transferohen nga vetë personi që përfiton prej përjashtimit, si kundrejt pagesës ashtu edhe falas.

2. Mosrespektimi i kësaj dispozite sjell zbatimin e detyrimeve të importit lidhur me produktet në fjalë, sipas nivelit tarifor të zbatueshëm në datën kur ndodhi mosrespektimi, llojit të mallrave dhe vlerës doganore të konstatuar ose pranuar prej autoriteteve doganore kompetente në atë datë.

Neni 515

Vajrat lubrifikues

Përjashtimi i referuar në nenin 511, zbatohet edhe për vajrat lubrifikues që gjenden në automjete dhe nevojiten për funksionimin normal të tyre gjatë udhëtimit.

Nënseksioni 29

Materiale për ndërtimin, mirëmbajtjen apo zbukurimin e përmendoreve apo varrezave të viktimave të luftës

Neni 516

Përjashtimet për viktimat e luftës

Përjashtohen nga detyrimet e importit mallrat e çdo lloji, të importuara nga organizma të autorizuar për këtë qëllim nga autoritetet doganore kompetente, për t'u përdorur për ndërtimin, mirëmbajtjen ose zbukurimin e varrezave, varreve, si dhe përmendoreve për të rënë në luftë të vendeve të tjera, të cilët

janë varrosur në territorin doganor të Republikës së Shqipërisë.

Nënseksioni 30

Arkivole, urnat funerale dhe artikujt dekorativ për funerale

Neni 517

Përfjashtimet për funeralet

Përfjashtohen nga detyrimet e importit artikujt e mëposhtëm:

a) arkivole të mbajnë trupa dhe urnat me hirin e të vdekurve si dhe lulet, zbukurimet funerale dhe objekte të tjera zbukurimi që i shoqërojnë;

b) lulet, kurozat dhe objekte të tjera dekorative të sjella nga persona banues në vendet e tjera që marrin pjesë në një funeral, ose të ardhura për të dekoruar varret në territorin doganor të Republikës së Shqipërisë, me kusht që këto importe nuk kanë, për nga natyra dhe sasia e tyre, qëllime tregtare.

Nënseksioni 31

Përfjashtime të tjera sipas ligjeve të veçanta

Neni 518

Përfjashtime për deputetët

1. Për qëllime të pikës 2 të nenit 184 të Kodit, në përputhje me nenet 519 dhe 520 deputeti, vetëm në një rast gjatë mandatit të tij, gëzon të drejtën e përfjashtimit nga detyrimet e importit, për mjetet e punës që lidhen me veprimtarinë e tij si deputet.

2. Për qëllime të pikës 1, mjete pune janë:

- a) automjeti;
- b) kompjuteri;
- c) faksi;
- d) telefoni;
- e) projektori;
- f) fotokopja;
- g) diktofoni;
- h) mobilje dhe ndriçues zyre.

Neni 519

Procedura e përfjashtimit

E drejta e përfjashtimit për mjetet e punës, që lidhen me veprimtarinë e tij si deputet fitohet pas paraqitjes pranë autoriteteve doganore kompetente, të kërkesës për përfjashtim të shoqëruar me dokumentin e ushtrimit aktualisht të mandatin si deputet.

Neni 520

Kushtëzime

1. Deputeti që përfiton nga përfjashtimi nuk mund ta huazojnë, japi me qira apo transferojë, me apo pa pagesë, automjetin e përfjashtuar nga detyrimet e importit sipas nenit 518.

2. Nëse automjeti jepet hua, me qira apo transferohen tek një deputet tjetër apo person që gëzon të drejtën e përfjashtimit nga detyrimet e importit sipas Kodit, atëherë përfjashtimi vazhdon të jepet.

3. Nëse automjeti jepet hua, me qira apo transferohet tek një person tjetër i cili nuk përfjashtohet nga

detyrimet e importit, automjeti i nënshtrohen pagesës paraprake të detyrimeve të importit, sipas nivelit tarifor që zbatohet në ditën e dhënies hua, me qira apo transferimit, në bazë të llojit të automjetit dhe vlerës doganore të konstatuar apo pranuar në atë ditë nga autoritetet doganore kompetente. Pas pagimit të detyrimit të importit, deputeti fiton të drejtën e e përjashtimin nga detyrimi i importit për automjetin tjetër.

4. Deputeti nuk mund të ketë, brenda një mandati, më shumë se një automjet, të përjashtuar nga detyrimet e importit.

Nënseksioni 32

Përjashtime për makineri dhe pajisje të tjera të importuara për ndërtimin e burimeve të reja të prodhimit të energjisë elektrike

Neni 521

Përjashtimi i makinerive dhe pajisjeve për ndërtimin e burimeve të energjisë

(Pikat 2 dhe 5, të nenit 184, të Kodit)

1. Për qëllime të nenit 2, të ligjit nr. 8987, datë 24.12.2002, “Për krijimin e kushteve lehtësuese për ndërtimin e burimeve të reja të prodhimit të energjisë elektrike”, përjashtohen nga taksat doganore makineritë dhe pajisjet që bëjnë pjesë në objektin e prodhimit të energjisë elektrike me fuqi të instaluar jo më pak se 5 MW për burim, që përdorin lëndë djegëse të lëngëta ose të ngurta dhe pa kufizim për burimet e tjera të rinovueshme të prodhimit.

2. Operatori ekonomik i cili ndërton burime të prodhimit të energjisë elektrike me fuqi të instaluar jo më pak se 5 MW për burim, pasi të ketë marrë nga organet shtetërore përkatëse lejen për ndërtimin e një objekti gjenerues, në përputhje me legjislacionin në fuqi, duhet të paraqesë pranë ministrisë përgjegjëse për sektorin e energjisë, 6 muaj para fillimit të importimit, listën e plotë e të specifikuar të makinerive dhe të pajisjeve që do të importohen vetëm për këtë objekt. Ministri përgjegjës për sektorin e energjisë e miraton këtë listë, pas shqyrtimit dhe verifikimit të saj.

3. Lista e makinerive duhet të përmbajë, për çdo makineri dhe pajisje që importohet, këto specifikime:

- a) Emërtimin dhe shenjat e njësish të makinerisë/pajisjes;
- b) Karakteristikat kryesore teknike të makinerisë/pajisjes, sasinë dhe çmimin e blerjes;
- c) Karakteristikat e lëndëve djegëse, që përdoren, duke specifikuar llojin dhe konsumin e shprehur për njësi;
- ç) Specifikime të tjera sqaruese (konsumi specifik i burimit etj.).

4. Lista e miratuar përgatitet në pesë kopje, nga të cilat një kopje i dërgohet operatorit ekonomik, një kopje Ministrisë përgjegjëse për financat, një kopje Drejtorisë së Përgjithshme të Doganave, një kopje Drejtorisë së Përgjithshme të Tatimeve dhe një kopje ruhet në ministrinë përgjegjëse për sektorin e energjisë.

5. Drejtoria e Përgjithshme e Doganave e dërgon listën e makinerive në zyrën doganore mbikëqyrëse të operatorit ekonomik, për të zbatuar të gjitha procedurat e parashikuara nga legjislacioni doganor për përjashtimin e makinerive dhe të pajisjeve të përfshira në këtë listë.

6. Institucionet e përmendura në pikën 4, për çdo ndryshim në listën e specifikuar të makinerive dhe të pajisjeve që importohen, vepronë në përputhje me dokumentet zyrtare që kërkojnë ndryshimin dhe për këtë japin miratimin përkatës. Në rast se në listën e miratuar më parë është përfshirë një makineri/pajisje që nuk i takon këtij objekti, veprimet doganore kryhen vetëm pasi të shlyhet dhe të dokumentohet pagesa e taksës doganore që nuk ishte paguar, në zbatim të këtij vendimi.

Seksioni 2

Mallrat e rikthyera

Neni 522

Mallrat që konsiderohen të rikthyera në gjendjen në të cilën ishin eksportuar

(Pika 5, e nenit 185, të Kodit)

1. Mallrat konsiderohen të rikthyera në gjendjen në të cilën ishin eksportuar, kur pas eksportimit nga territori doganor i Republikës së Shqipërisë, ato nuk kanë pësuar asnjë trajtim apo përpunim tjetër, përveç atij që i ndryshon pamjen ose që është i nevojshëm për riparimin, mbajtjen ose ruajtjen e tyre në gjendje të mirë.

2. Mallrat konsiderohen të rikthyera në gjendjen në të cilën ishin eksportuar, kur pas eksportimit nga territori doganor i Republikës së Shqipërisë, ato kanë pësuar një trajtim ose përpunim tjetër, të ndryshëm nga ai që i ndryshon pamjen apo që është i nevojshëm për riparimin, mbajtjen ose ruajtjen e tyre në gjendje të mirë, por pas fillimit të këtij trajtimi ose përpunimi rezultoi se ky i fundit nuk ndryshoi qëllimin e përdorimit për të cilin ishin destinuar mallrat.

3. Kur mallrat e referuara në pikat 1 ose 2 i janë nënshtruar trajtimit ose përpunimit që do t'i bënte ato objekt të detyrimit të importit, nëse do të kishin qenë të vendosura nën regjimin e përpunimit pasiv, këto mallra konsiderohen të rikthyera në gjendjen në të cilën ishin eksportuar vetëm me kusht që trajtimi ose përpunimi, duke përfshirë edhe trupëzimin e pjesëve të këmbimit, nuk tejkalon atë që është e nevojshme për t'u mundësuar mallrave që të përdoren në të njëjtën mënyrë si në kohën e eksportimit nga territori doganor i Republikës së Shqipërisë.

Neni 523

Informacioni i kërkuar

(Pika 6, e nenit 185, të Kodit)

1. Deklaruesi informon zyrën doganore ku është depozituar deklarata doganore për çlirimin për qarkullim të lirë, që kushtet për përjashtimin nga detyrimet e importit janë plotësuar.

2. Informacioni i përmendur në pikën 1, mund të sigurohet me një nga mjetet e mëposhtme:

a) Aksesit në të dhënat përkatëse të deklaratës doganore apo riekспортit, në bazë të së cilës mallrat e rikthyera janë eksportuar apo riekспортuar fillimisht nga territori doganor i Republikës së Shqipërisë;

b) Një kopje e vërtetuar nga zyra doganore kompetente e deklaratës doganore apo të riekспортit, në bazë të së cilës mallrat e rikthyera janë eksportuar apo riekспортuar fillimisht nga territori doganor i Republikës së Shqipërisë

c) Një dokument i lëshuar nga zyra doganore kompetente me të dhënat përkatëse të kësaj deklarate doganore ose deklaratës së riekспортit;

ç) Një dokument i lëshuar nga autoritetet doganore, që vërteton se janë përmbushur kushtet për përjashtimin nga detyrimi i importit (informacionit fletë INF3).

3. Kur informacioni në dispozicion të autoriteteve doganore kompetente vërteton se mallrat e deklaruarat për çlirim për qarkullim të lirë janë eksportuar fillimisht nga territori doganor i Republikës së Shqipërisë dhe në atë kohë kishin përmbushur kushtet për t'i dhënë përjashtim nga detyrimi i importit si mallra të rikthyera, informacioni i referuar në pikën 2 nuk do të kërkohej.

4. Pika 2 nuk do të zbatohet kur mallrat deklarohen për çlirim për qarkullim të lirë, me gojë ose me anë të ndonjë veprimi tjetër. Nuk do të zbatohet as për qarkullimin ndërkombëtar të materialeve të paketimit/ambalazheve, mjeteve të transportit ose disa mallrave të vendosura nën një regjim doganor të posaçëm, përveç kur parashikohet ndryshe.

Neni 524

Mallrat që përfitojnë në eksport nga masat e politikës bujqësore

(Neni 186 dhe pika 6, e nenit 185 të Kodit)

1. Mallrat e rikthyer, që përfitojnë në eksport nga masat e politikës bujqësore, përjashtohen nga detyrimi i importit kur plotësohen të gjitha kushtet e mëposhtme:

a) Janë rikthyer shumat e paguara në bazë të këtyre masave dhe autoritetet kompetente kanë ndërmarrë hapat e nevojshëm për të tërhequr shumat e përfituara në bazë të politikës bujqësore në lidhje me këto mallra apo janë anuluar përfitimet e tjera financiare të dhëna;

b) Mallrat janë në një nga situatat e mëposhtme:

i. nuk mund të hidhen në treg në vendin ku janë dërguar;

ii. janë kthyer nga marrësi për arsye defektesh ose nuk janë në përputhje me kontratën;

iii. janë rikthyer në territorin doganor të Republikës së Shqipërisë sepse nuk mund të përdorëshin për qëllimet e destinuara për shkak të rrethanave jashtë kontrollit të eksportuesit;

c) mallrat janë deklaruar për çlirim në qarkullim të lirë në territorin doganor Republikës së Shqipërisë brenda 12 muajve nga data e përfundimit të formaliteteve doganore lidhur me eksportimin e tyre.

2. Rrethanat e referuara në nënndarjen “iii”, të shkronjës “b”, të pikës 1, janë, si më poshtë vijon:

a) Mallrat e rikthyer në territorin doganor të Republikës së Shqipërisë si pasojë e dëmeve të vetë mallrave ose të mjetit të transportit me të cilin janë transportuar, të ndodhura para marrjes në dorëzim nga marrësi; b) Mallrat e eksportuara fillimisht për qëllime të konsumit ose shitjes në një panair tregtar apo rast të ngjashëm, që nuk janë konsumuar apo shitur;

c) Mallrat, të cilat nuk mund t'i dorëzoheshin marrësit për shkak të paafësisë së tij fizike ose ligjore për të respektuar kontratën, sipas së cilës u eksportuan mallrat;

ç) Mallrat, të cilat për shkak të çrregullimeve natyrore, politike apo shoqërore, nuk mund t'i dorëzohen marrësit ose i janë dorëzuar atij pas datës së dorëzimit kontraktual;

d) Frutat dhe perimet, të eksportuara për qëllime shitjeje, por të cilat nuk janë shitur në tregun e vendit të destinacionit.

3. Deklarata për çlirim për qarkullim të lirë në lidhje me mallrat e rikthyer, eksportimi i të cilave ka përmbushur formalitetet për marrjen e rimbursimeve ose pagesave të tjera të përcaktuara në bazë të masave të politikave bujqësore, duhet të mbështetet nga dokumentet e përmendura në nenin 523 dhe nga një certifikatë e lëshuar nga autoritetet kompetente për dhënien e rimbursimit apo pagesave të tilla në Republikën e Shqipërisë.

4. Kur autoritetet e zyrës doganore ku mallrat janë deklaruar për çlirim për qarkullim të lirë kanë informacion që vërteton se asnjë rimbursim ose pagesë tjetër e parashikuar në eksport në bazë të masave të politikave bujqësore nuk janë dhënë dhe nuk mund të jepen, certifikata nuk do të jetë e nevojshme.

Neni 525

Lëshimi i fletës së informacionit INF 3

(Nenet 17, pika 3, shkronja “a” dhe 185, pika 6, të Kodit)

1. Eksportuesi mund të kërkojë një fletë informacioni INF 3 nga zyra doganore e eksportit.

2. Kur eksportuesi kërkon fletën e informacionit INF 3 në kohën e eksportit, fleta e informacionit INF 3 do të lëshohet nga zyra doganore e eksportit në kohën e përfundimit të formaliteteve të eksportit për mallrat.

Kur është e mundur që mallrat e eksportuara të rikthehen në territorin doganor të Republikës së Shqipërisë nëpërmjet disa zyrave doganore, eksportuesi mund të kërkojë disa fletë informuese INF 3, ku secila mbulon një pjesë të sasisë totale të mallrave të eksportuara.

3. Kur eksportuesi kërkon një fletë informacioni INF 3 për mallrat pas përfundimit të formaliteteve

të eksportit, fleta e informacionit INF 3 mund të lëshohet nga zyra doganore e eksportit, nëse informacioni në lidhje me mallrat e deklaruar nga eksportuesi korrespondon me informacionin në dispozicion të zyrës doganore të eksportit në lidhje me mallrat e eksportuara dhe asnjë rimbursim ose pagesa të tjera të parashikuara në eksport në bazë të masave të politikave bujqësore nuk janë dhënë, dhe nuk mund të jepen, në lidhje me këto mallra.

4. Kur një fletë informacioni INF 3 është lëshuar, eksportuesi mund të kërkojë që zyra doganore e eksportit ta zëvendësojë atë me disa fletë informative INF 3 ku secila mbulon një pjesë të sasisë totale të mallrave të përfshira në fletën informacioni INF 3 të lëshuar fillimisht.

5. Eksportuesi mund të kërkojë që një fletë informative INF 3 të lëshohet vetëm në lidhje me një pjesë të mallrave të eksportuara.

6. Kur lëshohet në letër një fletë informacioni INF 3, një kopje mbahet nga zyra doganore e eksportit që e ka lëshuar atë.

7. Kur fleta origjinale e informacionit INF 3 e lëshuar në letër është vjedhur, humbur ose shkatërruar, zyra doganore e eksportit që e ka lëshuar atë, mund të lëshojë një dublikatë me kërkesë të eksportuesit.

Zyra doganore e eksportit shënon në kopjen e fletës së informacionit INF 3 në zotërim të saj, që një dublikatë është lëshuar.

8. Fleta e informacionit INF 3 do të hartohet duke përdorur formularin e përcaktuar në aneksin 62-02, të shtojcës B bashkëlidhur këtij vendimi dhe pjesë përbërëse e tij.

Neni 526

Mjetet e komunikimit të fletës së informacionit INF 3

(Shkronja “a”, e pikës 3, të nenit 17, të Kodit)

Dokumenti që vërteton se janë përmbushur kushtet për përjashtim nga detyrimi i importit ('fleta e informacionit INF 3') mund të komunikohet duke përdorur mjete të ndryshme nga teknikat informatike të përpunimit të të dhënave.

Neni 527

Komunikimi ndërmjet autoriteteve

(Pika 6, e nenit 185, të Kodit)

Me kërkesë të zyrës doganore ku mallrat e rikthyera janë deklaruar për çlirim për qarkullim të lirë, zyra

doganore e eksportit dërgon çdo informacionin në dispozicion të saj, në të cilin përcaktohet se kushtet për përjashtimin nga detyrimi i importit janë plotësuar në lidhje me ato mallra.

Seksioni 3

Produktet e peshkimit detar dhe produkte të tjera të nxjerra nga deti

Neni 528

Përjashtimi nga detyrimi i importit

(Pika 2, e nenit 189, të Kodit)

Prova që kushtet e përcaktuara në pikën 1, të nenit 189, të Kodit, janë përmbushur mund të jepet, sipas rastit në përputhje me dispozitat e neneve 162 deri 165 dhe neneve 483 deri 485.

TITULLI VII REGJIMET E POSAÇME

KREU 1
Dispozita të përgjithshme

Seksioni 1
Aplikimi për autorizim

Neni 529
Aplikuesi i vendosur jashtë territorit doganor të Republikës së Shqipërisë
(Shkronja “a”, e pikës 3, të nenit 192, të Kodit)

Duke anashkaluar përcaktimet e shkronjës “a”, të pikës 3, të nenit 192, të Kodit, autoritetet doganore në raste të caktuara, kur e konsiderojnë të justifikuar, mund t’i japin autorizim për regjimin e përdorimit të veçantë përfundimtar (*end-use*) ose regjimin e përpunimit aktiv personave të vendosur jashtë territorit doganor të Republikës së Shqipërisë.

Neni 530
Vendi për dorëzimin e aplikimeve, kur aplikuesi është i vendosur jashtë territorit doganor të Republikës së Shqipërisë
(Pika 1, e nenit 27, të Kodit)

1. Duke anashkaluar paragrafin e tretë, të pikës 1, të nenit 27, të Kodit, në rastet kur aplikuesi për autorizimin e regjimit të përdorimit të veçantë përfundimtar (*end-use*) është i vendosur jashtë territorit doganor të Republikës së Shqipërisë, autoriteti doganor kompetent për depozitimin e aplikimit është Drejtoria e Përgjithshme e Doganave.

2. Duke anashkaluar paragrafin e tretë, të pikës 1, të nenit 27, të Kodit, në rastet kur aplikuesi për autorizim i regjimit të përpunimit aktiv është i vendosur jashtë territorit doganor të Republikës së Shqipërisë, autoriteti doganor kompetent për depozitimin e aplikimit është Drejtoria e Përgjithshme e Doganave.

Neni 531
Aplikimi për autorizim bazuar në një deklaratë doganore
(Nenet 17, pikat 1, 2 e 3, shkronja “a”, dhe 192, pika 1, të Kodit)
(Shtuar shkronja “e” e pikës 1, shfuqizuar shkronja “e” e pikës 2 me VKM nr. 872, datë 30.12.2024)

1. Deklarata doganore, me kusht që të plotësohet me të dhëna shtesë, siç përcaktohet në aneksin A, të shtojcës A bashkëlidhur këtij vendimi dhe pjesë përbërëse e tij, konsiderohet si një aplikim për autorizim në secilin prej rasteve të mëposhtme:

a) Kur mallrat duhet të vendosen nën regjimin e lejimit të përkohshëm, nëse autoritetet doganore kërkojnë një aplikim formal në rastet e përcaktuara nga shkronja “b”, e nenit 681;

b) Kur mallrat duhet të vendosen nën regjimin e përdorimit të veçantë përfundimtar (*end-use*) dhe aplikuesi ka për qëllim t’i vendosë tërësisht mallrat e përdorimit të veçantë përfundimtar (*end-use*), të parashikuara;

c) Kur mallra të tjera nga ato të renditura në aneksin 71-02, të shtojcës A bashkëlidhur këtij vendimi dhe pjesë përbërëse e tij, duhet të vendosen nën regjimin e përpunimit aktiv;

ç) Kur mallra të tjera nga ato të renditura në aneksin 71-02, të shtojcës A bashkëlidhur këtij vendimi dhe pjesë përbërëse e tij, duhet të vendosen nën regjimin e përpunimit pasiv;

d) Kur është dhënë një autorizim për përdorimin e regjimit të përpunimit pasiv dhe produktet zëvendësuese duhet të hidhen në qarkullim të lirë duke përdorur sistemin e shkëmbimit standard, i cili nuk mbulohet nga ky autorizim;

dh) Kur produktet e përpunuara hidhen në qarkullim të lirë pas përpunimit pasiv dhe operacioni i përpunimit ka të bëjë me mallra të natyrës jotregtare.

e) Kur mallrat e listuara në shtojcën A, aneksi 71-02, vlera e të cilave nuk kalon vlerën ekuivalente në lekë të shumës 150 000 (njëqind e pesëdhjetë mijë) euro janë vendosur ose do të vendosen në regjimin e përpunimit aktiv dhe do të shkatërrohen nën mbikëqyrjen doganore, për shkak të rrethanave të veçanta dhe të justifikuara siç duhet.

2. Pika 1, nuk zbatohet në rastet:

a) e deklaruesit të thjeshtuar;

b) e zhdoganimit të centralizuar;

c) e hyrjes në regjistrimet e deklaruesit;

ç) e aplikimit për një autorizim, të ndryshëm nga ai për lejim të përkohshëm, që përfshin më shumë se një zyrë doganore;

d) e aplikimit për përdorim të mallrave ekuivalente në përputhje me nenin 201 të Kodit;

dh) kur autoriteti doganor kompetent informon deklaruesin se është i nevojshëm shqyrtimi i kushteve ekonomike në përputhje me pikën 5, të nenit 192, të Kodit;

e) Shfuqizuar;

ë) kur zbatohet autorizimi me efekt prapaveprues në përputhje me pikën 2, të nenit 192, të Kodit, me përjashtim të rasteve të referuara në shkronjat “d” dhe “dh”, të pikës 1, të këtij neni.

3. Kur autoritetet doganore gjykojnë se vendosja e mjeteve të transportit ose e pjesëve të këmbimit, aksesoreve dhe pajisjeve për mjetet e transportit në regjimin e lejimit të përkohshëm do të përbënte një rrezik serioz të mospërmbushjes së një prej detyrimeve të parashikuara në legjislacionin doganor, deklarata doganore e përmendur në pikën 1, nuk duhet të bëhet me gojë ose në përputhje me nenin 304. Në këtë rast, pas paraqitjes së mallrave në doganë, autoritetet doganore informojnë deklaruesin pa vonesë.

4. Detyrimi për të paraqitur të dhëna shtesë të referuara në pikën 1 nuk zbatohet në deklaratat e mëposhtme:

a) deklaraten doganore për çlirim në qarkullim të lirë të bëra me gojë në përputhje me nenin 304;

b) deklaraten doganore për lejim të përkohshëm ose deklaraten e rieksporit, të bëra me gojë në përputhje me nenin 305;

c) deklaraten doganore për lejim të përkohshëm ose deklaraten e rieksporit në përputhje me nenin 309, të konsideruara si të bëra në përputhje me nenin 311.

5. Carnet ATA dhe Carnet CPD konsiderohen aplikime për autorizim për lejimin e përkohshëm, kur ato përmbushin të gjitha kushtet e mëposhtme:

a) Carnet-i është lëshuar në një palë kontraktuese të Konventës ATA ose Konventës së Stambollit dhe është miratuar e garantuar nga një shoqëri, e cila është pjesë e një zinxhiri garantues, sipas përcaktimit të shkronjës “d”, të nenit 1, të aneksit A, të Konventës së Stambollit;

b) Carnet-i lidhet me mallrat dhe përdorimet e parashikuara nga Konventa sipas së cilës është lëshuar;

c) Carnet-i është i certifikuar nga autoritetet doganore;

ç) Carnet-i është i vlefshëm në të gjithë territorin doganor të Republikës së Shqipërisë.

Neni 532

Aplikimi për rinovimin ose ndryshimin e një autorizimi

(Shkronja “a”, e pikës 3, të nenit 17, të Kodit)

Autoritetet doganore mund të lejojnë që aplikimi për rinovimin ose ndryshimin e një autorizimi të referuar në pikën 1, të nenit 192, të Kodit, të paraqitet me shkrim.

Neni 533

Dokumentet shoqëruese për një deklaratë doganore me gojë në regjimin e lejimit të përkohshëm

(Nenet 17, pikat 2 e 3, shkronja “a”, dhe 192, pika 1, të Kodit)

Kur një deklaratë doganore me gojë është konsideruar si një aplikim për një autorizim për lejim të përkohshëm në përputhje me nenin 531, deklaruesi duhet të paraqesë një dokument shoqërues, sipas përcaktimit të aneksit 71-01, të shtojcës A bashkëlidhur këtij vendimi dhe pjesë përbërëse e tij.

Neni 534

Dokumenti mbështetës për një deklaratë doganore me gojë për lejim të përkohshëm

(Pika 2, e nenit 27, të Kodit)

Kur një aplikim për një autorizim për lejim të përkohshëm është bazuar në një deklaratë doganore me gojë, deklaruesi paraqet dokumentin mbështetës të përmendur në nenin 533, në dy kopje dhe, një kopje e miratuar nga autoriteti doganor do t'i jepet mbajtësit të autorizimit.

Seksioni 2

Marrja e vendimit për aplikimin

Neni 535

Shqyrtimi i kushteve ekonomike

(Pikat 3 dhe 4, të nenit 192, të Kodit)

(Ndryshuar shkronja “b” e pikës 1 me VKM nr. 872, datë 30.12.2024)

1. Kushti i përcaktuar në shkronjën “b”, të pikës 4, të nenit 192, të Kodit, nuk zbatohet për autorizime të përpunimit aktiv, përveç rasteve të mëposhtme:

a) Kur llogaritja e shumës së detyrimit të importit është bërë në përputhje me pikën 3, të nenit 81, të Kodit, ekziston prova se interesat thelbësorë të prodhuesve shqiptarë mund të ndikohen negativisht dhe rasti nuk parashikohet nga shkronjat “a” deri “dh”, të pikës 1, të nenit 537;

b) Kur llogaritja e shumës së detyrimeve të importit është bërë në përputhje me nenin 81, të Kodit, mallrat e destinuara për t'u vendosur nën regjimin e përpunimit aktiv do të ishin objekt i një mase të politikës bujqësore ose tregtare, nëse do të deklaroheshin për çlirim në qarkullim të lirë dhe nëse rasti nuk mbulohet nga shkronjat “dh”, “e” ose “h”, të pikës 1 të nenit 537;

c) Kur llogaritja e shumës së detyrimit të importit është bërë në përputhje me nenin 80 të Kodit, mallrat e destinuara për t'u vendosur në regjimin e përpunimit aktiv nuk do t'i nënshtrohen një mase të politikës bujqësore ose tregtare, një detyrimi të përkohshëm ose të përhershëm antidumping, një detyrimi kundërbalances, një mase mbrojtëse apo detyrimi shtesë që rezulton nga një pezullim i koncesioneve, nëse do të ishin deklaruar për çlirim në qarkullim të lirë, atëherë ekziston prova se interesat thelbësorë të prodhuesve shqiptarë mund të ndikohen negativisht dhe ky rast nuk mbulohet nga shkronjat “e” – “n”, të pikës 1, të nenit 537.

2. Kushti i përcaktuar në shkronjën “b”, të pikës 4, të nenit 192, të Kodit, nuk zbatohet për autorizimet për përpunim pasiv, përveç rasteve kur ekziston prova se interesat thelbësorë të prodhuesve shqiptarë për mallrat e listuara në aneksin 71-02, të shtojcës A bashkëlidhur këtij vendimi dhe pjesë përbërëse e tij, ka mundësi të ndikohen negativisht dhe mallrat nuk janë të destinuara për riparim.

Neni 536

Procedura e shqyrtimit të kushteve ekonomike

(Shkronja “a” e pikës 1, të nenit 32 dhe pika 5, e nenit 192, të Kodit)

1. Kur pas një aplikimi për autorizim të përmendur në shkronjën “a”, të pikës 1, të nenit 192, të Kodit shqyrtimi i kushteve ekonomike është i nevojshëm në përputhje me pikën 5, të nenit 192, të Kodit, autoriteti doganor kompetent për të marrë vendim për aplikimin do t’ia transmetojë pa vonesë dosjen DPD, për një shqyrtim të tillë.

2. Kur, pas lëshimit të një autorizimi për përdorimin e regjimit të përpunimit, autoriteti doganor vihet në dijeni që përdorimi i këtij autorizimi mund të cenojë interesat thelbësore të prodhuesve të Republikës së Shqipërisë, autoriteti doganor do t’ia transmetojë dosjen DPD duke kërkuar shqyrtim të kushteve ekonomike.

3. Një shqyrtim i kushteve ekonomike në nivel kombëtar mund të bëhet me iniciativën e DPD, kur ka prova se interesat thelbësore të prodhuesve të Republikës së Shqipërisë mund të cenohen nga përdorimi i një autorizimi.

4. DPD do të caktojë një grup ekspertësh, të përbërë nga përfaqësues të administratës doganore, të cilët këshillojnë DPD për të përcaktuar nëse kushtet ekonomike janë plotësuar apo jo.

5. Përfundimi i arritur nga shqyrtimi i kushteve ekonomike do të merret parasysh nga autoriteti doganor në fjalë dhe nga çdo autoritet tjetër doganor që ka të bëjë me aplikime apo autorizime të ngjashme.

Mund të specifikohet në përfundimet e arritura në shqyrtim të kushteve ekonomike, që rasti në shqyrtim është unik dhe për këtë arsye nuk mund të shërbejë si precedent për aplikime apo autorizime të tjera.

6. Kur është konstatuar se kushtet ekonomike nuk përmbushen më, autoritetet doganore kompetente do të revokojnë autorizimin përkatës. Revokimi hyn në fuqi jo më vonë se 1 vit nga e nesërmja e datës në të cilën mbajtësi i autorizimit ka marrë dijeni për vendimin e revokimit.

Neni 537

Rastet në të cilat kushtet ekonomike konsiderohen të plotësuara për regjimin e përpunimit aktiv

(Pika 5, e nenit 192, të Kodit)

1. Kushtet ekonomike për regjimin e përpunimit aktiv konsiderohen të plotësuara kur aplikimi lidhet me një nga operacionet e mëposhtme:

a) Përpunimin e mallrave që nuk janë të listuara në aneksin 71-02, të shtojcës A bashkëlidhur këtij vendimi

dhe pjesë përbërëse e tij;

b) Riparimin;

c) Përpunimin e mallrave të vëna direkt ose indirekt në dispozicion të mbajtësit të autorizimit, i kryer sipas specifikave në emër të një personi të vendosur jashtë territorit doganor të Republikës së Shqipërisë, përgjithësisht vetëm kundrejt pagesës së shpenzimeve të përpunimit;

ç) Përpunimin e grurit të fortë (durum) në makarona;

d) Vendosjen e mallrave në përpunimin aktiv brenda kufijve të sasisë së përcaktuar mbi bazën e një ekuilibri në përputhje me legjislacionin e posaçëm që përcakton një gjë të tillë;

dh) Përpunimin e mallrave të cilat janë të listuara në aneksin 71-02, të shtojcës A bashkëlidhur këtij vendimi dhe pjesë përbërëse e tij, në një nga situatat e mëposhtme:

i. mungesa e mallrave të prodhuara në Republikën e Shqipërisë që kanë të njëjtin kod 8-shifror të Nomenklaturës së Kombinuar të Mallrave, të njëjtën cilësi tregtare dhe karakteristika teknike si mallrat e destinuar për t’u importuar për operacionet e parashikuara të përpunimit;

ii. diferencat në çmim mes mallrave të prodhuara në Republikën e Shqipërisë dhe atyre të destinuar për importim, kur mallra të krahasueshme nuk mund të përdoren për shkak se çmimi i tyre nuk do ta bënte veprimin tregtar ekonomikisht të mundur;

iii. detyrimet kontraktuale kur mallrat e krahasueshme nuk janë në përputhje me kërkesat kontraktuale të blerësit të një vendi tjetër për produktet e përpunuara ose kur, në përputhje me kontratën, produktet e përpunuara duhet të jenë përfutur nga mallrat e destinuara për t'u vendosur në regjimin e përpunimit aktiv, në mënyrë që të përputhen me dispozitat në lidhje me mbrojtjen e të drejtave të pronësisë industriale ose tregtare; iv. vlera totale e mallrave për t'u vendosur nën regjimin e përpunimit aktiv për aplikues, vit kalendarik dhe për çdo kod tetëshifror të Nomenklaturës së Kombinuar të Mallrave nuk e kalon vlerën ekuivalente në lekë të shumës 150 000 (njëqind e pesëdhjetë mijë) euro;

e) Përpunimin e mallrave për të siguruar përputhjen e tyre me kërkesat teknike për çlirimin në qarkullim të lirë;

ë) Përpunimin e mallrave të natyrës jotregtare;

f) Përpunimin e mallrave bazuar në një autorizim të mëparshëm, lëshimi i të cilit ishte objekt i shqyrtimit të kushteve ekonomike;

g) Përpunimin e fraksioneve të ngurta dhe të lëngshme të vajit të palmës, vajit të kokosit, fraksionet e lëngshme të vajit të kokosit, të vajit të palmës kernel, të vajit babassu ose vajit të recinit në produkte të cilat nuk janë të destinuara për sektorin ushqimor;

gj) Përpunimin e produkteve që trupëzohen ose përdoren në aviacionin civil për të cilin është lëshuar certifikata e vlefshmërisë ajrore;

h) Përpunimin e produkteve që përfitojnë nga pezullimi autonom i detyrimit të importit të armëve dhe pajisjeve ushtarake të caktuara, në përputhje me legjislacionin e posaçëm që përcakton një gjë të tillë;

i) Përpunimin e mallrave në mostra;

j) Përpunimin e çdo lloji të komponentëve elektronikë, pjesëve, bashkimeve apo ndonjë materiali tjetër në produkte të teknologjisë së informacionit;

k) Përpunimin e mallrave që klasifikohen në kodet e Nomenklaturës së Kombinuar të Mallrave 2707 ose

2710 në produkte që klasifikohen në kodet e Nomenklaturës së Kombinuar të Mallrave 2707, 2710 ose 2902;

l) Reduktimin në mbeturina dhe skrap, shkatërrimin, rikuperimin e pjesëve ose komponentëve;

ll) Denatyrimin;

m) Format e zakonshme të trajtimit të përmendura në nenin 199 të Kodit;

n) Vlerën totale të mallrave për t'u vendosur në regjimin e përpunimit aktiv për aplikues, vit kalendarik dhe për çdo kod tetëshifror të Nomenklaturës së Kombinuar të Mallrave nuk e kalon vlerën ekuivalente në lekë të shumës 150 000 (njëqind e pesëdhjetë mijë) euro në lidhje me mallrat e listuara në aneksin 71-02, të shtojcës A bashkëlidhur këtij vendimi dhe pjesë përbërëse e tij dhe vlerën ekuivalente në lekë të shumës 300 000 (treqind mijë) euro për mallra të tjera, me përjashtim të rasteve kur mallrat e destinuara për t'u vendosur në regjimin e përpunimit aktiv do t'i nënshtrohen detyrimit të përkohshëm ose përfundimtar antidumping, detyrimit kundërbalancues, një mase mbrojtëse apo një detyrimi shtesë që rezulton nga një pezullim i koncesioneve, nëse do të ishin deklaruar për çlirim në qarkullim të lirë.

2. Mungesa e mallrave të përmendura në nënndarjen "i", të shkronjës "dh", të pikës 1, ka të bëjë me rastet e mëposhtme:

a) mungesën totale të prodhimit të mallrave të krahasueshme brenda territorit doganor të Republikës së Shqipërisë;

b) mungesën e një sasive të mjaftueshme të këtyre mallrave, në mënyrë që të kryhen operacionet e parashikuara të përpunimit;

c) mallrat shqiptare të krahasueshme nuk mund të vihen në kohë në dispozicion të aplikuesit për operacionin tregtar të propozuar për t'u kryer, pavarësisht nga fakti se aplikimi është bërë në kohën e duhur.

Neni 538

Llogaritja e shumës së detyrimit të importit në raste të caktuara të regjimit të përpunimit aktiv (Pika 4, e nenit 81, të Kodit)

1. Kur nuk kërkohet shqyrtimi i kushteve ekonomike dhe mallrat e destinuara për t'u vendosur nën regjimin e përpunimit aktiv do të jenë objekt i një mase të politikës bujqësore ose tregtare, një detyrimi të përkohshëm ose përfundimtar antidumping, një detyrimi kundërbalancues, një mase mbrojtëse apo një detyrimi shtesë që rezulton nga një pezullim i koncesioneve nëse do të deklaroheshin për çlirim në qarkullim të lirë, shuma e detyrimit të importit do të llogaritet në përputhje me pikën 3, të nenit 81, të Kodit.

Paragrafi i parë nuk zbatohet nëse kushtet ekonomike konsiderohen të plotësuara në rastet e përcaktuara në shkronjat “ë”, “f”, “i”, “l” ose “n”, të pikës 1, të nenit 537.

2. Kur produktet e përpunuara që rezultojnë nga regjimi i përpunimit aktiv janë të importuara direkt ose indirekt nga mbajtësi i autorizimit dhe janë çliruar për qarkullim të lirë brenda një periudhe prej një viti pas riekспортimit të tyre, shuma e detyrimit të importit duhet të përcaktohet në përputhje me pikën 3, të nenit 81, të Kodit.

Neni 539

Procedura e konsultimit mes autoriteteve doganore (Neni 27 i Kodit)

1. Kur është paraqitur një aplikim për një autorizim të përmendur në pikën 1, të nenit 192, të Kodit dhe përfshin më shumë se një autoritet doganor, zbatohen nenet 27 dhe 31, si dhe pikat 2 deri 5, të këtij neni, përveçse kur autoriteti doganor kompetent për marrjen e vendimit gjykon të arsyeshme se kushtet për dhënien e një autorizimi të tillë nuk janë përmbushur.

2. Autoriteti doganor kompetent për marrjen e vendimit do t'i komunikojë autoriteteve të tjera doganore të përfshira aplikimin dhe draftautorizimin, jo më vonë se 30 ditë pas datës së pranimi të aplikimit.

3. Në rastet kur është iniciuar konsultimi, asnjë autorizim që përfshin më shumë se një autoritet doganor nuk do të lëshohet pa pëlqimin paraprak të autoriteteve doganore përkatëse mbi draftautorizimin.

4. Autoritetet e tjera doganore kompetente duhet të komunikojnë miratimin ose kundërshtimet e tyre brenda 30 ditëve pas datës në të cilën u është komunikuar draftautorizimi. Kundërshtimet duhet të justifikohen në mënyrë të arsyetuar.

Kur kundërshtimet janë komunikuar dhe nuk arrihet mirëkuptimi brenda 60 ditëve nga data në të cilën është komunikuar draftautorizimi, autorizimi nuk do të jepet për pjesët mbi të cilat janë ngritur kundërshtime.

5. Nëse autoritetet e tjera doganore të përfshira nuk kanë komunikuar kundërshtime brenda 30 ditëve nga data në të cilën është komunikuar draftautorizimi, miratimi i tyre do të konsiderohet i dhënë.

Neni 540

Rastet në të cilat nuk është e nevojshme procedura e konsultimit (Neni 27 i Kodit)

1. Autoriteti doganor kompetent merr një vendim për një aplikim, pa konsultimin e autoriteteve të tjera doganore të përfshira, siç është përcaktuar në nenin 549, në rastet e mëposhtme:

- a) Një autorizim që përfshin më shumë se një autoritet doganor është:
 - i) rinovuar;
 - ii) nënshtruar ndryshimeve të vogla;

- iii) anuluar; iv) pezulluar; v) revokuar;
- b) Dy ose më shumë autoritete doganore të përfshira kanë rënë dakord me to;
- c) Aktiviteti i vetëm që përfshin autoritetet e ndryshme doganore është një operacion ku zyra doganore e vendosjes nën regjim dhe zyra doganore e mbylljes së regjimit nuk janë të njëjta;
- ç) Një aplikim për autorizim për lejim të përkohshëm, i cili përfshin më shumë se një autoritet doganor do të bëhet në bazë të një deklarate doganore në formën standarde.

Në raste të tilla, autoriteti doganor pasi ka marrë vendimin, vë në dispozicion të autoriteteve të tjera doganore, të dhënat e autorizimit.

2. Autoriteti doganor kompetent merr një vendim për një aplikim pa konsultimin e autoriteteve të tjera doganore të përfshira, siç është përcaktuar në nenin 539 dhe pa vënien në dispozicion të të dhënave të autorizimit ndaj autoriteteve të tjera doganore në përputhje me pikën 1, në rastet e mëposhtme:

- a) Kur përdoren Carnet ATA ose Carnet CPD;
- b) Kur një autorizim për lejim të përkohshëm është dhënë nga çlirimi i mallrave për vendosjen nën regjimin përkatës doganor, në përputhje me nenin 555;
- c) Kur dy ose më shumë autoritete doganore të përfshira, kanë shprehur miratimin;
- ç) Ku i vetmi aktivitet që përfshin autoritetet e ndryshme doganore, lidhet me lëvizjen e mallrave.

Neni 541

Autorizimi për përdorimin e mallrave ekuivalente

(Neni 201, pikat 1, 2 e 3, shkronja “c”, të Kodit)

1. Për qëllim të dhënies së autorizimit në përputhje me pikën 2, të nenit 201, të Kodit, nuk përbën rëndësi nëse përdorimi i mallrave ekuivalente është sistematik apo jo.

2. Përdorimi i mallrave ekuivalente, sipas përcaktimit të paragrafit të parë, të pikës 1, të nenit 201, të Kodit, nuk autorizohet kur mallrat e vendosura në regjimin e posaçëm do të jenë objekt i një detyrimi të përkohshëm ose përfundimtar antidumping, një detyrimi kundërbalancues, një detyrimi mbrojtës apo shtese që rezulton nga një pezullim i koncesioneve nëse do të ishin deklaruar për çlirim në qarkullim të lirë.

3. Përdorimi i mallrave ekuivalente, sipas përcaktimit të paragrafit të dytë, të pikës 1, të nenit 201, të Kodit, nuk do të autorizohet kur mallrat joshqiptare të përpunuara në vend të mallrave shqiptare të vendosura në regjimin e përpunimit pasiv do të jenë objekt i një detyrimi të përkohshëm ose përfundimtar antidumping, një detyrimi kundërbalancues, një mase mbrojtëse apo një detyrimi shtesë që rezulton nga një pezullim i koncesioneve nëse do të ishin deklaruar për çlirim në qarkullim të lirë.

4. Përdorimi i mallrave ekuivalente nën regjimin e magazinimit doganor nuk autorizohet kur mallrat joshqiptare të vendosura nën regjimin e magazinimit doganor janë ato të listuara në aneksin 71-02, të shtojcës A bashkëlidhur këtij vendimi dhe pjesë përbërëse e tij.

5. Përdorimi i mallrave ekuivalente nuk autorizohet për mallrat ose produktet që janë të modifikuara gjenetiksht ose përmbajnë elemente që u janë nënshtruar modifikimit gjenetik.

6. Duke anashkaluar paragrafin e tretë, të pikës 1, të nenit 201, të Kodit, do të konsiderohen si mallra ekuivalente për regjimin e përpunimit aktiv:

- a) mallrat në një fazë më të avancuar të fabrikimit se mallrat joshqiptare të vendosura në regjimin e përpunimit aktiv, kur pjesa thelbësore e përpunimit të këtyre mallrave ekuivalente kryhet nën sipërmarrjen e mbajtësit të autorizimit ose në atë sipërmarrje ku operacioni është kryer në emër të tij;
- b) në rastin e riparimit, mallrat e reja në vend të mallrave të përdorura ose të mallrave në një gjendje më të mirë se mallrat joshqiptare të vendosura në regjimin e përpunimit aktiv;
- c) mallrat me karakteristika teknike të ngjashme me mallrat të cilat ato zëvendësojnë, me kusht që të kenë të njëjtin kod tetëshifror të Nomenklaturës së Kombinuar të Mallrave dhe të njëjtin cilësi

tregtare.

7. Duke anashkaluar paragrafin e tretë, të pikës 1, të nenit 201, të Kodit, për mallrat e listuara në aneksin 71-04, të shtojcës A bashkëlidhur këtij vendimi dhe pjesë përbërëse e tij, do të zbatohen dispozitat e posaçme të përcaktuara në këtë aneks.

8. Në rast të regjimit të lejimit të përkohshëm, mallrat ekuivalente mund të përdoren vetëm kur autorizimi për lejim të përkohshëm me përjashtim të plotë nga detyrimi i importit jepet në përputhje me nenet 653 deri në 656.

Neni 542

Formalitetet për përdorimin e mallrave ekuivalente

(Neni 201 i Kodit)

1. Përdorimi i mallrave ekuivalente nuk do të jetë subjekt i formaliteteve për vendosjen e mallrave nën një regjim të posaçëm.

2. Mallrat ekuivalente mund të ruhen së bashku me mallra të tjera shqiptare ose mallra joshqiptare. Ned raste të tilla, autoriteti doganor mund të përcaktojë metoda të veçanta të identifikimit të mallrave ekuivalente, me qëllim dallimin e tyre nga mallrat e tjera shqiptare ose joshqiptare.

Kur është i pamundur ose do të ishte e mundur vetëm me kosto joproporcionale, identifikimi në çdo moment për çdo lloj malli do të kryhet ndarja kontabël në lidhje me secilin lloj të mallrave, statusin doganor dhe kur është e përshtatshme, origjinën e mallit.

3. Në rastin e regjimit të përdorimit të veçantë përfundimtar (*end-use*), mallrat të cilat janë zëvendësuar nga mallrat ekuivalente, nuk do të jenë më nën mbikëqyrjen doganore në secilin nga rastet e mëposhtme:

a) Mallrat ekuivalente janë përdorur për qëllime të përcaktuara për aplikimin e përjashtimit ose reduktimit të detyrimit;

b) Mallrat ekuivalente eksportohen, shkatërrohen ose braktisen për llogari të shtetit;

c) Mallrat ekuivalente janë përdorur për qëllime të ndryshme nga ato të parashikuara në aplikimin për zbatimin e përjashtimit apo reduktimin e normës të detyrimit dhe është paguar detyrimi i zbatueshëm në import.

Neni 543

Statusi i mallrave ekuivalente

(Neni 201 i Kodit)

1. Në rastin e magazinimit doganor dhe lejimit të përkohshëm, mallrat ekuivalente do të bëhen mallra joshqiptare dhe mallrat të cilat ato kanë zëvendësuar do të bëhen mallra shqiptare në kohën e çlirimit të tyre nën regjimin pasues doganor, për mbylljen e regjimit ose në kohën kur mallrat ekuivalente janë larguar nga territori doganor i Republikës së Shqipërisë.

2. Në rastin e përpunimit aktiv, mallrat ekuivalente dhe produktet e përpunuara prej tyre do të bëhen mallra joshqiptare dhe mallrat të cilat ato kanë zëvendësuar do të bëhen mallra shqiptare në kohën e çlirimit të tyre nën regjimin pasues doganor, për mbylljen e regjimit ose në kohën kur produktet e përpunuara janë larguar nga territori doganor i Republikës së Shqipërisë.

Megjithatë, kur mallrat e vendosura nën regjimin e përpunimit aktiv janë vënë në treg para se regjimi të jetë mbyllur, statusi i tyre do të ndryshojë në kohën kur ato janë vënë në treg. Në raste të jashtëzakonshme, kur mallrat ekuivalente pritet të mos jenë të disponueshme në kohën kur mallrat vendosen në treg, autoritetet doganore mund të lejojnë, me kërkesë të mbajtësit të regjimit, që mallrat ekuivalente të jenë në dispozicion në një kohë të mëvonshme brenda një periudhe të arsyeshme që do të përcaktohet nga ana e tyre.

3. Në rastin e eksportimit paraprak të produkteve të përpunuara në bazë të përpunimit aktiv,

mallrat ekuivalente dhe produktet e përpunuara të përfutuara prej tyre do të bëhen mallra joshqiptare me efekt prapaveprues në kohën e çlirimit të tyre për regjimin e eksportit, nëse mallrat që do të importohen janë vendosur nën këtë regjim.

Kur mallrat që do të importohen janë vendosur nën regjimin e përpunimit aktiv, ato në të njëjtën kohë do të bëhen mallra shqiptare.

Neni 544

Produktet e përpunuara ose mallrat e vendosura nën regjimin e përpunimit aktiv IM / EX

(Pika 1, e nenit 192, të Kodit)

1. Autorizimi për përpunimin aktiv IM/EX, me kërkesë të aplikuesit, duhet të specifikojë se produktet e përpunuara ose mallrat e vendosura nën këtë regjim të përpunimit aktiv IM/EX, të cilat nuk janë deklaruar për një regjim doganor pasues ose rieksportuar në përfundim të periudhës për mbyllje, do të konsiderohen se janë vendosur në qarkullim të lirë në datën e mbarimit të afatit për mbyllje.

2. Pika 1, nuk zbatohet për aq kohë sa produktet apo mallrat i nënshtrohen masave ndaluese ose kufizuese.

Neni 545

Afati për marrjen e vendimit lidhur me aplikimin për autorizim referuar pikës 1, të nenit 192, të Kodit

(Pika 3, e nenit 27, të Kodit)

1. Kur aplikimi për autorizim i referohet shkronjës “a”, të pikës 1, të nenit 192, të Kodit, vendimi për këtë aplikim, me përjashtim të paragrafit të parë, të pikës 3, të nenit 27, të Kodit, merret pa vonesë dhe jo më vonë se brenda 30 ditëve nga data e pranimi të aplikimit.

Kur aplikimi për autorizim i referohet shkronjës “b”, të pikës 1, të nenit 192, të Kodit, vendimi për këtë aplikim, duke anashkaluar paragrafin e parë, të pikës 3, të nenit 27, të Kodit, merret pa vonesë dhe jo më vonë se brenda 60 ditëve nga data e pranimi të aplikimit.

2. Kur kushtet ekonomike duhet të shqyrtohen në përputhje me pikën 4, të nenit 192, të Kodit, afati i përmendur në paragrafin e parë, të pikës 1, të këtij neni, zgjatet deri në një vit nga data në të cilën dosja depozitohet në Drejtorinë e Përgjithshme të Doganave.

Autoritetet doganore informojnë aplikuesin ose mbajtësin e autorizimit për nevojën e shqyrtimit të kushteve ekonomike dhe, në rast se nuk është lëshuar autorizimi, për zgjatjen e afatit kohor në përputhje me paragrafin e parë.

Neni 546

Efekt prapaveprues

(Pika 4, e nenit 27, të Kodit)

1. Në rastet kur autoritetet doganore japin një autorizim me efekt prapaveprues në përputhje me pikën 2, të nenit 192, të Kodit, autorizimi duhet të hyjë në fuqi jo më parë se data e pranimi të aplikimit.

2. Në raste të veçanta, autoritetet doganore mund të lejojnë që autorizimi i referuar në pikën 1, të hyjë në fuqi të paktën një vit para datës së pranimi të aplikimit dhe në rast të mallrave të listuara në aneksin 71-02, të shtojcës A bashkëlidhur këtij vendimi dhe pjesë përbërëse e tij, tre muaj para datës së pranimi të aplikimit.

3. Në qoftë se aplikimi ka të bëjë me rinovimin e autorizimit për të njëjtin lloj operacioni dhe mallrash, autorizimi mund të jepet me efekt prapaveprues nga data në të cilën ka përfunduar autorizimi i mëparshëm. Kur, në përputhje me pikën 4, të nenit 192, të Kodit, shqyrtimi i kushteve ekonomike

është i nevojshëm në lidhje me rinovimin e autorizimit për të njëjtin lloj operacioni dhe mallrash, një autorizim me efekt prapaveprues hyn në fuqi të paktën në datën në të cilën është dhënë vendimi mbi kushtet ekonomike.

Neni 547
Vlefshmëria e autorizimit
(Pika 5, e nenit 27, të Kodit)

1. Në rastet kur është lëshuar një autorizim në përputhje me shkronjën “a”, të pikës 1, të nenit 192, të Kodit, periudha e vlefshmërisë së autorizimit nuk duhet t’i kalojë pesë vjet nga data në të cilën autorizimi hyn në fuqi.

2. Periudha e vlefshmërisë e përmendur në pikën 1 nuk duhet t’i kalojë tre vjet, në rastet kur autorizimi ka të bëjë me mallrat e listuara në aneksin 71-02, të shtojcës A bashkëlidhur këtij vendimi dhe pjesë përbërëse e tij.

Neni 548
Afati për mbylljen e një regjimi të posaçëm
(Pika 4, e nenit 195, të Kodit)

1. Me kërkesën e mbajtësit të regjimit, afati për mbylljen e përcaktuar në një autorizim të dhënë në përputhje me pikën 1, të nenit 192, të Kodit, mund të zgjatet nga autoritetet doganore, edhe pas përfundimit të afatit të vendosur fillimisht.

2. Kur afati për mbyllje përfundon në një datë të caktuar për të gjitha mallrat e vendosura nën regjim në një periudhë të caktuar, autoritetet doganore mund të vendosin në autorizim, sipas shkronjës “a”, të pikës 1, të nenit 192, të Kodit, se afati për mbyllje zgjatet automatikisht për të gjitha mallrat që janë ende nën regjim në atë datë. Autoritetet doganore mund të vendosin që të ndërpresin zgjatjen automatike të afatit në lidhje me të gjitha ose disa nga mallrat e vendosura nën regjim.

Neni 549
Mbyllja e një regjimi të posaçëm
(Neni 195 i Kodit)

1. Kur mallrat janë vendosur nën një regjim të posaçëm duke përdorur dy ose më shumë deklarata doganore në bazë të një autorizimi të vetëm, vendosja e mallrave të tilla ose produkteve të përfutura prej tyre nën një regjim doganor pasues, ose vendosja në regjimin e përdorimit të veçantë përfundimtar (*end-use*), do të konsiderohet si mbyllje e regjimit të posaçëm për mallrat në fjalë të vendosura nën deklaratat doganore më të hershme.

2. Kur mallrat janë vendosur nën një regjim të posaçëm duke përdorur dy ose më shumë deklarata doganore në bazë të një autorizimi të vetëm dhe ky regjim i posaçëm është mbyllur duke nxjerrë mallrat jashtë territorit doganor të Republikës së Shqipërisë ose me anë të shkatërrimit të mallrave pa lënë asnjë mbetje, nxjerrja e mallrave ose shkatërrimi pa lënë asnjë mbetje do të konsiderohet si mbyllje e regjimit të posaçëm për mallrat në fjalë të vendosura nën deklaratat doganore më të hershme.

3. Duke anashkaluar pikat 1 dhe 2, mbajtësi i autorizimit ose mbajtësi i regjimit mund të kërkojë që mbyllja të bëhet në lidhje me mallra të veçanta të vendosura nën regjim.

4. Aplikimi i pikave 1 dhe 2 nuk mund të sjellë si pasojë përfitime të pajustificuara të detyrimit të importit.

5. Kur mallrat nën regjimin e posaçëm janë vendosur së bashku me mallra të tjera dhe në rast të një shkatërrimi të plotë ose humbje të pazëvendësueshme, autoritetet doganore mund të pranojnë

provat e paraqitura nga mbajtësi i regjimit që tregojnë sasinë e vërtetë të mallrave nën regjim, të cilat u shkatërrojnë ose humbën.

Kur mbajtësi i regjimit nuk mund të paraqesë prova të pranueshme për autoritetet doganore, sasia e mallrave të cilat janë shkatërruar ose kanë humbur do të përcaktohet në raport me atë pjesë të mallrave të të njëjtit lloj të vendosura nën regjim në kohën kur shkatërrimi ose humbja kanë ndodhur.

Neni 550

Dokumenti i mbylljes

(Pika 2 dhe shkronja “a”, e pikës 3 të nenit 17, pika 1, e nenit 192, dhe neni 195 të Kodit)

1. Autorizimet për përdorimin e përpunimit aktiv IM/EX, përpunimit aktiv EX/ IM pa përdorimin e shkëmbimit standard të informacionit, siç referohet në nenin 551, ose të përdorimit të veçantë përfundimtar (*end-use*), duhet të përcaktojnë se mbajtësi i autorizimit duhet të paraqesë dokumentin e mbylljes në zyrën doganore mbikëqyrëse, brenda 30 (tridhjetë) ditësh pas skadimit të afatit kohor për mbyllje.

Megjithatë, zyra doganore mbikëqyrëse mund të heqë dorë nga detyrimi për paraqitjen e dokumentit të mbylljes, kur ajo e konsideron të panevojshme.

2. Me kërkesë të mbajtësit të autorizimit, autoritetet doganore mund ta zgjasin afatin e përmendur në pikën 1 në 60 (gjashtëdhjetë) ditë. Në raste të veçanta, autoritetet doganore mund të zgjasin afatin edhe në qoftë se ai ka përfunduar.

3. Dokumenti i mbylljes duhet të përmbajë të dhënat e listuara në aneksin 71-06, të shtojcës A bashkëlidhur këtij vendimi dhe pjesë përbërëse e tij, përveç rasteve kur përcaktohet ndryshe nga zyra doganore mbikëqyrëse.

4. Kur produktet e përpunuara ose mallrat e vendosura nën regjimin e përpunimit aktiv IM/EX konsiderohen se janë çliruar për qarkullim të lirë në përputhje me pikën 1, të nenit 544, ky fakt duhet të shënohet në dokumentin e mbylljes.

5. Kur autorizimi për përpunimin aktiv IM/EX specifikon se produktet e përpunuara ose mallrat e vendosura nën këtë regjim konsiderohen se janë çliruar për qarkullim të lirë në datën e përfundimit të afatit për mbyllje, mbajtësi i autorizimit duhet të paraqesë dokumentin e mbylljes në zyrën doganore mbikëqyrëse siç përmendet në pikën 1, të këtij neni.

6. Pa rënë ndesh me nenet 47 dhe 49, të Kodit, zyra doganore mbikëqyrëse do të kontrollojë pa vonesë dokumentin e mbylljes, siç përmendet në pikën 1, të këtij neni.

Zyra doganore mbikëqyrëse mund të pranojë shumën e detyrimit të importit që duhet paguar, siç është përcaktuar nga mbajtësi i autorizimit.

7. Shuma e detyrimit të importit që duhet paguar do të evidentohet në kontabilitet, siç përmendet në nenin 98, të Kodit, brenda 14 ditëve nga data në të cilën dokumenti i mbylljes i është komunikuar zyrës doganore mbikëqyrëse.

8. Autoritetet doganore mund të lejojnë që dokumenti i mbylljes të paraqitet me mjete të tjera përveç teknikave informatike të përpunimit të të dhënave.

Neni 551

Shkëmbimi standard i informacionit dhe detyrimet e mbajtësit të autorizimit për përdorimin e një regjimi përpunimi

(Pika 1, e nenit 192, të Kodit)

1. Në autorizimet për përdorimin e përpunimit aktiv EX/IM ose të përpunimit pasiv EX/IM, të cilët përfshijnë një ose më shumë se një zyrë doganore dhe autorizimet për përdorimin e përpunimit aktiv IM/EX ose të përpunimit pasiv IM/EX të cilët përfshijnë më shumë se një zyrë doganore përcaktohen

detyrimet e mëposhtme:

a) Përdorimi i shkëmbimit standard të informacionit (INF), sipas parashikimit të nenit 552, përveç rasteve kur autoritetet doganore bien dakord për mjete të tjera të shkëmbimit elektronik të informacionit;

b) Mbajtësi i autorizimit i siguron zyrës doganore mbikëqyrëse informacionet e referuara në seksionin A, të aneksit 71-05, të shtojcës A bashkëlidhur këtij vendimi dhe pjesë përbërëse e tij;

c) Kur depozitohen deklaratat apo njoftimet e mëposhtme, ato i referohen numrit përkatës INF:

i. deklaratat doganore për përpunim aktiv;

ii. deklaratat e eksportit për përpunimin aktiv EX/IM ose përpunimin pasiv;

iii. deklaratat doganore për çlirim për qarkullim të lirë pas përpunimit pasiv;

iv. deklaratat doganore për mbylljen e regjimit së përpunimit;

v. deklaratat e rieksporit ose njoftimet e rieksporit.

2. Autorizimet për përdorimin e përpunimit aktiv IM/EX të cilët përfshijnë vetëm një zyrë doganore duhet të përcaktojnë se, me kërkesë të zyrës doganore mbikëqyrëse, mbajtësi i autorizimit siguron asaj informacion të mjaftueshëm në lidhje me mallrat e vendosura në regjimin e përpunimit aktiv duke i mundësuar zyrës doganore mbikëqyrëse të llogarisë shumën e detyrimit të importit në përputhje me pikën 3, të nenit 81, të Kodit.

Neni 552

Shkëmbimi standard i informacionit

(Pika 2, e nenit 17, të Kodit)

1. Zyra doganore mbikëqyrëse duhet të bëjë të disponueshme elementet përkatëse të të dhënave të përcaktuara në seksionin A, të aneksit 71-05 bashkëlidhur këtij vendimi dhe pjesë përbërëse e tij, të shtojcës A, në sistemin elektronik që do të ngrihet për qëllime të shkëmbimit standard të informacionit (INF) për:

a) përpunimin aktiv EX/IM ose përpunimin pasiv EX/IM që përfshin një ose më shumë se një zyrë doganore;

b) përpunimin aktiv IM/EX ose përpunimin pasiv IM/EX që përfshin më shumë se një zyrë doganore.

2. Kur autoriteti përgjegjës doganor, sipas përcaktimit të pikës 1, të nenit 95, të Kodit, ka kërkuar një shkëmbim standard të informacionit mes autoriteteve doganore në lidhje me mallrat e vendosura në përpunimin aktiv IM/EX që përfshin vetëm një zyrë doganore, zyra doganore mbikëqyrëse duhet të bëjë të disponueshme elementet përkatëse të të dhënave, të përcaktuara në seksionin B të aneksit 71-05, të shtojcës A bashkëlidhur këtij vendimi dhe pjesë përbërëse e tij, në sistemin elektronik që do të ngrihet për qëllimet e INF.

3. Kur deklarata doganore, deklarata e rieksporit ose njoftimi i rieksporit i referohet një INF, autoritetet doganore kompetente duhet të bëjnë të disponueshme elementet specifike të të dhënave të përcaktuara në seksionin A, të aneksit 71-05, të shtojcës A bashkëlidhur këtij vendimi dhe pjesë përbërëse e tij, në sistemin elektronik që do të ngrihet për qëllimet e INF.

4. Autoritetet doganore, me kërkesë të mbajtësit të autorizimit, duhet të japin informacion të përditësuar në lidhje me INF.

5. Deri në implementimin e sistemit të informatizuar INF për procedura të veçanta sipas Planit të punës së ministrit përgjegjës për financat, me përjashtim të pikës 1, të këtij neni, mund të përdoren mënyra të tjera të ndryshme nga teknikat e përpunimit të të dhënave elektronike.

Neni 553

Sistemi elektronik në lidhje me shkëmbimin standard të informacionit

(Pika 1, e nenit 17, të Kodit)

1. Sistemi elektronik i informacionit dhe komunikimit në bazë të pikës 1, të nenit 17, të Kodit, do të përdoret për shkëmbimin e informacionit standard (INF) që ka të bëjë me secilën nga regjimet e mëposhtme:

- a) Përpunimin aktiv EX/IM ose përpunimin pasiv EX/IM;
- b) Përpunimin aktiv IM/EX ose përpunimin pasiv EX/IM, ku më shumë se një zyrë doganore është përfshirë;
- c) Përpunimin aktiv IM/EX ku një zyrë doganore është përfshirë dhe autoriteti përgjegjës doganor, siç përmendet në pikën 1, të nenit 95, të Kodit, ka kërkuar një INF.

Një sistem i tillë do të përdoret edhe për përpunimin dhe ruajtjen e informacionit përkatës. Kur një INF kërkohet, informacioni do të vihet në dispozicion, pa vonesë, përmes këtij sistemi nga zyra doganore mbikëqyrëse. Kur deklarata doganore, deklarata e rieksporit apo njoftimi i rieksporit i referohet një INF, autoritetet doganore kompetente duhet ta përditësojnë INF pa vonesë.

Përveç kësaj, sistemi elektronik i informacionit dhe komunikimit do të përdoret për shkëmbimin standard të informacionit që ka të bëjë me masat e politikave tregtare.

2. Pika 1, e këtij neni do të zbatohet nga implementimi sistemit të informatizuar të INF sipas Planit të punës të miratuar nga ministri i përgjegjës për financat.

Neni 554

Magazinimi i mallrave shqiptare, së bashku me mallrat joshqiptare në një ambient magazinimi

(pika 1, e nenit 192, të Kodit)

(Ndryshuar me VKM nr. 872, datë 30.12.2024)

1. Kur mallrat shqiptare magazinohen së bashku me mallrat joshqiptare në një ambient magazinimi për magazinim doganor dhe identifikimi në çdo kohë i secilit prej tyre (magazinim i përbashkët) është i pamundur ose do të ishte i mundur vetëm me një kosto joproporcionale, autorizimi siç përmendet në shkronjën “b”, të pikës 1, të nenit 192, të Kodit, cakton që ndarja e kontabilitetit kryhet për secilin mall, status doganor dhe, sipas rastit, origjinës së mallrave.

2. Mallrat shqiptare të magazinuara së bashku me mallrat joshqiptare në një ambient magazinimi, siç përmendet në pikën 1, ndajnë të njëjtin kod tetëshifror NK, të njëjtën cilësi tregtare dhe të njëjtat karakteristika teknike.

3. Për qëllime të pikës 2, mallrat joshqiptare, të cilat do t'i nënshtroheshin, në kohën e magazinimit me mallrat joshqiptare një detyrimi të përkohshëm ose të përhershëm *antidumping*, një detyrimi kundërbalancues, një mase mbrojtëse apo një detyrimi shtesë që rezulton nga pezullimi i koncesioneve nëse ato do të deklaroheshin për vendosje në qarkullim të lirë, nuk konsiderohen të kenë të njëjtën cilësi tregtare, si mallrat shqiptare.

4. Pika 3 nuk zbatohet kur mallrat joshqiptare magazinohen së bashku me mallrat shqiptare, të cilat janë deklaruar më parë si mallra joshqiptare për vendosje në qarkullim të lirë dhe për të cilat janë paguar detyrimet e përmendura në pikën 3.

Neni 554/1

Magazinimi i përzier i produkteve që i nënshtrohen mbikëqyrjes doganore në përdorimin e veçantë përfundimtar (*end-use*)

(pika 1, e nenit 192, të Kodit)

(Shtuar me VKM nr. 872, datë 30.12.2024)

Autorizimi i përdorimit të veçantë përfundimtar (*end-use*), siç përmendet në shkronjën “a”, të pikës 1, të nenit 192, të Kodit, përcakton mënyrat dhe metodat e identifikimit dhe të mbikëqyrjes doganore për magazinimin e përzier të produkteve, që i nënshtrohen mbikëqyrjes doganore, të përfshirë në kapitujt 27 dhe 29 të NK-së ose të këtyre produkteve me naftë bruto që përfshihet në kodin NK 2709 00.

Kur produktet e përmendura në paragrafin e parë nuk përfshihen në të njëjtin kod tetëshifror NK-së ose nuk ndajnë të njëjtën cilësi tregtare dhe të njëjtat karakteristika teknike dhe fizike, magazinimi i përzier mund të lejohet vetëm kur e gjithë përzierja duhet t'i nënshtrohet një prej trajtimeve të përmendura në shënimin shtesë 5, të kreut 27, të Nomenklaturës së Kombinuar.

Neni 555

Autorizimi për çlirimin e mallrave

(Pika 1, e nenit 27, të Kodit)

Kur një aplikim për një autorizim është bërë në bazë të një deklarate doganore në përputhje me pikat 1 dhe 5, të nenit 531, autorizimi jepet me çlirimin e mallrave për vendosjen nën regjimin përkatës doganor.

Seksioni 3

Dispozita të tjera

Neni 556

Depozitimi i deklaratës doganore në një zyrë tjetër doganore

(Pika 2, e nenit 147, të Kodit)

Autoriteti doganor kompetent mund të lejojë, në raste të veçanta, që deklarata doganore të paraqitet në një zyrë doganore që nuk është specifikuar në autorizim. Në këtë rast, autoriteti doganor kompetent duhet të informojë zyrën doganore mbikëqyrëse pa vonesë.

Neni 557

Regjistrimet

(Nenet 192, pika 1, dhe 194, pika 1, të Kodit)

1. Regjistrimet e referuara në pikën 1, të nenit 194, të Kodit, duhet të përmbajnë sa më poshtë:

a) Kur është rasti, referimin në autorizimin e kërkuar për vendosjen e mallrave nën një regjim të posaçëm;

b) MRN ose, kur kjo nuk ekziston, ndonjë numër ose kod tjetër që identifikon deklaratat doganore përmes së cilit mallrat janë vendosur nën regjimin e posaçëm dhe në rastet kur regjimi është mbyllur në përputhje me pikën 1, të nenit 195, të Kodit, informacionin për mënyrën në të cilën është mbyllur regjimi;

c) të dhënat që qartësisht mundësojnë identifikimin e të gjitha dokumenteve të tjera doganore për vendosjen e mallrave në një regjim të posaçëm dhe të çdo dokumenti tjetër që lidhet me mbylljen përkatëse të regjimit, përveç deklaratave doganore;

ç) të dhënat mbi shenjat, numrat identifikues, numrin dhe llojin e pakove/kolive, sasinë dhe përshkrimin tregtar apo teknik të mallrave dhe, sipas rastit, shenjat e identifikimit të kontejnerit që janë të nevojshme për identifikimin e mallrave;

d) vendndodhjen e mallrave dhe informacionin në lidhje me çdo lëvizje të tyre;

dh) statusin doganor të mallrave;

e) të dhënat mbi format e zakonshme të trajtimit dhe, kur është e zbatueshme, klasifikimin e ri

tarifor që rezulton nga format e zakonshme të trajtimit;

ë) veçoritë e lejimit të përkohshëm ose përdorimit të veçantë përfundimtar (end-use);

f) të dhënat e përpunimit aktiv ose pasiv, duke përfshirë informacionin në lidhje me natyrën e përpunimit; g) në rastet kur zbatohet pika 1, e nenit 81, të Kodit, shpenzimet për magazinimin ose format e zakonshme të trajtimit;

gj) normën e rendimentit ose mënyrën e llogaritjes, sipas rastit;

h) të dhënat që mundësojnë mbikëqyrjen dhe kontrollet doganore të përdorimit të mallrave ekuivalente, në përputhje me nenin 201 të Kodit;

i) në rastet kur nevojitet ndarja kontabile, informacionin në lidhje me llojin e mallrave, statusin doganor dhe, kur është rasti, origjinën e mallit;

j) në rastet e lejimit të përkohshëm të referuar në nenin 685, të dhënat e kërkuara nga ky nen;

k) në rastet e përpunimit aktiv të referuar në nenin 688, të dhënat e kërkuara nga ky nen;

l) kur kërkohet, të dhënat e ndonjë transferimi të të drejtave dhe detyrimeve në përputhje me nenin 197 të Kodit;

ll) në rastet kur të dhënat nuk janë pjesë e kontabilitetit për qëllime doganore, referencën në këtë kontabilitet për qëllime doganore;

m) në raste të veçanta, për shkaqe të arsyeshme informacione shtesë, me kërkesë të autoriteteve doganore.

2. Në rastin e zonave të lira, në vijim të informacionit të parashikuar në pikën 1, regjistrimet duhet të përmbajnë:

a) të dhënat identifikuese të dokumenteve të transportit për mallrat që hyjnë ose dalin nga zonat e lira;

b) të dhënat në lidhje me përdorimin ose konsumimin e mallrave, për të cilat çlirimi në qarkullim të lirë ose lejimi i përkohshëm nuk sjell aplikimin e detyrimit të importit ose të masave të përcaktuara në bazë të politikave bujqësore ose tregtare, në përputhje me pikën 2, të nenit 220, të Kodit.

3. Autoritetet doganore mund të heqin dorë nga kërkesa për një pjesë të informacionit të parashikuar në pikat 1 dhe 2, kur kjo nuk ndikon negativisht në mbikëqyrjen dhe kontrollin doganor gjatë përdorimit të një regjimi të posaçëm.

4. Në rastin e lejimit të përkohshëm, të dhënat duhet të mbahen vetëm nëse kërkohen nga autoritetet doganore.

Neni 558

Lëvizja e mallrave ndërmjet vendeve të ndryshme në territorin doganor të Republikës së Shqipërisë

(Neni 198 i Kodit)

1. Lëvizja e mallrave të vendosura nën përpunim aktiv, lejim të përkohshëm ose përdorim të veçantë përfundimtar (*end-use*) mund të bëhet ndërmjet vendeve të ndryshme në territorin doganor të Republikës së Shqipërisë pa formalitete doganore, me përjashtim të atyre të përcaktuara në shkronjën “d”, të pikës 1, të nenit 557.

2. Lëvizja e mallrave të vendosura nën përpunim pasiv mund të kryhet brenda territorit doganor të Republikës së Shqipërisë nga zyra doganore e vendosjes në regjim në zyrën doganore të daljes.

3. Lëvizja e mallrave të vendosura nën magazinim doganor mund të bëhet brenda territorit doganor të Republikës së Shqipërisë pa formalitete doganore, ndryshe nga ato të përcaktuara në shkronjën “d”, të pikës 1, të nenit 557, si më poshtë vijon:

a) ndërmjet ambienteve të ndryshme të magazinimit, të përcaktuara në të njëjtin autorizim;

b) nga zyra doganore e vendosjes nën regjim në ambientet e magazinimit; ose

c) nga ambientet e magazinimit deri në zyrën doganore të daljes ose në ndonjë zyrë doganore

të përcaktuar në autorizimin e regjimit të posaçëm, siç referohet në pikën 1, të nenit 192, të Kodit, për çlirimin e mallrave në regjimin pasues doganor ose për të pranuar deklaraten e rieksporitit për qëllime të mbylljes së regjimit të posaçëm.

Lëvizjet në magazinimin doganor duhet të përfundojnë brenda 10 (dhjetë) ditëve pasi mallrat të jenë larguar nga magazina doganore.

Me kërkesë të mbajtësit të regjimit, autoritetet doganore mund ta zgjasin periudhën deri në 30 (tridhjetë) ditë.

4. Kur mallrat në magazinimin doganor janë zhvendosur nga ambientet e magazinimit në zyrën doganore të daljes, regjistrimet e referuara në pikën 1, të nenit 194, të Kodit, duhet të sigurojnë informacionin në lidhje me daljen e mallrave brenda 60 (gjashtëdhjetë) ditëve pasi mallrat të jenë larguar nga magazina doganore.

Me kërkesë të mbajtësit të regjimit, autoritetet doganore mund ta zgjasin periudhën deri në 100 ditë.

Neni 559

Lëvizja e mallrave nën një regjim të posaçëm

(Neni 198 i Kodit)

1. Lëvizja e mallrave në zyrën doganore të daljes me qëllim mbylljen e një regjimi të posaçëm të ndryshëm nga ai i përdorimit të veçantë përfundimtar (*end-use*) dhe përpunimi pasiv, duke nxjerrë mallrat jashtë territorit doganor të Republikës së Shqipërisë, kryhet sipas deklaratës së rieksporitit.

2. Kur mallrat janë zhvendosur nën përpunimin pasiv nga zyra doganore e vendosjes te zyra doganore e daljes, mallrat do t'i nënshtrohen dispozitave që do të kishin qenë të zbatueshme nëse mallrat do të ishin vendosur nën procedurën e eksportit.

3. Kur mallrat janë zhvendosur nën regjimin e përdorimit të veçantë përfundimtar (*end-use*) në zyrat doganore të daljes, ato do t'i nënshtrohen dispozitave që do të kishin qenë të zbatueshme nëse mallrat do të ishin vendosur nën procedurën e eksportit.

4. Formalitete doganore të tjera të ndryshme nga regjistrimi, siç përmendet në nenin 194, të Kodit, nuk janë të nevojshme për zhvendosje që nuk përmenden nga pikat 1 deri në 3.

5. Kur zhvendosja e mallrave ndodh në përputhje me pikat 1 ose 3, mallrat mbeten nën regjimin e posaçëm deri sa ato të jenë nxjerrë jashtë territorit doganor të Republikës së Shqipërisë

Neni 560

Format e zakonshme të trajtimit

(Neni 199 i Kodit)

Format e zakonshme të trajtimit të parashikuara në nenin 199 të Kodit janë ato të përcaktuara në aneksin 71-03, të shtojcës A bashkëlidhur këtij vendimi dhe pjesë përbërëse e tij.

Neni 561

Statusi doganor i kafshëve të lindura prej kafshëve të vendosura nën një regjim të posaçëm

(Pika 3, e nenit 142, të Kodit)

Kur vlera e përgjithshme e kafshëve, të lindura në territorin doganor të Republikës së Shqipërisë prej kafshëve që janë objekt i një deklarate doganore dhe që janë të vendosura në regjimin e magazinimit, regjimin e lejimit të përkohshëm ose regjimin e përpunimit aktiv, e kalon vlerën ekuivalente në lekë të shumës 100 (njëqind) euro, këto kafshë konsiderohen si mallra joshqiptare dhe vendosen në të njëjtin regjim si kafshët prej të cilave kanë lindur.

Neni 562

Heqja dorë nga detyrimi për të paraqitur një deklaratë plotësuese

(Shkronja “b”, e pikës 2, të nenit 153, të Kodit)

Detyrimi për të paraqitur një deklaratë plotësuese do të hiqet për mallrat, për të cilat është mbyllur një regjim i posaçëm i ndryshëm nga transiti, duke i vendosur ato nën një regjim pasues të posaçëm, i ndryshëm nga transiti, me kusht që të plotësohen të gjitha kushtet e mëposhtme:

- a) Mbajtësi i autorizimit të regjimit të parë të posaçëm dhe i atij pasues është i njëjti person;
- b) Deklarata doganore për regjimin e parë të posaçëm është depozituar në formën standarde ose deklaruesi ka paraqitur një deklaratë plotësuese në përputhje me paragrafin e parë, të pikës 1, të nenit 153, të Kodit, në lidhje me regjimin e parë të posaçëm;
- c) Regjimi i parë i posaçëm mbyllet me vendosjen e mallrave nën një regjim pasues të posaçëm, i ndryshëm nga përdorimi i veçantë përfundimtar (*end-use*) ose përpunimi aktiv, pas depozitimit të një deklarate doganore në formën e një hyrjeje në regjistrimet e deklaruesit.

Neni 563

Transferimi i të drejtave dhe detyrimeve

(Neni 197 i Kodit)

(Shtuar paragrafi i dytë me VKM nr. 872, datë 30.12.2024)

Autoriteti doganor kompetent vendos nëse një transferim i të drejtave dhe detyrimeve të referuara në nenin 197, të Kodit mund të bëhet apo jo. Në qoftë se një transferim i tillë mund të bëhet, autoriteti doganor kompetent përcakton kushtet në të cilat lejohet transferimi.

Përrjashtimisht në rastin e regjimit të magazinës doganore (*duty free shop*), ministri përgjegjës për financat miraton ose jo transferimin e të drejtave dhe detyrimeve pas vendimit të marrë nga autoriteti doganor, i cili shqyrton dhe vlerëson përmbushjen e kushteve të përcaktuara për regjimin.

Neni 564

Sistemi elektronik në lidhje me Carnet ATA

(Pika 1, e nenit 17, të Kodit)

Një sistem elektronik i informacionit dhe komunikimit (Sistemi i Carnet ATA) i ngritur në bazë të pikës 1, të nenit 17, të Kodit, do të përdoret për përpunimin, shkëmbimin dhe ruajtjen e informacionit që ka të bëjë me Carnet ATA lëshuar në bazë të nenit 21a të Konventës së Stambollit. Informacioni do të vihet në dispozicion përmes këtij sistemi nga autoritetet doganore kompetente pa vonesë.

Neni 565

Formulari për aplikimet dhe autorizimet lidhur me regjimet e posaçme përveç transitit

Deri në datën e implementimit të sistemit të informatizuar për vendimet doganore, kur një aplikim për një autorizim siç përmendet në nenin 192 (1) të Kodit nuk është i bazuar në një deklaratë doganore dhe kur është paraqitur me mjete të tjera të ndryshme nga teknika elektronike e përpunimit të të dhënave, aplikimi duhet të bëhet duke përdorur formularin sipas aneksit 8 dhe autorizimi sipas aneksit 9, të shtojcës C bashkëlidhur këtij vendimi dhe pjesë përbërëse e tij.

KREU 2

Transiti

Seksioni 1

Regjimi i transitit të jashtëm dhe të brendshëm

Nënseksioni 1

Dispozita të përgjithshme

Neni 566

Mjetet e komunikimit të MRN të operacionit të transitit dhe të MRN të operacionit TIR ndaj autoriteteve doganore

(Shkronja “a”, e pikës 3, të nenit 17, të Kodit)

1. MRN e një deklarate transiti ose e një operacioni TIR mund të paraqitet pranë autoriteteve doganore përmes njërës prej mënyrave të mëposhtme, përveç teknikave elektronike të përpunimit të të dhënave:

- a) një barkodi;
- b) një dokumenti shoqërues transiti;
- c) një dokumenti shoqërues transiti/të sigurisë;
- ç) në rast të ndonjë operacioni TIR, me një Carnet TIR;
- d) mjeteve të tjera të lejuara nga autoriteti doganor pritës.

2. Deri në implementimin e sistemit të informatizuar të transitit sipas Planit të punës së ministrit përgjegjës për financat, MRN e një deklarate të transitit paraqitet në doganë më një nga mënyrat e referuara në shkronjat “b” dhe “c”, të pikës 1.

Neni 567

Dokumenti shoqërues i transitit dhe dokumenti shoqërues i transitit/sigurisë

(Pika 2, e nenit 17, të Kodit)

Kërkesat e përbashkëta për të dhënat shoqëruese të transitit dhe, nëse është e nevojshme, për listën e artikujve, si dhe për dokumentin shoqërues të transitit/të sigurisë dhe për listën e artikujve të transitit/sigurisë janë të përcaktuara në aneksin B-02, të shtojcës A bashkëlidhur këtij vendimi dhe pjesë përbërëse e tij.

Neni 568

Kontrollet dhe formalitetet për mallrat që dalin dhe rihyjnë në territorin doganor të Republikës së Shqipërisë

(Nenet 203, pika 3, shkronjat “b”, “c”, “ç”, “d” dhe 204, pika 2, “b”, “c”, “ç”, “d”, të Kodit)

Kur, në rrjedhën e lëvizjes së mallrave nga një pikë në tjetrën, brenda territorit doganor të Republikës së Shqipërisë, mallrat dalin dhe rihyjnë në territorin doganor të Republikës së Shqipërisë, kontrollet doganore dhe formalitetet që zbatohen në përputhje me Konventën TIR, Konventën ATA, Konventën e Stambollit, Marrëveshjen ndërmjet Palëve të Traktatit të Atlantikut të Veriut lidhur me Statusin e Forcave të tyre, nënshkruar në Londër më 19 qershor 1951 ose në përputhje me aktet e Bashkimit Postar Universal, duhet të kryhen në pikat ku mallrat largohen përkohësisht nga territori doganor i Republikës së Shqipërisë dhe ku ato rihyjnë sërish në këtë territor.

Neni 569

Sistemi elektronik lidhur me transitin

(Pika 1, e nenit 17, të Kodit)

1. Për shkëmbimin e të dhënave të Carnet TIR, për operacionet TIR dhe kryerjen e formaliteteve doganore të regjimit të transitit, përdoret një sistem elektronik, siç përcaktohet në pikën 1, të nenit 17, të Kodit (sistemi informatik i transitit).

2. Në rast mospërputhjes ndërmjet të dhënave që përmban Carnet TIR dhe atyre të sistemit informatik të transitit, kanë përparësi të dhënat e Carnet TIR.

3. Duke anashkaluar pikën 1, të këtij neni, deri në implementimin e sistemit të ri të informatizuar, në përputhje me nenin 286, të Kodit, Republika e Shqipërisë përdor sistemin aktual informatik të transitit.

Neni 570

Aplikimet për statusin e pritësit të autorizuar për operacionet TIR

(Neni 205 i Kodit)

Për qëllime të operacioneve TIR, aplikimi për statusin e pritësit të autorizuar të përmendur në nenin 205 të Kodit, paraqitet pranë DPD.

Neni 571

Autorizimet për statusin e pritësit të autorizuar për operacionet TIR

(Neni 205 i Kodit)

1. Statusi i pritësit të autorizuar i përcaktuar në nenin 205 të Kodit jepet për aplikuesit që plotësojnë kushtet e mëposhtme:

- a) Aplikuesi është i vendosur në territorin doganor të Republikës së Shqipërisë;
- b) Aplikuesi deklaron se do të presë rregullisht mallra që lëvizin sipas një operacioni TIR;
- c) Aplikuesi plotëson kriteret e përcaktuara në shkronjat “a”, “b” dhe “d”, të nenit 41, të Kodit.

2. Autorizimi duhet të jepet vetëm me kusht që autoriteti doganor të jetë në gjendje të mbikëqyrë operacionet TIR dhe të kryejë kontrole pa pasur nevojë marrjen e masave administrative në disproporcion

me nevojat e personit të interesuar.

3. Autorizimi në lidhje me statusin e pritësit të autorizuar zbatohet për operacionet TIR që do të mbyllet në Republikën e Shqipërisë, sipas përcaktimeve në autorizim.

Nënseksioni 2

Lëvizja e mallrave nën operacionin TIR

Neni 572

Operacioni TIR në rrethana të veçanta

(Shkronja “b”, e pikës 3, të nenit 17, shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Autoritetet doganore do të pranojnë një Carnet TIR pa shkëmbimin e të dhënave të Carnet për operacionin TIR në rast të defekteve të përkohshme të:

- a) sistemit elektronik të transitit;
- b) sistemit të kompjuterizuar të përdorur nga mbajtësi i Carnet TIR për depozitimin e të dhënave të Carnet TIR me teknika informatike të përpunimit të të dhënave;
- c) lidhjes elektronike mes sistemit të kompjuterizuar të përdorur nga mbajtësi i Carnet TIR për depozitimin e të dhënave të Carnet TIR me anë të teknikave informatike të përpunimit të të dhënave dhe të sistemit elektronik të transitit.

Pranimi i Carnet TIR pa shkëmbimin e të dhënave të Carnet TIR në rast të një defekti të përkohshëm siç është referuar në shkronjat “b” ose “c” do t’i nënshtrohet miratimit të autoriteteve doganore.

Neni 573

Itinerari për lëvizjet e mallrave nën një operacion TIR

(Shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Mallrat që transportohen nën një operacion TIR, duhet të transferohen në zyrën doganore të destinacionit ose të daljes sipas një itinerari të justifikuar ekonomikisht.

2. Kur zyra doganore e nisjes apo hyrjes e konsideron të nevojshme, do të caktojë një itinerar për operacionin TIR, duke marrë parasysh çdo informacion përkatës të komunikuar nga mbajtësi i Carnet TIR. Kur bëhet caktimi i një itinerari, zyra doganore do të shënojë në sistemin elektronik të transitit dhe në Carnet TIR të paktën treguesin e shteteve përmes së cilave operacioni TIR do të zhvillohet.

Neni 574

Formalitetet për t'u plotësuar në zyrën doganore të nisjes ose hyrjes për lëvizjet e mallrave nën një operacion TIR

(Shkronja "b" e pikës 3, të nenit 203, dhe shkronja "b", e pikës 2, të nenit 204, të Kodit)

1. Mbajtësi i Carnet TIR do të paraqesë të dhënat e Carnet TIR për operacionin TIR në zyrën doganore të nisjes apo hyrjes.

2. Zyra doganore tek e cila janë paraqitur të dhënat e Carnet TIR, do të caktojë një afat kohor brenda të cilit mallrat duhet të paraqiten në zyrën doganore të destinacionit ose të daljes, duke marrë parasysh:

- a) itinerarin;
- b) mjetet e transportit;
- c) legjislacionin e transportit ose çdo legjislacion tjetër që mund të kenë ndikim në përcaktimin e një afati kohor;

ç) çdo informacion tjetër të komunikuar nga mbajtësi i Carnet TIR.

3. Kur afati është caktuar nga DPD, do të jetë detyrues për autoritetet doganore dhe afati nuk mund të ndryshojë.

4. Kur mallrat janë çliruar për operacionin TIR, zyra doganore e nisjes ose hyrjes do të regjistrojë MRN e operacionit TIR në Carnet TIR. Zyra doganore që çliron këto mallra do të njoftojë mbajtësin e Carnet TIR për çlirimin e mallrave për operacionin TIR.

Me kërkesë të mbajtësit të Carnet TIR zyra doganore e nisjes ose hyrjes do të sigurojë një dokument shoqërues transiti ose, kur është e përshtatshme, një dokumentacion shoqërues të transit/sigurie të mbajtësit të Carnetit TIR.

Dokumentacioni përcjellës i transitit duhet të sigurohet duke përdorur formularin e paraqitur në aneksin B-02, të shtojcës A bashkëlidhur këtij vendimi dhe pjesë përbërëse e tij, dhe nëse është e nevojshme, të plotësohet nga lista e artikujve në formën e përcaktuar në aneksin B-03, të shtojcës A bashkëlidhur këtij vendimi dhe pjesë përbërëse e tij. Dokumenti i transit/sigurisë shoqërues duhet të sigurohet duke përdorur formularin e paraqitur në aneksin B-04 të shtojcës A bashkëlidhur këtij vendimi dhe pjesë përbërëse e tij, dhe të plotësohet me listën e transit/sigurisë të artikujve në formën e përcaktuar në aneksin B-05, të shtojcës A bashkëlidhur këtij vendimi dhe pjesë përbërëse e tij.

5. Zyra doganore e nisjes ose hyrjes do të transmetojë të dhënat e operacionit TIR në zyrën e deklaruar doganore të destinacionit ose daljes.

Neni 575

Incidente gjatë lëvizjes së mallrave nën operacionin TIR

(Shkronja "b" e pikës 3, të nenit 203, dhe shkronja "b", e pikës 2, të nenit 204, të Kodit)

1. Transportuesi duhet të paraqesë menjëherë pas incidentit mallrat së bashku me mjetin rrugor, kombinimin e mjetit rrugor me kontejner, Carnet TIR dhe MRN të operacionit TIR, në zyrën doganore më të afërt pranë së cilës ndodhet mjeti transportit kur:

a) transportuesi është i detyruar të devijojë nga itinerari i përcaktuar sipas nenit 573, për shkak të rrethanave që nuk varen nga ai;

b) ka ndodhur një incident ose aksident në kuptim të nenit 25, të Konventës TIR.

2. Nëse zyra doganore pranë së cilës ndodhet mjeti i transportit vlerëson që operacioni TIR në fjalë mund të vazhdojë, ajo duhet të marrë të gjitha masat e nevojshme.

Informacioni në lidhje me incidentin, siç referohet në pikën 1, duhet të regjistrohet në sistemin elektronik të transitit nga ajo zyrë doganore.

3. Deri në implementimin e sistemit të informatizuar NCTS sipas Planit të Punës të miratuar nga ministri përgjegjës për financat, informacioni lidhur me incidentin siç referohet në pikën 1, regjistrohet në sistemin e transitit nga zyra doganore e destinacionit ose e daljes.

4. Deri në implementimin e sistemit të informatizuar NCTS sipas Planit të punës të miratuar nga ministri përgjegjës për financat, paragrafi i dytë i pikës 2, të këtij neni, nuk do të zbatohet.

Neni 576

Paraqitja e mallrave që lëvizin nën një operacion TIR te zyra doganore e destinacionit ose e daljes

(Shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Kur mallrat që lëvizin nën një operacion TIR arrijnë tek zyra doganore e destinacionit ose e daljes, zyrës doganore i paraqiten:

a) mallrat së bashku me mjetin rrugor, kombinimin e mjetit me kontejnerin;

b) Carnet TIR;

c) MRN e operacionit TIR;

ç) çdo informacion tjetër i kërkuar nga zyra doganore e destinacionit ose daljes.

Paraqitja duhet të bëhet gjatë orarit zyrtar të punës. Megjithatë zyra doganore e destinacionit ose e daljes me kërkesë të personit të interesuar, mundet të lejojë paraqitjen e mallrave jashtë orarit zyrtar të punës ose në një vend tjetër të miratuar nga autoritetet doganore.

2. Nëse paraqitja e mallrave pranë zyrës doganore të destinacionit ose daljes ka ndodhur pas kalimit të afatit të përcaktuar nga zyra doganore e nisjes ose e hyrjes, në përputhje me pikën 2, të nenit 574, mbajtësi i Carnet TIR do të konsiderohet se ka respektuar afatin kohor në rastet kur ai ose transportuesi i provojnë zyrës doganore të destinacionit ose daljes që vonesa nuk ka ndodhur për faj të tij.

3. Operacioni TIR mund të mbyllet në një zyrë doganore të ndryshme nga ajo e përcaktuar në deklaratën e transitit. Kjo zyrë doganore do të konsiderohet zyrë doganore e destinacionit ose e daljes.

Neni 577

Formalitetet në zyrën doganore të destinacionit ose të daljes për lëvizjen e mallrave nën një operacion TIR

(Shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Zyra doganore e destinacionit ose e daljes duhet të njoftojë zyrën doganore të nisjes ose hyrjes për mbërritjen e mallrave në ditën kur mallrat së bashku me mjetin rrugor, kombinimin e mjetit me kontejner, Carnet TIR dhe MRN të operacionit TIR, janë paraqitur në përputhje me pikën 1, të nenit 576.

2. Kur operacioni TIR është mbyllur në një zyrë doganore të ndryshme nga ajo e paraqitur në deklaratën e transitit, zyra doganore që konsiderohet si zyrë doganore e destinacionit ose daljes në përputhje me pikën 3, të nenit 576, do të njoftojë mbërritjen zyrës doganore të nisjes apo hyrjes në ditën kur mallrat janë paraqitur në përputhje me pikën 1, të nenit 576.

Zyra doganore e hyrjes njofton mbërritjen në zyrën doganore të destinacionit apo të daljes, të

përcaktuara në deklaratën e transitit.

3. Zyra doganore e destinacionit apo daljes njofton për rezultatet e kontrollit zyrën doganore të hyrjes apo nisjes, jo më vonë se tre ditë nga dita e paraqitjes të mallrave në zyrën doganore të destinacionit apo daljes ose në ndonjë vend tjetër të miratuar nga autoritetet doganore, në përputhje me pikën 1, të nenit 576. Në raste përjashtimore afati mund të zgjatet deri në 6 ditë.

Megjithatë, kur mallrat janë marrë nga një pritës i autorizuar sipas nenit 205, të Kodit, zyra doganore e nisjes apo hyrjes njofton, jo më vonë se gjashtë ditë, pas ditës së paraqitjes të mallrave tek pritësi i autorizuar.

4. Zyra doganore e destinacionit ose daljes përfundon operacionin TIR, në përputhje me nenet 1, shkronja “d” dhe 28, pika 1, të Konventës TIR. Ajo plotëson kundër fletën nr. 2 të Carnet TIR dhe mban kuponin nr. 2 të Carnet TIR. Carnet TIR i kthehet mbajtësit të Carnet TIR ose personit që vepron në emër të tij.

Neni 578

Procedura hetimore për lëvizjen e mallrave nën një operacion TIR

(Shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Kur zyra doganore e nisjes apo e hyrjes nuk ka marrë rezultatet e kontrollit brenda 6 ditëve pas marrjes së njoftimit të mbërritjes së mallrave, kërkon menjëherë rezultatet e kontrollit nga zyra doganore e destinacionit apo daljes, e cila dërgoi njoftimin e mbërritjes së mallrave.

Zyra doganore e destinacionit apo daljes dërgon rezultatet e kontrollit menjëherë pas marrjes së kërkesës nga zyra doganore e nisjes apo hyrjes.

2. Kur zyra doganore e nisjes apo hyrjes nuk ka marrë ende informacion që lejon mbylljen e operacionit TIR ose për rikuperimin e borxhit doganor, kërkon informacion nga mbajtësi i Carnet TIR, ose kur të dhënat e disponueshme janë të mjaftueshme në vendin e destinacionit apo daljes, nga zyra doganore e destinacionit apo daljes, në rastet e mëposhtme:

a) zyra doganore e nisjes apo hyrjes nuk ka marrë njoftimin e mbërritjes së mallrave nga përfundimi i afatit për paraqitjen e mallrave të përcaktuar në përputhje me pikën 2, të nenit 574;

b) zyra doganore e nisjes apo hyrjes nuk ka marrë rezultatet e kontrollit të kërkuara në përputhje me pikën 1;

c) zyra doganore e nisjes apo hyrjes konstaton se njoftimi i mbërritjes së mallrave ose të rezultateve të kontrollit janë dërguar gabimisht.

3. Zyra doganore e nisjes apo hyrjes dërgon kërkesat për informacion në përputhje me shkronjën “a”, të pikës 2, brenda një afati prej 7 ditësh, pas përfundimit të afatit kohor, siç është përcaktuar dhe kërkesat për informacion në përputhje me shkronjën “b”, të pikës 2, brenda një afati prej 7 ditësh pas përfundimit të afatit të referuar në pikën 1.

Megjithatë, nëse para përfundimit të këtyre afateve, zyra doganore e nisjes apo hyrjes ka marrë informacion se operacioni TIR nuk është përfunduar në mënyrë korrekte, ose ka dyshime të ndodhë kështu, ajo do të dërgojë kërkesën pa vonesë.

4. Përgjigjet e kërkesave të bëra në përputhje me pikën 2, do të dërgohen brenda 28 ditëve nga data që është dërguar kërkesa.

5. Kur, pas një kërke në përputhje me pikën 2, zyra doganore e destinacionit apo daljes nuk ka marrë informacion të mjaftueshëm për mbylljen e operacionit TIR, zyra doganore e nisjes apo hyrjes i kërkon mbajtësit të Carnet TIR të japë informacion, jo më vonë se 35 ditë pas fillimit të procedurës hetimore. Megjithatë, deri në implementimin e sistemit të informatizuar të NCTS sipas Planit të punës të miratuar nga ministri përgjegjës për financat, autoriteti doganor kërkon nga mbajtësi i Carnet TIR këtë informacion, jo më vonë se 28 ditë pas fillimit të procedurës hetimore.

Mbajtësi i Carnet TIR i përgjigjet kësaj kërkesë brenda 28 ditëve nga data e dërgimit. Me kërkesën e

mbajtësit të Carnet TIR kjo periudhë mund të zgjatet edhe për 28 ditë të tjera.

6. Kur një Carnet TIR është pranuar pa shkëmbimin e të dhënave Carnet TIR për një operacion TIR, në përputhje me nenin 574, zyra doganore e nisjes apo hyrjes fillon një procedure hetimore për marrjen e informacioneve të nevojshme për mbylljen e operacionit TIR, nëse nuk e ka marrë informacionin se operacioni TIR është mbyllur. Kjo zyrë i përgjigjet kësaj kërkesë brenda 28 ditëve nga data në të cilën është dërguar.

Megjithatë, nëse para përfundimit të kësaj periudhe, zyra doganore e nisjes apo hyrjes merr informacion se operacioni TIR nuk është përfunduar në mënyrë korrekte, ose ka dyshime të ndodhë kështu, ajo do të fillojë procedurën hetimore pa vonesë.

Procedura e hetimit, gjithashtu, fillon prej zyrës doganore të nisjes apo hyrjes në rast se informacioni për përfundimin e operacionit TIR është falsifikuar dhe procedura e hetimit është e nevojshme që të arrihen objektivat e pikës 9.

7. Zyra doganore e nisjes apo hyrjes informon shoqatën garantuese se nuk ka qenë e mundur të kryhet mbyllja e operacionit TIR dhe e fton atë për të paraqitur prova për mbylljen e operacionit TIR. Ky informacion nuk do të konsiderohet si një njoftim brenda komizës së pikës 1, të nenit 11, të Konventës TIR.

8. Kur gjatë procedurës hetimore të përcaktuar në pikat 1 deri 7, konstatohet se operacioni TIR është mbyllur me korrektësi, zyra doganore e nisjes apo hyrjes mbyll operacionin TIR dhe, menjëherë, informon shoqatën garantuese dhe mbajtësin e Carnet TIR dhe kur është e përshtatshme çdo autoritet doganor që mund të ketë nisur një procedure rikuperimi.

9. Kur gjatë procedurës hetimore të përcaktuar në pikat 1 deri 7, konstatohet se nuk mund të mbyllet operacioni TIR, zyra doganore e nisjes apo hyrjes vendos nëse ka lindur borxhi doganor.

Nëse borxhi doganor ka lindur, zyra doganore e nisjes apo hyrjes, duhet të marrë të gjitha masat në përputhje me pikën 1, të nenit 96, të Kodit.

Neni 579

Prova alternative të përfundimit të operacionit TIR

(Shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Operacioni TIR do të konsiderohet që është mbyllur në mënyrë korrekte, brenda afatit kohor të caktuar në përputhje me pikën 2, të nenit 576, kur mbajtësi i Carnet TIR ose shoqata garantuese, sipas kërkesës, paraqet pranë zyrës doganore të nisjes apo hyrjes, një nga dokumentet e mëposhtëm që të identifikojë mallrat:

a) Dokument të vërtetuar nga autoriteti doganor i destinacionit apo daljes, që identifikon mallrat dhe

përcakton se mallrat janë paraqitur në zyrën doganore të destinacionit apo daljes, ose i janë dorëzuar një pritësi të autorizuar sipas nenit 205, të Kodit;

b) Një dokument i regjistrimit doganor, i vërtetuar nga autoritetet doganore, i cili përcakton se mallrat kanë dalë fizikisht nga territori doganor i Republikës së Shqipërisë;

c) Një dokument doganor të lëshuar në një vend tjetër ku mallrat janë vendosur nën një regjim doganor, ç) Një dokument të lëshuar në një vend tjetër, vulosur ose vërtetuar nga autoritetet doganore të atij

vendi dhe që përcakton se mallrat janë hedhur për qarkullim të lirë në atë vend.

2. Në vend të dokumenteve të përmendura në pikën 1, mund të jepen si prove, kopje të njësuara me

originalin nga organi i cili vërteton dokumentet origjinale.

3. Njoftimi i mbërritjes së mallrave të përmendura në pikat 1 dhe 2, të nenit 577, nuk

konsiderohet si provë se operacioni TIR ka përfunduar në mënyrë korrekte.

Neni 580

Formalitetet për lëvizjen e mallrave nën operacionin TIR të pranuar nga një pritës i autorizuar

(Shkronja “b” e pikës 3, të nenit 203, dhe shkronja “b”, e pikës 2, të nenit 204, të Kodit)

1. Kur mallrat mbërrin në një vend të përcaktuar në autorizimin e përmendur në nenin 205 të Kodit, pritësi i autorizuar duhet:

a) menjëherë, të njoftojë zyrën doganore të destinacionit të mbërritjes së mallrave dhe të njoftojë atë për ndonjë parregullsi apo incident që ka ndodhur gjatë transportit;

b) të shkarkojë mallrat vetëm pas marrjes së lejes nga zyra doganore e destinacionit;

c) pas shkarkimit, të regjistrojë pa vonesë në regjistrat e tij rezultatet e inspektimit dhe çdo informacion tjetër në lidhje me të dhënat e shkarkimit;

ç) të njoftojë zyrën doganore të destinacionit për rezultatet e inspektimit të mallrave dhe të njoftojë atë për ndonjë parregullsi, jo me vonë se tre ditë pas ditës kur ai ka marrë lejen për shkarkimin e mallrave.

2. Kur zyra doganore e destinacionit merr njoftimin e mbërritjes së mallrave në ambientet e pritësit të autorizuar, ajo njofton zyrën doganore të nisjes apo hyrjes për mbërritjen e mallrave.

3. Kur zyra doganore e destinacionit merr rezultatet e inspektimit të mallrave të përmendura në pikën 1, shkronja “ç”, ajo dërgon rezultatet e kontrollit në zyrën doganore të nisjes apo hyrjes jo më vonë se gjashtë ditë nga dërgimi i mallrave tek pritësi i autorizuar.

4. Me kërkesë të mbajtësit të Carnet TIR, pritësi i autorizuar do të lëshojë një faturë, e cili vërteton mbërritjen e mallrave në vendin e përcaktuar në autorizimin e përmendur në nenin 205, të Kodit dhe përmban MRN e operacionit TIR dhe Carnet TIR. Fatura nuk konsiderohet si provë nëse operacioni TIR është përfunduar në përputhje me pikën 4, të nenit 577.

5. Pritësi i autorizuar, siguron që Carnet TIR bashkë me MRN e operacionit TIR, janë paraqitur brenda afatit kohor të përcaktuar në autorizimin e zyrës doganore të destinacionit për qëllime të mbylljes të operacionit TIR, në përputhje me pikën 4, të nenit 577.

6. Mbajtësi i Carnet TIR, konsiderohet të ketë përmbushur detyrimet e tij sipas nenit 1(o) të Konventës TIR, kur Carnet TIR bashkë me mjetin rrugor, kombinimin e mjeteve me kontejnerët dhe mallrat janë paraqitur të paprekura tek pritësi i autorizuar në vendin e përcaktuar në autorizim.

Nënseksioni 3

Zbatimi i Konventës për një regjim transiti të përbashkët

Neni 581

Zbatimi i regjimit të transitit të jashtëm në raste të veçanta

(Pika 2, dhe shkronja “a” e pikës 3, të nenit 203,
dhe shkronja “a” e pikës 2, të nenit 204, të Kodit)

(Ndryshuar togfjalësh në shkronjën “c” të pikës 1, pikat 2, 3, shtuar pika 4 me VKM nr. 872, datë 30.12.2024)

1. Kur mallrat shqiptare eksportohen në një vend tjetër, i cili është palë kontraktuese e Konventës në një regjim transiti të përbashkët ose kur mallrat shqiptare eksportohen dhe kalojnë përmes një ose më shumë vendeve të transitit të përbashkët si dhe zbatohen dispozitat e konventës për një regjim transiti të përbashkët, atëherë mallrat vendosen nën regjimin e transitit të jashtëm të Republikës së Shqipërisë, sipas përcaktimit të pikës 2, të nenit 203, të Kodit, në rastet e mëposhtme:

a) kur mallrat shqiptare i janë nënshtruar formaliteteve doganore të eksportit, me qëllim rimbursimin që u është dhënë me eksportin në vende të tjera nën politikat e përbashkëta bujqësore;

b) kur mallrat shqiptare kanë ardhur nga rezervat e emergjencës, që janë objekt i masave të kontrollit për përdorimin ose destinacionin e tyre dhe i janë nënshtruar formaliteteve doganore për eksport drejt vendeve të tjera nën politikën e përbashkët bujqësore;

c) kur mallrat shqiptare kanë përfituar të drejtën për rimbursim ose falje të detyrimit të importit, me kusht që ato të jenë vendosur nën transitin e jashtëm, në përputhje me pikën 1, të nenit 111 të Kodit.

2. Mallrat shqiptare që kualifikohen për rimbursimin ose faljen e detyrimit të importit në përputhje me pikën 1, të nenit 111, të Kodit, mund të vendosen nën regjimin e transitit të jashtëm të përmendur në pikën 4, të nenit 111, dhe në pikën 2, të nenit 203, të Kodit.

3. Kur mallrat shqiptare eksportohen drejt një vendi të tretë dhe zhvendosen brenda territorit doganor të Republikës së Shqipërisë, sipas një operacioni TIR ose sipas një regjimi transiti, në përputhje me Konventën ATA ose me Konventën e Stambollit, mallrat vendosen nën regjimin e transitit të jashtëm, të përmendur në pikën 2, të nenit 203, të Kodit.

4. Kur eksportohen mallra akcize, të cilat kanë statusin doganor të mallrave shqiptare, këto mallra mund të vendosen nën regjimin e transitit të jashtëm, të përmendur në pikën 2, të nenit 203, të Kodit.

Neni 582

Vërtetim i miratuar nga zyra doganore e destinacionit

(Shkronja “a”, e pikës 3, të nenit 17, të Kodit)

Një vërtetim i miratuar nga zyra doganore e destinacionit, me kërkesë të personit që paraqet mallrat dhe informacionin e kërkuar nga kjo zyrë, duhet të përmbajë të dhënat e përmendura në aneksin 72-03, të shtojcës A bashkëlidhur këtij vendimi dhe pjesë përbërëse e tij.

Nënseksioni 4

Thjeshtimet e përdorura nën regjimin e transitit

Neni 583

Dispozita të përgjithshme mbi autorizimet e thjeshtimeve

(Pika 4, e nenit 207, të Kodit)

(Ndryshuar togfjalësh në shkronjën “c” të pikës 1 me VKM nr. 872, datë 30.12.2024)

1. Autorizimet e përmendura në pikën 4, të nenit 207, të Kodit, do t’i jepen aplikuesit që plotëson kushtet e mëposhtme:

a) Është i vendosur në territorin doganor të Republikës së Shqipërisë;

b) Deklaron se do të përdorë rregullisht regjimin e transitit;

c) Plotëson kriteret e përcaktuara në shkronjat “a”, “b”, “c” dhe “d”, të nenit 41, të Kodit.

2. Autorizimet duhet të jepen vetëm me kusht që autoriteti doganor konsideron se është në gjendje të mbikëqyrë regjimin e transitit dhe të kryejë kontrolle pa një përpjekje administrative joproporcionale ndaj aplikuesit në fjalë.

Neni 584

Fusha e zbatimit territorial të thjeshtimeve

(shkronjat “a”, “b”, “c” dhe “d”, të pikës 4, të nenit 207, të Kodit)

(Ndryshuar referenca nën titull me VKM nr. 872, datë 30.12.2024)

1. Thjeshtimi i përmendur në nenin 207, pika 4, shkronjat “a” dhe “c”, të Kodit Doganor zbatohet vetëm për operacione transiti të filluara në Republikën e Shqipërisë, ku është dhënë autorizimi për

thjeshtim.

2. Thjeshtimi i përmendur në nenin 207, pika 4, shkronja “b”, të Kodit, zbatohet vetëm për operacione transiti që përfundojnë në Republikën e Shqipërisë, ku është dhënë autorizimi për thjeshtim.

3. Thjeshtimi i përmendur në nenin 207, pika 4, shkronja “d”, të Kodit zbatohet vetëm në zyrat doganore të specifikuara në autorizimin për thjeshtim.

Neni 585

Aplikimi për statusin e dërguesit të autorizuar për vendosjen e mallrave në regjimin e transitit

(Paragrafi i tretë, i pikës 1, të nenit 27, të Kodit)

Për vendosjen e mallrave nën regjimin e transitit, aplikimet për statusin e dërguesit të autorizuar të përmendur në shkronjën “a”, të pikës 4, të nenit 207, të Kodit, paraqiten pranë Drejtorisë së Përgjithshme të Doganave.

Neni 586

Autorizimi për statusin e dërguesit të autorizuar për vendosjen e mallrave nën regjimin e transitit

(shkronja “a”, e pikës 4, të nenit 207, të Kodit)

(Ndryshuar referenca nën titull me VKM nr. 872, datë 30.12.2024)

Statusi i dërguesit të autorizuar i përmendur në shkronjën “a”, të pikës 4, të nenit 207, të Kodit, u jepet vetëm aplikuesve, të cilët janë të autorizuar për të depozituar një garanci globale në përputhje me pikën 5, të nenit 84, të Kodit, ose për të përfituar një përjashtim nga depozitimi i garancisë, në përputhje me pikën 2, të nenit 90, të Kodit.

Neni 587

Vendosja e mallrave nën regjimin e transitit nga dërguesi i autorizuar

(Shkronja “a”, e pikës 4, të nenit 207, të Kodit)

1. Kur dërguesi i autorizuar ka për qëllim të vendosë mallrat nën regjimin e transitit, paraqet një deklaratë transiti në zyrën doganore të nisjes. Dërguesi i autorizuar nuk mund të nisë regjimin e transitit deri në përfundimin e afatit kohor të përcaktuar në autorizimin e përmendur në nenin 207, pika 4, shkronja “a”, të Kodit.

2. Dërguesi i autorizuar regjistron të dhënat e mëposhtme në sistemin elektronik të transitit:

- a) itinerarin nëse është përcaktuar në përputhje me nenin 615;
- b) afatin kohor të përcaktuar, në përputhje me nenin 614, brenda të cilit mallrat duhet të paraqiten në zyrën doganore të destinacionit;
- c) numrin e plumbçeve dhe numrin identifikues të çdo plumbçeje sipas nevojës.

3. Dërguesi i autorizuar mund të pritë dokumentin shoqërues të transitit ose dokumentin shoqërues të transit/sigurisë vetëm pas marrjes së njoftimit të çlirimit të mallrave për regjimin e transitit nga zyra doganore e nisjes.

Pas implementimit të sistemit të informatizuar të NCTS sipas planit të punës të miratuar nga ministri përgjegjës për financat, dërguesi i autorizuar do t'i pritë ato dokumente.

Neni 588

Aplikimet për statusin e pritësit të autorizuar për mallrat që lëvizin nën regjimin e transitit

(Paragrafi i tretë, i pikës 1, të nenit 27, të Kodit)

Me qëllim pritjen e mallrave që lëvizin nën regjimin e transitit, aplikimi për statusin e pritësit të autorizuar të përmendur në shkronjën “b”, të pikës 4, të nenit 207, të Kodit, paraqitet pranë Drejtorisë së Përgjithshme të Doganave.

Neni 589

Autorizimet për statusin e pritësit të autorizuar për mallrat që lëvizin nën regjimin e transitit

(shkronja “b”, e pikës 4, të nenit 207, të Kodit)

(Ndryshuar referenca nën titull me VKM nr. 872, datë 30.12.2024)

Statusi i pritësit të autorizuar të përmendur në shkronjën “b”, të pikës 4, të nenit 207, të Kodit, jepet vetëm për aplikuesit, të cilët deklarojnë se do të presin rregullisht mallrat që janë vendosur nën regjimin e transitit.

Neni 590

Formalitetet për mallrat që lëvizin nën regjimin e transitit të mbërritura pranë pritësit të autorizuar

(Shkronja “b”, e pikës 4, të nenit 207, të Kodit)

1. Kur mallrat mbërrin në vendin e specifikuar në autorizim, sipas nenit 207, pika 4, shkronja “b”, të Kodit, pritësi i autorizuar duhet:

a) të njoftojë menjëherë zyrën doganore të destinacionit për mbërritjen e mallrave dhe për ndonjë parregullsi apo aksident që ka ndodhur gjatë transportit;

b) të shkarkojë mallrat vetëm pas marrjes së lejes nga zyra doganore e destinacionit;

c) pas shkarkimit, të regjistrojë pa vonesë në regjistrat e tij, rezultatet e kontrollit dhe çdo informacion tjetër në lidhje me shkarkimin;

ç) të njoftojë zyrën doganore të destinacionit për rezultatet e kontrollit të mallrave dhe ta informojë atë për çdo parregullsi, brenda tre ditëve, pas datës kur ai ka marrë lejen për shkarkimin e mallrave.

2. Kur zyra doganore e destinacionit merr njoftim për mbërritjen e mallrave në ambientet e pritësit të autorizuar, njofton zyrën doganore të nisjes për mbërritjen e mallrave.

3. Kur zyra doganore e destinacionit merr rezultatet e kontrollit të mallrave, sipas shkronjës “ç”, të pikës 1, dërgon rezultatet e kontrollit në zyrën doganore të nisjes, brenda gjashtë ditësh, pas datës së marrjes së mallrave nga pritësi i autorizuar;

Neni 591

Mbyllja e regjimit të transitit për mallrat e marra nga pritësi i autorizuar

(Shkronja “b”, e pikës 4, të nenit 207, të Kodit)

1. Mbajtësi i regjimit konsiderohet se ka përmbushur detyrimet e tij dhe regjimi i transitit konsiderohet i mbyllur në përputhje me pikën 2, të nenit 207, të Kodit, kur mallrat janë paraqitur të paprekura pranë pritësit të autorizuar sipas shkronjës “b”, të pikës 4, të nenit 207, të Kodit, në vendin e specifikuar në autorizim, brenda afatit kohor të përcaktuar në përputhje me pikën 1, të nenit 614.

2. Me kërkesë të transportuesit, pritësi i autorizuar lëshon një vërtetim që konfirmon mbërritjen e mallrave në vendin e specifikuar në autorizim sipas shkronjës “b”, të pikës 4, të nenit 207, të Kodit dhe përmban referencën MRN të operacionit transit. Vërtetimi duhet të lëshohet në përputhje me formatin e përcaktuar në aneksin 72-03, të shtojcës B bashkëlidhur këtij vendimi dhe pjesë përbërëse e tij.

Neni 592

Vërtetimi i lëshuar nga pritësi i autorizuar

(Shkronja “a”, e pikës 3, të nenit 17, të Kodit)

Vërtetimi i lëshuar nga pritësi i autorizuar për transportuesin në lidhje me dërgimin e mallrave duhet të përmbajë të dhënat dhe informacionin e kërkuar e përmendura në aneksin 72-03, të shtojcës A bashkëlidhur këtij vendimi dhe pjesë përbërëse e tij.

Neni 593

Autorizimi për përdorimin e plumbçeve të një lloji të veçantë

(shkronja “c”, e pikës 4, të nenit 207, të Kodit)

(Ndryshuar referenca nën titull me VKM nr. 872, datë 30.12.2024)

1. Autorizimet, sipas përcaktimit të shkronjës “c”, të pikës 4, të nenit 207, të Kodit, për përdorimin e plumbçeve të një lloji të veçantë për mjetet e transportit, kontejnerët ose pakot që përdoren nën regjimin e transitit jepen kur autoritetet doganore miratojnë plumbçet e përcaktuara në aplikimin për autorizim.

2. Autoriteti doganor mund të pranojë plumbçe të një lloji të veçantë sipas autorizimit të miratuar nga një shtet tjetër me të cilin Republika e Shqipërisë ka nënshkruar një marrëveshje ndërkombëtare për transitin, përveç rasteve kur ka informacion se këto plumbçe të veçanta nuk janë të përshtatshme për qëllime doganore.

Neni 593/1

Aplikimet për përdorimin e plumbçeve të një lloji të veçantë

(shkronjat “a” dhe “c”, të pikës 4, të nenit 207, të Kodit)

(Shtuar me VKM nr. 872, datë 30.12.2024)

Kur një dërgues i autorizuar ose një operator ekonomik, i cili aplikon për statusin e dërguesit të autorizuar, të përmendur në shkronjën “a”, të pikës 4, të nenit 207, të Kodit, aplikon për një autorizim për të përdorur plumbçe të një lloji të veçantë, siç përmendet në shkronjën “c”, të pikës 4, të nenit 207, të Kodit, aplikimi mund t’i dorëzohet autoritetit doganor kompetent për marrjen e një vendimi, ku duhet të fillojnë operacionet e transitit të dërguesit të autorizuar.

Neni 594

Formalitetet për përdorimin e plumbçeve të një lloji të veçantë

(Shkronja “c”, e pikës 4, të nenit 207, të Kodit)

1. Plumbçet e një lloji të veçantë duhet të jenë në përputhje me kërkesat e përcaktuara në pikën 1, të nenit 618.

Plumbçet e certifikuar nga një organ kompetent në përputhje me Standardin Ndërkombëtar ISO 17712:2013 “kontejnerë për transport - plumbçet mekanike”, konsiderohen si plumbçe që përmbushin këto kërkesa.

Për transportin me kontejnerë përdoren, për sa është e mundur, plumbçet me elementë të lartë të sigurisë

2. Plumbçet e një lloji të veçantë përmbajnë një nga treguesit e mëposhtëm:

a) emrin e personit të autorizuar për ta përdorur atë, në përputhje me nenin shkronjën “c”, të pikës 4, të nenit 207, të Kodit;

b) një shkurtim ose kodin përkatës mbi bazën e të cilit autoritetet doganore të nisjes mund të identifikojnë personin e interesuar.

3. Mbajtësi i regjimit shënon numrin e plumbçeve të llojit të veçantë dhe numrin identifikues të secilit prej tyre në deklaraten e transitit dhe i vendos plumbçet jo më vonë se momenti i nisjes së mallrave në regjimin e transitit.

Neni 595

Mbikëqyrja doganore për përdorimin e plumbçeve të një lloji të veçantë

(Shkronja “c”, e pikës 4, të nenit 207, të Kodit)

Drejtorja e Përgjithshme e Doganave kryen, sa më poshtë:

- a) i njofton zyrave doganore plumbçet e një lloji të veçantë në përdorim dhe plumbçet e llojit të veçantë, të cilat ka vendosur të mos miratojë për arsye të parregullsive ose mangësive teknike;
- b) rishqyrton plumbçet e një lloji të veçantë të miratuara e në përdorim;
- c) mund të kërkojë të konsultohet me zyrat doganore me qëllim që të arrihet një vlerësim i përbashkët; Zyrat doganore mbikëqyrin përdorimin e plumbçeve të një lloji të veçantë nga personat e autorizuar në përputhje me nenin 593.

Neni 596

Autorizimi për përdorimin e një deklarate transiti me të dhëna të reduktuara

(Shkronja “ç”, e pikës 4, të nenit 207, të Kodit)

Autorizimet, në përputhje me shkronjën “ç”, të pikës 4, të nenit 207, të Kodit, për përdorimin e një deklarate doganore me të dhëna të reduktuara për të vendosur mallrat nën regjimin e transitit jepen për:

- a) transportin e mallrave në rrugë hekurudhore;
- b) transportin e mallrave në rrugë ajrore dhe detare, nëse dokumenti elektronik i transportit nuk përdoret si deklarate transiti.

Neni 597

Autorizimet për përdorimin e një dokumenti elektronik të transportit si deklarate transiti në transportin ajror

(Shkronja “d”, e pikës 4, të nenit 207, të Kodit)

Për qëllime të transportit ajror, autorizimet për përdorimin e një dokumenti elektronik të transportit si deklarate transiti për t'i vendosur mallrat nën regjimin e transitit, në përputhje me shkronjën “d”, të pikës 4, të nenit 207, të Kodit, jepen vetëm kur aplikuesi:

- a) kryen një numër të konsiderueshëm fluturimesh ndërmjet aeroporteve të Republikës së Shqipërisë;
- b) vërteton që është në gjendje të sigurojë se të dhënat e dokumentit elektronik të transportit janë të disponueshme në zyrën doganore të nisjes në aeroportin e nisjes dhe në zyrën doganore të destinacionit në aeroportin e destinacionit dhe se këto të dhëna janë të njëjta si në zyrën doganore të nisjes ashtu edhe në zyrën doganore të destinacionit.

Neni 598

Autorizimet për përdorimin e një dokumenti elektronik të transportit si deklarate transiti në transportin detar

(Shkronja “d”, e pikës 4, të nenit 207, të Kodit)

Për qëllime të transportit detar, autorizimet për përdorimin e një dokumenti elektronik të transportit si deklarate transiti për t'i vendosur mallrat nën regjimin e transitit, në përputhje me shkronjën “d”, të pikës 4, të nenit 207, të Kodit, jepen vetëm kur:

- a) aplikuesi kryen një numër të konsiderueshëm lundrimesh ndërmjet porteve në Republikën së Shqipërisë;

b) aplikuesi tregon se ai është në gjendje të sigurojë që të dhënat e dokumentit elektronik të transportit janë të disponueshme në zyrën doganore të nisjes në portin e nisjes dhe në zyrën doganore të destinacionit në portin e destinacionit, dhe se këto të dhëna janë të njëjta si në zyrën doganore të nisjes ashtu edhe në zyrën doganore të destinacionit.

Neni 599

Konsultime para autorizimit për përdorimin e një dokumentit elektronik transporti, si deklaratë transiti për transportin ajror ose detar (Neni 27 i Kodit)

Pasi është shqyrtuar përmbushja e kushteve për lëshimin e autorizimit, të parashikuara në nenin 583, dhe përkatësisht neneve 597, (për transportin ajror) apo 598, (për transportin detar), autoriteti doganor kompetent për marrjen e vendimit konsultohet me autoritetin doganor pranë aeroporteve të nisjes dhe të destinacionit (në rast të transportit ajror) apo me autoritetin doganor pranë porteve të nisjes apo destinacionit (në rastin e transportit detar).

Afati kohor për konsultimin caktohet 45 ditë nga komunikimi sipas nenit 31, nga ana e autoritetit doganor kompetent për marrjen e vendimit, në lidhje me kushtet dhe kriteret që duhet të shqyrtohen nga autoritetet doganore me të cilat janë konsultuar.

Neni 600

Formalitetet për përdorimin e dokumentit elektronik të transportit si një deklaratë transiti për transportin në rrugë ajrore apo detare (Shkronja “d”, e pikës 4, të nenit 207, të Kodit)

1. Mallrat do të vendosen nën regjimin e transitit kur të dhënat e dokumentit elektronik të transportit, janë vënë në dispozicion të zyrës doganore të nisjes në aeroport, në rast të transportit në rrugë ajrore apo në zyrën doganore të nisjes në port, në rastin e transportit në rrugë detare, në përputhje me mënyrat e përcaktuara në autorizim.

2. Kur mallrat do të vendosen nën regjimin e transitit, mbajtësi i regjimit shënon kodet përkatëse në të gjithë fushat, në dokumentin elektronik të transportit.

Regjimi i transitit përfundon kur mallrat paraqiten në zyrën doganore të destinacionit në aeroport, në rastin e transportit në rrugë ajrore apo në zyrën doganore të destinacionit në port, në rastin e transportit në rrugë detare dhe të dhënat e dokumentit elektronik të transportit janë vënë në dispozicion të kësaj zyre doganore, sipas mënyrave të përcaktuara në autorizim.

4. Mbajtësi i regjimit njofton menjëherë zyrat doganore të nisjes dhe destinacionit për të gjitha shkeljet apo parregullsitë.

5. Regjimi i transitit konsiderohet i mbyllur me përjashtim kur autoritetet doganore nuk janë informuar ose kanë arritur në përfundimin se regjimi nuk është mbyllur në mënyrë korrekte.

Nënseksioni 5

Lëvizja e mallrave në përputhje me Konventën ATA dhe Konventën e Stambollit

Neni 601

Njoftimi i veprave penale dhe parregullsive (Shkronja “c” e pikës 3, të nenit 203, dhe shkronja “c”, e pikës 2, të nenit 204, të Kodit)

Kur një vepër penale apo parregullsi është kryer gjatë ose në lidhje me transitin ATA, DPD njofton mbajtësin e Carnet ATA dhe shoqatën garantuese për veprën penale apo parregullsitë, brenda një viti nga data e përfundimit të vlefshmërisë së Carnet.

Neni 602

Prova alternative të përfundimit të operacionit transit ATA

(Shkronja “c” e pikës 3, të nenit 203, dhe shkronja “c”, e pikës 2, të nenit 204, të Kodit)

1. Operacioni transit ATA konsiderohet i përfunduar me korrektësi kur mbajtësi i Carnet ATA paraqet, brenda afateve të përcaktuara në pikat 1 dhe 2, të nenit 7, të Konventës ku Carnet lëshohet nën Konventën ATA dhe në shkronjat “a” dhe “b”, të pikës 1, të nenit 9, të aneksit A të Konventës së Stambollit, kur Carnet lëshohet nën Konventën e Stambollit dhe për të bindur autoritetet doganore, një nga dokumentet e mëposhtme që identifikon mallrat:

a) dokumentet e përmendura në nenin 8, të Konventës ATA, kur Carnet lëshohet nën Konventën ATA dhe në nenin 10, të aneksit A, të Konventës së Stambollit, kur Carnet lëshohet nën Konventën e Stambollit;

b) një dokument i vërtetuar nga autoritetet doganore, që përcakton se mallrat janë paraqitur në zyrën doganore të destinacionit apo daljes;

c) një dokument i lëshuar nga autoritetet doganore në një vend tjetër ku mallrat janë vendosur nën një regjim doganor.

2. Në vend të dokumenteve të përmendura në pikën 1, mund të jepet si provë, kopje e njësuar me origjinalin nga organi i cili vërteton dokumentet origjinale.

Nënseksioni 6

Lëvizja e mallrave nën formatin/formularin 302

Neni 603

Zyra doganore kompetente

(Shkronja “ç” e pikës 3, të nenit 203, shkronja “ç” e pikës 2, të nenit 204, dhe pika 2, e nenit 147, të Kodit)

DPD me udhëzim përcakton zyrën doganore ose zyrat përgjegjëse për formalitetet doganore dhe kontrollet për lëvizjen e mallrave të kryera nga ose në emër të forcave të Organizatës së Traktatit të Atlantikut të Veriut (NATO), që kanë të drejtë të përdorin formularin 302.

Neni 604

Furnizimi i forcave të NATO me formularët 302

(Shkronja “ç” e pikës 3, të nenit 203, shkronja “ç” e pikës 2, të nenit 204, të Kodit)
(Hequr fjalë në fjalinë e parë me VKM nr. 872, datë 30.12.2024)

Zyra doganore e caktuar nga DPD do të furnizojë forcat e NATO të vendosura në zonën e saj me formularët 302 që:

a) janë paravërtetuar, vulosur dhe nënshkruar nga kryetari i kësaj zyre;

b) kanë numër serial;

c) kanë adresën e plotë të zyrës doganore në fjalë për kthimin e kopjeve të formularit 302.

Neni 605

Rregullat procedurale që zbatohen për përdorimin e formularit 302

(Shkronja “ç” e pikës 3, të nenit 203, shkronja “ç” e pikës 2, të nenit 204, të Kodit)

1. Në kohën e dërgimit të mallrave, forcat e NATO do të kryejnë një nga veprimet e mëposhtme:

a) të depozitojnë formularin 302, në formë elektronike në zyrën doganore të nisjes apo hyrjes;

b) plotësojnë formularin 302 me një deklaratë që vërteton se mallrat janë transportuar nën kontrollin

e tyre dhe të verifikojë këtë deklaratë me nënshkrimin e tyre, vulën dhe datën.

2. Kur forcat e NATO, depozitojnë formularin 302 në formë elektronike, në përputhje me shkronjën “a” të pikës 1, nenet 611, 613, 621, 623, 587, 590 dhe 591 do të aplikohen *mutatis mutandis*.

3. Kur forcat e NATO veprojnë në përputhje me shkronjën “b” të pikës 1, një kopje e formularit 302 jepet pa vonesë në zyrën doganore përgjegjëse për formalitetet doganore dhe kontrollet, që kanë të bëjnë me forcat e NATO që dërgojnë mallrat ose në emër të cilave mallrat do të dërgohen.

Kopjet e tjera të formularit 302, do të shoqërojnë ngarkesën në destinacionin e forcave të NATO, ku formularët do të vulosen dhe nënshkruhen nga ato forca të NATO.

Në kohën e mbërritjes së mallrave, dy kopje të formularit do t'i jepen zyrës doganore kompetente të përcaktuar për formalitetet doganore dhe kontrollet e zbatueshme të forcave të NATO të destinacionit.

Zyra doganore e përcaktuar duhet të mbajë një kopje dhe do ta kthejë kopjen e dytë në zyrën doganore përgjegjëse për formalitetet doganore dhe kontrollet që kanë të bëjnë me forcat e NATO, e cila dërgon mallrat ose në emër të së cilës janë dërgohen mallrat.

Nënseksioni 7

Transiti i mallrave të transportuara nën sistemin postar

Neni 606

Lëvizja e mallrave joshqiptare në dërgesat postare nën regjimin e transitit të jashtëm

(Shkronja “d”, e pikës 3, të nenit 203, të Kodit)

Kur mallrat joshqiptare qarkullojnë nën regjimin e transitit të jashtëm në përputhje me shkronjën “d”, të pikës 3, të nenit 203, të Kodit, dërgesat postare dhe të gjitha dokumentet shoqëruese do të mbajnë një etiketë sipas aneksit 72-01, të shtojcës B bashkëlidhur këtij vendimi dhe pjesë përbërëse e tij.

Neni 607

Lëvizja e dërgesave postare që përmbajnë mallra shqiptare dhe joshqiptare

(Shkronja “d” e pikës 3, të nenit 203, dhe shkronja “d” e pikës 2, të nenit 204, të Kodit)

1. Kur një dërgesë postare përmban mallra shqiptare dhe jo shqiptare, ngarkesa dhe çdo dokument do të mbajnë etiketën e përcaktuar në aneksin 72-01, të shtojcës B bashkëlidhur këtij vendimi dhe pjesë përbërëse e tij.

2. Për mallrat shqiptare të një dërgese siç referohet në pikën 1, prova për statusin doganor të mallrave ose MRN mund të dërgohen më vete operatorit postar të destinacionit ose së bashku me dërgesën.

Kur prova e statusit doganor të mallrave shqiptare i dërgohet më vete operatorit postar të destinacionit, operatori postar paraqet prova të statusit doganor të mallrave shqiptare në zyrën doganore të destinacionit së bashku me dërgesën.

Ku prova e statusit doganor të mallrave shqiptare ose MRN e saj, është bashkëngjitur në dërgesë, kjo do të tregohet qartë në pjesën e jashtme të paketimit.

Neni 608

Lëvizja e dërgesave postare nën regjimin e transitit të brendshëm në situata të veçanta

(Shkronja “d”, e pikës 2, të nenit 204, të Kodit)

Kur mallrat shqiptare lëvizin nën regjimin e transitit të brendshëm në përputhje me nenin shkronjën “d”, të pikës 2, të nenit 204, të Kodit, nga territori doganor i Republikës së Shqipërisë, në një vend transiti të përbashkët, për të rihyrë në territorin doganor të Republikës së Shqipërisë, ato mallra shoqërohen me provën e statusit doganor shqiptar të përcaktuar me një nga mënyrat e listuara në nenin

563.

Prova e statusit doganor të mallrave shqiptare paraqitet në zyrën doganore të rihyrjes në territorin doganor të Republikës së Shqipërisë.

Seksioni 2

Dispozita të tjera për regjimin e transitit të brendshëm dhe të jashtëm

Nënseksioni 1

Dispozita të tjera

Neni 609

Operacione transiti në rrethana të veçanta

(Shkronja “b”, e pikës 3, të nenit 17, të Kodit, shkronja “b”, e pikës 3, të nenit 17, shkronja “a”, e pikës 3, të nenit 203, shkronja “a”, e pikës 2, të nenit 204, të Kodit)

(Shtuar togfalësh referencës nën titull me VKM nr. 872, datë 30.12.2024)

1. Autoriteti doganor pranon një deklaratë transiti në letër në rast të defekteve të përkohshme të:

- a) sistemit informatik të transitit;
- b) sistemit informatik të përdorur nga mbajtësi i regjimit për depozitimin e deklaratës së transitit nëpërmjet teknikave informatike të përpunimit të të dhënave;
- c) lidhjes elektronike ndërmjet sistemit informatik të transitit dhe sistemit informatik të përdorur nga mbajtësi i regjimit për depozitimin e deklaratës transit nëpërmjet teknikës informatike të përpunimit të të dhënave.

Rregullat për përdorimin e deklaratës transit në letër përcaktohen në aneksin 72-04 ‘Procesi i Vazhdimësisë së Punës (PVP)’, të shtojcës B bashkëlidhur këtij vendimi dhe pjesë përbërëse e tij.

2. Pranimi i deklaratës transit në letër në rast të defekteve të përkohshme sipas shkronjave “b” dhe “c”, i nënshtrohet miratimit të autoriteteve doganore.

Neni 610

Kontrolli dhe asistenca administrative

(Neni 49 i Kodit)

1. Autoriteti doganor kompetent mund të kryejë kontroll pas çlirimit për transit (*a-posteriori*), të informacioneve të dhëna, si dhe të çdo dokumenti, formulari, autorizimi ose të dhëne në lidhje me operacionin e transitit, për të kontrolluar vërtetësinë e të dhënave të regjistruara, informacionit të shkëmbyer dhe vulave. Këto kontrolle bëhen në rast dyshimesh për saktësinë dhe vërtetësinë e informacionit të dhënë ose në rast dyshimi për mashtrim. Ato mund të bëhen gjithashtu në bazë të analizës së riskut ose me përzgjedhje të rastësishme.

2. Autoriteti doganor kompetent përgjigjet menjëherë pas marrjes së një kërkesë për kontroll *a-posteriori*.

3. Nëse autoriteti doganor kompetent i vendit të nisjes i bën një kërkesë autoritetit doganor kompetent për një kontroll *a-posteriori* të informacioneve në lidhje me operacionin e transitit të përbashkët, kushtet e parashikuara në pikën 2, të nenit 195, të Kodit, për mbylljen e regjimit të transitit nuk konsiderohen të përmbushura derisa të konfirmohet vërtetësia dhe saktësia e të dhënave.

Neni 611

Dërgesa të përziera

(Shkronja “a”, e pikës 3, të nenit 203, shkronja “a”, e pikës 2, të nenit 204, të Kodit)

(Ndryshuar referenca nën titull me VKM nr. 872, datë 30.12.2024)

Një dërgesë mund të përmbajë njëkohësisht si mallra që duhet të vendosen nën regjimin e transitit të jashtëm në përputhje me nenin 203, të Kodit, ashtu dhe mallra që duhet të vendosen nën regjimin e transitit të brendshëm në përputhje me nenin 204, të Kodit, me kusht që çdo artikull i mallrave të jetë saktësisht i identifikueshëm në deklaratën e transitit.

Neni 612

Fusha e zbatimit

(Shkronja “a” e pikës 3, të nenit 203 të Kodit)

(Hequr toqfjalësh në referencën nën titull me VKM nr. 872, datë 30.12.2024)

Regjimi i transitit është i detyrueshëm në rastet e mëposhtme:

- a) nëse mallrat joshqiptare të transportuara në rrugë ajrore janë ngarkuar ose shkarkuar në një aeroport të Republikës së Shqipërisë;
- b) nëse mallrat joshqiptare të transportuara në rrugë detare përdorin një shërbim të rregullt të transportit detar të autorizuar në përputhje me nenin 295.

Nënseksioni 2

Formalitetet në zyrën doganore të nisjes

Neni 613

Deklarata e transitit dhe mjetet e transportit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Çdo deklaratë transiti do të përfshijë vetëm mallrat e vendosura nën regjimin e transitit që lëvizin ose duhet të lëvizin nga zyra doganore e nisjes në zyrën doganore të destinacionit në një mjet të vetëm transporti, në një kontejner apo në një kolli/pako.

Megjithatë, një deklaratë e vetme transiti mund të përfshijë mallra që lëvizin ose duhet të lëvizin nga zyra doganore e nisjes në zyrën doganore të destinacionit, në më shumë se një kontejner apo në më shumë se një pako/kolli, me kusht që kontejnerët apo pakot/kollitë janë ngarkuar në një mjet të vetëm transporti.

2. Për qëllime të këtij neni, mjetet e mëposhtme do të konsiderohen se përbëjnë një mjet të vetëm transporti, me kusht që të transportojnë mallra të cilat lëvizin së bashku:

- a) një automjet rrugor i shoqëruar nga rimorkio/t ose gjysmërimorkio/t e tij;
- b) një varg vagonësh hekurudhorë apo vagonë që bashkëshoqërohen;
- c) mjete lundruese që përbëjnë një zinxhir të vetëm.

3. Kur për qëllime të regjimit të transitit, një mjet i vetëm transporti është përdorur për ngarkimin e mallrave në më shumë se një zyrë doganore nisjeje si dhe për shkarkimin e tyre në më shumë se një zyrë doganore destinacioni, depozitohen deklarata transiti të veçanta për secilën ngarkesë.

Neni 614

Afati për paraqitjen e mallrave

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Zyra doganore e nisjes përcakton afatin kohor brenda të cilit mallrat do të paraqiten në zyrën doganore të destinacionit, duke marrë parasysh sa më poshtë:

- a) itinerarin;
- b) mjetin e transportit;
- c) legjislacionin e transportit apo të gjitha aktet e tjera ligjore që mund të ndikojë në përcaktimin e afatit;

- ç) çdo informacion që konsiderohet i rëndësishëm, i komunikuar nga mbajtësi i regjimit.
2. Afati kohor, i përcaktuar nga zyra doganore e nisjes do të jetë detyrues për autoritetet doganore të përfshira në operacionin e transitit dhe ky afat nuk mund të ndryshohet nga këto të fundit.

Neni 615

Itinerari për lëvizjen e mallrave nën regjimin e transitit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Mallrat e vendosura nën regjimin transitit, do të lëvizin për në zyrën doganore të destinacionit përgjatë një itinerari të justifikuar ekonomikisht.
 2. Kur zyra doganore e nisjes ose mbajtësi i regjimit e konsideron të nevojshme, kjo zyrë doganore do të përcaktojë një itinerar për lëvizjen e mallrave nën regjimin e transitit, duke marrë parasysh çdo informacion të rëndësishëm të komunikuar nga mbajtësi i regjimit.
- Kur përcaktohet itinerari, zyra doganore e pasqyron atë në sistemin elektronik të transitit.

Neni 616

Plumbosja si masë identifikuese

(Nenet 173, shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Kur mallrat do të vendosen nën regjimin e transitit, zyra doganore e nisjes plumbos si më poshtë:
 - a) hapësirën që mban mallrat, kur mjetet e transportit ose kontejneri është i pranuar nga zyra doganore e nisjes si i përshtatshëm për plumbosje.
 - b) çdo paketim individual, në raste të tjera.
2. Zyra doganore e nisjes do të regjistrojë numrin e plumbçeve dhe numrin identifikues të çdo plumbçeje në sistemin elektronik të transitit.

Neni 617

Përshtatshmëria për plumbosje

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Zyra doganore e nisjes konsideron të përshtatshëm për plumbosje, mjetet e transportit ose kontejnerët që plotësojnë kushtet e mëposhtme:
 - a) të plumbosen thjeshtë dhe në mënyrë efikase;
 - b) të jenë ndërtuar në mënyrë të tillë që kur mallrat hiqen apo vendosen, heqja ose vendosja e mallrave në fjalë lë gjurmë të dukshme, plumbçet thyhen, tregojnë shenja manipulimi, ose një sistem elektronik i mbikëqyrjes regjistron heqjen ose vendosjen;
 - c) të mos përmbajnë hapësira të fshehta ku mund të fshihen mallra;
 - ç) hapësirat e rezervuara për vendosjen e mallrave, të jenë lehtësisht të arritshme për kryerjen e kontrollit, nga autoritetet doganore.
2. Automjetet rrugore, rimorkiot, gjysmërimorkiot dhe kontejnerët e miratuar për transportin e mallrave nën plumbosje doganore në përputhje me një marrëveshje ndërkombëtare në të cilën Republika e Shqipërisë është palë, konsiderohen si të përshtatshme për plumbosje.

Neni 618

Karakteristikat e plumbçeve doganore

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Plumbçet doganore duhet të kenë së paku karakteristikat thelbësore si vijon:
 - a) të mbeten të pandryshueshme, të fiksuara në mënyrë solide, gjatë përdorimit normal;

b) të jenë lehtësisht të kontrollueshme dhe të identifikueshme;
c) të jenë prodhuar në mënyrë të tillë që çdo thyerje, manipulim apo heqje të lërë gjurmë të dukshme me sy të lirë;

ç) të jenë projektuar për një përdorim ose, nëse janë për disa përdorime, të projektohen në mënyrë të tillë që çdo rivendosje e tyre të jetë qartësisht e identifikueshme nëpërmjet një treguesi unik për çdo ripërdorim;

d) të kenë identifikim unik të përthshëm, lehtësisht të lexueshëm dhe të shfaqin tregues unik në çdo përdorim;

2. Plumbçet doganore duhet të të plotësojnë së paku specifikimet teknike si vijon:

a) forma dhe përmasat e plumbçeve mund të ndryshojnë në varësi të plumbosjes, por përmasat duhet të jenë të tilla që të garantojnë një tregues identifikimi lehtësisht të lexueshëm;

b) treguesit identifikues të plumbçeve duhet të jenë të pafalsifikueshëm dhe vështirësisht të riprodhueshëm;

c) materiali i përdorur të jetë rezistent ndaj thyerjeve aksidentale si dhe i tillë që të parandalojë falsifikimin ose ripërdorimin.

3. Plumbçet e certifikuar nga një organ kompetent në përputhje me Standardin Ndërkombëtar ISO 17712:2013 “kontejnerë për transportin e mallrave - plumbçe mekanike”, konsiderohen se janë në përputhje me kërkesat e përcaktuara në pikën 1 dhe 2.

Për transportet me kontejner, do të përdoren plumbçe me elementë të lartë të sigurisë, në masën më të gjerë të mundshme.

4. Plumbçja doganore duhet të mbajë treguesit e mëposhtëm:

a) fjalën “Dogana”;

b) kodin e shtetit shqiptar ‘AL’, në përputhje me standardet ISO-alpha-2;

c) simbolin e flamurit shqiptar (jo detyrues).

ç) Republika e Shqipërisë në marrëveshje me shtete të tjera mund të vendosë të përdorë elemente sigurie dhe teknologjie të përbashkëta.

5. Sa herë që duhet të hiqet një plumbçe me qëllim kryerjen e një kontrolli doganor, autoritetet doganore duhet të kryejnë riplumbosjen në mënyrën e duhur, me plumbçe doganore që përmbajnë të paktën elemente sigurie ekuivalente dhe të shënojnë detajet e veprimeve të kryera në dokumentacionin e ngarkesës, përfshirë edhe numrin e ri të plumbçes.

Neni 619

Masa identifikuese alternative për plumbosjen

(Nenet 173, shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

(Shtuar shkronja “c” e pikës 2 me VKM nr. 872, datë 30.12.2024)

1. Duke anashkaluar nenin 616, zyra doganore e nisjes mund të vendosë të mos plumbosë mallrat nën regjimin e transitit por të mbështetet në përshkrimin e mallrave në deklaratën e transitit apo në dokumentet plotësuese, me kusht që përshkrimi të jetë mjaftueshëm i saktë, në mënyrë që të lejojë identifikimin e mallrave lehtësisht, të përcaktojë sasinë dhe natyrën e tyre si dhe karakteristikat e veçanta sikundër numrat serial të mallrave.

2. Duke anashkaluar nenin 616, përveç se kur zyra doganore e nisjes vendos ndryshe, as mjete i transportit, dhe as paketimet individuale që përmbajnë mallra nuk do të plumbosen nëse:

a) mallrat transportohen në rrugë ajrore, dhe çdo ngarkesë i ngjiten etiketa që përmbajnë numrin e faturës shoqëruese të avionit (AWB), ose dërgesa përbën një njësi ngarkese mbi të cilën tregohet numri i faturës shoqëruese të avionit;

b) mallrat transportohen në rrugë hekurudhore dhe masat identifikuese zbatohen nga kompanitë hekurudhore.

c) mallrat transportohen në rrugë detare dhe një referencë e fletëngarkesës shoqëruese përmendet në një dokument elektronik të transportit të përdorur si deklaratë doganore për të vendosur mallrat nën regjimin e transitit, siç përmendet në shkronjën “d”, të pikës 4, të nenit 207, të Kodit.

Neni 620

Çlirimi i mallrave për regjimin e transitit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Vetëm mallrat që plumbosen në përputhje me nenin 616, ose kur respektohen masat identifikuese alternative për plumbosjen e mallrave në përputhje me nenin 619, çlirohen për regjimin e transitit.

2. Lidhur me çlirimin e mallrave për transit, zyra doganore e nisjes dërgon të dhënat e operacionit të transitit:

- a) në zyrën doganore të destinacionit të deklaruar;
- b) në çdo zyrë doganore transiti të deklaruar;

Këto të dhëna do të bazohen në informacionet e marra nga deklarata e transitit, me ndryshimet përkatëse kur është e nevojshme.

3. Zyra doganore e nisjes njofton mbajtësin e regjimit të transitit për çlirimin e mallrave për regjimin e transitit.

4. Me kërkesë të mbajtësit të regjimit, zyra doganore e nisjes duhet t’i sigurojë një dokument shoqërues transiti apo nëse është e nevojshme një dokument shoqërues transiti/sigurisë.

Dokumenti shoqërues i transitit është modeli i përcaktuar në aneksin B-02, të shtojcës A bashkëlidhur këtij vendimi dhe pjesë përbërëse e tij, dhe nëse është e nevojshme plotësohet me listën e artikujve sipas modelit të përcaktuar në aneksin B-03, të shtojcës A bashkëlidhur këtij vendimi dhe pjesë përbërëse e tij. Dokumenti shoqërues i transitit/sigurisë është modeli i përcaktuar në aneksin B-04, të shtojcës A bashkëlidhur këtij vendimi dhe pjesë përbërëse e tij, dhe nëse është e nevojshme plotësohet me listën e artikujve të modelit të përcaktuar në aneksin B-05, të shtojcës A bashkëlidhur këtij vendimi dhe pjesë përbërëse e tij.

Deri në implementimin e sistemeve të reja të informatizuara, në përputhje me nenin 286, të Kodit nuk do të përdoret DSHT (dokumenti shoqërues i transitit) dhe DSHIS (dokumenti shoqërues i transitit/sigurisë).

Nënseksioni 3

Formalitetet gjatë regjimit të transitit

Neni 621

Paraqitja e mallrave që lëvizin nën regjimin e transitit në zyrën doganore të transitit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Mallrat, së bashku me MRN e deklaratës së transitit do të paraqiten në çdo zyrë doganore transiti.

2. Në lidhje me paraqitjen e MRN të deklaratës së transitit në çdo zyrë doganore transiti, do të zbatohet shkronja “b”, e nenit 566.

3. Zyra doganore e transitit duhet të regjistrojë kalimin në kufi të mallrave për operacionin e transitit, në bazë të të dhënave të marra nga zyra doganore e nisjes. Ky kalim do të njoftohet zyrës doganore të nisjes nga zyrat doganore të transitit.

4. Kur mallrat lëvizin përmes një zyre doganore transiti të ndryshme nga ajo e deklaruar, zyra doganore aktuale e transitit do të kërkojë të dhëna për operacionin transit zyrës doganore të nisjes dhe do ta njoftojë atë për kalimin në kufi të mallrave.

5. Zyra doganore e transitit mund të kontrollojë mallrat. Çdo kontroll i mallrave bëhet bazuar

kryesisht në të dhënat e operacionit transit, të marra nga zyra doganore e nisjes.

6. Pikat 1 deri 4, nuk do të zbatohen për transportin e mallrave në rrugë hekurudhore, me kusht që zyra doganore e transimit të verifikojë kalimin në kufi të mallrave me mjete të tjera. Një verifikim i tillë do të kryhet vetëm në rast se është e nevojshme. Verifikimi mund të bëhet në retrospektive (*a-posteriori*).

Neni 622

Incidentet gjatë lëvizjes së mallrave nën një operacion transit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Transportuesi pas incidentit paraqet menjëherë pa vonesë, mallrat bashkë me MRN e deklaratës transit pranë autoritetit doganor më të afërt në territorin e të cilit ndodhen mjetet e transportit në rastet kur:

a) transportuesi është i detyruar të devijojë nga itinerari i përcaktuar në përputhje me nenin 615, për rrethana që nuk varen prej tij;

b) plumbçet janë thyer ose manipuluar për shkaqe që nuk varen prej transportuesit;

c) mallrat transferohen nga një mjet transporti në një mjet tjetër transporti, nën mbikëqyrjen e autoritetit doganor;

ç) një rrezik evident kërkon shkarkimin e menjëhershëm të plotë apo të pjesshëm të mallrave nga mjeti i plumbosur i transportit;

(d) nëse ka ndodhur një incident që mund të kushtëzojë aftësinë e mbajtësit të regjimit ose të transportuesit për të përmbushur detyrimet e tij;

(dh) nëse është ndryshuar ndonjë prej elementëve/pjesëve që përbëjnë një mjet të vetëm transporti siç përmendet në pikën 2, të nenit 613.

2. Nëse autoriteti doganor, në territorin e të cilit ndodhet mjeti i transportit, konsideron se operacioni transit në fjalë mund të vazhdojë, ndërmerr të gjitha masat që i konsideron të nevojshme.

Autoriteti doganor i lartpërmendur regjistron informacionet përkatëse në sistemin elektronik të transimit lidhur me incidentet e përmendura në pikën 1.

3. Në rast të një incidenti, siç përmendet në pikën 1, shkronja “c”, autoritetet doganore nuk kërkojnë paraqitjen e mallrave, së bashku me MRN e deklaratës transit nëse plotësohen të gjitha kushtet e mëposhtme:

a) mallrat transferohen nga një mjet transporti që nuk është i plumbosur;

b) mbajtësi i regjimit ose transportuesi për llogari të mbajtësit të regjimit siguron informacionet përkatëse lidhur me transferimin e mallrave pranë autoritetit doganor në territorin e të cilit ndodhet mjeti i transportit;

c) autoriteti i lartpërmendur regjistron informacionet përkatëse në sistemin elektronik të transimit.

4. Në rast të një incidenti, siç përmendet në pikën 1, shkronja “dh”, transportuesi mund të vazhdojë operacionin e transimit nëse një ose më shumë karroca ose vagonë hekurudhorë janë hequr nga një grup karrocash ose vagonësh hekurudhorë për shkak të problemeve teknike.

5. Në rast të një incidenti, siç përmendet në pikën 1, shkronja “dh”, nëse kabina e një mjeti rrugor zëvendësohet pa iu ndryshuar rimorkiot ose gjysmë-rimorkiot, autoriteti doganor nuk kërkon paraqitjen e mallrave dhe të MRN të deklaratës transit nëse plotësohen të gjitha kushtet e mëposhtme:

a) mbajtësi i regjimit ose transportuesi për llogari të mbajtësit të regjimit i siguron informacionin përkatës në lidhje me përbërjen e mjetit rrugor autoritetit doganor në territorin e të cilit ndodhet mjeti rrugor;

b) autoriteti i lartpërmendur regjistron informacionet përkatëse në sistemin elektronik të transimit.

6. Deri në implementimin e sistemeve të reja të informatizuara, në përputhje me nenin 286 të Kodit, në rastet e përmendura në pikën 1, transportuesi do të plotësojë deklaratën e transimit me informacionin e duhur dhe pas incidentit paraqet menjëherë pa vonesë mallrat bashkë me deklaratën e transimit pranë

autoritetit doganor më të afërt në territorin e të cilit ndodhet mjeti rrugor.

Në rastet e përmendura në pikat 3, shkronjat “a” dhe “b”, 4 dhe 5, shkronja “a” transportuesi çlirohet nga detyrimi i paraqitjes së mallrave dhe të MRN të deklaratës së transitit pranë autoritetit doganor të përmendur më lart.

Informacionet përkatëse në lidhje me incidentet gjatë operacionit të transitit do të regjistrohen në sistemin elektronik të transitit nga zyra doganore e transitit ose nga zyra doganore e destinacionit.

7. Deri në implementimin e sistemeve të reja të informatizuara, në përputhje me nenin 286, të Kodit nuk do të zbatohet paragrafi i dytë i pikës 2 të këtij neni.

Nënseksioni 4

Formalitetet në zyrën doganore të destinacionit

Neni 623

Paraqitja e mallrave të vendosura nën regjimin e transitit në zyrën doganore të destinacionit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

(Ndryshuar togfjalësh në pikën 2 me VKM nr. 872, datë 30.12.2024)

1. Kur mallrat e vendosura nën një regjim transiti mbërrijnë në zyrën doganore të destinacionit, kësaj zyre i paraqiten:

- a) mallrat;
- b) MRN e deklaratës së transitit;
- c) çdo informacion i kërkuar nga zyra doganore e destinacionit.

Paraqitja bëhet gjatë orarit zyrtar të funksionimit të zyrave doganore. Megjithatë, zyra doganore e destinacionit, me kërkesë të personit të interesuar, mund të lejojë që paraqitja e tyre të bëhet jashtë orarit zyrtar të funksionimit ose në çdo vend tjetër që konsiderohet i përshtatshëm prej tyre.

2. Paraqitja e MRN së deklaratës transit në çdo zyrë doganore të destinacionit kryhet në përputhje me nenin 566.

3. Nëse paraqitja bëhet pas përfundimit të afatit kohor të përcaktuar nga zyra doganore e nisjes në përputhje me pikën 1, të nenit 614, mbajtësi i regjimit konsiderohet se ka respektuar afatin kohor kur ai vetë ose transportuesi është në gjendje t'i provojë në mënyrë bindëse zyrës doganore të destinacionit, që vonesa nuk është për faj të tij.

4. Regjimi i transitit mund të mbyllet në një zyrë doganore të ndryshme nga ajo e deklaruar në deklaratën transit. Në këtë rast, zyra doganore e lartpërmendur konsiderohet zyra doganore e destinacionit.

5. Me kërkesë të personit që paraqet mallrat në zyrën doganore të destinacionit, kjo zyrë doganore lëshon vërtetim të nënshkruar dhe vulosur që konfirmon paraqitjen e mallrave në këtë zyrë doganore dhe i referohet MRN të deklaratës transit.

Vërtetimi përgatitet duke përdorur formularin sipas aneksit 72-03, të shtojcës B bashkëlidhur këtij vendimi dhe pjesë përbërëse e tij, dhe plotësohet paraprakisht nga personi i interesuar.

Vërtetimi nuk mund të përdoret si provë alternative e mbylljes së regjimit të transitit në përputhje me nenin 629.

Neni 624

Njoftimi i mbërritjes së mallrave nën regjimin e transitit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Zyra doganore e destinacionit njofton zyrën doganore të nisjes për mbërritjen e mallrave në ditën kur mallrat dhe MRN e deklaratës transit paraqiten në përputhje me pikën 1, të nenit 623.

2. Në rast se regjimi i transitit përfundon në një zyrë doganore të ndryshme nga ajo e deklaruar në

deklaratën transit, zyra doganore e konsideruar si zyra doganore e destinacionit në përputhje me pikën 4, të nenit 623, i njofton mbërritjen zyrës doganore të nisjes në ditën kur mallrat dhe MRN e deklaratës transit paraqiten në përputhje me pikën 1, të nenit 623.

Zyra doganore e nisjes i njofton mbërritjen zyrës doganore të destinacionit të deklaruar në deklaratën transit.

Neni 625

Kontrollet dhe dhënia e provës alternative

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

(Ndryshuar togfjalësh në pikën 2 me VKM nr. 872, datë 30.12.2024)

1. Kur regjimi i transimit mbyllet, zyra doganore e destinacionit bën kontrollet doganore në bazë të të dhënave të operacionit të transimit të marra nga zyra doganore e nisjes.

2. Nëse pas përfundimit të regjimit të transimit, nuk janë konstatuar parregullsi nga zyra doganore e destinacionit, dhe mbajtësi i regjimit paraqet një dokument shoqërues transiti ose një dokument shoqërues transiti/sigurie, kjo zyrë nënshkruan dhe vulos dokumentin e lartpërmendur me kërkesë të mbajtësit të regjimit me qëllim që të japë një provë alternative në përputhje me nenin 629. Vërtetimi përmban vulën e zyrës së lartpërmendur doganore, nënshkrimin e nëpunësit, datën dhe shënimin e mëposhtëm:

‘Provë alternative — 99202’.

Neni 626

Dërgimi i rezultateve të kontrollit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Zyra doganore e destinacionit i njofton rezultatet e kontrollit zyrës doganore të nisjes brenda tre ditësh nga e nesërmja e ditës kur mallrat paraqiten në zyrën doganore të destinacionit ose në një vend tjetër në përputhje me pikën 1, të nenit 623. Në raste të jashtëzakonshme, ky afat kohor mund të zgjatet deri në një maksimum prej gjashtë ditësh.

2. Duke anashkaluar pikën 1, nëse mallrat merren nga një pritës i autorizuar sipas shkronjës “b”, të pikës 4, të nenit 207, të Kodit, zyra doganore e nisjes njoftohet brenda gjashtë ditësh pas ditës kur mallrat i janë dorëzuar pritësit të autorizuar.

Në rast se mallrat transportohen me tren dhe një ose më shumë karroca apo vagonë tërhiqen nga një grup karrocash ose vagonësh treni për shkak të problemeve teknike, siç parashikohet nga pika 4, e nenit 622, zyra doganore e nisjes njoftohet maksimumi brenda 12 ditësh pas ditës në të cilën pjesa e parë e mallrave është paraqitur.

3. Deri në implementimin e sistemeve të reja të informatizuara të sistemit elektronik të transimit në përputhje me pikën 1, të nenit 17, dhe nga neni 203, deri në 209, të Kodit, nuk do të aplikohet paragrafi i dytë i pikës 2, të këtij neni.

Nënseksioni 5

Procedura hetimore dhe vjelja e borxhit doganor

Neni 627

Procedura hetimore për mallrat që lëvizin nën regjimin e transimit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)

1. Kur zyra doganore e nisjes nuk ka marrë rezultatin e kontrollit brenda 6 ditëve në përputhje me pikën 1, të nenit 626, ose paragrafin e parë të pikës 2, të nenit 626 ose brenda 12 ditësh në përputhje me

paragrafin e dytë të pikës 2, të nenit 626, pas marrjes së njoftimit të mbërritjes së mallrave, kjo zyre doganore do të kërkojë menjëherë rezultatet e kontrollit nga zyra doganore e destinacionit që dërgoi njoftimin e mbërritjes së mallrave.

Zyra doganore e destinacionit do të dërgojë rezultatet e kontrollit menjëherë pas marrjes së kërkesës nga zyra doganore e nisjes.

2. Kur autoritetet doganore të nisjes nuk kanë marrë ende informacionin që lejon mbylljen e regjimit të transitit ose të dhëna për vjeljen e borxhit doganor, ato do ti kërkojnë informacionin përkatës mbajtësit të regjimit ose, kur në vendin e destinacionit janë të disponueshme të dhëna të mjaftueshme, zyrës doganore të destinacionit, në rastet e mëposhtme:

a) Zyra doganore e nisjes nuk ka marrë njoftimin e mbërritjes së mallrave deri në përfundimin e afatit të përcaktuar për paraqitjen e mallrave në përputhje me nenin 614,

b) Zyra doganore e nisjes nuk ka marrë rezultatet e kontrollit të kërkuara në përputhje me pikën 1;

c) Zyra doganore e nisjes konstaton se njoftimi i mbërritjes së mallrave ose rezultatet e kontrollit janë dërguar gabimisht.

3. Autoritetet doganore të nisjes do të dërgojnë kërkesë për informacion në përputhje me pikën 2, shkronja “a”, brenda një afati prej 7 ditësh pas përfundimit të afatit kohor të përmendur më lart dhe kërkesë për informacion në përputhje me pikën 2, shkronja “b”, brenda një afati prej 7 ditësh pas skadimit të afatit të zbatueshëm të referuar në pikën 1.

Megjithatë, nëse para përfundimit të këtyre afateve kohore, autoritetet doganore të nisjes marrin informacion se regjimi transit nuk është mbyllur në mënyrë të rregullt, ose dyshojnë për një rast të tillë, ato do të dërgojnë kërkesën për informacion pa vonesë.

4. Përgjigjet për kërkesat e bëra në përputhje me pikën 2 duhet të dërgohen brenda 28 ditëve nga data në të cilën dërguar kërkesa.

5. Kur, pas një kërkesë në përputhje me pikën 2, zyra doganore e destinacionit nuk ka dhënë informacion të mjaftueshëm për mbylljen e regjimit të transitit, autoritetet doganore të nisjes do t’ia kërkojnë këtë informacion mbajtësit të regjimit, jo më vonë se 35 ditë pas fillimit të procedurës hetimore.

Megjithatë, deri në implementimin e sistemit të informatizuar të NCTS sipas Planit të Punës të miratuar nga ministri përgjegjës për financat, autoritetet doganore do të kërkojnë nga mbajtësi i regjimit të sigurojë informacion, jo më vonë se 28 ditë pas fillimit të procedurës hetimore.

Mbajtësi i regjimit do ti përgjigjet kësaj kërkesë brenda 28 ditëve nga data në të cilën është dërguar.

6. Nëse informacionet e dhëna në një përgjigje nga mbajtësi i regjimit në përputhje me pikën 5, nuk janë të mjaftueshme për mbylljen e regjimit transit, por autoriteti doganor i nisjes konsideron se janë të mjaftueshme në mënyrë që të vazhdojë procedurën hetimore, ky autoritet do t’i dërgojë menjëherë një kërkesë për informacion plotësues zyrës doganore të përfshirë.

Kjo zyre doganore do t’i përgjigjet kërkesës brenda 40 ditëve nga data në të cilën ajo është dërguar.

7. Kur gjatë një procedure hetimore të përcaktuar në pikat nga 1 deri 6 është vendosur se regjimi transit është mbyllur në mënyrë korrekte, autoriteti doganor i nisjes mbyll regjimin e transitit dhe menjëherë do të informojë mbajtësin e regjimit dhe, sipas nevojës, çdo autoritet doganor që mund të ketë nisur një procedurë vjelje.

8. Kur gjatë një procedure hetimore të përcaktuar në pikat nga 1 deri 6 është vendosur se regjimi transit nuk mund të mbyllet, autoriteti doganor i nisjes do të vendosë nëse ka lindur një borxh doganor.

Nëse ka lindur një borxh doganor, autoriteti doganor i nisjes do të marrë masat si më poshtë:

a) identifikon debitorin;

b) përcakton autoritetin doganor përgjegjës për njoftimin e borxhit doganor në përputhje me pikën

1, të nenit 96, të Kodit.

Neni 628

Kërkesa për të transferuar vjeljen e borxhit doganor

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)
(Shtuar pikat 3 dhe 4 me VKM nr. 872, datë 30.12.2024)

1. Kur autoriteti doganor i nisjes, gjatë procedurës hetimore, dhe para përfundimit të afatit të referuar në shkronjën “a”, të nenit 175, merr prova se vendi ku ngjarjet nga të cilat ka lindur borxhi doganor, është në një zyrë doganore tjetër, ai autoritet menjëherë dhe në çdo rast brenda këtij afati kohor ia dërgon të gjithë informacionin në dispozicion autoritetit doganor kompetent në atë vend.

2. Autoriteti doganor kompetent në atë vend do të pranojë marrjen e njoftimit dhe informon autoritetin doganor të nisjes nëse është përgjegjës për vjeljen. Nëse autoriteti doganor i nisjes e merr informacionin brenda 28 ditëve, vazhdon menjëherë procedurat hetimore ose fillon vjeljen.

3. Kur autoriteti doganor i përfshirë në një operacion transiti siguron prova përpara se të përfundojë afati kohor, i përmendur në shkronjën “a”, të nenit 175, se vendi nga ku ka lindur borxhi doganor ka ndodhur në një zyrë tjetër doganore, ky autoritet, menjëherë dhe në çdo rast brenda këtij afati kohor, i paraqet një kërkesë të argumentuar saktë autoritetit doganor të nisjes për t’i transferuar përgjegjësinë autoritetit doganor kërkues për të filluar rikuperimin.

4. Autoriteti kompetent doganor i nisjes konfirmon marrjen e kërkesës së bërë, në përputhje me pikën 3, dhe informon autoritetin doganor kërkues, brenda 28 (njëzet e tetë) ditëve nga data në të cilën është dërguar kërkesa, nëse pranon të plotësojë kërkesën dhe t’i transferojë autoritetit kërkues përgjegjësinë për të filluar rikuperimin.

Neni 629

Prova alternative për të mbyllur regjimin e transitit

(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)
(Ndryshuar togfjalësh në pikën 3 me VKM nr. 872, datë 30.12.2024)

1. Regjimi i transitit konsiderohet i mbyllur në mënyrë korrekte kur mbajtësi i regjimit, në bindje të autoritetit doganor të nisjes, paraqet një nga dokumentet e mëposhtme për identifikimin e mallrave:

a) një dokument të vërtetuar nga autoriteti doganor i destinacionit që identifikon mallrat dhe vërteton se mallrat janë paraqitur në zyrën doganore të destinacionit, ose janë dërguar pranë një pritësi të autorizuar, siç referohet në shkronjën “b”, të pikës 4, të nenit 207, të Kodit;

b) një dokument ose një regjistrim doganor, i vërtetuar nga autoriteti doganor, i cili përcakton se mallrat kanë lënë fizikisht territorin doganor të Republikës së Shqipërisë;

c) një dokument doganor të lëshuar nga një vend tjetër ku mallrat janë vendosur nën një regjim doganor, ç) një dokument të lëshuar në një vend tjetër, të vulosur ose të vërtetuar në një mënyrë tjetër nga autoriteti doganor i atij vendi dhe që vërteton se mallrat konsiderohen të jenë në qarkullim të lirë në atë vend.

2. Në vend të dokumenteve të përmendura në pikën 1, mund të paraqiten si provë kopjet e vërtetuara si kopje të njehsuara me origjinalin nga organi që vërteton dokumentet origjinale nga autoriteti i vendit tjetër në fjalë.

3. Njoftimi i mbërritjes së mallrave, siç referohet në nenin 624, nuk do të konsiderohet provë që regjimi i transitit është mbyllur në mënyrë korrekte.

Nënseksioni 5

Mallrat e transportuara me instalime fikse transporti

Neni 630

Transporti me instalime fikse transporti dhe funksionimi i regjimit të transitit
(Shkronja “a” e pikës 3, të nenit 203, dhe shkronja “a” e pikës 2, të nenit 204, të Kodit)
(Ndryshuar pika 5, shtuar pika 6 me VKM nr. 872, datë 30.12.2024)

1. Në rastin kur mallrat e transportuara me një instalim fiks transporti, hyjnë në territorin doganor të Republikës së Shqipërisë, nëpërmjet strukturës së lartpërmendur, këto mallra konsiderohen të vendosura nën regjimin e transitit në momentin e hyrjes në këtë territor.

2. Në rastin kur mallrat gjenden tashmë në territorin doganor të Republikës së Shqipërisë dhe janë transportuar me një instalim fiks transporti, këto mallra konsiderohen të vendosura nën regjimin e transitit në momentin e futjes në instalimin fiks të transportit.

3. Për qëllime të regjimit të transitit, në rast se mallrat janë transportuar me instalim fiks transporti, mbajtësi i regjimit është operatori i instalimit fiks të transportit, i vendosur në Republikën e Shqipërisë, nëpërmjet të cilit mallrat hyjnë në këtë territor, në rastin e përmendur në pikën 1, ose operatori i instalimit fiks të transportit në vendin në të cilën lëvizja fillon, në rastin e përmendur në pikën 2.

Mbajtësi i regjimit dhe autoritetet doganore bien dakord mbi mënyrën e mbikëqyrjes doganore për mallrat e transportuara.

4. Për qëllime të pikës 3, të nenit 207, të Kodit, transportues konsiderohet operatori i instalimit fiks të transportit, i vendosur në Republikën e Shqipërisë, përmes territorit të së cilës mallrat qarkullojnë me instalim fiks transporti.

5. Regjimi i transitit konsiderohet i përfunduar kur:

- a) është bërë hyrja e duhur në regjistrat tregtarë të pritësit; ose
- b) operatori i instalimeve fikse të transportit ka certifikuar se mallrat e transportuara me instalime fikse të transportit:
 - i. kanë mbërritur tek impianti i pritësit;
 - ii. janë pranuar në rrjetin e shpërndarjes së pritësit; ose
 - iii. kanë dalë nga territori doganor i Republikës së Shqipërisë.

6. Mallrat joshqiptare konsiderohen në magazinim të përkohshëm nga momenti kur përfundon regjimi i transitit, në përputhje me shkronjën “a” ose me shkronjën “b”, nënndarjen “i” ose “ii” të pikës 5.

KREU 3

Magazinimi doganor

Seksioni 1

Magazinimi doganor dhe tipet e magazinave

Neni 631

Shitja me pakicë

(Shkronja “b”, e pikës 1, të nenit 192, të Kodit)

Autorizimi për përdorimin e ambienteve për magazinim doganor të mallrave jepet me kusht që ambientet e magazinimit të mos përdoren për shitje me pakicë, përveç rasteve kur mallrat janë shitur me pakicë në ndonjë nga situatat e mëposhtme:

- a) Me përjashtim nga detyrimi i importit për udhëtarët që shkojnë ose kthehen nga vende ose territore jashtë territorit doganor të Republikës së Shqipërisë;
- b) Me përjashtim nga detyrimi i importit për anëtarët e organizatave ndërkombëtare;
- c) Me përjashtim nga detyrimi i importit për forcat e NATO;
- ç) Me përjashtim nga detyrimi i importit sipas marrëveshjeve diplomatike apo konsullore;

d) Në distancë, përfshirë edhe përmes internetit.

Neni 632

Ambientet e magazinimit të pajisura posaçërisht

(Shkronja “b”, e pikës 1, të nenit 192, të Kodit)

Kur mallrat paraqesin rrezik ose ka mundësi të dëmtojnë mallrat e tjera apo kërkojnë kushte të veçanta për arsye të tjera, në autorizimet për funksionimin e ambienteve për magazinim doganor të mallrave mund të specifikohet se mallrat mund të magazinohen vetëm në ambientet e magazinimit, të pajisura posaçërisht për mbajtjen e tyre.

Neni 633

Tipet e magazinave

(Shkronja “b”, e pikës 1, të nenit 192, të Kodit)

Në autorizimet për funksionimin e ambienteve për magazinimin doganor të mallrave duhet të përcaktohet se cili nga tipet e mëposhtme të magazinave doganore duhet të përdoret nën secilin autorizim:

- a) magazinë doganore publike e tipit I;
- b) magazinë doganore publike e tipit II;
- c) magazinë doganore private.

Seksioni 2

Magazinat doganore private-dyqane të çliuara nga detyrimet (duty free shop)

Neni 634

Kushtet e përgjithshme për pajisjen me autorizim

(Nenit 192, pika 1, shkronja “b”, 28 dhe 213, pika 2, të Kodit)

1. Pa rënë ndesh me dispozitat e këtij seksioni, dispozitat lidhur me regjimin e magazinimit doganor, të referuara në këtë vendim zbatohen edhe për qëllime të këtij seksioni.

2. Çdo person i vendosur në Republikën e Shqipërisë mund të aplikojë për marrjen e një autorizimi për dyqan *duty free shop*, me kusht që të përmbushë kushtet si dhe detyrimet e përcaktuara në këtë vendim dhe në legjislacionin në fuqi.

3. Përfitimi i autorizimit për dyqan *duty free shop* kushtëzohet nga:

a) garantimi i detyrimeve dhe pagesave të tjera, përmes një garancie bankare, jo më të vogël se 5 000 000 (pesë milionë) lekë.

b) përdorimi nga mbajtësi i autorizimit i sistemeve kompjuterike të përpunimit të të dhënave për paraqitjen e deklarimeve dhe njoftimeve doganore elektronike në sistemin informatik të doganës apo në sisteme specifike të krijuara për këtë qëllim, duke zbatuar dispozitat përkatëse lidhur me këto teknika apo sisteme.

c) përdorimi i sistemeve të monitorimit me videokamera. Mbajtësi i autorizimit *duty free shop*, për qëllime mbikëqyrjeje dhe kontrolli nga autoritetet doganore është i detyruar që më shpenzimet e tij të bëjë instalimin, vendosjen, mirëmbajtjen, furnizimin me energji të pandërprerë etj. të sistemeve mbikëqyrëse me videokamera dhe të sigurojë transmetimin *online* dhe ruajtjen e pacenuar të imazheve të regjistruara nga sistemet mbikëqyrëse me videokamera. Sistemi i videokamerave duhet të mundësojë kontrollin e perimetrit të jashtëm të magazinave *duty free shop*, si dhe ambientet e brendshme të tyre. Mbajtësi i autorizimit siguron të gjitha pajisjet e nevojshme për autoritetet doganore, shikueshmërinë

online të imazheve dhe ruajtjen e imazheve për një periudhë të paktën prej tre muajsh. Në rast se ka filluar procedura hetimore/gjyqësore, këto imazhe ruhen deri në përfundim të procesit hetimor dhe/ose gjyqësor. Drejtoria e Përgjithshme e Doganave përcakton këndet e pozicionimit të kamerave në këto ambiente;

ç) përdorimi i sistemit të skanimit të inventarit si në hyrje dhe në dalje;

d) përdorimi i sistemit të skanimit të *Bording pass* dhe “Pasaportës”, të pasagjerëve/blerës që udhëtojnë nga ajri apo deti, për *duty free shop* që kërkohet të hapen në aeroportet për fluturime ndërkombëtare dhe portet për destinacionet ndërkombëtare.

4. Mbajtësi i autorizimit duhet të përmbushë në vazhdimësi kushtet dhe kriteret e përcaktuara, pa cenuar detyrimet dhe rregullat mbi lindjen e një borxhi doganor.

5. Mbajtësi i autorizimit duhet të përmbushë të gjitha kushtet dhe rregullat e përcaktuara në autorizim në lidhje me kontrollin doganor, çlirimin e mallrave, regjistrat e magazinimit të mallrave dhe dispozita të tjera relevante. Në rast se nuk përmbushen të gjitha këto kushte, kjo gjë sjell revokimin e menjëhershëm të autorizimit dhe për të gjitha mallrat e ruajtura në këtë magazinë duhet t’u caktohet menjëherë një destinacion doganor.

6. Mbajtësi i autorizimit duhet të informojë ministrin përgjegjës për financat dhe Drejtorinë e Përgjithshme të Doganave për të gjithë faktorët e dalë pas dhënies së autorizimit të cilët mund të ndikojnë në vazhdimësinë apo përmbajtjen e tij.

7. Mbajtësi i autorizimit duhet të plotësojë të gjitha kushtet e punës për autoritetet doganore kur ata vijnë për kontroll, pa asnjë shpenzim nga këto të fundit. Ambientet e punës të ofruara autoriteteve doganore duhet të plotësojnë standardet e përcaktuara nga Drejtoria e Përgjithshme e Doganave.

Neni 635

Aplikimi

(Pika 1, e nenit 27, të Kodit)

1. Aplikuesi për të përfituar autorizimin për magazinë doganore private (*duty free shop*), paraqet aplikimin pranë Zyrës Doganore kufitare, ku mendohet të vendoset/të hapet dyqani i çliruar nga detyrimet” (*duty free shop*).

2. Aplikimi bëhet me shkrim sipas aneksit 13, të shtojcës A bashkëlidhur këtij vendimi dhe pjesë përbërëse e tij, që i bashkëlidhet këtij vendimi dhe është pjesë përbërëse e tij.

3. Aplikimi duhet të shoqërohet me dokumentet e mëposhtme (në formë shkresore dhe elektronike “CD”):

a) Ekstraktin e Qendrës Kombëtare të Regjistrimit i cili vërteton gjendjen e shoqërisë dhe statusin e saj, i cili duhet të jetë aktiv;

b) Dokumentet e pronësisë ose kontratës së qirasë për ambientin/godinën që do të përdoret për këtë qëllim;

c) Vërtetim nga Ministria e Drejtësisë, që nuk është dënuar penalisht për vepra penale që lidhen me aktivitetin ekonomik të aplikuesit ndonjë nga personat e mëposhtëm:

i. Aplikuesi;

ii. Aksionerët e shoqërisë në rast se operatori ekonomik aplikues, është një shoqëri aksionare;

iii. Personi përgjegjës në shoqërinë aplikuese për çështjet doganore,

iv. Personeli që do të operojë në magazinë / dyqanin *duty free* (përgjegjësi, shitësi /t, mirëmbajtësi/t etj.);

ç) Vërtetim nga Drejtoria e Përgjithshme e Tatimeve që shoqëria (Operatori ekonomik aplikues), administratori dhe aksionarët e shoqërisë (në rast se operatori ekonomik aplikues është një shoqëri aksionare), nuk kanë detyrime tatimore të papaguara dhe nuk kanë kryer shkelje në fushën e tatimeve për një periudhë trevjeçare nga data e lëshimit të vërtetimit;

d) Vërtetim nga Drejtoria e Përgjithshme e Doganave që shoqëria (Operatori ekonomik aplikues), administratori dhe aksionarët e shoqërisë (në rast se operatori ekonomik aplikues është një shoqëri aksionare) nuk kanë detyrime doganore të papaguara dhe nuk kanë kryer shkelje në fushën doganore dhe të akcizës për një periudhë trevjeçare nga data e lëshimit të vërtetimit;

dh) Planbiznesin, ku argumentohet qarkullimi vjetor i parashikuar, si dhe numri/lista e mallrave, që do të tregtohen;

e) Planin e organizimit të punës dhe listën e personelit që do të operojë në magazinë/dyqanin *duty free*, që do të ndjekë zbatimin e këtij plani. Listës duhet t'i bashkëlidhet kopje e letërnjoftimeve të personelit;

ë) Planin e menaxhimit të fluksit të udhëtarëve dhe masat që parashikohen për të garantuar pengimin e rifutjes në territorin doganor të Republikës së Shqipërisë të udhëtarëve që mbartin mallra të blera në dyqanin *duty free shop*;

f) Të dhëna mbi sistemin e skanimit të inventarit si në hyrje dhe në dalje;

g) Të dhëna mbi sistemin e skanimit të *Bording pass* dhe "Pasaportave" të pasagjerëve/blerës që udhëtojnë nga ajri apo deti;

gj) Genplani/planvendosje të dyqanit dhe vendit të magazinimit, kushteve të ruajtjes së sigurisë së mallrave në këto mjedise, mundësinë e mbikëqyrjes nga autoriteti doganor dhe zyra /ambienti që i ofrohet këtij të fundit në rast nevojë;

h) Garanci bankare për llogari të Drejtorisë së Përgjithshme të Doganave në shumën 5 000 000 (pesë milionë) lekë;

i) Të gjithë projektet/planet kur ambienti /godina nuk janë ekzistuese, të cilat sigurojnë plotësimin e të gjitha kërkesave, kushteve dhe kriterëve të përcaktuara në këtë kre.

4. Aplikimi duhet t'i referohet dokumenteve shoqëruese, të cilat duhet të jenë në origjinal apo kopje të noterizuara të origjinalit, si prova mbështetëse apo dokumente që kane lidhje me hollësitë e dhëna në aplikim, paraqitja e të cilave nevojitet për vlerësimin e aplikimit dhe të plotësimit të kushteve e të kriterëve.

5. Aplikimi shoqërohet nga dokumente shtesë në të cilat jepet informacion provues mbi plotësimin e kushteve dhe kërkesave të përcaktuara në këtë vendim. Të gjitha këto dokumente, prova apo fletë shtesë konsiderohen pjesë përbërëse e aplikimit që ato shoqërojnë. Në aplikim shënohet edhe numri i anekseve.

Neni 636

Procedurat përpara dhënies së autorizimit

(Neni 27, pika 1, dhe 213 të Kodit)

1. Zyra doganore, me marrjen e aplikimit përmes sektorit që administron regjimet doganore, verifikon informacionin e paraqitur. Kur konstatohet se aplikimi nuk përmban të gjitha të dhënat/dokumentet/informacionet e kërkuara, zyra doganore, brenda 30 ditëve nga data e marrjes së aplikimit i kërkon aplikuesit (operatorit ekonomik) të plotësojë të dhënat /dokumentet /informacionet e duhura, duke i dhënë edhe arsyet e kësaj kërke. Personi i interesuar duhet të plotësojë informacionin brenda 15 ditësh nga data e marrjes së kësaj kërke, në të kundërt aplikimi konsiderohet i refuzuar dhe personi i interesuar mundet të aplikojë si për herë të parë.

2. Zyra doganore, brenda 30 ditësh nga data e konstatimit se plotësohen të gjitha kushtet dhe dokumentacioni/ informacionet e sipër-përmendura procedon me:

a) verifikimin në vend (kur ambienti/godina janë ekzistuese) të vendndodhjes/ambienteve të dyqanit.

Vendndodhja e dyqanit duhet të sigurojë hapësira të mjaftueshme të lëvizjes në dalje nga territori doganor i Republikës së Shqipërisë dhe duhet të jetë mbas mjediseve të kryerjes së veprimeve me policinë

dhe doganën; Korsia e rrugës drejt *duty free shop* duhet të jetë e ndarë në mënyrë të tillë që të mos lejojë aksesin drejt saj të udhëtarëve që hyjnë në territorin e Republikës së Shqipërisë;

b) analizimin e nevojave në bazë të fluksit të udhëtarëve;

c) kushtet e ruajtjes së sigurisë së mallrave në këto ambiente, numrin e dyerve dhe mundësinë e plumbosjes, mbylljen e dritareve etj., (kur ambienti /godina janë ekzistuese) dhe përshtatshmërinë e vendosjes dhe projektit në rastin kur ambienti/godina do të ndërtohet e re;

ç) mundësinë e monitorimit, mbikëqyrjes, kontrollit, inventarizimit të mallrave etj. nga autoritetet doganore;

d) verifikimin e vërtetësisë (kur gjykohet e arsyeshme) e të gjithë dokumentacionit të paraqitur nga operatori ekonomik;

dh) verifikimin e plotësimit të kushtëzimeve të përgjithshme sipas përcaktimeve të neneve 634 dhe 635.

3. Kur konstatohen mosvërtetësi të dokumentacionit të paraqitur nga operatori ekonomik, aplikimi refuzohet dhe zyra doganore duhet të ndërmarrë të gjithë hapat e përcaktuar në legjislacionin në fuqi, përfshirë këtu edhe kallëzimin penal, kur është rasti.

4. Kur zyra doganore konstaton parregullsi, i kërkon aplikuesit që të plotësojë apo të rregullojë situatën duke marrë masat e duhura brenda një periudhe kohore prej 15 ditësh. Zyra doganore, në varësi të rrethanave dhe specifikave të ambientit për qëllime mbikëqyrjeje dhe kontrolli, mund të kërkojë dokumentacion shtesë apo të vendosë kushte të tjera përtej atyre të përcaktuara në këtë vendim.

5. Brenda 15 ditësh nga përfundimi i procesit të verifikimit apo përfundimi i afatit për rregullimin e situatës, zyra doganore e përcjell të gjithë dokumentacionin në Drejtorinë e Përgjithshme të Doganave, së bashku me një relacion ku sqarohet në mënyrë të detajuar e gjithë procedura e ndjekur deri në këtë moment, përfundimin e verifikimeve të kryera, opinionin e zyrës doganore lidhur me mundësinë e monitorimit, mbikëqyrjes, kontrollit etj. në rast të dhënies së autorizimit, plotësimit ose jo të masave shtesë të kërkuara aplikuesit etj.

6. Brenda 60 ditëve nga data e dorëzimit të dokumentacionit nga zyra doganore, Drejtoria e Përgjithshme e Doganave shqyrton dokumentacionin e ardhur. Në shqyrtimin e dokumentacionit përfshihet edhe vizita dhe mbikëqyrja/testimi në vend se si parashikohet të funksionojë dyqani *duty free shop* sipas aplikimit të propozuar nga aplikuesi (kur ambienti/godina janë ekzistuese).

7. Kur konstatohen parregullsi, pamundësi mbikëqyrjeje/kontroll ose gjenden me vend rekomandimet e zyrës doganore lidhur me kushtet apo kërkesat e paplotësuara nga aplikuesi, aplikimi refuzohet dhe i gjithë dokumentacioni i kthehet zyrës doganore që e ka dërguar në mënyrë që kjo e fundit t'ia komunikojë aplikuesit.

Aplikuesi, brenda 30 ditësh nga data e marrjes së njoftimit, ka të drejtë t'i drejtohet ministrit përgjegjës për financat me një ankim të arsyetuar lidhur me këtë refuzim duke paraqitur të gjithë dokumentacionin e duhur që e mbështet atë, përfshirë edhe provat nëse i ka plotësuar apo jo masat shtesë të kërkuara nga autoritetet doganore.

8. Kur konstatohet se aplikimi është i rregullt dhe në përputhje me kushtet dhe kërkesat e këtij vendimi si dhe legjislacionin doganor në fuqi si dhe konkludohet mbi mundësinë për mbikëqyrje dhe kontroll të magazinës doganore private (*duty free shop*), Drejtoria e Përgjithshme e Doganave e përcjell të gjithë dokumentacionin pranë Ministrisë përgjegjës për financat, së bashku me një opinion të sajën lidhur me plotësimin e kushteve, kriterëve, kërkesave nga ana e aplikuesit.

Neni 637

Dhënia e autorizimit

(Neni 27, pika 1, dhe 213 të Kodit)

1. Ministri përgjegjës për financat, brenda 60 ditësh nga data e depozitimit të ankimit sipas

përcaktimit të pikës 7, të nenit 636, apo dorëzimit të dokumentacionit sipas përcaktimit të pikës 8, të nenit 636, në Ministrinë përgjegjëse për financat, miraton ose jo autorizimin, duke njoftuar aplikuesin dhe Drejtorinë e Përgjithshme të Doganave.

2. Në rastin e mosmiratimit të autorizimit, ministri përgjegjës për financat shpjegon arsyet e refuzimit si dhe të drejtën e ankimit në gjykatën administrative kompetente.

3. Brenda 10 ditësh nga data e marrjes së njoftimit për dhënien e autorizimit Drejtoria e Përgjithshme e Doganave kryen aktivizimin në sistemin kompjuterik të fillimit të funksionimit të dyqanit *duty free shop*.

4. Në rastet kur kemi të bëjmë me ambiente/godina joekzistuese, pra aplikuesi ka paraqitur vetëm projekte të ambienteve/godinës dhe sistemeve e të mënyrës së menaxhimit të fluksit të udhëtarëve apo të skanimit të inventarit në hyrje/dalje si dhe *bording pass* apo “pasaportave” në aeroporte dhe porte, autorizimi jepet jodefinitiv (provizor) dhe nuk aktivizohet, por thjesht shërben si dokument mbështetës për aplikuesin për të marrë lejet e nevojshme për realizimin e projektit.

5. Me përfundimin e projektit, aplikuesi informon për këtë zyrën doganore ku është bërë aplikimi, duke paraqitur të gjithë dokumentacionin e përcaktuar në nenin 635, të rifreskuar dhe që nga ky moment fillojnë të ndiqen të gjithë hapat dhe afatet e përcaktuara në nenin 636. Ministri përgjegjës për financat, shprehet për miratimin definitiv të këtij autorizimi dhe njofton për këtë qëllim aplikuesin dhe Drejtorinë e Përgjithshme të Doganave. Aktivizimi i autorizimit bëhet sipas pikës 3, të këtij neni, kur është rasti.

Neni 638

Afati dhe numri i autorizimeve

(Neni 27, pika 1, dhe 213 të Kodit)

(Ndryshuar fjalia e dytë e pikës 2 me VKM nr. 872, datë 30.12.2024)

1. Për qëllime sigurie, mbikëqyrjeje dhe kontrolli, magazinat doganore private (*duty free shop*), do të lejohen:

a) në aeroportet për fluturime ndërkombëtare, maksimumi 2 (dy) *duty free shop*;

b) në portin e Durrësit për destinacionet ndërkombëtare brenda zonës, 1 (një) *duty free shop*;

2. Autorizimi për magazinat doganore private (*duty free shop*) është i vlefshëm për 5 vjet, me të drejtë rinovimi. Jo më vonë se 60 (gjashtëdhjetë) ditë përpara përfundimit të afatit 5-vjeçar, drejtori i Përgjithshëm i Doganave, pasi merr relacionin përkatës të Zyrës Doganore Mbikëqyrëse të Autorizimit, informon ministrin përgjegjës për financat në lidhje me argumentet për rinovimin ose jo të autorizimit, të shoqëruar me relacion për plotësimin ose jo nga ana e aplikuesit të kushteve, kritereve dhe kërkesave të Kodit Doganor dhe të këtij vendimi. Nëse ministri përgjegjës për financat nuk njofton mbajtësin e autorizimit, atëherë rinovimi konsiderohet i mirëqenë.

3. Në përfundim të afatit të autorizimit dhe nëse autorizimi nuk rinovohet, të gjitha mallrave në dyqanet *duty free shop* duhet t’u jetë dhënë një destinacion.

Neni 639

Përgjegjësitë e mbajtësit të autorizimit për magazinë “duty free shop”

(Nenet 28 dhe 213 të Kodit)

Operatori ekonomik që autorizohet për magazinë doganore të tipit (*duty free shop*) ka këto përgjegjësi:

a) Përgjigjet për mallrat e magazinuara në ambientet e autorizuar si “duty free shop”.

b) Merr aprovimin paraprak nga autoritetet doganore për çdo ndryshim strukturor në ambientet e autorizuar si “duty free shop”.

c) Merr masat për sigurinë e mjediseve të “duty free shop”.

- ç) Siguron që të gjitha hyrje/daljet në dhe nga “duty free shop” të jenë të sigurta.
- d) Vepron në përputhje me përcaktimet e legjislacionit doganor apo tatimor lidhur me regjimin e magazinës doganore dhe/ose regjime apo procedura të tjera të nevojshme sipas rastit si dhe zbaton gjithashtu rregullat e kushtet e tjera të vendosura prej autoriteteve doganore për qëllime mbikëqyrjeje dhe kontrolli.
- dh) Mirëmban dhe përditëson të dhënat e inventarit dhe i vë ato në dispozicion të autoriteteve doganore sa herë që kërkohen për qëllime mbikëqyrjeje dhe kontrolli.
- e) Informon zyrtarisht me shkrim, pa vonesë, zyrën doganore mbikëqyrëse, nëse konstaton mospërputhje mes stokut faktik në magazinën “duty free shop” dhe stokut sipas sistemit të skanimit të inventarit (elektronik) të kësaj magazine.

Neni 640
Pezullimi i autorizimit
(Nenet 28 dhe 213 të Kodit)

1. Një autorizim për dyqan “duty free shop” pezullohet nga ministri përgjegjës për financat kur:
nga Ministria përgjegjëse për financat apo autoritetet doganore zbulohen mospërputhje me përcaktimet e neneve 634, 635 dhe 636;
a) Ministria përgjegjëse për financat apo autoriteti doganor ka arsye të mjaftueshme të besojë që një veprim, i cili mund të shkaktojë procedim penal lidhur me shkelje të legjislacionit doganor, akcizës apo atë tatimor, është kryer nga mbajtësi i autorizimit, aksionarët e shoqërisë në rast se operatori ekonomik aplikues është një shoqëri aksionare a personi përgjegjës në shoqërinë aplikuese për çështjet doganore.
2. Para marrjes së vendimit, ministri përgjegjës për financat ia komunikon konstatimet mbajtësit të autorizimit. Mbajtësi i autorizimit ka të drejtë të korrigjojë situatën dhe/ose të shprehë qëndrimin e tij brenda 30 ditëve nga data e komunikimit.
3. Nëse mbajtësi i autorizimit nuk e rregullon situatën e përmendur në shkronjën “a”, të pikës 1, të këtij neni, brenda 30 ditësh, ministri përgjegjës për financat njofton mbajtësin e autorizimit dhe Drejtorinë e Përgjithshme të Doganave që autorizimi për dyqan *duty free shop* pezullohet për një periudhë kohore prej 30 ditësh për t’i mundësuar mbajtësit të autorizimit të marrë masat e kërkuara për të rregulluar situatën.
4. Në rastet e referuara në shkronjën “b”, të pikës 1, të këtij neni, ministri i përgjegjës për financat pezullon autorizimin deri në fund të procedimit në gjykatë. Ai njofton mbajtësin e autorizimit për këtë qëllim dhe Drejtorinë e Përgjithshme të Doganave.
5. Kur mbajtësi i autorizimit nuk është në gjendje të rregullojë situatën brenda 30 ditësh, por mund të japë prova që kushtet mund të pëmbushen nëse shtyhet periudha e pezullimit, ministri përgjegjës për financat pezullon autorizimin për një periudhë tjetër prej 30 ditësh kalendarike. Për këtë qëllim njoftohet mbajtësi i autorizimit dhe Drejtoria e Përgjithshme e Doganave.
6. Gjatë periudhës së pezullimit të autorizimit, magazina doganore private *duty free shop* mbyllet/plumboset nga zyra doganore mbikëqyrëse. Vetëm nën mbikëqyrjen e zyrës doganore dyqani *duty free shop* mundet të hapet dhe mbajtësi i autorizimit mund të kryejë vetëm veprime që kanë të bëjnë me mirëmbajtjen e dyqanit apo mallrave si dhe t’u japë destinacion tjetër mallrave që janë në prag të skadencës.

Neni 641
Heqja e pezullimit
(Nenet 28 dhe 213 të Kodit)

1. Kur mbajtësi i autorizimit vlerësohet se ka marrë masat e nevojshme për të plotësuar kushtet dhe

kriteret që duhet të përmbushen për autorizimin e “duty free shops”, ministri përgjegjës për financat heq pezullimin dhe informon mbajtësin e autorizimit dhe Drejtorinë e Përgjithshme të Doganave. Pezullimi mund të hiqet përpara përfundimit të afatit kohor të përcaktuar në pikat 4 ose 6, të nenit 640.

2. Nëse mbajtësi i autorizimit dështon të marrë masat e nevojshme brenda periudhës kohore të pezullimit të parashikuar në pikën 4 ose 6, të nenit 640, zbatohet neni 643.

Neni 642

Pezullimi me kërkesë

(Nenet 28 dhe 213 i Kodit)

1. Kur mbajtësi i një autorizimi nuk është në gjendje të përmbushë përkohësisht ndonjë nga kushtet dhe kriteret e përcaktuara për një autorizim për magazinë doganore private (*duty free shop*), ai mund të kërkojë pezullimin e autorizimit. Në raste të tilla, mbajtësi i një autorizimi njofton ministrin përgjegjës për financat dhe Drejtorinë e Përgjithshme të Doganave, duke specifikuar datën kur ai do të jetë në gjendje të përmbushë kushtet dhe kriteret përsëri. Ai, gjithashtu, njofton për masat e planifikuara dhe afatet kohore për përmbushjen e tyre.

2. Nëse mbajtësi i një autorizimi dështon të rregullojë situatën brenda periudhës kohore të përcaktuar në njoftimin e tij, ministri përgjegjës për financat mund të autorizojë një shtyrje të arsyeshme, me kusht që mbajtësi i autorizimit të ketë vepruar me vullnet të mirë. Për këtë qëllim njoftohet mbajtësi i autorizimit dhe Drejtoria e Përgjithshme e Doganave.

Neni 643

Revokimi

(Nenet 32 dhe 213 të Kodit)

1. Autorizimi për magazinë doganore private (*duty free shop*) revokohet nga ministri përgjegjës për financat në rastet e mëposhtme:

Kur mbajtësi i autorizimit dështon të rregullojë situatën e referuar në pikën 4, të nenit 640, dhe në pikën 1, të nenit 642;

a) Kur janë identifikuar në mënyrë të përsëritur raste kundërvajtjeje në plotësimin e kushteve për hyrje- daljen e mallrave dhe regjistrimin e tyre;

b) Kur janë kryer shkelje të rënda ose të përsëritura në lidhje me legjislacionin doganor, akcizën apo atë tatimor nga mbajtësi i autorizimit ose personat e tjerë të përcaktuar në shkronjën “b”, të pikës 1, të nenit 640 dhe kur ka shteruar e drejta e ankimit;

ç) Me kërkesë të mbajtësit të autorizimit.

2. Ministri përgjegjës për financat mund të vendosë revokimin e një autorizimi për magazinë doganore private (*duty free shop*), kur kjo e fundit nuk përdoret në masën e mjaftueshme për të justifikuar ekzistencën, sepse nuk justifikohet me fluksin e udhëtarëve, i cili ka rënë me 40% nga viti i parë i fillimit të aktivitetit në magazinën doganore private (*duty free shop*).

3. Revokimi i njoftohet Drejtorisë së Përgjithshme të Doganave dhe mbajtësit të autorizimit duke i shpjeguar arsyet e revokimit si dhe të drejtën e ankimit në gjykatën administrative kompetente.

4. Brenda 15 ditësh nga data e marrjes së njoftimit të revokimit, mallrave në dyqanet *duty free shop* duhet t’u jetë dhënë një destinacion doganor.

Neni 644

Anulimi

(Nenet 31 dhe 213 të Kodit)

1. Ministri i përgjegjës për financat, anulon një autorizim për magazinë doganore private (*duty free*

shop), në qoftë se plotësohen të gjitha kushtet e mëposhtme:

- a) Autorizimi është dhënë bazuar në informacion të pasaktë ose të paplotë;
 - b) Personi, ndaj të cilit është dhënë vendimi, ishte në dijeni ose objektivisht duhej të ishte në dijeni që informacioni i dhënë ishte i pasaktë ose i paplotë.
2. Personi, ndaj të cilit është dhënë autorizimi, duhet të njoftohet për anulimin e tij.
3. Anulimi i shtrën efektet që nga data e hyrjes në fuqi të vendimit fillestar, përveçse kur, në përputhje me legjislacionin doganor, në vendim specifikohet ndryshe.

Neni 645

Mallrat që lejohet të magazinohen

(Nenet 28 dhe 213 të Kodit)

Lejohet të magazinohen në magazinë doganore private (*duty free shop*):

- a) mallra joshqiptare të llojit të mëposhtëm:
 - i. çokollata dhe ëmbëlsira të tjera;
 - ii. parfume, prodhime kozmetike dhe kolonjë;
 - iii. pajisje për përdorim personal të llojit që normalisht mbahet me vete, p.sh. kollare, shall, orë, bizhuteri, lapsa, çakmak, çanta, portofola etj.;
 - iv. punime artizanale dhe suvenire;
 - v. pije alkoolike, verë dhe birra;
 - vi. duhan dhe produkte duhani.
- b) mallra shqiptare të pataksueshme të llojit të mëposhtëm:
 - i. çokollata dhe ëmbëlsira të tjera;
 - ii. parfume, prodhime kozmetike dhe kolonjë;
 - iii. pajisje për përdorim personal të llojit që normalisht mbahet me vete, p.sh. kollare, shall, orë, bizhuteri, lapsa dhe çakmak, çanta, portofola etj.;
 - iv. punime artizanale dhe suvenire;
 - v. pije alkoolike, verë dhe birra;
 - vi. duhan dhe produkte duhani.

Neni 646

Hyrja/dalja e mallrave në/nga dyqanet duty free shop

(Nenet 28 dhe 213 të Kodit)

1. Dyqanet *duty free shop* mund t'u shesin mallra vetëm udhëtarëve që largohen nga territori doganor i Republikës së Shqipërisë, kundrejt pagesës në valutë të huaj ose të shumës së konvertuar në lekë.
2. Në dyqanet *duty free shop* zbatohen të gjitha ndalimet apo kufizimet e përcaktuara në legjislacionin në fuqi.
3. Me qëllim mbikëqyrjen e regjimit të daljes së mallrave nga *duty free shop*, periodikisht të hënën e parë të çdo muaji bëhet deklaratë përmbledhëse eksporti për mallrat e shitura.
4. Për mallrat shqiptare që hyjnë në një dyqan *duty free shop* duhet të paraqitet një deklaratë në zyrën doganore mbikëqyrëse.
5. Kur hyrja e mallrave shqiptare në një dyqan *duty free shop* ka nevojë të vërtetohet, autoritetet doganore mbikëqyrëse të *duty free shop* mund të firmosin dhe të vulosin faturën e mallrave nëse një gjë e tillë i kërkohet nga personi i interesuar.

Neni 647

Kufizime specifike në shitje

(Neni 213 i Kodit)

1. Dyqanet *duty free shop* mund të shesin cigare vetëm me konfeksion “stekë” e cila të ketë të shënuar në karton mbishkrimin *for duty free sales only*.
2. Ndalohet shitja në dyqanet *duty free shop* e cigareve në paketa dhe *master box*.
3. Ndalohet shitja me shumicë në dyqanet *duty free shop* e produkteve të tjera.

Neni 648

Kontrolle specifike në shitje në duty free shops

(Neni 213 i Kodit)

1. Zyra doganore kompetente për mbikëqyrjen e *duty free shop* çdo muaj bën rakordimin midis pasaportave të skanuara, kuponit tatimor dhe bazës të të dhënave të personave që hyjnë e dalin në/dhe nga territori i Republikës së Shqipërisë (TIMS).
2. Në rast të mospërputhjes së këtyre të dhënave apo tejkalimit të sasive të shitura bazuar në fluksin e udhëtarëve dhe sasive të lejuara në shitje për çdo udhëtar sipas produkteve specifike, zyra doganore njofton menjëherë Drejtorinë e Përgjithshme të Doganave, e cila më pas informon menjëherë ministrin e përgjegjës për financat.

Seksioni 3

Zonat e lira doganore

(shtuar seksioni me VKM nr.557, datë 31.7.2019; ndryshuar me VKM nr. 626, datë 18.9.2019)

Neni 648–1

Kushtet e përgjithshme të funksionimit

(Nenet 210 deri 222, të Kodit)

1. Në përputhje me dispozitat e këtij seksioni, dispozitat lidhur me regjimin e magazinimit doganor, të referuara në këtë vendim, zbatohen edhe për qëllime të këtij seksioni.
2. Çdo person juridik, i themeluar në Republikën e Shqipërisë, i cili, në bazë të një titulli të ligjshëm, posedon pronën brenda perimetrit të miratuar të zonës së lirë doganore (në vijim, zona) ka të drejtë të aplikojë për administrimin e një zone, me cilësinë e administratorit të zonës, me kusht që të përmbushë kushtet dhe detyrimet e përcaktuara në këtë vendim e në legjislacionin në fuqi.
3. Autorizimi për administrimin e zonës miratohet nga drejtori i Përgjithshëm i Doganave.
4. Administratori i zonës është përgjegjës për funksionimin e zonës.

Neni 648–2

Aktivitetet në zonë

(Nenet 199, 217, 219 dhe 220 të Kodit)

1. Në zonë kryhen këto aktivitete:
 - a) magazinimi i mallrave joshqiptare deri në caktimin e një regjimi për to;
 - b) magazinimi i mallrave shqiptare, të cilat mund të hyjnë, të lëvizin, të përdoren, të përpunohen ose të konsumohen në një zonë. Në këto raste mallrat nuk konsiderohen sikur janë nën regjimin e zonës;
 - c) përpunime nën regjime të posaçme doganore;
 - ç) çdo transaksion që lidhet me tregtimin e mallrave joshqiptare;
 - d) furnizime *duty free*, furnizime bordesh;
 - dh) operacione përzierjeje (*blending*) për produkte të veçanta sipas kërkesës së klientëve dhe të

tregjeve;

- e) logjistikë tregtare, operacione seleksionimi dhe përshtatjeje sipas kërkesave të tregjeve;
- ë) ambalazhim, paketim, etiketim dhe vendosje shenjash identifikimi, pullash fiskale apo tregtare;
- f) përpunime të çfarëdolloji, sipas aneksit 71–03, të shtojcës A, që i bashkëlidhet këtij vendimi dhe është pjesë përbërëse e tij;
- g) depozitim mallrash si garanci kontraktuale për operacionet tregtare;
- gj) transbordim i mallrave;
- h) furnizime/transferime nga anija/mjeti në anije/mjet, nga magazina në magazinë, nga magazina në anije/mjet dhe nga anija/mjeti në magazinë.

2. Aktivitetet në zonë miratohen nga drejtori i Përgjithshëm i Doganave. Kërkesa për miratim aktiviteti në zonë paraqitet nga administratori i zonës sipas modelit në aneksin 16, të shtojcës A, që i bashkëlidhet këtij vendimi dhe është pjesë përbërëse e tij.

Çdo aktivitet në zonë kodifikohet sipas metodikës që administratori i zonës ka zgjedhur për efekte regjistrimi e inventarizimi.

3. Miratimi i aktivitetit në zonë bëhet sipas aneksit 17, të shtojcës A, që i bashkëlidhet këtij vendimi dhe është pjesë përbërëse e tij. Me miratimin e aktivitetit, administratori i zonës regjistron llojin e aktivitetit të miratuar në sistem. Për çdo aktivitet të miratuar, administratori i zonës harton rregulloren e funksionimit të aktivitetit dhe ia paraqet për miratim drejtorit të Përgjithshëm i Doganave, jo më vonë se 30 (tridhjetë) ditë nga data e miratimit të aktivitetit.

4. Nëse nga përpunimi i mallrave nën regjimin e zonës ndryshojnë parametrat fizikë, kimikë, pesha, densiteti, madhësia ose forma e ambalazhimit, detyrimisht për këto procese, operatori duhet të mbajë regjistër të detajuar dhe, njëkohësisht, për një periudhë 3-vjeçare, kopje të kartave teknike, ditarëve të prodhimit, certifikatave ose analizave përkatëse, në funksion të kontrollit dhe mbikëqyrjes doganore. Nëse cikli i prodhimit zgjat më shumë se 24 (njëzet e katër) orë, transferimi i produkteve në regjistrat e inventarit nga objekti në objekt bëhet çdo ditë në orën 08:00.

5. Mallrat e përftuara nga këto operacione mund të pajisen me certifikatë origjine, në të cilën detyrimisht shënohet zona e lirë. Në varësi të kushteve të përmbushura certifikata mund të jetë edhe preferenciale.

6. Transbordi/transferimi i mallrave bëhet vetëm ndërmjet objekteve që janë miratuar për këtë aktivitet. Çdo mjet ku kryhet transbord do të regjistrohet si operator me të gjitha të dhënat përkatëse në regjistër, sipas përcaktimeve të pikës 1, të nenit 648-4, të këtij vendimi. Në rast se transbordi kryhet nga anija/mjeti në anije/mjet, zyra doganore njoftohet jo më vonë se 12 (dymbëdhjetë) orë para kryerjes së saj.

Neni 648–3
Zyra/Personeli doganor
(Nenet 7 dhe 8 të Kodit)

Në përputhje me nenet 7 dhe 8 të Kodit, për funksionimin e zonës krijohet struktura përkatëse me personel doganor të mjaftueshëm për kryerjen e formaliteteve doganore dhe bashkëpunimin me administratorin dhe operatorët në zonë.

Administratori vë në dispozicion ambientet dhe krijon kushtet e punës e të pajisjeve për funksionimin e zyrës.

Nenit 648–4
Regjistrat e zonës
(Nenet 17 dhe 194 të Kodit)

1. Çdo hyrje, dalje ose përpunim në zonë shënohet në regjistrat e zonës për efekte kontrolli dhe mbikëqyrjeje doganore. Administratori i zonës harton formën dhe rregulloren e plotësimit të regjistrave dhe ia paraqet për miratim drejtorit të Përgjithshëm të Doganave, i cili, kur i gjen në përputhje me parashikimet e Kodit dhe të dispozitave zbatuese të tij, si dhe jo më vonë se 15 (pesëmbëdhjetë) ditë nga data e paraqitjes, i miraton ato.

2. Regjistrat do të jenë elektronikë e funksionalë në kohë reale për të gjithë operatorët dhe autoritetin doganor, sipas përcaktimeve të neneve 3, 4, 5 e 6, të këtij vendimi. Teknologjia e ndërtimit të regjistrave elektronikë duhet të jetë fleksibël për ndërveprim me sisteme të tjera përmes shkëmbimit të mesazheve. Regjistrat duhet të kenë të paktën një *back up* sipas standardit. Komunikimi në çdo post pune apo kontrolli të regjistrave duhet të jetë i sigurt.

Neni 648–5

Hyrja e mallrave shqiptare ose joshqiptare në zonë

(Nenet 218, 219 e 220 të Kodit)

1. Mallrat joshqiptare hyjnë në rrugë tokësore, si më poshtë vijon:

a) mallrat nën regjimin e zonës hyjnë në rrugë tokësore drejtpërsëdrejti (në rastet kur shtrirja e zonës kufizohet nga kufij tokësorë të Republikës së Shqipërisë) ose përmes mbylljes së një regjimi të posaçëm doganor;

b) pas kryerjes së formaliteteve doganore, që lidhen me mbylljen e regjimit për mallrat, bëhet futja e tyre në zonë përmes regjistrimeve në regjistrat përkatës. Pjesë e këtij regjistrimi do të jetë edhe numri i regjimit paraardhës që ka përfunduar, për të vijuar më tej me hyrjen në zonë.

2. Mallrat joshqiptare hyjnë në rrugë detare, si më poshtë vijon:

a) mallrat futen në zonë pasi janë kryer formalitetet doganore. Para futjes së mallrave bëhet regjistrimi i tyre në regjistër në bazë të të dhënave që ka manifesti apo dokumenti i transportit (*Bill of Lading* / *BL*). Me përfundimin e futjes së mallrave në objekt, operatori bën inventarizimin e tyre dhe, nëse konstaton diferenca në sasi ndërmjet gjendjes faktike të mallrave dhe gjendjes sipas manifestit apo dokumentit të transportit, mban një procesverbal konstatimi, i cili nënshkruhet nga të gjithë personat përgjegjës për futjen e inventarizimin e mallrave në objekt, sipas përcaktimeve të bëra në rregulloren e miratuar, sipas pikës 2, të nenit 648-9, të këtij vendimi. Procesverbali i njoftohet menjëherë zyrës doganore përgjegjëse e cila kryen verifikimet përkatëse dhe, nëse i çmon të nevojshme, sipas parashikimeve të akteve ligjore dhe nënligjore në fuqi, mund të fillojë një hetim;

b) pas njoftimit të doganës dhe, në çdo rast, jo më vonë se 24 (njëzet e katër) orë nga mbajtja e procesverbalit, operatori bën pasqyrimin në regjistër të diferencave të konstatuara.

3. Procedurat e parashikuara në pikën 2, të këtij neni, zbatohen edhe në rastin e hyrjes së mallrave në objekt nëpërmjet instalimeve fikse të transportit.

4. Mallrat shqiptare hyjnë në një zonë, sipas përcaktimit në nenin 219, të Kodit. Për qëllim të formaliteteve doganore, mallrat shqiptare që hyjnë në një zonë të lirë nuk regjistrohen në regjistrat e administrimit të regjimit të zonës së lirë. Këto mallra magazinohen dhe regjistrohen më vete dhe janë lehtësisht të identifikueshme për autoritetet doganore.

Neni 648–6

Dalja e mallrave shqiptare ose joshqiptare nga zona

(Nenet 221 dhe 241 të Kodit)

1. Mallrat joshqiptare dalin nga regjimi i zonës në rrugë tokësore, si më poshtë vijon:

a) mallrat joshqiptare dalin nga regjimi i zonës detyrimisht duke caktuar një regjim doganor për to;

b) operatori detyrimisht duhet të depozitojë deklaratën doganore për regjimin doganor të kërkuar dhe, pas pranimit të saj, kryen regjistrimet e daljes në regjistrat e magazinës, duke shënuar dhe numrin e deklaratës përkatëse.

2. Mallrat joshqiptare dalin nga regjimi i zonës në rrugë detare, si më poshtë vijon:

a) për mallrat që dalin në rrugë detare, jo më vonë se 12 (dymbëdhjetë) orë para nisjes së operacionit, operatori/administratori njofton zyrën doganore për orën e saktë kur do të nisë dalja e mallrave. Autoriteti doganor i zyrës që mbikëqyr zonën, në përputhje me rrethanat dhe bazuar në analizën e riskut, kryen kontroll ose mbikëqyrje doganore. Forma dhe procedura e dërgimit të njoftimit caktohet nga struktura doganore përgjegjëse dhe i njoftohet administratorit të zonës. Forma dhe procedura për njoftimin e daljes së mallrave është e njëjtë për të gjithë operatorët që ushtrojnë veprimtarinë në zonë;

b) pas përfundimit të daljes së mallrave nga objekti dhe të procedurës përkatëse me anijen detare, operatori plotëson regjistrat e magazinës, duke shënuar numrin e manifestit apo të dokumentit të transportit (*Bill of Lading* / *BL*). Në çdo rast, një kopje e dokumenteve të përcaktuara në këtë pikë ruhet nga operatori për të paktën 3 (tre) vjet.

3. Mallrat shqiptare që dalin nga zona, jashtë territorit doganor të Republikës së Shqipërisë, vendosen nën regjimin e eksportit.

Neni 648–7

Aplikimi për administrimin e një zone të lirë doganore

(Pika 1, e nenit 27, të Kodit)

1. Aplikimi për administrimin e një zone paraqitet pranë Drejtorisë së Përgjithshme të Doganave.

2. Aplikimi bëhet me shkrim, sipas aneksit 14, të shtojcës A, që i bashkëlidhet këtij vendimi dhe është pjesë përbërëse e tij.

3. Aplikimit i bashkëngjiten dokumentet e mëposhtme:

a) pasqyrat financiare të shoqërisë për 3 (tri) vitet e fundit, akti i themelimit dhe statuti i saj, si dhe ekstrakti i regjistrat tregtar të lëshuar jo më vonë se 3 (tre) muaj nga data e paraqitjes së aplikimit;

b) akti i disponimit për ambientin/godinën që do të përdoret për këtë qëllim;

c) vërtetimi që aplikuesi, përfaqësuesi ligjor, anëtarët e këshillit të administrimit ose të këshillit mbikëqyrës, ortakët/aksionarët, punonjësi përgjegjës në shoqërinë aplikuese për çështjet doganore dhe personeli kyç, që është përcaktuar të operojë në zonën e lirë doganore, sipas planit të organizimit të punës, në 5 (pesë) vitet e fundit nga data e paraqitjes së aplikimit, nuk kanë detyrime doganore të papaguara dhe nuk janë dënuar me vendim të formës së prerë ose nuk janë në ndjekje penale për njërën nga veprat penale në fushën e doganave;

ç) plani i organizimit të punës dhe lista e personelit kyç që do të operojë në zonën e lirë doganore e do të ndjekë zbatimin e këtij plani;

d) akti noterial që provon se aplikuesi gëzon besimin dhe autorizimin e pronarëve apo personave që kanë të drejtën e disponimit të pronave brenda perimetrit të miratuar të zonës;

dh) lista e mjeteve që disponon operatori për plotësimin e nevojave të ushtrimit të aktivitetit e që lidhen me trajtimet, përpunimet, matjet, transportin, kontrollin, ruajtjen dhe sigurinë;

e) numri dhe emërtimi i dokumenteve që i bashkëngjiten kërkesës.

4. Dokumentet e mësipërme paraqiten në formë shkresore në origjinal ose në kopje të njësuara me origjinalin, si dhe në formë elektronike. Përveç dokumenteve të mësipërme, aplikuesi duhet të paraqesë edhe çdo dokument tjetër nëpërmjet të cilit provon përmbushjen e kriterëve të parashikuara nga legjislacioni në fuqi, si dhe të rrethanave/fakteve të parashtruara në aplikimin e tij e që është i nevojshëm për vlerësimin e aplikimit.

Procedurat e miratimit të autorizimit për administrimin e zonës

(Nenet 27, pika 1, dhe 217, të Kodit)

1. Me marrjen e aplikimit, struktura përgjegjëse në Drejtorinë e Përgjithshme të Doganave, në bashkëpunim me degën doganore mbikëqyrëse, verifikon informacionin e paraqitur. Kur konstatohet se aplikimi nuk përmban të gjitha të dhënat/dokumentet/informacionet e kërkuara, brenda 10 (dhjetë) ditëve nga data e marrjes së aplikimit, i kërkohej aplikuesit të plotësojë të dhënat/dokumentet/informacionet e nevojshme, duke i paraqitur edhe shkaqet e kërkesës për plotësimin e dokumentacionit. Aplikuesi plotëson informacionin e kërkuar brenda 10 (dhjetë) ditëve nga data e marrjes së kësaj kërkesë. Mosplotësimi i të metave brenda afatit të caktuar përbën shkak për mospranimin e kërkesës.

2. Dega doganore mbikëqyrëse, brenda 5 (pesë) ditëve pune nga data e konstatimit se plotësohen të gjitha kushtet dhe dokumentacioni/informacionet e lartpërmendura, kryen verifikimin e përputhshmërisë së dokumentacionit të paraqitur me gjendjen reale, si dhe me këqyrjen në vend të vendndodhjes/ambienteve për të cilat kërkohej autorizimi.

3. Në rast se nga dega mbikëqyrëse doganore ose Drejtoria e Përgjithshme e Doganave konstatohet se janë paraqitur rrethana të rreme ose janë fshehur fakte të vërteta, drejtori i Përgjithshëm i Doganave vendos refuzimin e aplikimit. Në rastet kur vlerësohet se paraqitja e rrethanave të rreme ose fshehja e fakteve të vërteta përbën vepër penale, nëpunësi publik përgjegjës bën kallëzimin me shkrim, sipas parashikimeve të nenit 281, të Kodit të Procedurës Penale.

4. Kur konstatohen parregullsi, i kërkohej aplikuesit që të plotësojë apo të rregullojë situatën, duke marrë masat e duhura brenda një periudhe kohore prej 10 (dhjetë) ditësh.

5. Brenda 5 (pesë) ditëve nga përfundimi i procesit të verifikimit apo nga rregullimi i situatës, dega doganore mbikëqyrëse përcjell në Drejtorinë e Përgjithshme të Doganave një relacion, ku sqarohet në mënyrë të detajuar e gjithë procedura e ndjekur deri në këtë moment, si edhe përfundimi i verifikimeve të kryera.

6. Kur Drejtoria e Përgjithshme e Doganave konstaton se aplikimi është i rregullt dhe në përputhje me kushtet e kërkesat e këtij vendimi dhe me legjislacionin doganor në fuqi, miraton autorizimin për administrimin e zonës, sipas aneksit 15, të shtojcës A, që i bashkëlidhet këtij vendimi dhe është pjesë përbërëse e tij.

7. Autorizimi për administrimin e zonës së lirë doganore mund të pezullohet, shfuqizohet ose anulohet nga Drejtoria e Përgjithshme e Doganave, duke zbatuar *mutatis mutandis* përcaktimet e neneve 648–12 deri 648–17, të këtij vendimi.

Përgjegjësitë dhe detyrimet e administratorit të zonës

(Nenet 28 dhe 217, të Kodit)

1. Administratori i zonës ka këto përgjegjësi:

- a) rrethon dhe mirëmban zonën, së paku me gardh metalik të qëndrueshëm me bazament solid, në një lartësi jo më pak se 2 (dy) metra;
- b) përgjigjet për sigurinë dhe paprekshmërinë e zonës përmes shërbimit të rojeve fizike dhe grupit të gatshëm për zgjidhjen e emergjencave;
- c) krijon dhe mban regjistrimet e zonës sipas përcaktimeve të nenit 194, të Kodit Doganor;
- ç) mirëmban dhe siguron mbrojtjen e regjistrave të nevojshëm për funksionimin e zonës;
- d) mban përgjegjësi për mallrat, sipas përcaktimeve të nenit 215, të Kodit Doganor;

dh) është përgjegjës për marrëdhënie të drejta e korrekte ndërmjet punonjësve, operatorëve të zonës së lirë dhe doganës;

e) siguron lejet, licencat, aktin e kolaudit apo të kalibrit, lejen mjedisore dhe dokumente të tjera që vërtetojnë plotësimin e kushtëzimeve të përcaktuara në këtë vendim e në legjislacionin në fuqi, që rregullon fusha të veçanta e që mbulojnë aktivitetin e kërkuar;

ë) siguron mundësinë për mbyllje me dry ose plumbosje nga autoritetet doganore të ambienteve, godinave, instalimeve etj.;

f) siguron aparaturat matëse, që mundësojnë verifikimin fizik të sasisë gjendje, në çdo moment që do të kërkohej nga autoritetet doganore, si edhe ndarjen e mallrave sipas statusit të tyre;

g) është përgjegjës për kryerjen e të gjitha procedurave për autorizimin e objekteve dhe të veprimtarive të operatorëve në zonë, sipas aplikimit të përcaktuar në anekset 16 e 18, të shtojcës A, që i bashkëlidhet këtij vendimi dhe është pjesë përbërëse e tij. Miratimi i këtyre aplikimeve bëhet sipas anekseve 17 e 19, të shtojcës A, që i bashkëlidhet këtij vendimi dhe është pjesë përbërëse e tij, duke zbatuar “mutatis mutandis” procedurat e përcaktuara në nenin 648-8, të këtij vendimi.

2. Administratori i zonës ka detyrimet e mëposhtme:

a) harton rregulloren e operatorëve që do të operojnë në zonë;

b) regjistron operatorët e zonës, i pajis me kod identifikimi për kryerjen e aktivitetit në një objekt dhe për një veprimtari të autorizuar;

c) informon zyrtarisht me shkrim, pa vonesë, zyrën doganore mbikëqyrëse, nëse konstaton mospërputhje ndërmjet regjistrat elektronik dhe gjendjes që disponon operatori apo për çdo rast konstatimi të shkeljeve të tjera në zonë;

ç) siguron sistemin e monitorimit me videokamera dhe të ndriçimit për qëllime mbikëqyrjeje e kontrolli nga autoritetet doganore;

d) bën ndriçimin e ambienteve dhe të rrethimit, si dhe instalimin, vendosjen, mirëmbajtjen, furnizimin me energji të pandërprerë etj. të sistemeve mbikëqyrëse me videokamera dhe siguron transmetimin on-line dhe ruajtjen e pacenuar të imazheve të regjistruara nga sistemet mbikëqyrëse me videokamera, sipas vendeve dhe këndeve të përcaktuara nga Drejtoria e Përgjithshme e Doganave. Sistemi i ndriçimit dhe i videokamerave duhet të mundësojë kontrollin e perimetrit të jashtëm të zonës së lirë doganore, si dhe ambienteve të brendshme të tyre. Administratori siguron ruajtjen e imazheve për një periudhë të paktën prej 3 (tre) muajsh. Në rast se ka filluar procedura hetimore/gjyqësore, këto imazhe ruhen deri në përfundim të procesit hetimor dhe/ose gjyqësor;

dh) vendos në dispozicion të autoriteteve doganore ambientet e punës, të cilat duhet të plotësojnë standardet e përcaktuara nga Drejtoria e Përgjithshme e Doganave, si dhe mjetet e nevojshme për të kryer kontrollin;

e) informon zyrtarisht me shkrim dhe pa vonesë zyrën doganore mbikëqyrëse, nëse konstaton mospërputhje mes stokut faktik në zonën e lirë doganore dhe stokut sipas sistemit elektronik doganor;

ë) bashkëpunon me zyrën mbikëqyrëse doganore të zonës së lirë doganore për funksionimin e saj sipas orarit të miratuar, duke bërë edhe kërkesat për ndryshimin e tij, duke e shoqëruar edhe me dokumentacionin e nevojshëm për pagesat e punonjësve doganorë, sipas vendimit nr.921, datë 29.12.2014, të Këshillit të Ministrave, “Për personelin e administratës doganore”, të ndryshuar;

f) merr aprovimin paraprak nga Drejtoria e Përgjithshme e Doganave për çdo ndryshim strukturor në ambientet e autorizuar;

g) siguron që të gjitha hyrjet/daljet në dhe nga zona e lirë të jenë të sigurta.

Neni 648–10

Përgjegjësitë dhe detyrimet e operatorit

(Nenet 28 dhe 217 të Kodit)

1. Operatori ka detyrimet e mëposhtme:
 - a) zbaton me korrektësi legjislacionin doganor;
 - b) zbaton me korrektësi statutin dhe rregulloret e zonës;
 - c) merr masat për ruajtjen, përpunimin dhe trajtimin sipas rregullave dhe normave të sigurisë së mallrave që ka në objektet që administron;
 - ç) plotëson saktë dhe në kohë regjistrat elektronikë për mallrat që hyjnë dhe dalin në objektet që administron;
 - d) kryen inventarin fizik çdo 6 (gjashtë) muaj dhe i raporton të dhënat në regjistrin elektronik doganës mbikëqyrëse dhe administratorit të zonës;
 - dh) ruan kopje origjinale të të gjitha transaksioneve, kartave teknologjike dhe analizave të kryera;
 - e) bashkëpunon me administratorin e zonës dhe doganën për çdo çështje që ka lidhje me mbikëqyrjen e aktivitetit brenda zonës;
 - ë) kujdeset për respektimin e rregullave për ambientin dhe sigurinë.
2. Operatori ka përgjegjësitë e mëposhtme:
 - a) është përgjegjës për mallrat, sipas përcaktimeve të nenit 215, të Kodit;
 - b) mirëmban e siguron kushtet teknike të objekteve që ka në administrim në mënyrë që mallrat nën regjim të mos kenë asnjë dëmtim;
 - c) është përgjegjës për regjistrimet e sakta dhe në kohë reale të transaksioneve që kryen me mallrat në objektet dhe veprimtaritë që kryen në zonë;
 - ç) është përgjegjës për inventarin e mallrave nën regjim dhe çdo mangësi apo mospërputhje e ngarkon me përgjegjësi para ligjit;
 - d) Mban përgjegjësi dhe ka në ngarkim çdo borxh doganor që mund të lindë gjatë aktivitetit në zonë.

Neni 648–11

Ndërtesat, objektet në zonë

(Neni 217 i Kodit)

1. Çdo ndërtesë, depozitë, silos, magazinë, shesh, linjë teknologjike, impiant, për efekte doganore, do të identifikohen me termin “objekt”.
2. Para ndërtimit të ndërtesës në një zonë të lirë merret miratimi paraprak nga Drejtoria e Përgjithshme e Doganave. Objektet në zonë miratohen nga drejtori i Përgjithshëm i Doganave me kërkesën e administratorit të zonës.
3. Administratori i zonës ka detyrimin të përshkruajë në mënyrë të detajuar objektin, proceset që do të kryhen, produktet që do të hyjnë në zonë, mënyrën e identifikimit dhe të matjes së produkteve.
4. Çdo objekt në zonë kodifikohet sipas metodikës që administratori i zonës ka zgjedhur për efekte regjistrash e inventari.
5. Me miratimin e objektit, administratori i zonës merr masat për regjistrimin e tij në sistem. Për çdo kategori objektësh të miratuara, administratori i zonës harton rregulloren e funksionimit të objektit dhe e dërgon për njohje pranë Drejtorisë së Përgjithshme të Doganave.
6. Të gjitha objektet duhet të jenë tërësisht funksionale. Në rast se konstatohen mangësi teknike që cenojnë ruajtjen e përshtatshme të mallrave nën regjim, administratori i zonës bën menjëherë pezullimin e aktivitetit në objekt dhe njofton zyrën doganore mbikëqyrëse për defektin dhe pasojat që ka sjellë. Operatori, i cili kryen aktivitet në objekt, mund të transferojë mallrat në një objekt tjetër brenda zonës së lirë, për të mundësuar riparimin e defekteve. Pasi objektet janë rikthyer në kushte teknike për veprimtarinë e autorizuar, administratori i zonës së lirë njofton zyrën doganore mbikëqyrëse për gatishmërinë e objektit.

Neni 648–12

Pezullimi i autorizimit për veprimtari në zonë

(Nenet 28 dhe 217 të Kodit)

1. Autorizimi për veprimtari në zonë pezullohet nga Drejtoria e Përgjithshme e Doganave kur:

a) nga autoritetet doganore konstatohen mospërputhje me përcaktimet e nenit 648–10, të këtij vendimi;

b) autoriteti doganor ka arsye të mjaftueshme të besojë që një veprim, i cili mund të shkaktojë procedim penal lidhur me shkelje të legjislacionit doganor, të akcizës apo atë tatimor, është kryer nga operatori, anëtarët e bordit apo të këshillit drejtues/këshillit të administrimit/këshillit mbikëqyrës, ortakët apo aksionarët e shoqërisë, në rast se operatori ekonomik aplikues është një shoqëri aksionare ose personi përgjegjës në shoqërinë aplikuese për çështjet doganore.

2. Para marrjes së vendimit, Drejtoria e Përgjithshme e Doganave ia komunikon konstatimet operatorit për veprimtari në zonë. Operatori ka të drejtë të korrigjojë situatën dhe/ose të shprehë qëndrimin e tij brenda 15 (pesëmbëdhjetë) ditëve nga data e komunikimit.

Në rast të kundërt Drejtoria e Përgjithshme e Doganave njofton operatorin për pezullimin për një periudhë kohore prej 30 (tridhjetë) ditësh, duke i mundësuar atij marrjen e masave të kërkuara për të rregulluar situatën.

3. Në rastet e referuara në shkronjën “b”, të pikës 1, të këtij neni, Drejtoria e Përgjithshme e Doganave pezullon autorizimin deri në fund të procedimit penal dhe njofton operatorin për këtë qëllim.

4. Kur operatori nuk është në gjendje të rregullojë situatën brenda 30 (tridhjetë) ditëve, por mund të japë prova që kushtet mund të përmbushen nëse shtyhet periudha e pezullimit, Drejtoria e Përgjithshme e Doganave pezullon autorizimin për një periudhë tjetër prej 30 (tridhjetë) ditësh kalendarike. Për këtë qëllim, njoftohet operatori.

5. Gjatë periudhës së pezullimit të autorizimit për veprimtari në zonë, objektet mbyllen me dry/plumbosje nga administratori dhe zyra doganore mbikëqyrëse. Vetëm nën mbikëqyrjen e zyrës doganore mbikëqyrëse këto ambiente mund të hapen dhe operatori mund të kryejë vetëm veprime që kanë të bëjnë me mirëmbajtjen e pajisjeve apo të mallrave, si dhe t’u japë destinacion tjetër mallrave që janë në prag të skadimit.

Neni 648–13

Pezullimi i aktivitetit për objektet

Të gjitha objektet, sipas përcaktimeve të pikës 1, të nenit 648–11, të këtij vendimi, duhet të jenë tërësisht funksionale. Në rast se nga administratori i zonës konstatohen mangësi teknike që cenojnë ruajtjen e përshtatshme të mallrave nën regjim, ky i fundit bën menjëherë pezullimin e aktivitetit në objekt dhe njofton doganën për defektin dhe pasojat që ka sjellë.

Në rastet kur mangësitë teknike konstatohen nga autoriteti doganor, menjëherë bëhet njoftimi i administratorit të zonës për pezullimin e objektit.

Operatori, i cili kryen aktivitet në objekt, me konfirmim nga zyra doganore, mund të transferojë mallrat në një objekt tjetër për të mundësuar riparimin e defekteve.

Neni 648–14

Heqja e pezullimit të autorizimit për veprimtari në zonë

(Nenet 28 dhe 217 të Kodit)

1. Kur operatori vlerësohet se ka marrë masat e nevojshme për të plotësuar kushtet dhe kriteret që duhet të përmbushen, Drejtoria e Përgjithshme e Doganave heq pezullimin dhe informon operatorin dhe administratorin e zonës. Pezullimi mund të hiqet përpara përfundimit të afatit kohor të përcaktuar në nenin 648–12, të këtij vendimi.

2. Nëse operatori në zonë dështon të marrë masat e nevojshme brenda periudhës kohore të pezullimit të parashikuar në nenin 648–12, të këtij vendimi, atëherë zbatohet neni 648-16, i këtij vendimi.

Neni 648–15

Heqja e pezullimit të autorizimit për objekt në zonë

(Nenet 28 dhe 217 të Kodit)

1. Pasi objektet janë kthyer në kushte teknike për veprimtarinë e autorizuar, administratori i zonës njofton doganën për gatishmërinë e objektit dhe, nëse nuk ka një refuzim nga kjo e fundit për 24 (njëzet e katër) orë, bën aktivizimin e objektit.

2. Nëse operatori në zonë dështon të marrë masat e nevojshme brenda periudhës kohore të pezullimit të parashikuar në nenin 648–12, të këtij vendimi, atëherë zbatohet *mutatis mutandis*, neni 648–16, i këtij vendimi.

Neni 648–16

Shfuqizimi i autorizimit për veprimtari në zonë

(Neni 217 i Kodit)

Me propozimin e zyrës doganore mbikëqyrëse të zonës, Drejtoria e Përgjithshme e Doganave shfuqizon autorizimin për veprimtari në zonë, në rastet, si më poshtë vijon:

- a) kur operatori dështon të rregullojë situatën e referuar në nenin 648–12, të këtij vendimi;
- b) kur janë identifikuar në mënyrë të përsëritur raste kundërvajtjeje në plotësimin e kushteve për hyrje-daljen e mallrave e regjistrimin e tyre;
- c) kur janë kryer shkelje të rënda ose të përsëritura lidhur me legjislacionin doganor, akcizën apo atë tatimor nga operatori ose personat e tjerë të përcaktuar në shkronjën “b”, të pikës 1, të nenit 648–12, të këtij vendimi, dhe kur ka shteruar e drejta e ankimit;
- ç) kur operatori falimenton sipas vendimit gjyqësor;
- d) me kërkesë të operatorit.

Neni 648–17

Anulimi, shfuqizimi i autorizimit për objekte dhe veprimtari në zonë

(Neni 217 i Kodit)

1. Me propozimin e zyrës doganore mbikëqyrëse të zonës së lirë doganore, Drejtoria e Përgjithshme e Doganave anulon një autorizim për veprimtari në zonë të lirë doganore, në qoftë se plotësohen të gjitha kushtet e mëposhtme:

- a) autorizimi është dhënë bazuar në informacion të rremë, të pasaktë ose të falsifikuar;
- b) personi, ndaj të cilit është dhënë vendimi, ishte në dijeni ose objektivisht duhej të ishte në dijeni që informacioni i dhënë ishte i rremë, i pasaktë ose i falsifikuar.

2. Anulimi i shtrin efektet që nga data e hyrjes në fuqi të vendimit fillestar, përveçse kur, në përputhje me legjislacionin doganor, në vendim specifikohet ndryshe.

3. Në rast shfuqizimi ose anulimi të autorizimit për veprimtari në zonë, mallrave në regjimin e zonës u jepet një regjim doganor sipas përcaktimeve të nenit 221 të Kodit.

Neni 648–18

Rakordime dhe kontrole

(Neni 218, 219, 220, 221 dhe 222, të Kodit)

1. Pas miratimit të zonës së lirë doganore, Drejtoria e Përgjithshme e Doganave miraton:
 - a) rregulloren për funksionimin e zonës së lirë doganore. Rregullorja përmban rregullat dhe kushtet për organizimin e zonës, sigurinë e ndërtesave dhe objekteve, sigurinë dhe kushtet e punës, lejet dhe dokumentet e hyrjes/daljes së mallrave/personave në zonë etj.;
 - b) regjistrat e paraqitur nga administratori dhe aplikuesi për objektet dhe veprimtarinë në zonë.
2. Gjatë ushtrimit të aktivitetit, administratori dhe operatori janë të detyruar të regjistrojnë e të dokumentojnë të gjitha hyrjet/daljet e mallrave në zonën e lirë doganore, si dhe të paraqesin pranë autoriteteve doganore të zyrës mbikëqyrëse për çdo rast, sipas legjislacionit në fuqi, deklaratimet, të shoqëruara me dokumentet përkatëse.
3. Brenda datës 5 (pesë) dhjetor të çdo viti, administratori dhe operatori, dorëzojnë pranë autoriteteve doganore të zyrës mbikëqyrëse raport për gjendjen e mallrave.
4. Të gjitha veprimet për hyrjen/daljen e mjeteve e të mallrave në dhe nga zona janë objekt i njoftimit dhe lejes përkatëse të autoriteteve doganore të zyrës mbikëqyrëse. Këto veprime mund të kryhen vetëm gjatë orarit të përcaktuar nga autoritetet doganore.

Seksioni 4

Krijimi apo shfuqizimi i zonës së lirë doganore

(Shtuar seksioni me VKM nr. 557, datë 31.7.2019; ndryshuar me VKM nr. 626, datë 18.9.2019)

Neni 648–19

Propozimi për krijimin e zonës së lirë doganore

(Neni 216 i Kodit)

Ministria përgjegjëse për financat i paraqet Këshillit të Ministrave propozimin për krijimin e zonës së lirë doganore, në përputhje me nenin 216, të Kodit.

Neni 648–20

Dokumentet tip që i bashkëlidhen propozimit për krijimin dhe shtrirjen territoriale të zonës së lirë doganore

(Neni 216 i Kodit)

1. Propozimit për krijimin dhe shtrirjen territoriale të zonës së lirë doganore i bashkëlidhet dokumentacioni, si më poshtë vijon:
 - a) kërkesa e subjektit apo e subjekteve (aplikuese), shoqëruar me informacion lidhur me aktivitetin e tyre;
 - b) planvendosja e territorit që propozohet për krijimin e zonës së lirë doganore, e hartuar nga ekspertë të licencuar, ku të jenë përcaktuar pikat e hyrjes e të daljes;
 - c) në rastin kur zona e lirë doganore do të krijohet në pasurinë në pronësi të aplikuesit kërkuar, duhet të dorëzohet përshkrimi i pronës private, vendndodhja e saj, dokumenti i pronësisë, statusi juridik aktual i pasurisë i lëshuar nga Agjencia Shtetërore e Kadastrës, shoqëruar me hartën treguese të pasurisë;
 - ç) në rastin kur zona e lirë doganore do të krijohet në pasuri, jo në pronësi të aplikuesit kërkuar,

së bashku me dokumentacionin e përcaktuar në shkronjën “c”, duhet të dorëzohet edhe aktmarrëveshja paraprake, e lidhur ndërmjet aplikuesit kërkues dhe pronarit të pasurisë;

d) mendimi i Drejtorisë së Përgjithshme të Doganave, pas shqyrtimit dhe vlerësimit të aplikimit për krijimin dhe shtrirjen territoriale të zonës së lirë doganore.

2. Pas miratimit të zonës së lirë doganore nga Këshilli i Ministrave, aplikuesit kërkues shprehin vullnetin me akt noterial për administratorin që gëzon besimin e autorizimin e pronarëve apo poseduesve ligjorë të pronave brenda perimetrit të miratuar të Zonës, me qëllim që ky i fundit të aplikojë për administrimin e një zone të lirë doganore, sipas aneksit 14, të shtojcës A, që i bashkëlidhet këtij vendimi dhe është pjesë përbërëse e tij, së bashku me dokumentacionin e përcaktuar në këtë aneks.

Neni 648–21

Shfuqizimi i zonës së lirë doganore

1. Me propozimin e ministrit përgjegjës për financat, Këshilli i Ministrave shfuqizon vendimin për autorizimin e zonës së lirë doganore në rastet e mëposhtme:

a) kur aplikuesi kërkues apo administratori dështon të rregullojë situatën lidhur me detyrimet e përcaktuara në këtë vendim;

b) kur janë verifikuar në mënyrë të përsëritur raste kundërvajtjeje në plotësimin e kushteve për hyrje-daljen e mallrave dhe regjistrimin e tyre;

c) kur janë kryer shkelje të rënda dhe të përsëritura lidhur me legjislacionin doganor, të akcizës apo atë tatimor;

ç) kur zona e lirë doganore nuk ka filluar aktivitet apo kur ka pushuar së kryeri aktivitet për të paktën 2 (dy) vjet;

d) me kërkesë të aplikuesit kërkues.

2. Në rast shfuqizimi, mallrave në regjimin e zonës së lirë doganore u jepet një regjim doganor sipas përcaktimeve të nenit 221, të Kodit.

KREU 4

Përdorimi i veçantë

Seksioni 1

Lejimi i përkohshëm

Nënseksioni 1

Dispozita të përgjithshme

Neni 649

Dispozita të përgjithshme për përdorimin e regjimit

(Shkronja “a”, të pikës 1, të nenit 192, të Kodit)

Përveç rasteve kur përcaktohet ndryshe, autorizimet për përdorimin e regjimit të lejimit të përkohshëm duhet të jepen me kusht që gjendja e mallrave të vendosura nën regjim të mbetet e njëjtë.

Megjithatë, pranohen riparimet dhe mirëmbajtja, duke përfshirë rregullimet dhe përshtatjet apo masat për të ruajtur mallrat ose për të siguruar përputhjen e tyre me kërkesat teknike për përdorimin e tyre nën regjim.

Neni 650

Vendi për paraqitjen e aplikimit

(Pika 1, e nenit 27, të Kodit)

1. Duke anashkaluar paragrafin e tretë, të pikës 1, të nenit 27, të Kodit, aplikimi për autorizim për lejim të përkohshëm duhet të paraqitet pranë autoritetit doganor kompetent për vendin ku mallrat do të hyjnë ose do të përdoren.

2. Duke anashkaluar paragrafin e tretë, të pikës 1, të nenit 27, të Kodit, kur një aplikim për autorizim për lejim të përkohshëm është bërë me anë të një deklarate doganore me gojë në përputhje me nenin 305, një veprim në përputhje me nenin 309 ose me një Carnet ATA ose Carnet CPD në përputhje me nenin 531, aplikimi do të bëhet në vendin ku mallrat janë paraqitur dhe deklaruar për lejim të përkohshëm.

3. Policisë Kufitare dhe Migracionit i delegohet e drejta për vendosjen nën regjimin e lejimit të përkohshëm të automjeteve rrugore për përdorim privat, të cilat plotësojnë kushtet për dhënien e këtij regjimi.

Vendosja nën këtë regjim, si rast specifik, bëhet nëpërmjet regjistrimit në rrugë elektronike, në sistemin TIMS.

Mbikëqyrja dhe mbyllja e këtij regjimi bëhen nga autoritetet doganore, në bashkëpunim me Policinë Kufitare dhe Migracionit, sipas kompetencave, të përcaktuara në legjislacionin në fuqi.

Neni 651

Lejimi i përkohshëm me përjashtim të pjesshëm nga detyrimi i importit

(Nenet 192, pika 1, dhe 223, pika 2, shkronja “ç”, të Kodit)

1. Autorizimi për përdorimin e regjimit të lejimit të përkohshëm me përjashtim të pjesshëm nga detyrimi i importit jepet në lidhje me mallrat të cilat nuk i plotësojnë të gjitha kërkesat përkatëse për përjashtim të plotë nga detyrimi i importit të përcaktuara në nenet 654 deri në 661 dhe nenet 664 deri në 681.

2. Autorizimi për përdorimin e regjimit të lejimit të përkohshëm me përjashtim të pjesshëm nga detyrimi i importit, nuk jepet për mallrat për konsum.

3. Autorizimi për përdorimin e regjimit të lejimit të përkohshëm me përjashtim të pjesshëm nga detyrimi i importit jepet me kusht që shumica përkatëse e detyrimit të importit në përputhje me paragrafin e dytë, të pikës 1, të nenit 225, të Kodit, të paguhet kur të jetë mbyllur regjimi.

Nënseksioni 2

Mjetet e transportit, paletat dhe kontejnerët përfshirë aksesorët dhe pajisjet e tyre

Neni 652

Dispozita të përgjithshme

(Pika 3, e nenit 192, të Kodit)

(Shtuar paragrafi i dytë me VKM nr. 872, datë 30.12.2024)

Përjashtimi i plotë nga detyrimi i importit mund të jepet për mallrat, siç referohet në nenet 653 deri në 656 dhe në nenin 658, dhe nëse aplikuesi dhe mbajtësi i regjimit janë të vendosur në territorin doganor të Republikës së Shqipërisë.

Kur në nënseksionin 2, të kreut 4, të titullit VII, përmendet “një përdorim tregtar i një mjeti transporti”, ai nënkupton përdorimin e një mjeti transporti për transportin e personave kundrejt pagesës ose për përdorimin e një mjeti transporti për transportin industrial ose tregtar të mallrave, qoftë kundrejt pagesës ose jo. Përdorimi privat i një mjeti transporti nënkupton përdorimin e një mjeti transporti, të ndryshëm nga ai tregtar.

Neni 653

Paletat

(Shkronja “ç”, e pikës 2, të nenit 223, të Kodit)

Përrjashtimi i plotë nga detyrimi i importit jepet për paletat.

Neni 654

Pjesët e këmbimit, aksesoret dhe pajisjet për paletat

(Shkronja “ç”, e pikës 2, të nenit 223, të Kodit)

Përrjashtimi i plotë nga detyrimi i importit jepet për pjesët e këmbimit, aksesoret dhe pajisjet për paletat kur ato janë importuar përrkohësisht për t’u rieksportuar më vete ose si pjesë e paletave.

Neni 655

Kontejnerët

(Nenet 24, pika 2, dhe 223, pika 2, shkronja “ç”, të Kodit)

1. Përrjashtimi i plotë nga detyrimi i importit jepet për kontejnerët kur kanë të shënuar në një vend të përrshtatshëm dhe të dukshëm të gjithë informacionin e mëposhtëm:

- a) Identifikimin e pronarit ose përrdorusit, të cilët mund të tregohen ose me emrin e tyre të plotë ose me një sistem të përrcaktuar identifikimi, duke përrjashtuar simbolet, si emblemat ose flamujt;
- b) Shenjat identifikuese dhe numrat e kontejnerit, të vendosura nga pronari ose operatori;
- c) Peshën e kontejnerit, duke përrfshirë edhe të gjitha pajisjet e tij të fiksuara në mënyrë të përrhershme.

Për kontejnerët transportues që përrdoren në rrugë detare apo për ndonjë kontejner tjetër që përrdor një prefiks standard ISO të përrbërë nga katër shkronja të mëdha që përrfundojnë me “U”, identifikimi i pronarit ose i operatorit kryesor, numri serial i kontejnerit dhe shifra e kontrollit të kontejnerit duhet t’i përrmbahen standardit ndërrkombëtar ISO 6346 dhe anekseve të tij.

2. Kur aplikimi për autorizim është bërë në përrputhje me pikën 1, të nenit 531, kontejnerët monitorohen nga një person i vendosur në territorin doganor të Republikës së Shqipërisë ose nga një person i vendosur jashtë territorit doganor të Republikës së Shqipërisë, i cili ka një përrfaqësues në territorin doganor të Republikës së Shqipërisë.

Personi, sipas kërkesës i jep autoriteteve doganore, informacione të detajuara në lidhje me lëvizjet e secilit kontejner të cilit i është dhënë regjimi i lejimit të përrkohshëm, duke përrfshirë datat dhe vendet e hyrjes dhe të mbylljes së regjimit.

Neni 656

Pjesët e këmbimit, aksesoret dhe pajisjet për kontejnerë

(Shkronja “ç”, e pikës 2, të nenit 223, të Kodit)

Përrjashtimi i plotë nga detyrimi i importit jepet për pjesët e këmbimit, aksesoret dhe pajisjet për kontejnerët kur ato janë importuar përrkohësisht për t’u rieksportuar më vete ose si pjesë të kontejnerëve.

Neni 657

Kushtet për dhënien e përrjashtimit të plotë nga detyrimi i importit për mjetet e transportit

(Shkronja “ç”, e pikës 2, të nenit 223, të Kodit)

(Ndryshuar pika 2 me VKM nr. 872, datë 30.12.2024)

1. Për qëllime të këtij neni, termi “mjetet e transportit” përrfshin pjesë këmbimi normale, aksesore dhe pajisje që shoqërojnë mjetet e transportit.

2. Kur mjetet e transportit deklarohen për lejim të përkohshëm verbalisht (me gojë), në përputhje me pikën 1, të nenit 305, ose me një akt tjetër në përputhje me pikën 1, të nenit 309, së bashku me pikën 1, të nenit 311, autorizimi për lejim të përkohshëm i jepet personit, i cili ka kontrollin fizik të mallrave në momentin e çlirimit të mallrave për regjimin e lejit të përkohshëm, përveçse në rastet kur ky person vepron në emër të një personi tjetër. Nëse ndodh kështu, autorizimi duhet t'i jepet këtij të fundit.

3. Përjashtimi i plotë nga detyrimi i importit jepet edhe për mjetet e transportit rrugor, hekurudhor, ajror, detar dhe ujor të brendshëm, kur ato plotësojnë kushtet e mëposhtme:

a) Janë të regjistruar jashtë territorit doganor të Republikës së Shqipërisë, në emër të një personi të vendosur jashtë këtij territori ose kur mjetet e transportit nuk janë regjistruar dhe janë në zotërim të një personi të vendosur jashtë territorit doganor të Republikës së Shqipërisë;

b) Janë përdorur nga një person i vendosur jashtë territorit doganor të Republikës së Shqipërisë, pa rënë ndesh me nenet 659, 660 dhe 661.

Kur mjetet e transportit janë përdorur privatisht nga një person i tretë i vendosur jashtë territorit doganor të Republikës së Shqipërisë, përjashtimi i plotë nga detyrimi i importit do të lejohet me kusht që ky person të jetë i autorizuar me shkrim nga mbajtësi i autorizimit.

Neni 658

Pjesët e këmbimit, aksesoret dhe pajisjet për mjetet e transportit që janë joshqiptare

(Shkronja “ç”, e pikës 2, të nenit 223, të Kodit)

Përjashtimi i plotë nga detyrimi i importit jepet për pjesë të këmbimit, aksesoret dhe pajisjet për mjetet e transportit në rastet kur ato janë importuar përkohësisht për t'u riekportuar më vete ose si pjesë të mjeteve të transportit.

Neni 659

Kushtet për dhënien e përjashtimit të plotë nga detyrimi i importit personave të vendosur në territorin doganor të Republikës së Shqipërisë

(Shkronja “ç”, e pikës 2, të nenit 223, të Kodit)

Personat e vendosur në territorin doganor të Republikës së Shqipërisë, përfitojnë nga përjashtimi i plotë nga detyrimi i importit, në rastet kur plotësohet një nga kushtet e mëposhtme:

a) Në rastin e mjeteve të transportit hekurudhor, ato vihen në dispozicion të personave të vendosur në territorin e Republikës së Shqipërisë sipas një marrëveshjeje përmes së cilës çdo person mund të përdorë mjetet hekurudhore të tjetrit;

b) Në rastin e mjeteve të transportit rrugor të regjistruar në territorin doganor të Republikës së Shqipërisë, një rimorkio që lidhet me mjetin e transportit;

c) Kur mjetet e transportit përdoren në lidhje me një situatë emergjente;

ç) Kur mjetet e transportit përdoren nga një shoqëri profesionale me qira për qëllime riekporti.

Neni 660

Përdorimi i mjeteve të transportit nga individët që kanë vendbanimin e tyre të përhershëm në territorin doganor të Republikës së Shqipërisë

(Shkronja “ç”, e pikës 2, të nenit 223, të Kodit)

(Shtuar pika 2/1, shfuqizuar pika 4 me VKM nr. 872, datë 30.12.2024)

1. Individët, që kanë vendbanimin e tyre të zakonshëm në territorin doganor të Republikës së

Shqipërisë, përfitojnë përjashtim të plotë nga detyrimi i importit në lidhje me mjetet e transportit që përdorin privatisht dhe herë pas here, me kërkesë të personit në emër të të cilit është regjistruar mjeti, me kusht që ky i fundit të jetë në territorin doganor të Republikës së Shqipërisë në kohën e përdorimit.

2. Individët që kanë vendbanimin e tyre të zakonshëm në territorin doganor të Republikës së Shqipërisë, përfitojnë përjashtim të plotë nga detyrimi i importit në lidhje me mjetet e transportit që kanë marrë me qira sipas një kontrate të shkruar dhe e përdorin privatisht për një nga qëllimet e mëposhtme:

- a) Për t'u kthyer në vendin e tyre të banimit në territorin doganor të Republikës së Shqipërisë;
- b) Për t'u larguar nga territori doganor i Republikës së Shqipërisë.

2/1. Individët që kanë vendbanimin e tyre të zakonshëm në territorin doganor të Republikës së Shqipërisë përfitojnë përjashtimin e plotë nga detyrimet e importit për mjetet e transportit rrugor, të cilat ata i kanë marrë me qira, sipas një kontrate me shkrim të lidhur me një shërbim profesional të makinave me qira dhe që ata përdorin privatisht.

3. Individët që kanë vendbanimin e tyre të zakonshëm në territorin doganor të Republikës së Shqipërisë, përfitojnë përjashtim të plotë nga detyrimi i importit në lidhje me mjetet e transportit, që përdorin për qëllime tregtare ose private me kusht që të jenë punësuar nga pronari, qiramarrësi ose marrësi me leasing i mjetit të transportit dhe që punëdhënësi të jetë i vendosur jashtë territorit doganor të Republikës së Shqipërisë.

Përdorimi privat i mjeteve të transportit lejohet për udhëtimet mes vendit të punës dhe vendbanimit të punonjësit ose me qëllim kryerjen e një detyre profesionale të punonjësit, siç përcaktohet në kontratën e punësimit.

Me kërkesë të autoriteteve doganore, personi që përdor mjetet e transportit, duhet të paraqesë një kopje të kontratës së punës.

4. Shfuqizuar.

Neni 661

Përjashtimi nga detyrimi i importit në lidhje me mjetet e transportit në raste të tjera

(Shkronja “ç”, e pikës 2, të nenit 223, të Kodit)

1. Përjashtimi i plotë nga detyrimi i importit jepet kur mjetet e transportit regjistrohen përkohësisht në territorin doganor të Republikës së Shqipërisë, me qëllim rieksporimit në emër të:

- a) një personi të vendosur jashtë territorit doganor të Republikës së Shqipërisë;
- b) një individi i cili e ka vendbanimin e tij/të saj të zakonshëm brenda territorit doganor të Republikës së Shqipërisë dhe është duke transferuar vendbanimin e zakonshëm në një vend jashtë territorit doganor të Republikës së Shqipërisë.

2. Përjashtimi i plotë nga detyrimi i importit, në raste të jashtëzakonshme mund të jepet për mjetet e transportit të përdorura për qëllime tregtare për një periudhë të kufizuar nga ana e personave të vendosur në territorin doganor të Republikës së Shqipërisë.

Neni 662

Afatet për mbylljen e regjimit të lejimit të përkohshëm në rastin e mjeteve të transportit dhe kontejnerëve

(Pika 4, e nenit 195, të Kodit)

Mbyllja e regjimit të lejimit të përkohshëm në rastin e mjeteve të transportit dhe kontejnerëve bëhet brenda afateve të mëposhtme, duke filluar nga koha që mallrat janë vendosur në regjim:

- a) për mjetet e transportit hekurudhor 12 muaj;
- b) për mjetet e transportit për përdorim tregtar, përveç transportit hekurudhor, për periudhën që nevojitet për kryerjen e operacioneve të transportit;

- c) për mjetet e transportit rrugor për përdorim privat:
 - i. nga studentët, për periudhën që ata qëndrojnë në territorin doganor të Republikës së Shqipërisë për qëllimin e vetëm të ndjekjes së studimeve;
 - ii. nga persona të ngarkuar me detyra me kohëzgjatje të caktuar, për periudhën që qëndrojnë në territorin doganor të Republikës së Shqipërisë me qëllimin e vetëm të plotësimit të detyrës së tyre;
 - iii. në raste të tjera, duke përfshirë kuajt e shalës apo kafshët e punës dhe mjetet e tërhequra prej tyre, 6 muaj;
- ç) për mjetet e transportit ajror që përdoren privatisht, 6 muaj;
- d) për mjetet transportit detar dhe ujqor që përdoren privatisht, 18 muaj;
- dh) për kontejnerët, pajisjet dhe aksesoret e tyre, 12 muaj.

Neni 663

Afatet kohore për riekспорт në rastin e shërbimeve profesionale të qirasë

(Nenet 192, pika 1, dhe 195, pika 4, të Kodit)

(Shtuar pika 4 me VKM nr. 872, datë 30.12.2024)

1. Kur një mjet transporti ka qenë i importuar përkohësisht në Republikën e Shqipërisë me përjashtim të plotë nga detyrimi i importit në përputhje me nenin 657 dhe i është kthyer një shoqërie shërbimi profesional të qirasë, të vendosur në territorin doganor të Republikës së Shqipërisë, riekспортi për mbylljen e regjimit të lejimit të përkohshëm duhet të kryhet brenda gjashtë muajve nga data e hyrjes së mjeteve të transportit në territorin doganor të Republikës së Shqipërisë.

Kur mjete të transportit merret sërish në përdorim nga shërbimi profesional i qirasë për një person të vendosur jashtë territorit doganor të Republikës së Shqipërisë, ose për individë që e kanë vendbanimin e tyre të zakonshëm brenda territorit doganor të Republikës së Shqipërisë, riekспортimi që bën mbylljen e regjimit të lejimit të përkohshëm duhet të kryhet brenda gjashtë muajve nga data e hyrjes së mjeteve të transportit në territorin doganor të Republikës së Shqipërisë dhe brenda tri javëve nga përfundimi i kontratës për rimarrje me qira.

Datë e hyrjes në territorin doganor të Republikës së Shqipërisë konsiderohet të jetë data e lidhjes të kontratës së qiramarrjes, sipas së cilës mjete të transportit është përdorur në kohën e hyrjes në këtë territor, përveç rastit kur provohet data aktuale e hyrjes.

2. Autorizimi për lejimin e përkohshëm të mjeteve të transportit për përdorim, siç përmendet në pikën 1, jepet me kusht që mjetet e transportit të riekспортohen.

3. Në rastin e referuar në pikën 2, të nenit 660, nëse mjete të transportit është përdorur nga një individ për t'u kthyer në vendin e tij të banimit në territorin doganor të Republikës së Shqipërisë ose riekспортohet për t'u larguar nga territori doganor i Republikës së Shqipërisë, brenda tre javëve nga data e lidhjes së kontratës së qiramarrjes ose kontratës së rimarrjes me qira, duhet t'i kthejë mjetin e transportit shoqërisë së shërbimit profesional të qirasë, të vendosur në territorin doganor të Republikës së Shqipërisë.

4. Në rastin e përmendur në pikën 2/1, të nenit 660, mjetet e transportit rrugor riekспортohen brenda 8 (tetë) ditëve nga vendosja nën regjimin e lejimit të përkohshëm.

Nënseksioni 3

Mallra të ndryshme nga mjetet e transportit, paletat dhe kontejnerët

Neni 664

Sendet personale dhe mallrat për qëllime sportive të importuara nga udhëtarët

(Shkronja “ç”, e pikës 2, të nenit 223, të Kodit)

Përjashtimi i plotë nga detyrimi i importit jepet në lidhje me mallrat e importuara nga udhëtarët që

janë banues jashtë territorit doganor të Republikës së Shqipërisë, në rastet kur përmbushet një nga kushtet e mëposhtme:

- a) Mallrat janë sende personale të nevojshme për udhëtim;
- b) Mallrat janë të destinuara për t'u përdorur për qëllime sportive.

Neni 665

Materialet e nevojshme për detarët

(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për materialet e nevojshme për detarët në rastet e mëposhtme:

- a) Kur ato janë përdorur në një anije në trafikun ndërkombëtar detar;
- b) Kur ato shkarkohen nga një anije e tillë dhe përdoren përkohësisht në breg nga ekuipazhi;
- c) Kur ato janë përdorur nga ana e ekuipazhit të një anijeje të tillë në qendra kulturore ose sociale të menaxhuara nga organizata jofitimprurëse ose në vende kulti, ku mbahen rregullisht shërbimet fetare për detarët.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 666

Materialet e ndihmave në raste fatkeqësish

(Shkronja “ç”, e pikës 2, të nenit 223, të Kodit)

Përfshirja e plotë nga detyrimi i importit jepet për materialet e ndihmave në raste fatkeqësish kur ato përdoren për përballimin e pasojave të fatkeqësive apo situatave të ngjashme që ndikojnë në territorin doganor të Republikës së Shqipërisë.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 667

Pajisjet mjekësore, kirurgjikale dhe laboratorike

(Shkronja “ç”, e pikës 2, të nenit 223, të Kodit)

Përfshirja e plotë nga detyrimi i importit jepet për pajisjet mjekësore, kirurgjikale dhe laboratorike, të cilat janë dërguar hua me kërkesë të një spitali apo institucioni tjetër mjekësor i cili ka nevojë urgjente për pajisje të tilla për të plotësuar pamjaftueshmërinë e pajisjeve të veta si dhe kur ato përdoren për qëllime diagnostikimi ose terapeutike. Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 668

Kafshët

(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për kafshët në pronësi të një personi të vendosur jashtë territorit doganor të Republikës së Shqipërisë.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 669

Mallrat për përdorim në zonat kufitare
(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për mallrat e mëposhtme që kanë për qëllim përdorimin në zonat kufitare:

- a) pajisjet në pronësi dhe të përdoruara nga persona të vendosur në një zonë kufitare të një vendi tjetër ngjitur me zonën kufitare të Republikës së Shqipërisë, ku do të përdoren mallrat;
- b) mallrat e përdorura për projekte ndërtimi, riparimi ose mirëmbajtjeje të infrastrukturës së një zone të tillë kufitare në Republikën e Shqipërisë, nën përgjegjësinë e autoriteteve publike.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë, për mallrat e përmendura në shkronjën “b”.

Neni 670

Mbajtëse audiovizive ose informacioni si dhe materiale reklame

(Shkronja “ç”, e pikës 2, të nenit 223, të Kodit)

Përfshirja nga detyrimi i importit jepet për mallrat e mëposhtme:

- a) mbajtëse audiovizive (figure-zëri) ose informacioni që ofrohen pa pagesë dhe përdoren për qëllime të demonstrimit para tregtimit, të destinuara për të prodhuar kolona zanore, dublime ose riprodhime;
- b) materiale të përdorura vetëm për qëllime reklame, përfshirë mjetet e transportit të pajisura posaçërisht për këto qëllime.

Neni 671

Pajisje profesionale

(Shkronja “ç”, e pikës 2, të nenit 223, të Kodit)

1. Përfshirja e plotë nga detyrimi i importit jepet për pajisje profesionale të cilat plotësojnë kushtet e mëposhtme:

- a) Janë në pronësi të një personi të vendosur jashtë territorit doganor të Republikës së Shqipërisë;
- b) Janë importuar ose nga një person i vendosur jashtë territorit doganor të Republikës së Shqipërisë ose nga një i punësuar i tij, i vendosur në territorin doganor të Republikës së Shqipërisë;
- c) Janë përdorur nga importuesi ose nën mbikëqyrjen e tij, përveç rasteve të bashkëprodhimeve audiovizive.

2. Duke anashkaluar pikën 1, përfshirja e plotë nga detyrimi i importit jepet për instrumentet muzikore portative të importuara përkohësisht nga udhëtarët me qëllim që të përdoren si pajisje profesionale.

Udhëtarët mund të jenë banues brenda ose jashtë territorit doganor të Republikës së Shqipërisë.

3. Përfshirja e plotë nga detyrimi i importit nuk jepet në lidhje me pajisje profesionale të cilat përdoren, si më poshtë:

- a) për prodhimin industrial të mallrave;
- b) për paketimin industrial të mallrave;
- c) për shfrytëzimin e burimeve natyrore;
- ç) për ndërtimin, riparimin ose mirëmbajtjen e ndërtesave;
- d) për punime të tokës dhe punime të ngjashme.

Shkronjat “c”, “ç” dhe “d” nuk zbatohen për veglat e dorës.

Neni 672

Materiali pedagogjik dhe pajisjet shkencore

(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për materiale pedagogjike dhe pajisje shkencore në rastet kur plotësohen kushtet e mëposhtme:

a) Kur ato janë në pronësi të një personi të vendosur jashtë territorit doganor të Republikës së Shqipërisë;

b) Kur ato importohen nga institucione shkencore publike ose private, mësimore apo të formimit profesional, jofitimprurëse dhe përdoren vetëm në mësimdhënie, formim profesional apo kërkime shkencore nën përgjegjësinë e institucionit importues;

c) Kur ato importohen në sasi të arsyeshme, duke pasur parasysh qëllimin e importit;

ç) Kur ato nuk janë përdorur për qëllime ekskluzivisht tregtare.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë, për mallrat e përmendura në shkronjën “b”.

Neni 673

Paketimet

(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për mallrat e mëposhtme:

a) paketimet e importuara të mbushura me qëllim për riekспорт, qoftë bosh ose të mbushura;

b) paketimet e importuara bosh me qëllim për riekспорт të mbushura.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 674

Format, stampat, kallëpet, vizatimet, skicat, instrumentet e matjes, kontrollit dhe testimit si dhe artikuj të tjerë të ngjashëm

(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për format, stampat, kallëpet, vizatimet, skicat, instrumentet e matjes, kontrollit dhe testimit si dhe artikujt e tjerë të ngjashëm, në rastet kur plotësohen kushtet e mëposhtme:

a) Kur ato janë në pronësi të një personi të vendosur jashtë territorit doganor të Republikës së Shqipërisë;

b) Kur ato janë përdorur në prodhim nga një person i vendosur në territorin doganor të Republikës së Shqipërisë dhe më shumë se 50% e prodhimit që rezulton nga përdorimi i tyre eksportohet.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 675

Mjetet dhe instrumentet e posaçme

(Shkronja “ç”, e pikës 2, të nenit 223, të Kodit)
(Shtuar paragrafi i dytë me VKM nr. 872, datë 30.12.2024)

Përfshirja e plotë nga detyrimi i importit jepet për mjetet dhe instrumentet e posaçme kur plotësohen kushtet e mëposhtme:

a) Kur ato janë në pronësi të një personi të vendosur jashtë territorit doganor të Republikës së Shqipërisë;

b) Kur ato janë vënë në dispozicion të një personi të vendosur në territorin doganor të Republikës

së Shqipërisë për prodhimin e mallrave dhe më shumë se 50% e mallrave që rezultojnë nga përdorimi i tyre eksportohen.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 676

Mallrat e përdorura për kryerjen e testeve apo që i nënshtrohen testeve

(Shkronja “ç”, e pikës 2, të nenit 223, të Kodit)

(Shtuar paragrafi i dytë me VKM nr. 872, datë 30.12.2024)

Përjashtimi i plotë nga detyrimi i importit jepet për mallrat në një nga situatat e mëposhtme:

- a) Kur ato i nënshtrohen testeve, eksperimenteve apo demonstrimeve;
- b) Kur ato i nënshtrohen një testi si kusht pranimit të parashikuar në kontratën e shitjes;
- c) Kur ato janë përdorur për kryerjen e testeve, eksperimenteve apo demonstrimeve pa përfitim financiar.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 677

Mostrat

(Shkronja “ç”, e pikës 2, të nenit 223, të Kodit)

(Shtuar paragrafi i dytë me VKM nr. 872, datë 30.12.2024)

Përjashtimi i plotë nga detyrimi i importit jepet për mostrat që përdoren vetëm për t'u ekspozuar ose demonstruar në territorin doganor të Republikës së Shqipërisë, me kusht që sasia e mostrave të jetë e arsyeshme duke pasur parasysh përdorimin.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 678

Mjetet zëvendësuese të prodhimit

(Shkronja “ç”, e pikës 2, të nenit 223, të Kodit)

(Shtuar paragrafi i dytë me VKM nr. 872, datë 30.12.2024)

Përjashtimi i plotë nga detyrimi i importit jepet për mjetet zëvendësuese të prodhimit të cilat janë vënë përkohësisht në dispozicion të klientit nga furnizuesi ose riparuesi në pritje të dorëzimit ose riparimit të mallrave të ngjashme.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 679

Mallrat për panaire ose për shitje në situata të caktuara

(Shkronja “ç”, e pikës 2, të nenit 223, të Kodit)

(Shtuar paragrafi i dytë i pikës 1 me VKM nr. 872, datë 30.12.2024)

1. Përjashtimi i plotë nga detyrimi i importit jepet për mallrat që do të ekspozohen ose do të përdoren në një panair publik që nuk është organizuar ekskluzivisht për shitjen tregtare të mallrave ose për mallrat që janë marrë në evente të tilla nga mallrat e vendosura nën regjimin e lejitimit të përkohshëm.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Në raste të veçanta, autoritetet doganore mund të japin përjashtim të plotë nga detyrimi i importit

për mallrat që do të ekspozohen ose do të përdoren në evente të tjera ose që janë marrë në këto evente të tjera nga mallrat e vendosura nën regjimin e lejimit të përkohshëm.

2. Përjashtimi i plotë nga detyrimi i importit jepet për mallrat e dorëzuara nga pronari për provë të një person në Republikën e Shqipërisë, i cili ka të drejtën për t'i blerë ato pas kryerjes së provës.

3. Përjashtimi i plotë nga detyrimi i importit jepet për sa më poshtë:

a) veprat e artit, sendet e koleksionistëve dhe ato antike, siç përcaktohet në aneksin 72-04 të shtojcës A bashkëlidhur këtij vendimi dhe pjesë përbërëse e tij, të importuara për qëllime të ekspozitës, me synim shitjen e mundshme;

b) mallra të tjera, përveç atyre të sapoproduhuara që janë importuar me qëllim shitjen e tyre në ankand.

Neni 680

Pjesët e këmbimit, aksesoret dhe pajisjet

(Shkronja “ç”, e pikës 2, të nenit 223, të Kodit)

(Shtuar paragrafi i dytë me VKM nr. 872, datë 30.12.2024)

Përjashtimi i plotë nga detyrimi i importit jepet për pjesët e këmbimit, aksesoret dhe pajisjet të cilat përdoren për riparim dhe mirëmbajtje, duke përfshirë ndreqjen, rregullimin dhe ruajtjen e mallrave të vendosura nën regjimin e lejimit të përkohshëm.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 680/1

Mallrat që do të transportohen ose përdoren në kuadër të aktiviteteve ushtarake (shkronjat “c” dhe “ç”, të pikës 2, të nenit 223, të Kodit)

(Shtuar me VKM nr. 872, datë 30.12.2024)

Përjashtimi i plotë nga detyrimet e importit jepet për mallrat që do të transportohen ose do të përdoren në kuadër të aktiviteteve ushtarake në bazë të formularit 302 të NATO-s.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë.

Neni 681

Mallra të tjera

(Shkronja “ç”, e pikës 2, të nenit 223, të Kodit)

(Shtuar paragrafi i dytë me VKM nr. 872, datë 30.12.2024)

Përjashtimi i plotë nga detyrimi i importit mund të jepet për mallra të tjera, përveç atyre të referuara në nenet 653 deri në 661 dhe 664 deri në 680 apo që nuk janë në përputhje me kushtet e këtyre neneve, në njërin nga situatat e mëposhtme:

a) Mallrat importohen në mënyrë rastësore për një periudhë jo më shumë se tre muaj;

b) Mallrat janë importuar në situata të veçanta dhe duke mos sjellë asnjë efekt ekonomik në Republikën e Shqipërisë.

Aplikuesi dhe mbajtësi i regjimit mund të jenë të vendosur brenda territorit doganor të Republikës së Shqipërisë në situatat e përmendura në shkronjën “b”.

Neni 682

Afate të posaçme për mbylljen e regjimit

(Pika 4, e nenit 195, të Kodit)
(Shtuar pika 3 me VKM nr. 872, datë 30.12.2024)

1. Për mallrat e referuara në shkronjën “c” të nenit 676, nenin 678, dhe pikën 2, të nenit 679, afati për mbyllje është 6 muaj nga momenti kur mallrat vendosen nën regjimin e lejimit të përkohshëm.
2. Për kafshët e referuara në nenin 668, afati për mbyllje do të jetë jo më pak se 12 muaj nga momenti kur kafshët vendosen nën regjimin e lejimit të përkohshëm.
3. Për mallrat e përmendura në paragrafin e parë, të nenit 680/1, afati kohor për mbyllje është 24 (njëzet e katër) muaj nga koha që mallrat vendosen nën regjimin e lejimit të përkohshëm, përveç se në rastet kur marrëveshjet ndërkombëtare caktojnë një afat më të gjatë kohor.

Neni 683

Mbyllja e regjimit të lejimit të përkohshëm në rastet që kanë të bëjnë me mjetet e transportit hekurudhor, paleta dhe kontejnerë
(Neni 195 i Kodit)

1. Për mjetet e transportit hekurudhor që përdoren bashkërisht në kuadrin e një marrëveshjeje midis transportuesve të Republikës së Shqipërisë dhe të vendeve të tjera që ofrojnë shërbime të transportit hekurudhor, regjimi i lejimit të përkohshëm mbyllet kur mjetet e transportit hekurudhor të llojit të njëjtë ose të njëjtës vlerë me ato të vëna në dispozicion të një personi të vendosur në territorin doganor të Republikës së Shqipërisë, janë eksportuar ose riekportuar.
2. Për paletat, regjimi i lejimit të përkohshëm mbyllet kur paleta e llojit të njëjtë apo të njëjtës vlerë si ato që kanë qenë të vendosura nën regjim, janë eksportuar ose riekportuar.
3. Për kontejnerët, në përputhje me marrëveshjen për trajtimin doganor të kontejnerëve të përdorur në transportin ndërkombëtar, regjimi i lejimit të përkohshëm mbyllet kur kontejnerët e llojit të njëjtë apo të njëjtës vlerë si ato që kanë qenë të vendosura nën regjim janë eksportuar ose riekportuar.

Neni 684

Mbyllja regjimit për mallrat për ekspozita/panaire apo për shitje
(Neni 195 i Kodit)

Për qëllime të mbylljes së regjimit të lejimit të përkohshëm të mallrave të përmendura në pikën 1, të nenit 679, me përjashtim të mallrave të përmendura në nenin 1, të ligjit nr.61/2012, “Për akcizat në Republikës së Shqipërisë”, konsumi i tyre, shkatërrimi apo shpërndarja falas për publikun në aktivitet do të konsiderohet si riekportim me kusht që sasia e tyre të përputhet me natyrën e ekspozitës/panairit, numrin e vizitorëve dhe shkallën e pjesëmarrjes së mbajtësit të regjimit.

Neni 684/1

Mbyllje e veçantë për mallrat që do të transportohen ose përdoren në kuadër të aktiviteteve ushtarake
(neni 195, i Kodit)

(Shtuar me VKM nr. 872, datë 30.12.2024)

Për qëllime të mbylljes së regjimit të lejimit të përkohshëm, për sa i përket mallrave të përmendura në nenin 680/1, konsumi ose shkatërrimi i tyre konsiderohet si riekportim, me kusht që sasia e konsumuar ose e shkatërruar përkon me natyrën e aktivitetit ushtarak.

Neni 685

Të dhëna për t'u përfshirë në deklaratën doganore
(Pika 2, e nenit 17, të Kodit)

1. Kur mallrat e vendosura nën regjimin e lejimit të përkohshëm, më pas vendosen në një regjim doganor që mundëson mbylljen e regjimit të lejimit të përkohshëm, në përputhje me pikën 1, të nenit 195, të Kodit, atëherë deklarata doganore për regjimin pasues doganor, përveç Carnet ATA/CPD, duhet të përmbajë edhe shënimin "LP" si dhe numrin përkatës të autorizimit, në rast se është e mundur.
2. Kur mallrat e vendosura nën regjimin e lejimit të përkohshëm janë rieksportuar në përputhje me pikën 1, të nenit 195, të Kodit, atëherë deklarata e rieksportit, përveç se Carnet ATA/CPD, duhet të përmbajë të dhënat e referuara në pikën 1.

Seksioni 2
Përdorimi i veçantë përfundimtar (end-use)

Neni 686
Detyrimi i mbajtësit të autorizimit të përdorimit të veçantë përfundimtar (end-use)
(Shkronja "a", e pikës 1, të nenit 192, të Kodit)

Autorizimi për përdorimin e regjimit të përdorimit të veçantë përfundimtar (*end-use*) jepet me kusht që mbajtësi i autorizimit të përmbushë njërin prej detyrimeve të mëposhtme:

- a) Të përdorë mallrat për qëllimet e parashikuara për zbatimin e përjashtimit prej detyrimeve ose të normës së reduktuar të detyrimeve;
- b) Për të transferuar detyrimin, siç referohet në shkronjën "a", te një person tjetër sipas kushteve të përcaktuara nga autoritetet doganore.

KREU 5
Përpunimi

Neni 687
Autorizimi
(Neni 192 i Kodit)

1. Autorizimi për regjimin e përpunimit duhet të plotësojë një nga masat e mëposhtme:
 - a) që produktet e përpunuara të jenë përftuar nga përpunimi i mallrave të vendosura nën regjimin e përpunimit;
 - b) që të jenë plotësuar kushtet për përdorimin e mallrave ekuivalente në përputhje me nenin 201 të Kodit ose sistemin e shkëmbimit standard në përputhje me nenin 234 të Kodit.
 2. Autorizimi për përpunim aktiv mund të jepet për aksesoret e prodhimit në kuptim të shkronjës "d", të pikës 37, të nenit 6, të Kodit, me përjashtim të rasteve të mëposhtme:
 - a) Karburantet dhe burimet e energjisë, përveç atyre që nevojiten për kontrollin e produkteve të përpunuara ose evidentimin e defekteve në mallrat e vendosura në regjim dhe që kanë nevojë për riparim;
 - b) Lubrifikantet, përveç atyre që nevojiten për testimin, rregullimin apo deformimin e produkteve të përpunuara;
 - c) Pajisjet dhe mjetet.
 3. Autorizimi për përpunim aktiv jepet vetëm kur plotësohen kushtet e mëposhtme:
 - a) Mallrat nuk mund të rikthehen ekonomikisht pas përpunimit në gjendjen ose përshkrimin e tyre, ashtu siç kanë qenë kur u vendosën nën regjim;
 - b) Përdorimi i regjimit nuk mund të sjellë shmangien e rregullave në lidhje me origjinën dhe kufizimet sasiore të zbatueshme për mallrat e importuara.
- Shkronja "a", e kësaj pike nuk zbatohet nëse shuma e detyrimit të importit është e përcaktuar në

bazë të pikës 3, të nenit 81, të Kodit.

Neni 688

Të dhëna për t'u përfshirë në deklaratën doganore për përpunim aktiv

(Pika 2, e nenit 17, të Kodit)

1. Kur mallrat e vendosura nën regjimin e përpunimit aktiv apo produktet e përpunuara që përftohen prej tyre janë vendosur më pas në një regjim doganor që mundëson mbylljen e regjimit të përpunimit aktiv në përputhje me pikën 1, të nenit 195, të Kodit, deklarata doganore për regjimin pasues doganor, pa përfshirë Carnet ATA/CPD, duhet të përmbajë shënimin "PA" dhe numrin përkatës të autorizimit ose numrin INF. Kur mallrat e vendosura nën regjimin e përpunimit aktiv janë objekt i masave të politikave të veçanta tregtare dhe masa të tilla vazhdojnë të jenë të zbatueshme në kohën kur mallrat qoftë në formën e produkteve të përpunuara ose jo, janë vendosur në një regjim doganor pasues, deklarata doganore për regjimin doganor pasues duhet të përmbajë të dhënat e përmendura në paragrafin e parë, si dhe shënimin "MPT".

2. Kur mallrat e vendosura nën regjimin e përpunimit aktiv janë rieksportuar, në përputhje me pikën 1, të nenit 242, të Kodit, deklarata e rieksportit duhet të përmbajë të dhënat e përmendura në pikën 1.

Neni 689

Raste të veçanta mbylljes të përpunimit aktiv IM/EX

(Neni 195 i Kodit)

(Shtuar nënparagrafi në shkronjën "a" të pikës 2 me VKM nr. 872, datë 30.12.2024)

1. Për qëllime të mbylljes të regjimit të përpunimit aktiv IM/EX, të mëposhtmet do të konsiderohen si rieksportime:

a) produktet e përpunuara i janë dërguar personave që kanë të drejtë për t'u përjashtuar nga detyrimi i importit në përputhje me Konventën e Vjenës të datës 18 prill 1961, mbi Marrëdhëniet Diplomatike, ose në Konventën e Vjenës të 24 prillit 1963, për Marrëdhëniet Konsullore, ose Konventën e Nju Jork-ut, më 16 dhjetor 1969, për misionet e posaçme, siç përmendet në shkronjën "a", të pikës 1, të nenit 184, të Kodit;

b) produktet e përpunuara i janë dërguar forcave të armatosura të vendeve të tjera të vendosura në territorin e Republikës së Shqipërisë, kur jepet përjashtimi nga detyrimet e importit në përputhje me shkronjën "c", të pikës 1, të nenit 10, të ligjit nr.61/2012, "Për akcizat në Republikën e Shqipërisë";

c) furnizimi i avionëve;

ç) furnizimi i anijeve kozmike dhe pajisjeve përkatëse;

d) dërgimi i produkteve kryesore të përpunuara për të cilën detyrimi i importi erga omnes është i përjashtuar ose për të cilat është lëshuar një certifikatë vlefshmërie ajrore në përputhje me legjislacionin në fuqi;

dh) asgjësimi, në përputhje me dispozitat përkatëse, të produkteve dytësore të përpunuara, shkatërrimi i të cilave nën mbikëqyrjen doganore është i ndaluar për arsye mjedisore.

2. Pika 1 nuk zbatohet:

a) kur mallrat joshqiptare të vendosura nën regjimin e përpunimit aktiv IM/EX, janë objekt i masave të politikave bujqësore ose tregtare, detyrimi të përkohshëm ose përfundimtar anti-dumping, një mase kundërbalancuese, një mase mbrojtëse ose një detyrimi shtesë që rrjedhin nga pezullimi i përjashtimeve nëse do të ishin deklaruar për çlirim për qarkullim të lirë;

Megjithatë, pika 1 zbatohet në rastet kur mallrat joshqiptare, të vendosura nën regjimin e përpunimit aktiv IM/EX, i nënshtrohen një mbikëqyrjeje paraprake, nëse janë deklaruar për vendosje në qarkullim të lirë, me kusht që mbajtësi i autorizimit të përpunimit aktiv IM/EX të japë

elementet e të dhënave, në përputhje me masën përkatëse të mbikëqyrjes.

b) kur lind një borxh doganor në përputhje me pikën 1, të nenit 73, të Kodit për mallrat jooriginuese të vendosura nën regjimin e përpunimit aktiv IM/EX, nëse mbajtësi i autorizimit synon të riekportojë produktet e përpunuara.

3. Në rastin e shkronjës “c”, të pikës 1, zyra doganore mbikëqyrëse lejon mbylljen e regjimit të përpunimit aktiv IM/EX pasi mallrat e vendosura nën regjim janë përdorur për herë të parë për prodhimin, riparimin duke përfshirë mirëmbajtjen, modifikimin apo shndërrimin e avionëve ose pjesëve të tyre, por me kusht që të dhënat e mbajtësit të regjimit janë të tilla që bëjnë të mundur verifikimin nëse regjimi është zbatuar në mënyre korrekte.

4. Në rastin e shkronjës “ç”, të pikës 1, zyra e mbikëqyrjes doganore lejon mbylljen e regjimit të përpunimit aktiv IM/EX pasi mallrat e vendosura nën regjim janë përdorur për herë të parë për prodhimin, riparimin duke përfshirë mirëmbajtjen, modifikimin apo shndërrimin e satelitëve hapësinor, anijet e tyre kozmike nisëse dhe pajisjet e stacionit bazë hapësinor dhe pjesët e tyre që janë pjesë integrale të sistemeve, me kusht që të dhënat e mbajtësit të regjimit janë të tilla që bëjnë të mundur verifikimin nëse regjimi është zbatuar në mënyre korrekte.

5. Në rastin e shkronjës “d”, të pikës 1, zyra doganore e mbikëqyrjes lejon mbylljen e regjimit të përpunimit aktiv IM/EX pasi mallrat e vendosura nën regjim janë përdorur për herë të parë në operacionet e përpunimit të produkteve të përpunuara e dërguara ose të pjesëve të tyre, por me kusht që të dhënat e mbajtësit të procedurës janë të tilla që bëjnë të mundur verifikimin nëse regjimi është zbatuar në mënyre korrekte.

6. Në rastin e shkronjës “dh”, të pikës 1, mbajtësi i regjimit të përpunimit aktiv duhet të provojë se mbyllja e procedurës së përpunimit aktiv në përputhje me rregullat normale është ose e pamundur ose e parrealizueshme nga ana ekonomike.

Neni 690

Produktet e përpunuara apo mallrat që konsiderohet se janë çliruar për qarkullim të lirë

(Neni 195 i Kodit)

1. Kur autorizimi për regjimin e përpunimit aktiv IM/EX ka përcaktuar se prodhimet e përpunuara apo mallrat e vendosura nën regjim konsiderohen se janë çliruar për qarkullim të lirë, nëse nuk kanë qenë të vendosura nën një regjim doganor të më passhëm ose të rieksporuara në përfundim të afatit për mbyllje, deklarata doganore për çlirimin për qarkullim të lirë, do të konsiderohet të jetë paraqitur dhe çlirimi është dhënë në datën e përfundimit të afatit për mbyllje.

2. Në rastet e përmendura në pikën 1, produktet apo mallrat e vendosura nën regjimin e përpunimit aktiv IM/EX do të konsiderohen mallrat shqiptare kur ato të hidhen në treg.

Neni 691

Përpunimi pasiv IM/EX

(Pika 1, e nenit 192, të Kodit)

1. Në rastin e përpunimit pasiv IM/EX, autorizimi duhet të specifikojë afatin brenda të cilit mallrat shqiptare, të cilat janë zëvendësuar nga mallrat ekuivalente, do të vendosen nën përpunimin pasiv. Ky afat nuk duhet t'i kalojë gjashtë muaj.

2. Me kërkesë të mbajtësit të autorizimit, afati mund të zgjatet edhe pas mbarimit të tij, me kusht që afati në total të mos e kalojë një vit.

3. Në rast të importit paraprak të produkteve të përpunuara duhet të sigurohet një garanci për mbulimin e shumës së detyrimit të importit, e cila do të jetë e pagueshme në rast se mallrat shqiptare të zëvendësuara nuk do të vendoseshin nën përpunimin pasiv në përputhje me pikën 1.

Neni 692
Riparimi nën përpunimin pasiv
(Pika 1, e nenit 192, të Kodit)

Në rastet kur regjimi i përpunimit pasiv kërkohet për riparim, mallrat e eksportuara përkohësisht duhet të jenë të riparueshme dhe regjimi nuk mund të përdoret për të përmirësuar performancën teknike të mallrave.

TITULLI VIII
DALJA E MALLRAVE NGA TERRITORI DOGANOR I REPUBLIKËS
SË SHQIPËRISË

KREU 1
Formalitetet para daljes së mallrave

Seksioni 1
Afatet e paraqitjes dhe rastet kur nuk kërkohet paraqitja e një deklarate të paranisjes

Neni 693
Sistemi elektronik lidhur me daljet
(Pika 1, e nenit 17, të Kodit)

Për përpunimin dhe shkëmbimit e informacioneve në lidhje me daljen e mallrave jashtë territorit doganor të Republikës së Shqipërisë, do të përdoret sistemi elektronik i ngritur në përputhje me pikën 1, të nenit 17, të Kodit.

Paragrafi i parë i këtij neni do të zbatohet sipas Planit të punës të miratuar nga ministri përgjegjës për financat.

Neni 694
Mallra që nuk mbulohen nga një deklaratë para-nisjes
(Neni 239 i Kodit)

Nëse konstatohet se mallrat që kanë për të dalë jashtë territorit doganor të Republikës së Shqipërisë, nuk janë të mbuluara nga një deklaratë paranisje, përveçse kur ky detyrim është hequr, dalja e mallrave duhet të shoqërohet nga një deklaratë e tillë.

Neni 695
Afati për paraqitjen e deklaratës të paranisjes
(Pika 1, e nenit 236, të Kodit)
(Ndryshuar nëndarja “ii” e shkronjës “a” të pikës 1 me VKM nr. 872, datë 30.12.2024)

1. Deklarata e paranisjes referuar nenit 236 të Kodit depozitohet në zyrën doganore kompetente, brenda afateve kohore të mëposhtme:

- a) në rastin e trafikut detar:
 - i. për lëvizjet e ngarkesave me kontejnerë, përveç atyre të përmendura në nënndarjet “ii” dhe “iii”, jo më vonë se 24 orë përpara se mallrat të ngarkohen në anijen me të cilën do të largohen nga territori doganor i Republikës së Shqipërisë;
 - ii. për lëvizjet e ngarkesave me kontejnerë midis territorit doganor të Republikës së Shqipërisë dhe Groenlandës, Ishujve Faroe, Islandës apo porteve në Detin Balltik, Detin e Veriut, Detin e Zi apo të Mesdheut, si dhe të gjitha porteve të Marokut dhe porteve të Mbretërisë së Bashkuar të

Britanisë së Madhe dhe Irlandës së Veriut, me përjashtim të porteve të vendosura në Irlandën e Veriut dhe porteve të Ishujve të Kanalit (*Channel*) dhe Ishullit të Njeriut (*Man*), të paktën 2 (dy) orë para nisjes nga porti i territorit doganor të Republikës së Shqipërisë;

iii. për lëvizjet që nuk përfshijnë ngarkesa në kontejnerë, të paktën 2 orë para nisjes nga porti i territorit doganor të Republikës së Shqipërisë;

b) në rastin e trafikut ajror, të paktën 30 minuta para nisjes nga aeroporti i territorit doganor të Republikës së Shqipërisë;

c) në rastin e trafikut rrugor dhe atij të brendshëm ujor, jo më vonë se një orë para se mallrat të largohen nga territori doganor i Republikës së Shqipërisë;

ç) në rastin e trafikut hekurudhor:

i. kur udhëtimi me tren nga stacioni i fundit i trenit për te zyra doganore e daljes zgjat më pak se dy orë, të paktën një orë para mbërritjes së mallrave në vendin për të cilin zyra doganore e daljes është kompetente;

ii. në të gjitha rastet e tjera, të paktën dy orë para se mallrat të largohen nga territori doganor i Republikës së Shqipërisë.

2. Pavarësisht nga pika 1, kur deklarata e paranisjes ka të bëjë me mallra, për të cilat kërkohet rimbursim në përputhje me legjislacionin e posaçëm lidhur me rimbursimet për produktet bujqësore, ajo depozitohet në zyrën doganore kompetente jo më vonë se koha e ngarkimit të mallrave në përputhje me përcaktimet specifike të legjislacionit të posaçëm.

3. Në situatat e mëposhtme, afati i fundit për depozitim të deklarates së paranisjes është ai që zbatohet për mjetin aktiv të transportit të përdorur për t'u larguar nga territori doganor i Republikës së Shqipërisë:

a) kur mallrat kanë mbërritur në zyrën doganore të daljes me një mjet tjetër transporti nga i cili janë transferuar para se të largohen nga territori doganor i Republikës së Shqipërisë (transporti inter-modal);

b) kur mallrat kanë mbërritur në zyrën doganore të daljes me një mjet transporti i cili në vetvete është transportuar me një mjet aktiv transporti, në rastet kur largohen nga territori doganor i Republikës së Shqipërisë (transporti i kombinuar).

4. Afatet e referuara në pikat 1, 2 dhe 3 nuk zbatohen në rastet e forcave madhore.

Neni 696

Përjashtim nga detyrimi për të paraqitur një deklaratë paranisjeje

(Shkronja "b", e pikës 2, të nenit 236, të Kodit)

(Ndryshuar shkronja "f" e pikës 1 me VKM nr. 872, datë 30.12.2024)

1. Pa rënë ndesh me detyrimin për të depozituar një deklaratë doganore në përputhje me pikën 1, të nenit 146, të Kodit, apo një deklaratë të rieksporit në përputhje me pikën 1, të nenit 242, të Kodit, depozitimi i një deklarate të paranisjes nuk kërkohet për mallrat e mëposhtme:

a) energjinë elektrike;

b) mallrat që dalin me tubacione;

c) artikujt e korrespondencës;

ç) mallrat e lëvizura sipas rregullave të akteve të Bashkimit Postar Universal;

d) pajisjet/sendet shtëpiake, siç përcaktohen në shkronjën "c", të nenit 399, me kusht që ato të mos jenë transportuar sipas një kontrate transporti;

dh) mallrat e ndodhura në bagazhin personal të udhëtarëve;

e) mallrat e referuara në pikën 1, të nenit 310, me përjashtim të rasteve kur kryhet në bazë të një kontrate transporti, të:

i. paletave, pjesëve të këmbimit, aksesoreve dhe pajisjeve për paleta;

ii. kontejnerëve, pjesëve të këmbimit, aksesorëve dhe pajisjeve për kontejnerët;
iii. mjeteve të transportit, pjesëve të këmbimit, aksesorëve dhe pajisjeve për mjete të transportit;
ë) mallrat e mbuluara nga Carnet ATA dhe Carnet CPD;
f) mallrat e transportuara ose të përdorura në kuadër të aktiviteteve ushtarake në bazë të formularit 302 të NATO-s.

g) mallrat e transportuara me anije që lëvizin mes porteve të Republikës së Shqipërisë pa ndaluar në asnjë port jashtë territorit doganor të Republikës së Shqipërisë;

gj) mallrat e transportuara me avion mes aeroporteve të Republikës së Shqipërisë pa ndaluar në asnjë aeroport jashtë territorit doganor të Republikës së Shqipërisë;

h) armët dhe pajisjet ushtarake të nxjerra jashtë territorit doganor të Republikës së Shqipërisë nga autoritetet përgjegjëse të mbrojtjes ushtarake të Republikës së Shqipërisë, me transport ushtarak ose transport për përdorim vetëm të autoriteteve ushtarake;

i) mallrat e mëposhtme të nxjerra jashtë territorit doganor të Republikës së Shqipërisë direkt në instalimet në det të hapur që operohen nga një person i vendosur në territorin doganor të Republikës së Shqipërisë:

i.1) mallrat që do të përdoren për ndërtimin, riparimin, mirëmbajtjen ose këmbimin e instalimeve në det të hapur;

i.2) mallrat që do të përdoren për të përshtatur ose pajisur instalimet në det të hapur;

i.3) furnizimet për t'u përdorur apo konsumuar në instalimet në det të hapur;

j) mallrat për të cilat përjashtimi prej detyrimeve mund të kërkohej në bazë të Konventës së Vjenës për marrëdhëniet diplomatike të 18 prillit 1961, Konventës së Vjenës mbi marrëdhëniet konsullore të datës 24 prill 1963, konventave të tjera konsullore ose Konventës së Nju Jorkut të datës 16 dhjetor 1969 për misione të posaçme;

k) mallrat të cilat janë furnizuar për t'u trupëzuar si pjesë ose aksesorë në anije ose avionë dhe për funksionimin e motorëve, makinave dhe pajisjeve të tjera të anijeve ose të avionëve, si dhe ushqime dhe artikuj të tjerë që do të konsumohen ose do të shiten në bord.

2. Depozitimi i deklaratës para nisjes nuk do të kërkohej për mallrat në situatat e mëposhtme:

a) Kur një anije që transporton mallra mes porteve të Republikës së Shqipërisë ndalon në një port jashtë territorit doganor të Republikës së Shqipërisë dhe mallrat mbeten të ngarkuara në bordin e anijes gjatë ndalesës në portin jashtë territorit doganor të Republikës së Shqipërisë;

b) Kur një avion që transporton mallra ndërmjet aeroporteve të Republikës së Shqipërisë ndalon në një aeroport jashtë territorit doganor të Republikës së Shqipërisë dhe mallrat mbeten të ngarkuara në bordin e avionit gjatë ndalesës në aeroportin jashtë territorit doganor të Republikës së Shqipërisë;

c) kur, në një port ose aeroport, mallrat nuk janë shkarkuar nga mjeti i transportit me të cilin u transportuan në territorin doganor të Republikës së Shqipërisë dhe që do t'i transportojë jashtë këtij territori; ç) kur mallrat janë ngarkuar në një port ose aeroport të mëparshëm në territorin doganor të Republikës së Shqipërisë, ku është depozituar një deklaratë e paranisjes ose zbatohet përjashtimi nga detyrimi për të depozituar një deklaratë të paranisjes dhe mallrat qëndrojnë në mjete të transportit me të cilat do të dalin jashtë territorit doganor të Republikës së Shqipërisë;

d) kur mallrat, që janë në magazinim të përkohshëm ose nën regjimin e zonës së lirë, transbordohen nën mbikëqyrjen e së njëjtës zyre doganore nga mjete të transportit që i sollën ato në këto ambiente, në anijen, avionin apo hekurudhën që do t'i transportojë ato jashtë territorit doganor të Republikës së Shqipërisë, me kusht që të plotësohen kushtet e mëposhtme:

i. transbordimi të kryhet brenda 14 ditëve nga data e paraqitjes së mallrave në përputhje me nenet 134 ose 218 të Kodit ose në rrethana të jashtëzakonshme, brenda një periudhe më të gjatë të autorizuar nga autoritetet doganore, kur periudha prej 14 ditësh nuk është e mjaftueshme për të përballuar këto rrethana;

- ii. informacioni në lidhje me mallrat vihet në dispozicion të autoriteteve doganore;
- iii. për sa ka dijeni transportuesi destinacioni i mallrave dhe marrësi nuk ndryshojnë;
- dh) kur mallrat janë sjellë në territorin doganor të Republikës së Shqipërisë, por ato janë refuzuar nga autoritetet kompetente doganore dhe janë kthyer menjëherë në vendin e eksportit.

Neni 697

Analiza e riskut

(Neni 237 i Kodit)

1. Analiza e riskut kryhet para çlirimit të mallrave brenda afatit kohor që korrespondon me periudhën midis përfundimit të afatit për të paraqitur deklaratën e paronisjes të përcaktuar në nenin 384, dhe ngarkimit ose nisjes të mallrave, sipas rastit.

2. Kur zbatohet heqja e detyrimit për të paraqitur një deklaratë paronisjes në bazë të nenit 385, analiza e riskut kryhet në momentin e paraqitjes së mallrave në bazë të deklaratës doganore apo deklaratës të ri-eksportit që mbulon ato mallra ose, kur nuk është e mundur, në bazë të informacioneve të tjera për mallrat.

KREU 2

Formalitetet për daljen e mallrave

Seksioni 1

Zyra doganore e daljes, komunikimi dhe mjetet e komunikimit ndërmjet zyrave doganore të eksportit dhe daljes

Neni 698

Përcaktimi i zyrës doganore të daljes

(Pika 2, e nenit 147, të Kodit)

(Shfuqizuar pika 6 me VKM nr. 872, datë 30.12.2024)

1. Përveç kur zbatohen pikat 2 deri në 7, zyra doganore e daljes është zyra doganore kompetente për vendin nga ku mallrat lënë territorin doganor të Republikës së Shqipërisë për një destinacion jashtë këtij territori.

2. Në rastin e largimit të mallrave nga territori doganor i Republikës së Shqipërisë përmes një instalimi fiks transporti, zyra doganore e daljes është zyra doganore e eksportit.

3. Kur mallrat janë ngarkuar në një anije apo një avion për transport në një destinacion jashtë territorit doganor të Republikës së Shqipërisë, zyra doganore e daljes është zyra doganore kompetente për vendin ku mallrat janë ngarkuar mbi këtë anije apo avion.

4. Kur mallrat janë ngarkuar mbi një anije që nuk është caktuar për një shërbim transporti të rregullt detar të referuar në nenin 295, zyra doganore e daljes është zyra doganore kompetente për vendin ku mallrat janë ngarkuar në këto anije.

5. Kur, pasi është çliruar për eksport, mallrat janë vendosur nën regjimin e transitit të jashtëm, zyra doganore e daljes është zyra doganore e nisjes të transitit.

6. Shfuqizuar.

7. Me kërkesë, zyrë doganore e daljes do të jetë zyra doganore kompetente për vendin ku mallrat janë ngarkuar sipas një kontrate për transportin e mallrave jashtë territorit doganor të Republikës së Shqipërisë nga shoqëritë e hekurudhave, operatorët postar ose shoqëritë ajrore apo detare të transportit, me kusht që mallrat të largohen nga territori doganor i Republikës së Shqipërisë në rrugë hekurudhore, postare, ajrore ose detare.

8. Pikat 4, 5 dhe 6 nuk do të zbatohen në rastet e mallrave me akcizë të pezulluar ose mallrat

që i nënshtrohen formaliteteve të eksportit me qëllim rimbursimin, që jepet për eksport në kuadër të masave të politikave bujqësore.

9. Ku një njoftim reksporti duhet të depozitohet në përputhje me pikën 1, të nenin 246, të Kodit, zyra doganore e daljes është zyra doganore kompetente për vendin ku mallrat janë në zonën e lirë apo në magazinim të përkohshëm.

Neni 699

Komunikimi ndërmjet zyrave doganore të eksportit dhe daljes

(Pika 1, e nenit 239, të Kodit)

Përveç rasteve kur deklarata doganore merr formën e hyrjes në regjistrimet e deklaruesit në përputhje me nenin 165, të Kodit, për çlirimin e mallrave, zyra doganore e eksportit, transmeton informacionet e deklarates së eksportit në zyrën doganore të daljes. Këto të dhëna do të bazohen në të dhënat që rrjedhin nga deklarata e eksportit, me ndryshime sipas rastit.

Neni 700

Mjetet për shkëmbimin dhe ruajtjen e informacionit për daljen e mallrave

(Neni 17, i Kodit)

Deri në datën e implementimit të sistemit të informatizuar sipas Planit të Punës së ministrit përgjegjës për financat, autoritetet doganore mund të lejojnë përdorimin e mjeteve të tjera të ndryshme nga teknika elektronike e përpunimit të të dhënave për shkëmbimin dhe ruajtjen e informacionit që ka të bëjë në daljen e mallrave jashtë territorit doganor të Republikës së Shqipërisë.

Neni 701

Mjetet për shkëmbimin e informacionit në rastet e paraqitjes së mallrave në zyrën doganore të daljes

(Shkronja “a”, e pikës 3, të nenit 17, të Kodit)

Kur mallrat janë paraqitur në zyrën doganore të daljes në përputhje me pikën 2, të nenit 239, të Kodit, përveç teknikave informatike të përpunimit të të dhënave për shkëmbimin e informacionit, mund të përdoren mjete të tjera për:

- a) identifikimin e deklarates së eksportit;
- b) komunikimet në lidhje me mospërputhjet mes mallrave të deklaruar dhe të çliuara për eksport dhe mallrave të paraqitura.

Neni 702

Paraqitja e mallrave në zyrën doganore të daljes

(Neni 239 i Kodit)

(Shtuar pika 3 me VKM nr. 872, datë 30.12.2024)

1. Personi që paraqet mallrat në dalje, në momentin e paraqitjes së mallrave në zyrën doganore të daljes, duhet:

- a) të tregojë MRN e deklarates të eksportit apo rieksporit
- b) të tregojë mospërputhjet midis mallrave të deklaruar dhe çliuara për eksport dhe atyre të paraqitura, duke përfshirë edhe rastet kur mallrat janë ripaketuar apo shkarkuar dhe ringarkuar në kontejner ,para paraqitjes të tyre në zyrën doganore të daljes;
- c) të tregojë gjithashtu dhe sasinë aktuale të mallrave, kur vetëm një pjesë e mallrave mbulohet nga një deklaratë eksporti apo rieksporti

Megjithatë, kur këto mallra janë paraqitur në koli ose kontejner, njofton për numrin e kolive dhe kur është rasti numrin identifikues të kontejnerit.

2. Mallrat e deklaruar për eksport apo riekспорт mund të paraqiten në një zyrë tjetër doganore të daljes, përveç asaj që deklarohet në deklaratën e eksportit apo riekспортit.

3. Kur mallrat e transportuara me instalime fikse të transportit nxirren nga territori doganor i Republikës së Shqipërisë nëpërmjet këtij instalimi, këto mallra konsiderohen të paraqitura në doganë, kur vendosen në instalimin fiks të transportit.

Neni 703

Formalitetet për daljen e mallrave

(Neni 239 i Kodit)

(Ndryshuar paragrafi i dytë i pikës 5 me VKM nr. 872, datë 30.12.2024)

1. Kur mallrat që do të dalin jashtë territorit doganor të Republikës së Shqipërisë i nënshtrohen kontrolleve doganore, zyra doganore e daljes kontrollon mallrat në bazë të informacionit të marrë nga zyra doganore e eksportit.

2. Kur personi që paraqet mallrat informon, ose zyra doganore e daljes konstaton, se disa nga mallrat e deklaruar për eksport apo riekспорт ose përpunim pasiv mungojnë në momentin e paraqitjes në zyrën doganore të daljes, kjo zyrë doganore informon zyrën doganore të eksportit për mallrat që mungojnë.

3. Kur personi që paraqet mallrat informon, ose zyra doganore e daljes konstaton, se disa nga mallrat e paraqitura në zyrën doganore të daljes janë në sasi më të mëdha se ato të deklaruar për eksport, riekспорт ose regjim të përpunimit pasiv, kjo zyrë doganore refuzon daljen e mallrave deri sa për këto mallra të paraqitet një deklaratë eksporti ose riekспортit. Kjo deklaratë eksporti apo riekспортit mund të paraqitet në zyrën doganore të daljes.

4. Kur personi që paraqet mallrat informon, ose zyra e doganave e daljes konstaton, se ka një mospërputhje në natyrën e mallrave të deklaruar për eksport, riekспорт ose regjim të përpunimit pasiv në krahasim me ato të paraqitura në zyrën doganore të daljes, zyra doganore e daljes refuzon daljen e këtyre mallrave deri sa një deklaratë eksporti apo riekспортit paraqitet për to dhe informon zyrën doganore të eksportit. Kjo deklarate eksporti apo riekспортit mund të paraqitet në zyrën doganore të daljes.

5. Transportuesi do të njoftojë për daljen e mallrave në zyrën doganore të daljes, duke ofruar të gjithë informacionin e mëposhtëm:

a) Numrin unik të ngarkesës ose numrin e referencës të dokumentit të transportit,

b) Kur mallrat janë paraqitur në koli ose kontejner, numrin e kolive dhe kur është rasti numrat identifikues të kontejnerëve ;

c) MRN e deklaratës të eksportit apo riekспортit kur është rasti.

Detyrimi i përcaktuar në nënparagrafin e parë nuk zbatohet për sa kohë që ky informacion është në dispozicion të autoriteteve doganore nëpërmjet sistemeve ekzistuese të informacionit tregtar, portual ose të transportit ose në situatën e mbuluar nga pika 7, e nenit 698.

6. Për qëllime të pikës 5, personi që dorëzon mallrat tek transportuesi i siguron këtij të fundit të dhënat e përmendura në atë pikë.

Transportuesi mund të ngarkojë mallra për transport në dalje nga territori doganor i Republikës së Shqipërisë, kur disponon të dhënat e përmendura në pikën 5.

Neni 704

Mbikëqyrja e mallrave të çliruara për dalje dhe shkëmbimi i informacionit midis zyrave doganore

(Neni 239 i Kodit)

1. Sapo të jenë çliruar mallrat për dalje, zyra doganore e daljes do t'i mbikëqyrë ato deri sa ato të kenë dalë jashtë territorit doganor të Republikës së Shqipërisë.

2. Kur zyra doganore e daljes dhe eksportit janë të ndryshme, zyra doganore e daljes njofton zyrën doganore të eksportit për daljen e mallrave jo më vonë se në ditën e punës pas ditës kur mallrat kanë lënë territorin doganor të Republikës së Shqipërisë.

Megjithatë, në rastet e referuara në pikat 3 deri 7 të nenit 698, afati kohor që zyra doganore e daljes të njoftojë zyrën doganore të eksportit për daljen e mallrave do të jetë si vijon:

a) në rastet e përmendura në pikat 3 dhe 4, të nenit 698, jo më vonë se në ditën e punës nga dita në të cilën anija apo avioni në të cilin mallrat janë ngarkuar ka lënë portin ose aeroportin e ngarkimit;

b) në rastet e përmendura në pikën 5, të nenit 698, jo më vonë se në ditën e punës pas ditës kur mallrat janë vendosur nën regjimin e transitit të jashtëm;

c) në rastet e përmendura në pikën 6, të nenit 698, jo më vonë se në ditën e punës pas ditës kur procedura e transitit është mbyllur;

ç) në rastet e përmendura në pikën 7, të nenit 698, jo më vonë se në ditën e punës pas ditës kur mallrat janë marrë përsipër nga një kontratë e vetme transporti.

3. Ku zyra doganore e daljes dhe eksportit janë të ndryshme dhe dalja e mallrave është refuzuar, zyra doganore e daljes informon zyrën doganore të eksportit jo më vonë se në ditën e punës pasi dalja e mallrave është refuzuar.

4. Në rrethana të paparashikuara, nëse mallrat e mbuluara nga një deklaratë eksporti apo rieksperti janë transferuar në një zyrë doganore dalje dhe në vijim do të lënë territorin doganor të Republikës së Shqipërisë nga më shumë se një zyrë doganore dalje, çdo zyrë doganore dalje, ku mallrat janë paraqitur do ta mbikëqyrë daljen e mallrave të cilat duhet të lënë territorin doganor të Republikës së Shqipërisë. Zyra doganore e daljes informon zyrën doganore të eksportit për daljen e mallrave nën mbikëqyrjen e tyre.

5. Nëse mallrat e mbuluara nga një deklaratë eksporti apo rieksperti janë transferuar në një zyrë doganore dalje dhe në vijim, lënë territorin doganor të Republikës së Shqipërisë në më shumë se një dërgesë, për shkak të rrethanave të paparashikuara, zyra doganore e daljes informon zyrën doganore të eksportit për daljen e çdo dërgese.

6. Kur mallrat janë larguar nga territori doganor i Republikës së Shqipërisë në rastin e përmendur në pikën 7, të nenit 698, transportuesi me kërkesë nga autoritetet kompetente doganore në pikën e daljes siguron informacion në lidhje me ato mallra.

Ky informacion do të konsistojë në një nga të mëposhtmet:

a) MRN të deklaratës së eksportit;

b) një kopje të kontratës së vetme të transportit për mallrat përkatës;

c) numrin unik të ngarkesës apo numri referencë i dokumentit të transportit dhe kur mallrat janë paraqitur në koli ose kontejner, numri i kolive dhe kur është rast numri identifikues i kontejnerit.

7. Duke anashkaluar shkronjën “c”, të pikës 2, të këtij neni, deri në implementimin e sistemit të informatizuar të eksportit sipas Planit të punës të miratuar nga ministri përgjegjës për financat, në rastet e përmendura në pikën 6, të nenit 698, afati kohor që zyra doganore e daljes të lajmërojë zyrën doganore të eksportit për daljen e mallrave do të jetë dita e parë e punës pas ditës kur mallrat janë vendosur në regjimin e transitit ose mallrat dalin nga territori doganor i Republikës së Shqipërisë apo regjimi i transitit është mbyllur.

8. Duke anashkaluar pikën 4, të këtij neni, deri në implementimin e sistemit të informatizuar të eksportit sipas Planit të punës, të miratuar nga ministri i përgjegjës për financat, zyra doganore e daljes ku ngarkesa u paraqit fillimisht mbledh rezultatet e daljes nga zyrat e tjera doganore të daljes dhe informon zyrën doganore të eksportit për daljen e mallrave. Ato e bëjnë këtë vetëm kur të gjitha mallrat

janë larguar nga territori doganor i Republikës së Shqipërisë.

9. Duke anashkaluar pikën 5 të këtij neni, deri në implementimin e sistemit të informatizuar të eksportit sipas Planit të punës, të miratuar nga ministri i përgjegjës për financat, kur mallrat e mbuluara nga një deklaratë eksporti apo riekspori janë transferuar në një zyrë doganore të daljes dhe në vijim dalin nga territori doganor i Republikës së Shqipërisë në më shumë se një dërgesë për shkak të rrethanave të paparashikuara, zyra doganore e daljes informon zyrën doganore të eksportit për daljen e mallrave vetëm kur të gjitha mallrat janë larguar nga territori doganor i Republikës së Shqipërisë.

Neni 705

Vërtetimi i daljes së mallrave

(Neni 239 i Kodit)

1. Zyra doganore e eksportit i vërteton daljen e mallrave deklaruesit ose eksportuesit në rastet e mëposhtme:

- a) kur kjo zyrë është informuar për daljen e mallrave nga zyra doganore e daljes;
- b) kur kjo zyrë është e njëjtë me zyrën doganore të daljes dhe mallrat kanë dalë;
- c) nëse zyra në fjalë vlerëson se provat e siguruara në përputhje me pikën 4, të nenit 707, janë të mjaftueshme.

2. Ku zyra doganore e eksportit ka vërtetuar daljen e mallrave në përputhje me shkronjën “c”, të pikës 1, ajo informon zyrën doganore të daljes.

Neni 706

Mjetet për dhënien e provës që mallrat janë larguar nga territori doganor i Republikës së Shqipërisë

(Shkronja “a”, e pikës 3, të nenit 17, të Kodit)

Me qëllim vërtetimin e daljes së mallrave, prova se mallrat janë larguar nga territori doganor i Republikës së Shqipërisë mund t’i sigurohet zyrës doganore të eksportit duke përdorur mënyra të tjera nga teknikat informatike të përpunimit të të dhënave.

Neni 707

Procedura hetimore

(Neni 239 i Kodit)

1. Nëse pas 90 ditëve nga çlirimi i mallrave për eksport, zyra doganore e eksportit nuk është njoftuar për daljen e mallrave, ajo mund t’i kërkojë deklaruesit t’i informojë datën kur kanë dalë mallrat dhe zyrën doganore të daljes nga e cila mallrat kanë lënë territorin doganor të Republikës së Shqipërisë.

2. Deklaruesi me iniciativë, mund të njoftojë datën kur kanë dalë mallrat dhe zyrën doganore të daljes nga e cila mallrat kanë lënë territorin doganor të Republikës së Shqipërisë.

3. Kur deklaruesi informon në zyrën doganore të eksportit në përputhje me pikat 1 ose 2, mund t’i kërkojë zyrës doganore të eksportit të vërtetojë daljen. Për këtë qëllim, zyra doganore e eksportit kërkon informacion për daljen e mallrave nga zyra doganore e daljes, e cila do të përgjigjet brenda 10 ditëve.

Kur zyra doganore e daljes nuk përgjigjet brenda kësaj kohe, zyra doganore e eksportit informon deklaruesin.

4. Kur zyra doganore e eksportit njofton deklaruesin që zyra doganore e daljes nuk jep përgjigje brenda afatit kohor të përcaktuar në pikën 3, deklaruesi mund të paraqesë në zyrën doganore të eksportit provat se mallrat kanë lënë territorin doganor të Republikës së Shqipërisë.

Provat mund të ofrohen, në veçanti, përmes njërit prej këtyre instrumenteve apo një kombinim të

tyre, të vërtetuara nga autoritetet doganore të një shteti tjetër:

- a) Një kopje të fletëngarkesës të nënshkruar ose verifikuar nga pritësi jashtë territorit doganor të Republikës së Shqipërisë;
- b) Dëshminë e pagesës;
- c) Fatura;
- ç) Fletë ngarkesa/dërgesa;
- d) Një dokument i nënshkruar ose vërtetuar nga operatori ekonomik që ka nxjerrë mallrat nga territori doganor i Republikës së Shqipërisë;
- dh) Një dokument i lëshuar nga autoritetet doganore të një shteti tjetër në përputhje me rregullat dhe procedurat e zbatuara në atë shtet;
- e) Regjistrimet e operatorëve ekonomik lidhur me mallrat e furnizuara për në anije, avionë ose instalimet në det të hapur.

KREU 3

Eksporti dhe rieksporti

Seksioni 1

Deklarata e eksportit, rieksporit, deklarimi prapaveprues, anulimi

Neni 708

Deklarata e eksportit apo rieksporit për mallrat në disa dërgesa

(Neni 149 i Kodit)

Kur mallrat janë të destinuara të dalin jashtë territorit doganor të Republikës së Shqipërisë në më shumë se një dërgesë, çdo dërgesë individuale do të mbulohet nga një deklaratë e veçantë e eksportit apo rieksporit.

Neni 709

Anulimi i deklaratës doganore ose e deklaratës së rieksporit

(Neni 159 i Kodit)

(Shtuar pika 3 me VKM nr. 872, datë 30.12.2024)

1. Kur ekziston një mospërputhje në natyrën e mallrave të çliuara për eksport, rieksport ose përpunim pasiv në krahasim me ato të paraqitura në zyrën doganore të daljes, atëherë zyra doganore e eksportit anulon deklaratën në fjalë.

2. Kur, pas një periudhe prej 150 ditësh nga data e çlirimit të mallrave për regjimin e eksportit, regjimin e përpunimit pasiv ose të rieksporit, zyra doganore e eksportit nuk ka marrë asnjë informacion për daljen e mallrave si dhe as prova që mallrat janë larguar nga territori doganor i Republikës së Shqipërisë, zyra doganore e eksportit mund ta anulojë deklaratën në fjalë.

3. Kur zyra doganore e eksportit informohet, në përputhje me nenin 714, që mallrat nuk janë nxjerrë nga territori doganor i Republikës së Shqipërisë, ajo anulon menjëherë deklaratën në fjalë dhe, sipas rastit, anulon menjëherë certifikatën përkatëse të daljes së mallrave, në përputhje me nenin 705.

Neni 710

Paraqitja e mëvonshme e një deklarate eksporti apo rieksporti

(Nenet 149 dhe 239 të Kodit)

1. Kur kërkohet një deklarate eksporti apo rieksporti por mallrat kanë dalë nga territori doganor i Republikës së Shqipërisë, pa këtë deklaratë, eksportuesi duhet të paraqesë një deklaratë të mëvonshme eksporti apo rieksporti. Këtë deklaratë e paraqet në zyrën doganore kompetente për

vendin, ku është vendosur eksportuesi. Kjo zyrë doganore provon daljen e mallrave për eksportuesin me kusht që çlirimi do të ishte dhënë nëse deklarata do të ishte paraqitur përpara daljes së mallrave nga territori doganor i Republikës së Shqipërisë dhe se ka prova në dispozicion se mallrat kanë dalë nga territori doganor i Republikës së Shqipërisë.

2. Kur mallrat të cilat ishin të destinuara për riimport janë larguar nga territori doganor i Republikës së Shqipërisë, por nuk kanë më qëllim të riimportohen dhe një lloj tjetër e deklarates doganore do të ishte përdorur nëse nuk ka pasur qëllim të riimportohen, eksportuesi mund të paraqesë një deklaratë eksporti të mëvonshme, duke zëvendësuar deklaratat origjinale, në zyrën doganore të eksportit. Kjo zyrë doganore duhet ti vërtetojë daljen e mallrave eksportuesit.

Megjithatë, kur mallrat shqiptare kanë dalë nga territori doganor i Republikës së Shqipërisë, të mbuluara me një Carnet ATA dhe CPD, zyra doganore e eksportit duhet ti vërtetojë daljen e mallrave eksportuesit me kusht që kuponi (*voucher*) dhe kundërfleta ATA dhe CPD për riimportimin janë anuluar.

Neni 711

Mjetet për depozitimin prapaveprues të një deklarate eksporti ose rieksperti

(Shkronja “a”, e pikës 3, të nenit 17, të Kodit)

Kur është kërkuar një deklaratë eksporti ose rieksperti, por mallrat janë nxjerrë jashtë territorit doganor të Republikës së Shqipërisë, pa një deklaratë të tillë, përveç teknikave informatike të përpunimit të të dhënave mund të përdoren mjete të tjera për shkëmbimin e informacionit për depozitimin prapaveprues të kësaj deklarate eksporti ose rieksperti.

Neni 712

Paraqitje e një deklarate rieksperti për mallrat që mbulohen nga një Carnet ATA dhe CPD

(Pika 2, e nenit 147, të Kodit)

Përveç zyrës doganore të përmendur në nenin pikën 2, të nenit 318, zyra doganore kompetente për riekspertin e mallrave që mbulohet nga një Carnet ATA dhe CPD, do të jetë zyra doganore e daljes.

Neni 713

Përdorimi i një Carneti ATA dhe CPD si deklaratë eksporti

(Neni 149 i Kodit)

1. Një Carnet ATA dhe CPD konsiderohet një deklaratë eksporti kur Carnet është lëshuar në një shtet palë kontraktuese e Konventës ATA apo e Konventës të Stambollit, miratuar dhe garantuar nga një shoqatë e themeluar në Republikën e Shqipërisë, pjesë e një zinxhiri garantues, siç është përcaktuar në shkronjën “d”, të nenit 1, të aneksit A, të Konventës së Stambollit.

2. Carnet ATA dhe CPD nuk do të përdoret si një deklaratë eksporti në lidhje me mallrat shqiptare, kur:

a) ato mallra i nënshtrohen formaliteteve të eksportit me qëllim rimbursimin për eksport në sipas masave të politikave bujqësore;

b) mallrat që kanë qenë pjesë e rezervave për ndërhyrje, i nënshtrohen masave të kontrollit të përdorimit dhe/ose të destinacionit dhe i kanë kaluar formalitetet doganore për eksport në territore jashtë territorit doganor të Republikës së Shqipërisë në kuadër të masave të politikave bujqësore;

c) mallrat përfitojnë nga rimbursimi ose falja e detyrimit të importit, me kusht që ato eksportohen nga territori doganor i Republikës së Shqipërisë;

ç) këto mallra qarkullojnë në regjim pezullimi nga akciza në territorin e Republikës së Shqipërisë, sipas ligjit nr.61/2012, “Për akcizat në Republikën e Shqipërisë”.

3. Kur një Carnet ATA është përdorur si një deklaratë eksporti, zyra doganore e eksportit

kryen formalitetet, si më poshtë:

- a) Verifikon informacionin e dhënë në kutitë A deri në G të kuponit të eksportit të mallrave nën mbulimin e Carnet;
 - b) Plotëson, sipas nevojës, kutinë “certifikuar nga autoritetet doganore” në faqen e parë të Carnet;
 - c) Plotëson kundëriletën dhe kutinë H të kuponit të eksportit;
 - ç) Identifikon zyrën doganore të eksportit në kutinë H (b) të kuponit të riimportimit;
 - d) Mban kuponin e eksportit.
4. Ku zyra doganore e eksportit nuk është zyra doganore e daljes, zyra e doganave e eksportit kryen formalitetet e përmendura në pikën 3, por nuk plotëson kutinë 7 të kundëriletës, e cila plotësohet në zyrën doganore të daljes.
5. Afatet kohore për riimportin e mallrave të përcaktuara nga zyra doganore e eksportit në kutinë (b) të kuponit të eksportit nuk mund të kalojë vlefshmërinë e Carnet.

Neni 714

Mallrat për eksport apo riekспорт që nuk largohen nga territori doganor i Republikës së Shqipërisë (Neni 239 i Kodit)

1. Ku mallrat për eksport apo riekспорт nuk janë më të destinuara të dalin jashtë territorit doganor të Republikës së Shqipërisë, deklaruesi njofton, menjëherë, zyrën doganore të eksportit.
2. Pa rënë ndesh me pikën 1, kur mallrat janë paraqitur në zyrën doganore të daljes, personi që i tërheq këto mallra nga zyra doganore e dalje për ti transportuar në një vend brenda territorit doganor të Republikës së Shqipërisë, informon zyrën doganore të daljes se mallrat nuk do të dalin nga territori doganor i Republikës së Shqipërisë dhe përcakton MRN e deklarates të eksportit apo të riekспортit.
3. Kur, në rastet e përmendura në nenin 698, shkronjat 5, 6 dhe 7, një ndryshim në kontratën e transportit ka si pasojë përfundimin brenda në territorin doganor të Republikës së Shqipërisë të një operacioni transporti, i cili duhet të përfundonte jashtë këtij territori, kompanitë apo shoqëritë në fjalë mund të kryejnë ndryshimin e kontratës me një miratim paraprak të zyrës doganore të daljes.
4. Në rastin e anulimit të deklarates së eksportit apo ri-eksportit në përputhje me nenin 709, zyra doganore e eksportit informon deklaruesit dhe zyrën doganore të daljes për anulimin.

KREU 4

Deklarata përmbledhëse e daljes

Seksioni 1

Depozitimi i deklarates përmbledhëse të daljes

Neni 715

Masat që merren pas depozitimit të deklarates përmbledhëse të daljes (Neni 243 i Kodit)

Zyra doganore e daljes ku është depozituar deklarata përmbledhëse në përputhje me pikën 1, të nenit 243, të Kodit duhet të:

- a) regjistrojë deklaraten përmbledhëse të daljes menjëherë pas marrjes së saj;
- b) japë një MRN deklaruesit;
- c) sipas nevojës, çlirojë mallrat për dalje nga territori doganor i Republikës së Shqipërisë.

Neni 716

Mallra që nuk largohen nga territori doganor i Republikës së Shqipërisë për të cilat është

depozituar një deklaratë përmblledhëse e daljes
(Neni 159 i Kodit)

Kur, mallrat për të cilat një deklaratë përmblledhëse e daljes është paraqitur nuk janë më të destinuara për të dalë nga territori doganor i Republikës së Shqipërisë, personi që i tërheq këto mallra nga zyra doganore e daljes për t'i transportuar në një vend brenda territorit doganor të Republikës së Shqipërisë, informon zyrën doganore të daljes se mallrat nuk do të dalin nga territori doganor i Republikës së Shqipërisë dhe përcakton MRN e deklaratës përmblledhëse të daljes.

KREU 5
Njoftimi i rieksporit

Seksioni 1
Regjistrimi i njoftimit të rieksporit

Neni 717
Masat që do të merren me marrjen e njoftimit të rieksporit
(Neni 246 i Kodit)

Zyra doganore e daljes duhet të:

- a) regjistrojë njoftimin e rieksporit menjëherë pas marrjes së tij;
- b) japë një MRN deklaruesit;
- c) sipas nevojës, çlirojë mallrat për dalje nga territori doganor i Republikës së Shqipërisë.

Neni 718
Mallrat që nuk largohen nga territori doganor i Republikës së Shqipërisë për të cilat është depozituar një njoftim riekspori
(Neni 159 i Kodit)

Kur, mallrat për të cilat një njoftim riekspori është paraqitur nuk janë më të destinuara për dalë nga territori doganor i Republikës së Shqipërisë, personi që i tërheq këto mallra nga zyra doganore e daljes për t'i transportuar në një vend brenda territorit doganor të Republikës së Shqipërisë, informon zyrën doganore të daljes se mallrat nuk do të dalin nga territori doganor i Republikës së Shqipërisë dhe përcakton MRN e njoftimit të rieksporit.

TITULLI IX
DISPOZITA TË TJERA PËR KOMPETENCAT E ADMINISTRATËS DOGANORE

KREU 1
ORARI I FUNKSIONIMIT TË ADMINISTRATËS DOGANORE, SEKUESTRIMI I SKEDARËVE KOMPJUTERIKË, I REGJISTRAVE, BASHKËPUNIMI NDËRINSTITUCIONAL

Seksioni 1
Orari i funksionimit

Neni 719
Orari i funksionimit të zyrave doganore
(neni 9 i Kodit)

(Ndryshuar togfjalësh në pikën 2, shtuar togfjalësh në pikën 3 me VKM nr. 872, datë 30.12.2024)

1. Për qëllime të nenit 9 të Kodit dhe pa cenuar dispozitat në fuqi për orarin ditor të punës

të administratës publike, në parim zyrat doganore, kufitare tokësore e ujore dhe në aeroporte ofrojnë shërbim për të gjitha ditët, duke përfshirë edhe ditët e festave, gjatë gjithë harkut kohor 24 orësh, përmes kryerjes së të gjitha kontrolleve dhe formaliteteve të parashikuara nga Kodi.

2. Orari i punës së zyrave të Administratës Doganore është nga ora 8 deri në orën 16:00 për ditët nga e hëna deri të premtën, duke përjashtuar ditët e festave.

3. Për mbulimin e shërbimeve doganore, duke marrë në konsideratë llojin e trafikut/transportit të mallrave, regjimet doganore nën të cilat vendosen mallrat dhe me qëllim që të mos pengohet dhe të mos vështirësohet trafiku ndërkombëtar i mallrave, Drejtori i Përgjithshëm, ose kryetari i degës mund të caktojë turne pune ose të autorizojë kryerjen e punës nga personeli jashtë orarit normal ditor përmes orëve shtesë.

4. Drejtori i Përgjithshëm, në bashkëpunim me administratat homologe, mund të vendosë një orar pune të ndryshëm ose mund të shkurtojë orarin e mbajtjes hapur të zyrave doganore, kur e kërkojnë nevojat e punës.

Seksioni 2

Sekuestrimi, kontrolli dhe analizimi i dokumentacionit dhe i pajisjeve elektronike, konfidencialiteti

Neni 720

Sekuestrimi i skedarëve kompjuterikë, regjistrave, dokumentacionit tjetër të nevojshëm, tregtar apo fiskal

(Pika 7, e nenit 10, të Kodit)

1. Për qëllime të pikës 7 të nenit 10 të Kodit, autoritetet doganore, në rastet e dyshimeve të arsyeshme për tentativë ose për kryerjen e ndonjë prej shkeljeve të parashikuara nga Kodi, mund të sekuestrojnë dokumente, skedarë kompjuterik ose regjistrat përkatës, kompjuter si dhe çdo dokumentacion tjetër të nevojshëm tregtar apo fiskal (sende/materiale) të ndodhura në ambientet e operatorëve ekonomikë.

2. Autoritetet doganore, për qëllimin e sekuestrimit, duhet të mbajnë një procesverbal në tri kopje, në të cilin shënohen të gjitha sendet/materialet të cilat po sekuestrohen dhe arsyeja se përse po bëhet ky sekuestrim. Procesverbali duhet të nënshkruhet nga punonjësit doganorë, të cilët po kryejnë sekuestrimin dhe nga operatori ekonomik ose përfaqësuesi i tij. Një kopje e këtij procesverbali i dorëzohet operatorit ekonomik ose përfaqësuesit të tij. Dy kopjet e tjera administrohen nga autoritetet doganore.

3. Nëse është e mundur, dokumentet origjinale fotokopjohen dhe kopja e vulosur me vulën e doganës i lihet në administrim operatorit ekonomik. Kjo procedurë duhet të përshkruhet edhe në procesverbal.

4. Në mënyrë që të ruhet integriteti i tyre, sendet/materialet e sipërpërmendura duhet të trajtohen me kujdes duke u vendosur nga punonjësit doganorë që i sekuestrojnë në një dosje ose kuti mbajtëse etj., në të cilën duhet të shënohen qartë:

- a) emri i plotë i operatorit ekonomik të cilit i sekuestrohen sendet/materialet;
- b) emri dhe mbiemri i punonjësve që kanë bërë sekuestrimin;
- c) data dhe vendi i saktë ku u sekuestrua sendi/materiali;
- ç) përshkrimi i përgjithshëm i sendit/materialit të sekuestruar.

5. Dosjet ose kutitë mbajtëse duhet të dërgohen në zyrën doganore mbikëqyrëse, në të cilën punonjësi i autorizuar i inventarizon këto sende /materiale. Para se të transportohet dosja ose kutia, duhet të vuloset me shiritë ngjitës ose të plumboset, për të shmangur heqjen e sendeve /materialeve të sekuestruara. Sendet/materialet e sekuestruara në vende të ndryshme nuk duhet të

vendosen në të njëjtën qese ose kuti.

6. Kur transportohen dhe ruhen sendet/materialet e sekuestruara, duhet të tregohet kujdesi i duhur, sipas llojit të tyre, për të shmangur faktorët mjedisorë, si të nxehtin, të ftohtin dhe lagështirën, të cilat mund të kenë ndikim tek ato.

7. Kompjuterat ose pajisje të tjera elektronike mund të ndryshohen, të fshihen ose të shkatërrohen lehtësisht dhe për sekuestrimin dhe marrjen e tyre duhet të sigurohet që të mos ndryshojë gjendja e pajisjeve elektronike. Kjo do të thotë që nuk duhet të fiket një kompjuter që gjendet në punë dhe që nuk duhet të ndizet një kompjuter ose pajisje elektronike që gjendet e fikur.

8. Përveç mbledhjes së informacionit të përgjithshëm nga personat që janë në vendin që kontrollohet, punonjësit doganorë duhet të përpiqen të marrin edhe informacion specifik mbi sistemet kompjuterike, duke përfshirë:

- a) emrat e të gjithë përdoruesve të kompjuterëve dhe të pajisjeve;
- b) emrat hyrës dhe fjalëkalimet për përdoruesit e kompjuterit dhe të internetit;
- c) emrat hyrës dhe fjalëkalimet e postës elektronike dhe llogarive në internet;
- ç) qëllimin e përdorimit të kompjuterëve dhe të pajisjeve;
- d) ekzistencën e serverave ose serverave në distancë;
- dh) të gjitha fjalëkalimet;
- e) aplikime automatike që janë në përdorim;
- ë) llojet e aksesit në internet;
- f) ofruesin e shërbimit të internetit;
- g) mjetet e ruajtjes së informacionit elektronik që mund të ndodhen diku tjetër;
- gj) dokumentet e programeve kompjuterike të instaluar;
- h) masat e sigurisë që zbatohen për pajisjet;
- i) kufizimet për aksesin ndaj të dhënave;
- j) të gjitha pajisjet ose programet kompjuterike të instaluar që mund të shkatërrojnë informacionin.

9. Për të parandaluar ndryshimin që mund t'u ndodhë dokumenteve digjitale gjatë marrjes së tyre, punonjësi doganor, së pari duhet:

- a) të dokumentojë çdo veprimtari në kompjuter, përbërësit e tij ose në pajisje;
- b) të konfirmojë nëse kompjuteri është i ndezur apo jo.

10. Rekomandohet heqja e menjëhershme e energjisë /burimit të ushqimit kur:

a) informacioni në ekran tregon se po fshihen të dhëna ose se mbi të dhënat e vjetra po shkruhen të dhëna të tjera;

b) ka arsye për të besuar se në pajisjet e ruajtjes së të dhënave të kompjuterit po kryhet një proces shkatërrues.

11. Heqja e kablllos së ushqimit nga kompjuteri do të ruajë informacionin e përdoruesit të fundit dhe kohën kur ai ka pasur akses, dokumentet e përdorura së fundi, si dhe informacione të tjera të vlefshme.

12. Në situatat e mëposhtme, nuk rekomandohet heqja e menjëhershme e kablllos së ushqimit:

- a) Në ekran janë shfaqur të dhëna që duket se kanë vlerë si dokumente;
- b) Ka të dhëna se janë aktive ose në përdorim:
 - i) dhoma *chat-room*;
 - ii) dokumente të hapura;
 - iii) pajisje të lëvizshme të ruajtjes së të dhënave;
 - iv) programe të mesazheve të çastit;
 - v) dokumente financiare;
 - vi) kodimi i të dhënave;
 - vii) veprimtari haptazi të paligjshme.

13. Nëse kompjuteri është i fikur: Për kompjutera tavoline, tover dhe minikompjutera duhet të

ndiqen hapat e mëposhtëm:

- a) Dokumentohet dhe etiketohen të gjitha kabllo dhe pajisjet e tjera të lidhura në kompjuter, si dhe hyrjen përkatëse që zë në kompjuter secili kordon, kablo, telat përcjellës apo USB;
- b) Hiqen dhe ruhen kordoni elektrik nga pas kompjuterit dhe nga ushqyesi në mur ose nga zgjatuesi apo bateria;
- c) Shkëputen dhe ruhen kabllo, telat përcjellës dhe USB nga kompjuteri dhe dokumentohet aparati apo pajisja e lidhur nëpërmjet tyre;
- ç) Mbyllet me shirit ngjitës vendi ku vendoset disketa, nëse ka një të tillë;
- d) Sigurohet që vendi i CD/DVD të jetë i mbyllur, kontrollohet nëse është bosh, ka disk apo nuk është kontrolluar dhe mbyllet me shirit ngjitës, në mënyrë që të mos hapet;
- dh) Sigurohet me shirit ngjitës çelësi i ndezjes / fikjes;
- e) Regjistrohen marka, modeli, numrat serialë dhe çdo shenjë apo identifikim të vendosur nga përdoruesi;
- ë) Inventarizohen kompjuteri dhe të gjithë kordonët, kabllo, telat përcjellës dhe përbërësit.

14. Gjatë transportimit të provave digjitale punonjësi duhet:

- a) të mbajë provat digjitale larg fushave magnetike, si ato të prodhuara nga transmetuesit e radios, magnetet e altoparlantëve dhe dritat e emergjencës, të fiksuara me magnet. Rreze të tjera të mundshme që punonjësi duhet të ketë parasysh janë ngrohësit e sediljeve dhe pajisje apo materiale të tjera që mund të prodhojnë elektricitet statik;
- b) të shmangë mbajtjen e provave digjitale në makinë për periudha të gjata kohe, sepse të nxehtë, të ftohtë dhe lagështira mund të dëmtojnë ose të shkatërrojnë provat digjitale;
- c) të kujdeset që kompjuterat dhe pajisjet digjitale të paketohen dhe të sigurohen gjatë transportimit për të parandaluar dëmtimin nga tronditjet dhe dridhjet;
- ç) të dokumentojë transportimin e provave digjitale dhe të mos shkëpusë zinxhirin e ruajtjes së tyre.

15. Gjatë magazinimit të provave digjitale, punonjësit doganorë duhet:

- a) të sigurohen që provat inventarizohen, në përputhje me rregullat e administratës doganore;
- b) të sigurohen që provat ruhen në një mjedis të sigurt, me kushte të kontrolluara dhe që nuk preket nga temperatura apo lagështia ekstreme;
- c) të sigurohen se provat nuk ekspozohen ndaj fushave magnetike, lagështirës, pluhurit, dridhjeve ose ndonjë faktori që mund t'i dëmtojë ose t'i shkatërrojë.

Neni 721

Kontrolli dhe analizimi i dokumenteve të sekuestruara

(Neni 10, i Kodit)

1. Pas sekuestrimit, çdo kontroll apo verifikim i dokumenteve duhet të kryhet në mënyrë që të shmanget humbja ose përzierja e tyre me të tjera dokumente. Nëse është e nevojshme që të hiqet shiriti vulosës për të lejuar kontrollin, duhet që qesja ose kutia të ri vuloset pas shqyrtimit, si dhe të dokumentohet se cili punonjës verifikoi apo kontrolloi dokumentet.

2. Dokumentet origjinale fotokopjohen ose skanohen dhe në të ardhmen punohet vetëm me kopjet.

Neni 722

Kontrolli dhe analiza e pajisjeve dhe dokumenteve elektronike/digjitale

(Neni 10, i Kodit)

1. Pajisjet dhe dokumentet elektronike duhet të ruhen me kujdes për të shmangur pretendimet se ato janë manipuluar dhe, për këtë qëllim, ato duhet të analizohen vetëm nga persona të trajnuar në mënyrë të posaçme.

2. Punonjësit e përfshirë në analiza dhe kontroll duhet të tregohen të kujdesshëm pasi të dhënat

kompjuterike dhe provat e tjera digjitale janë delikate, prandaj punonjësit e pa trajnuar dhe pa aftësitë e nevojshme nuk duhet të këqyrin përmbajtjen e tyre ose të përpiqen të rikuperojnë informacion. I vetmi veprim që ata mund të kryejnë është të regjistrojnë atë çka është e dukshme në ekran.

Seksioni 3

Kthimi i sendeve

Neni 723

Kthimi i sendeve të sekuestruara dhe konfidencialiteti

(Neni 10, i Kodit)

1. Autoritetet doganore, në përfundim të analizës/ekspertizës që i bëjnë dokumentacionit dhe ose pajisjeve, mjeteve të sekuestruara, i përfshijnë rezultatet në raportin përfundimtar të kontrollit, në funksion të të cilit u krye sekuestrimi, dhe sendet /materiale të sekuestruara i dorëzohen përfaqësuesit të operatorit ekonomik me procesverbal.

2. Të gjitha të dhënat e mbledhura nga autoritetet doganore si rezultat i analizave të sipërpërmendura janë konfidenciale. Çdo punonjës i administratës doganore, që ka akses në këto të dhëna, që është njohur me këto të dhëna gjatë dhe për shkak të kryerjes së detyrave të tij funksionale apo për çfarëdo arsye tjetër, është i detyruar të ruajë konfidencialitetin e tyre përkundrejt çdo personi të tretë.

3. Nëse dokumentacioni dhe/ose pajisjet, mjetet e sekuestruara (sende/materiale) lidhen me një vepër penale dhe mundet të shërbejnë si prova, ato, së bashku me dosjen përkatëse, u dërgohen autoriteteve kompetente proceduese.

KREU 2

BASHKËPUNIMI NDËRINSTITUCIONAL

Seksioni 1

Koordinimi, shkëmbimi i informacionit

Neni 724

Koordinimi i procedurave të kontrollit

(Neni 10, i Kodit)

1. Për qëllime të nenit 10 të Kodit, për të siguruar respektimin e dispozitave ligjore dhe nënligjore, zbatimi i të cilave u është ngarkuar autoriteteve të tjera kompetente, punonjësit e administratës doganore, në bashkëpunim me këto autoritete, mund të kryejnë kontrolle të përbashkëta periodike duke ndërmarrë masat e nevojshme administrative dhe organizative.

2. Rregullat e bashkëpunimit për zbatimin korrekt të dispozitave në lidhje me kontrollet e përbashkëta do të përcaktohen në bazë të marrëveshjeve të përbashkëta ndërinstytucionale.

Neni 725

Shkëmbimi i informacionit

(shkronja “b”, e pikës 11, të nenit 10, të Kodit)

1. Për qëllime të shkronjës “b” të pikës 11, të nenit 10, të Kodit, për zbatimin korrekt të legjislacionit doganor në fuqi, Drejtoria e Përgjithshme e Doganave mbledh informacion duke ja kërkuar këtë shoqërive tregtare, institucioneve të kreditimit, administratës postare ose çdo organizmi publik e privat.

2. Shoqëritë tregtare, Institucionet e kreditimit, administrata postare apo çdo organizëm publik e privat, në përputhje me legjislacionin në fuqi vënë në dispozicion të Drejtorisë së Përgjithshme të

Doganave informacionin dhe/ose dokumentacionin e kërkuara rast pas rasti sipas kërkesës në formën e kërkuar prej saj. Ky informacion në rast se kërkohet i tillë mund të jepet edhe në formën e aksesit në raporte të gatshme informatike periodike. Rregullat e aksesit do të përcaktohen në bazë të marrëveshjeve të përbashkëta.

3. Shkëmbimi i të dhënave të përmendura në pikën 1 të këtij neni, kryhet për arsye verifikimi dhe hetimi në lidhje me import-eksportin e mallrave, për arsye të verifikimeve të deklarimeve dhe informacioneve të dhëna lidhur me regjimet e posaçme, operacionet e privileguara ose për arsye të verifikimeve të deklarimeve dhe informacioneve të dhëna nga vetë operatorët ekonomikë për të përfituar thjeshtësi dhe lehtësi doganore.

4. Të dhënat e shkëmbyera sipas këtij neni janë konfidenciale dhe trajtohen si të tilla.

Neni 726

Aksesi në bazën e të dhënave të administratave të tjera

(Shkronja “dh”, e pikës 11, të nenit 10, të Kodit)

1. Për qëllime të shkronjës “dh”, të pikës 11, të nenit 10, të Kodit, dhe në përputhje me legjislacionin në fuqi, autoritetet doganore autorizohen të kenë akses në bazat e të dhënave të administratave të tjera, përkatësisht:

a) në bazën e të dhënave të personave që hyjnë dhe dalin në/dhe nga territori i Republikës së Shqipërisë;

b) në bazën e të dhënave të deklarimit të kapitaleve dhe llogarive bankare, për efekt hetimi;

c) në bazën e të dhënave të precedentëve policorë;

ç) në bazën e të dhënave të automjeteve të vjedhura.

2. Autoriteteve doganore u mundësohet akses në kohë reale në bazën e të dhënave, në raportet e krijuara paraprakisht apo përmes ndërveprimit të sistemeve si mënyrë komunikimi dhe shkëmbimi të dhënash, sipas nevojave të autoritetit doganor. Aksesi do të jetë vetëm në cilësinë e leximit dhe printimit pa pasur mundësi për të shtuar apo pakësuar të dhënat. Modalitet teknike për mundësimin e aksesit përcaktohen në marrëveshjet e bashkëpunimit të lidhura për këtë qëllim.

3. Shkëmbimi i të dhënave sipas pikës 1 të këtij neni, kryhet për arsye verifikimi dhe hetimi në lidhje me import-eksportin e mallrave, për arsye të verifikimeve të deklarimeve dhe informacioneve të dhëna lidhur me regjimet e posaçme, operacionet e privileguara ose për arsye të verifikimeve të deklarimeve dhe informacioneve të dhëna nga vetë operatorët ekonomikë për të përfituar thjeshtësi dhe lehtësi doganore.

4. Të dhënat e shkëmbyera sipas këtij neni janë konfidenciale dhe trajtohen si të tilla.

Neni 726/1

Modalitetet për bashkëpunimin, ndërmjet autoriteteve doganore dhe autoriteteve të tjera publike ose private, me qëllim vjeljen e borxhit doganor (nenet 10 dhe 280, të Kodit)

(Shtuar me VKM nr. 872, datë 30.12.2024)

Të gjitha institucionet e administratës shtetërore dhe subjektet private, sipas fushës së tyre të përgjegjësisë, detyrave funksionale dhe akteve ligjore në fuqi, ofrojnë bashkëpunim në çdo moment, kur i kërkohet nga autoritetet doganore, me qëllim vjeljen e borxhit doganor.

Në këto raste, dispozitat e vendimit nr. 867, datë 10.12.2014, të Këshillit të Ministrave, “Për procedurat e bashkëpunimit në institucionet e administratës shtetërore”, të ndryshuar, zbatohen *mutatis mutandis*.

TITULLI IX DISPOZITAT E FUNDIT

KREU 1

Vlefshmëria e vendimeve, autorizimeve dhe rivlerësimi i autorizimeve

Neni 727

Rivlerësimi i autorizimeve në fuqi

1. Autorizimet e dhëna para datës 1 qershor 2017, të cilat janë të vlefshme datën që fillon zbatimi i Kodit dhe që nuk kanë një periudhë të kufizuar vlefshmërie, duhet të rivlerësohen.

Vendimet për rivlerësimin e një autorizimi në përputhje me paragrafin e parë duhet të merren përpara datës 1 maj 2020. Këto vendime revokojnë autorizimet objekt rivlerësimi dhe, sipas nevojës, jepen autorizime të reja. Vendimet i komunikohen, pa vonesë, mbajtësit të autorizimit.

2. Duke anashkaluar pikën 1, nuk janë objekt rivlerësimi autorizimet:

a) e eksportuesve për të bërë deklarata faturë /deklarata origjine, siç referohet në legjislacionin në fuqi;

b) për administrimin e materialeve duke përdorur metodën e ndarjes kontabile më vete, siç referohet në legjislacionin në fuqi.

Neni 728

Vlefshmëria e autorizimeve në fuqi

1. Autorizimet e dhëna para datës 1 qershor 2017, që janë të vlefshme datën që fillon zbatimi i Kodit, vazhdojnë të mbeten në fuqi sipas përcaktimeve në vijim:

a) për autorizimet që kanë një afat të kufizuar vlefshmërie, deri në fund të kësaj periudhe ose më 1 maj 2020;

b) për të gjitha autorizimet e tjera, deri sa autorizimi të jetë rivlerësuar në përputhje me pikën 1, të nenit 727.

2. Duke anashkaluar pikën 1, autorizimet e referuara në shkronjat “a” dhe “b”, të pikës 2, të nenit 727, mbeten të vlefshme deri sa të tërhiqen nga autoritetet kompetente që i kanë dhënë ato.

3. Kur autorizimet e përmendura në pikat 1 dhe 2 përmbajnë referenca të ligjit nr.8449, datë 27.1.1999, “Kodi doganor i R.SH”, ose vendimi nr. 205, datë 13.4.1999, të Këshillit të Ministrave, “Për miratimin e dispozitave zbatuese të Kodit Doganor”, të ndryshuar, ato duhet të lexohen në përputhje me tabelën e aneksit 90, të shtojcës A, bashkëlidhur këtij vendimi dhe pjesë përbërëse e tij.

Neni 729

Vlefshmëria e vendimeve për informacionin detyrues në fuqi

Vendimet lidhur me informacionin detyrues të miratuara para datës 1 qershor 2017 vazhdojnë të mbeten në fuqi deri në përfundim të periudhës së përcaktuar në këto vendime.

Neni 730

Përdorimi i autorizimeve dhe vendimeve në fuqi

Nëse një vendim apo një autorizim, në përputhje me nenet 728 dhe 729, mbetet i vlefshëm pas ditës që fillon zbatimi i Kodit, kushtet e përcaktuara në atë vendim ose autorizim duhet të jenë sipas Kodit dhe këtij vendimi, siç përcaktohet në tabelën e përputhshmërisë së referuar në aneksin 90, të shtojcës A, bashkëlidhur këtij vendimi dhe pjesë përbërëse e tij.

Neni 731

**Dispozita kalimtare lidhur me aplikimet për autorizime të paraqitura përpara
1 Qershorit 2017**

Autoritetet doganore kompetente për marrjen e vendimit mund të japin autorizime në përputhje me Kodin dhe këtë vendim, për aplikime të paraqitura përpara datës 1 qershor 2017. Megjithatë, këto autorizime nuk do të jenë të vlefshme përpara datës 1 qershor 2017.

Neni 732

Dispozitat kalimtare për përdorimin e plumbçeve

Plumbçet doganore mund të vazhdojnë të përdoren derisa rezervat të mbarojnë ose deri më 1 maj 2021.

Neni 733

Dispozita kalimtare lidhur me vlerën e transaksionit

1. Vlera e transaksionit të mallrave mund të përcaktohet në bazë të një shitjeje që ndodh para shitjes referuar në pikën 1, të nenit 149, kur personi në emër të të cilit është paraqitur deklarata doganore është i lidhur me një kontratë të përfunduar para datës 18 janar 2017.

2. Ky nen zbatohet deri më 31 dhjetor 2018.

Neni 734

Dispozitat kalimtare lidhur me çlirimin e mallrave

Kur mallrat janë deklaruar për çlirim për qarkullim të lirë, magazinim doganor, përpunim aktiv, përpunim nën kontroll doganor, import i përkohshëm, transit, eksport ose përpunim pasiv përpara datës 1 qershorit 2017, në përputhje me kërkesat e ligjit nr. 8449, datë 27.1.1999, “Kodi doganor i R.SH”, dhe nuk janë çliruar deri në atë datë, ato do të çlirohen për regjimin e përcaktuar në deklaratë në përputhje me dispozitat përkatëse të Kodit dhe të këtij vendimi.

Neni 735

**Dispozita kalimtare për mallrat e vendosura nën disa regjime doganore të caktuara, të cilat
nuk janë mbyllur përpara datës 1 qershor 2017**

1. Kur mallrat janë vendosur nën regjimet doganore të mëposhtme përpara datës 1 qershor 2017 dhe regjimi në fjalë nuk është mbyllur para kësaj date, regjimi do të përfundojë në përputhje me dispozitat përkatëse të Kodit dhe këtij vendimi:

a) çlirimi i mallrave për qarkullim të lirë me një trajtim tarifor favorizues ose me detyrime të tyre të reduktuara ose zero, për shkak të përdorimit final;

b) magazinimi doganor të tipit A, B, C, D, E dhe F;

c) regjimi i përpunimit aktiv në formën e sistemit me pezullim;

ç) përpunimi nën kontroll doganor.

2. Kur mallrat janë vendosur nën regjimet doganore të mëposhtme përpara datës 1 qershor 2017 dhe regjimi në fjalë nuk është mbyllur para kësaj date, regjimi do të përfundojë në përputhje me dispozitat përkatëse të ligjit nr.8449, datë 27.1.1999, “Kodi doganor i R.SH”, dhe vendimit nr.205, datë 13.4.1999, të Këshillit të Ministrave:

a) magazinimi doganor të tipit D;

b) importi i përkohshëm;

c) regjim i përpunimit aktiv në formën e sistemit me rimbursim;

ç) përpunimi pasiv.

Megjithatë, nga data 1 janar 2020, regjimi i magazinimit doganor të tipit D do të mbyllet në përputhje me dispozitat përkatëse të Kodit dhe të këtij vendimi.

3. Në përputhje me shkronjën “a” të pikës 1, të nenit 728, mallrat në një zonë të lirë apo në një magazinë të lirë vijojnë të trajtohen në përputhje me dispozitat përkatëse të ligjit nr.8449, datë 27.1.1999, “Kodi doganor i R.SH”, dhe vendimit nr.205, datë 13.4.1999, të Këshillit të Ministrave, deri më 1 maj 2020. Për shkeljet që konstatohen, do të konsiderohet se mallrat janë nën regjimin e magazinimit doganor.

4. Kur mallrat janë çliruar për një operacion transit përpara datës 1 qershor 2017 dhe operacioni në fjalë nuk është mbyllur deri në atë datë, transiti do të mbyllet në përputhje me dispozitat përkatëse të ligjit nr. 8449, datë 27.1.1999, “Kodi doganor i R.SH”, dhe vendimit nr. 205, datë 13.4.1999, të Këshillit të Ministrave.

Neni 736

Dispozitë kalimtare për shkeljet doganore të kryera para datës 1 qershor 2017

Pas hyrjes në fuqi të këtij vendimi, për shkeljet doganore të kryera para datës 1 qershor 2017, por që konstatimi është kryer pas kësaj date:

- në përcaktimin e llojit dhe masës së shkeljes do jetë i aplikueshëm ligji që ka qenë në fuqi në momentin e kryerjes së shkeljes doganore;
- procedurat e verifikimit dhe ankimimit të shkeljeve doganore, do të zbatohen sipas kreut IV, dhe V, të titullit IX, të Kodit.

Neni 737

Akte nënligjore

1. Drejtori i Përgjithshëm i Doganave, mbështetur në parimet e përcaktuara në Kod, miraton udhëzime, rregullore apo manuale udhëzuese etj., për zbatimin në praktikë apo në sistemin kompjuterik/elektronik doganor të këtij vendimi.

2. Aktet e nivelit të tretë që rregullojnë elementët procedurale, të dala në zbatim të ligjit nr. 8449, datë 27.1.1999, “Kodi doganor i R.SH”, dhe vendimit nr. 205, datë 13.4.1999, të Këshillit të Ministrave, do të vijojnë të zbatohen për aq sa nuk bien ndesh me përcaktimet e Kodit dhe të këtij vendimi, deri në shfuqizimin e tyre në mënyrë nominative.

Neni 738

Shfuqizime

Vendimi nr.205, datë 13.4.1999, i Këshillit të Ministrave, “Për miratimin e dispozitave zbatuese të Kodit Doganor”, i ndryshuar dhe vendimi nr.919, datë 29.12.2014, të Këshillit të Ministrave, “Për miratimin e dispozitave zbatuese të ligjit nr.102/2014, “Kodi Doganor i Republikës së Shqipërisë”, të ndryshuar, shfuqizohen.

Neni 739

Institucionet zbatuese

Ngarkohen ministria përgjegjëse për financat dhe Drejtoria e Përgjithshme e Doganave për zbatimin e këtij vendimi.

Neni 740

Hyrja në fuqi

Ky vendim hyn në fuqi pas botimit në Fletoren Zyrtare dhe i shtrin efektet 15 ditë pas hyrjes në fuqi të

tij.

KRYEMINISTRI
Edi Rama